





h

48. d. 18.

14-8.A.24

48

48

48  
d.  
18

1: 11: 01:

**Ex Bibliotheca  
majori Coll. Rom.  
Societ. Jesu**





PARISIIS  
Apud Georgium Tasse via Jacobæa sub  
signo Coronæ spinæ ANNO M.D.C.LXX.



I D E A

PHILOSOPHIÆ

V N I V E R S A L I S

S E V

METAPHYSICA,

Paucis multa complectens de ra-  
tionibus vniuersalibus  
rerum.

*Pars secunda vniuersæ Philosophiæ.*

Auctore,

D. PETRO A SANCTO IOSEPH  
Fulienfi.



P A R I S I I S,

Apud GEORGIVM IOSSE, viâ Iacobæâ,  
sub signo Coronæ Spineæ.

---

M. DC. LIV.

*Cum Priuilegio, & Approbatione.*

2000.11.15



## MONITIO.



**E**T si hæc pars secundum magis consuetum docendi morem post Physicam tradi soleat, eaque maximè ratione Metaphysica appelletur, placeat tamen secundum locum inter partes Philosophiæ nostræ illi tribuere, tum quia cum fusc tractet quæ breuiter in Logica de vniuersalibus & categoriis perstricta sunt, connexio materiarum vetat ne ad finem cursus reiiciatur. Tum quia cum multa tradat de ente, de substantia, & de accidente in genere, vel eo titulo præmittenda fuit Physicæ quæ passim in tractationibus rerum naturalium notiones illas vniuersales supponit. Aliunde verò cum opus non sit hoc loco repetere quæ de Deo & Angelis in Idea Theologiæ speculatiuæ à nobis iamdiu tractata sunt, nullum ex hoc capite nobis onus incumbit iis morem gerendi qui ideo Physicam Metaphysicæ præmittunt quia per rerum terrenarum & visibilium disquisitionem veluti manu ducimur ad aliqualem rerum coele-

*Metaph.*

a. iij.

rium & inuisibilem notitiam & amorem.

Hæc ergo sit secunda pars totius nostræ Philosophiæ in tres libros distribuenda, quorum primo agatur de vniuersalibus tam in genere quam in specie, simulque patefiet quam inutilis sit labor quem fere omnes Philosophi impendunt in compingendo vniuersali siue à parte rei, siue per mentem. Secundò de ente per se spectato, vbi nonnulla satis difficilia de conceptu & analogia entis, de essentia & existentia, de gradibus essentialibus rerum, de principio indiuiduationis, aliisque eo spectantibus exponuntur. Tertio de generalioribus membris entis, nempe substantia & accidente & consequenter de qualitate, de habitibus, de relatione, aliisque entibus prædicamentalibus quæ ad Metaphysicam abstractionem spectare videntur.



# ERRATA.

*Pag. 4. lin. 27. lege & pictus, p. 11. l. 10. l. vni-*  
*tatem, veritatem, p. 18. l. 5. l. intrinsecæ, p. 32. l. 23.*  
*l. refellitur, p. 34. l. 4. l. propriam, p. 41. l. 8. l.*  
*concurrens, p. 48. l. 25. l. sit, p. 57. l. 3. l. genere ita-*  
*te, & lin. sequenti, æquo, p. 80. l. 24. l. inferiora,*  
*& lin. 30. l. distinctas, p. 81. in titulo lege, an, p. 82.*  
*l. 23. l. differentia, p. 104. l. 30. l. exploratum, p.*  
*126. l. 25. l. prædicata, p. 131. l. 28. l. eas, p. 141. l. 3.*  
*l. saltem, p. 163. l. 4. l. idque, p. 173. l. 16. l. non*  
*comperit, p. 180. l. 9. l. odibilitatem, p. 208. l. 11.*  
*l. quia, p. 238. l. 1. l. putamus, p. 278. l. 9. l. lumi-*  
*ne, p. 289. l. 9. l. subsistentiæ, p. 316. l. 1. l. sup-*  
*pleatur, p. 331. l. 21. l. aliis, p. 348. l. 25. l. sedes, p.*  
*352. l. 32. l. accedat, p. 359. l. 11. l. requiri, p. 376.*  
*l. 28. l. intellectiuos, p. 377. l. 13. l. ipse, p. 379.*  
*l. 7. l. eubuliam, p. 398. l. 11. l. qua, p. 418. l. 31. l.*  
*conseruant, p. 428. l. 10. l. adhuc, p. 443. & l.*  
*30. l. docent.*



# I N D E X

## LIBRORVM , CAPITVM, ET ARTICVLORVM.

### P R Æ F A T I O.

De ipsa Metaphysica secundum se.

## L I B E R I.

### De Vniuersali.

#### C A P. I. De Vniuersali à parte rei.

AR. I.	<b>Q</b> uid vulgò Philosophi intelligant nomine vniuersalis.	25
II.	Refellitur primus modus sententia statuentis vniuersalia à parte rei.	28
III.	Refellitur secundus modus dicendi eiusdè sententia.	30
IV.	Soluantur nonnulla obiectiones.	33
V.	Refellitur tertius modus dicendi prædicta sententia.	36
	C A P. II. De vniuersali per mentis operam.	

AR. I.	<b>P</b> rimus modus sentiendi excluditur.	39
II.	Alius dicendi modus impugnatur.	42
III.	Tertius modus dicendi exploditur.	47
IV.	Soluantur nonnulla obiectiones.	51
V.	De nonnullis proprietatibus vniuersali.	54

#### C A P. III. De Genere.

AR. I.	<b>Q</b> uidnam sit definitum in definitione generis.	56
II.	De genere prædicta definitionis.	59
III.	Angustus necessario requirat plures species.	62
IV.	Quomodo genus se habeat ad species, & ad indiuidua, de quibus predicatur.	65



## CAP. ET ART.

## CAP. IV. De Specie &amp; individuo.

- AR. I.** *AN Species rectè definiatur, Id quod subiicitur generi, & de quo genus prædicatur in quid.* 69
- II.** *An species infima rectè definiatur, Quæ de multis numero differentibus prædicatur in quid.* 73
- III.** *An rectè assignata sint speciesi habitudines seu respectus.* 78
- IV.** *An possit abstrahi communis & univoca ratio individui ab omnibus individui.* 81

## CAP. V. De Differentia.

- AR. I.** *AN dentur differentia infima & simplices.* 86
- II.** *An differentia inferior superiorem formaliter continent.*
- III.** *An genus sit extra conceptum differentia, & differentia extra conceptum generis.* 92
- IV.** *Quo sensu genus sumatur à materia, & differentia à forma.* 95

## CAP. VI. De Proprio &amp; accidente.

- AR. I.** *DVA proprij definitiones expenduntur.* 97
- II.** *DVA accidentis definitiones declarantur.* 101

## LIBER II.

## De Ente secundum se.

## CAP. I. De Conceptu &amp; Analogia Entis.

- AR. I.** *DE duplici acceptione entis.* 105
- II.** *De prædicabilitate entis.* 107
- III.** *De conceptu entis* 111
- IV.** *De Analogia entis.* 117

## CAP. II. De essentia, gradibusque rerum essentialibus.

- AR. I.** *DE essentia rerum.* 126
- II.** *Qualiter se habeat existentia creaturarum ad earum essentiam.* 132
- III.** *Quomodo se habeant inter se gradus rerum essentialis,* 140
- IV.** *De gradu singularitatis, seu individuationis.* 145

INDEX LIBRORVM,  
CAP. III. De proprietatibus entis tam in  
genere, quàm in specie.

AR. I.	DE proprietatibus entis in genere.	155
II.	De unitate entis.	160
III.	De veritate entis.	164
IV.	De bonitate entis.	173

CAP. IV. De variis rerum distinctionibus.

AR. I.	DE distinctione reali.	181
II.	De distinctione rationis.	187
III.	De distinctione quam aliqui ex natura rei, alij formalem appellant.	195

CAP. V. De rerum causis in genere.

AR. I.	DE causa definitione & causalitate.	199
II.	Quotuplex sit causa.	205
III.	Quomodo causa mutuo se habeant inter se.	206
IV.	De habitudine causa ad effectus.	209
V.	De habitudine effectuum ad causas.	213

CAP. VI. De causa efficiente.

AR. I.	DE causa efficiente in genere.	221
II.	De causa efficiente creata.	226
III.	De causa efficiente increata.	332
IV.	De causa determinationis effectuum.	240

CAP. VII. De causa finali & quibusdam  
causis minus propriis.

AR. I.	DE iis quæ spectant ad causam finalem.	244
II.	De causa instrumentali.	248
III.	De causa exemplari seu ideali.	251
IV.	De casu, fortuna & fato.	255

CAP. VIII. De ente rationis.

AR. I.	DE existentia & natura entis rationis.	258
II.	De causa effectiva entis rationis.	263
III.	De divisionibus entis rationis.	268

LIBER III.

De speciebus primariis entis.

CAP. I. De Substantia secundum se.

AR. I.	DE quidditate substantia	271
II.	De substantia quæ competit substantia	275

## CAP. ET ART.

III. De substantia compositi naturalis. 283

IV. De causis substantia, & de formali illius effecti. 284

V. Quomodo se habeat substantia ad existentiam, hypostasim, personalitatem, & suppositum. 291

### CAP. II. De accidente secundum se.

AR. I. IN quo consistat ratio accidentis. 295

II. De accidente, ut actu inherente & separato. 302

III. De divisione accidentis. 306

IV. De productione accidentium. 309

### CAP. III. De qualitate.

AR. I. DE essentia qualitatis. 311

II. De prima specie qualitatis, qua est habitus & dispositio. 312

III. De secunda specie qualitatis, qua est naturalis potentia & impotentia. 315

IV. De potentia obedientiali. 317

V. De tertia specie qualitatis, qua est patibilis qualitas & passio. 324

VI. De quarta specie qualitatis, forma nempe & figura. 326

VII. Dubia dubitationes expenduntur. 327

### CAP. IV. De variis oppositionibus rerum.

AR. I. OBServationes circa opposita. 330

II. Nonnulla dubitationes proponuntur circa oppositiones praedictas. 333

III. De regressu a privatione ad habitum. 335

IV. Nonnulla observanda circa proprietates contrariorum ab Aristotele assignatas. 340

### CAP. V. De habitibus in genere.

AR. I. DE essentia & existentia habitus. 343

II. De subiecto habituum. 347

III. De causis habituum. 353

IV. De incremento & diminutione habituum. 360

V. De causalitate habituum. 367

VI. De divisione habituum. 374

# INDEX LIBR. CAP. ET ART.

## CAP. VI. De Relatione.

AR. I.	<b>Q</b> uomodo relatio distinguatur à fundamento.	381
II.	De subiecto relationis.	389
III.	De termino relationis.	392
IV.	An relatio tendat ad terminum ut absolutum, aut ut respectivum.	396

## CAP. VII. De actione & passione.

AR. I.	<b>D</b> e natura actionis & passionis.	400
II.	De coniunctione agentis ad patientem.	404
III.	De distinctione inter agentem & patientem.	407
IV.	An simile agat in sibi perfecte simile.	413
V.	De resistantia & reactione patientis.	417

## CAP. VIII. De alteratione.

AR. I.	<b>D</b> e natura alterationis.	421
II.	An alteratio successiva fiat continue, & sine in- terruptione.	423
III.	Quid tenendum sit de intensione qualitatis.	428
IV.	Quomodo gradus intensiōis se habeant inter se.	436

## CAP. IX. De rerum vocatione, & dura- tione.

AR. I.	<b>P</b> er quid res sint formaliter in loco.	441
II.	De rerum duratione.	445
III.	De tempore.	450
IV.	De inceptione & desitione rerum.	494

**FINIS.**

IDEA



I D E A  
PHILOSOPHIÆ  
VNIVERSALIS,  
S E V  
METAPHYSICA,

*Paucis multa complectens de rationi-  
bus vniuersalibus rerum.*

---

P R Æ F A T I O.

*De ipsa Metaphysica secundum se.*



VÆRITVR. i. quibus  
nominibus scientia illa de  
qua modo acturi sumus,  
insigniri soleat. Respon-  
deo eam varia sortiri no-  
mina, ac maximè quatuor. Vocatur pri-  
Metaph. A

mò Philosophia per antonomasiam, quia cæteris Philosophiæ partibus antecellit. Secundò dicitur sapientia, quia tractat de rebus altissimis, & difficillimis nempe de ente secundum se, de Deo, ac de Angelis. Vocatur tertio Theologia naturalis, quia agit de rebus diuinis prout lumine naturæ cognosci possunt. sicque distinguitur à Theologia quam Doctores Catholici tractare solent; quia hæc procedit ex principijs fidei reuelatis, & eatenus à nonnullis dicitur scientia supernaturalis. Quartò dicitur Metaphysica, quod idem est ac ultra, seu post Physicam, quia iuxta mentem Aristotelis, moremque magis consuetum post Physicam tradi solet, cum sit de rebus à sensu remotioribus, & consequenter difficilioribus, ad quas peruestigandas & addiscendas per rerum faciliorem considerationem intellectus veluti manu duci debet. Tandem vocari meritò potest scientia vniuersalis, eo quòd vniuersaliores gradus entis contemplatur.

Quæritur 2. An Metaphysica sit propriè scientia. Respondeo ex communi omnium Philosophorum sententia, affirmatiuè: quod probatur tum ex Arist. 4. Metaph. cap. 1. vbi ait, esse quandam scientiam quæ speculatur ens, inquantum ens;

## PRÆFATIO.

3

hæc enim verba non possunt intelligi nisi de Metaphysica, cum nulla alia scientia contempletur ens, inquantum ens. Tum quia ea est propriè scientia, quæ demonstrat proprietates de suo objecto, per principia illius interna; at hoc præstat Metaphysica, cum demonstret v. c. objectum suum esse bonum, quia est ens. Tum denique quia Philosophia omnium consensu, est scientia propriè dicta; at Metaphysica est nobilior alijs Philosophiæ partibus, ergo est propriè scientia.

Dices non sequi, quia ut nobilior alijs est sapientia, adeoque non scientia, cum sapientia & scientia diversi sint habitus. Respondeo rationem sapientiæ non impedire quin Metaphysica sit scientia, imò ex eo quod est sapientia, colligendum esse eam quoque habere rationem scientiæ; quia ad scientiam sufficit cognitio effectus per causam, at sapientia est cognitio effectus per causam, cum id habeat speciale ut sit per causam altissimam.

Nec refert vulgaris divisio habitus in intelligentiam, sapientiam, scientiam, prudentiam, & artem; ibi enim scientia sumitur vulgariter pro quacunque cognitione effectus per causam, quomodo scientia est habitus à sapientia specie distin-

ctus; non autem pro scientia perfectissima, quæ scilicet habetur per causas altissimas, quomodo ratio scientiæ includitur in sapientia, & vtraque competit Metaphysicæ.

Quæritur; quodnam sit obiectum Metaphysicæ. Respondeo hac in re varios esse dicendi modos: Nonnulli putant obiectum Metaphysicæ esse ens communissimè sumptum, vt dicitur de ente reali, & de ente rationis. Sed hoc refellitur, quia quæ non conueniunt in conceptu aliquo reali, non possunt spectare ad idem obiectum alicuius scientiæ, vt patet in Physica, quæ non considerat nisi ea quæ conueniunt in ratione corporis naturalis: atqui ens reale & ens rationis non conueniunt in conceptu aliquo reali, cum in ente rationis nihil sit reale, sed mera fictio intellectus; ergo non possunt spectare ad idem obiectum Metaphysicæ.

Confirmatur, nam sicut Physica non agit de homine, vt dicitur de vero homine, & de homine picto; ita Metaphysica non debet tractare de ente vt includit ens reale & rationis: eò quòd quemadmodum homo verus & probus in solo hominis nomine conueniunt, ita ens reale & rationis in sola voce entis.

Nec refert quod in Metaphysica tracte-



## PRÆFATIO.

tur de ente rationis, de eo enim agitur indirectè ut per illud melius percipiatur natura entis realis; quemadmodum in Physica agitur de priuatione, ut ex illa habitus oppositus clariùs intelligatur; & in Ethica de malo, ut ex illius consideratione bonum dilucidius innotescat.

Alij non modo entia rationis excludunt ab obiecto Metaphysicæ, sed etiam accidentia realia, adeoque existimant solam substantiam abstrahentem à materiali & immateriali esse obiectum adæquatum Metaphysicæ. At neque hoc placet, quia accidens est verum ens reale, & ex se abstrahit à materiali & immateriali, non secus ac substantia: quare si substantia spectat ad obiectum Metaphysicæ, quia est ens reale abstrahens à materiali & immateriali, idem à pari de accidente affirmandum est. Confirmatur, quia accidens sub ea abstractione est aliquid scibile: ergo ut sic spectat ad Metaphysicam, cum nulla alia scientia eò pertingere possit.

Obijcies, proprietas obiecti non est obiectum, atqui accidens est proprietas substantiæ, ergo non potest cum illa obiectum Metaphysicæ, constituere. Respondeo minorem ita generatim sumptam

falsam esse præsertim in Metaphysica: quia hæc non considerat accidens vt passionem substantiæ , sed vt ens reale ab ea distinctum per differentiam oppositam, adeoque vt diuersam speciem entis constituens: quæ ratione sub Metaphysica , tanquam obiectum parziale , cadere potest. Vnde quas proprietates demonstrat de substantia , vt ens est , nempe vnitatem , veritatem , & bonitatem : easdem de accidente vt ens est , demonstrat.

Alij docent substantiam immaterialem, vt Deum , & intelligentias duntaxat comprehendit, esse obiectum totale Metaphysicæ. At neque hoc probatur, tum quia vel assignanda est alia Metaphysica , quæ agat de ente materiali , quod repugnat communi Philosophorum sensui: vel fatendum eandem Metaphysicam, quæ agit de substantia immateriali , agere etiam de ente materiali , cum ratio entis realis ab vtraque præscindi possit. Tum quia Metaphysica , quæ agit de substantia immateriali , simul agit de vno, vero , & bono quæ non magis sunt passionēs intelligentiarum , quàm rerum materialium : ergo etiam res materiales spectant ad obiectum Metaphysicæ , cum repugnet eam scientiam non agnoscere pro obiecto suo , id cui proprietates

quas demonstrat. conueniunt.

Obijcies 1 ex Arist. 6. Metaph. tex. 3. Si nulla esset substantia præter eas quæ natura constant, Physicam fore primam scientiarum: ex quo sequitur nullam fore Metaphysicam, si nullæ essent substantiæ immateriales, adeoque Metaphysicam versari tantum circa eiusmodi substantias. Respondeo hoc posterius non sequi, licet enim Metaphysica consideret ens abstractum à materiali & immateriali: si tamen nullum esset ens immateriale, non opus esset aliquam Metaphysicam constituere pro solo ente materiali, cum hoc in Physica sufficienter tractetur.

Obijcies 2 Metaphysica non considerat nisi res abstractas à materia, atqui substantiæ immateriales duntaxat abstrahunt à materia, ergo illæ tantum considerantur à Metaphysica, & sunt obiectum illius adæquatum. Respondeo duplicem esse abstractionem à materia, aliam realem, aliam rationis: quarum prior competit substantiis spiritualibus, quia ipsæ sunt separatæ à materia: posterior verò potest competere substantiis materialibus, etiam enim reuera sint coniunctæ cum materia, concipiuntur ab intellectu secundum gradum entis & substantiæ, qui ex se abstrahit à materia, cum rebus spiri-

## 8 METAPHYSICÆ

tualibus competere possit. Vnde Metaphysica potest considerare substantias tam materiales, quàm immateriales sub illis rationibus abstractis, nec necesse est ut quidquid considerat, realiter sit abstractum à materia.

Alij putant solum Deum esse obiectum adequatum Metaphysicæ. Sed & hi videntur decipi, tum quia in Metaphysica non tantum agitur de Deo sed etiam de intelligentiis, imò de ente abstracto à rebus spiritualibus & corporeis: quare repugnat quod Deus sit totale & adequatum obiectum Metaphysicæ.

Confirmatur, quia sicut nec sensus, nec intellectus, nec vlla alia potentia potest excurrere extra suum obiectum adequatum, ita nec vlla scientia: eò quòd cum nullo nisi cum adequato obiecto commensurationem habet: quare ab eo solo ita limitatur, ut in aliud excurrere non possit.

Tum quia obiectum totale scientiæ alienius tale esse debet, ut quidquid in ea tractatur per se, spectet ad obiectum illius, vel tanquam principium, vel tanquam pars, vel tanquam passio: sic enim consequitur perfectam cognitionem sui obiecti, quam maximè intendit, & propter quam est instituta. At perspicuum est.

multa tractari per se in Metaphysica, quæ nullo ex modis prædictis ad Deum referri possunt, ut patebit ex dicendis: esto ad eum omnia referantur ut ad causam primam, & ultimum finem. Ergo fatendum est Deum solum non esse obiectum adæquatum Metaphysicæ, sed ad summum esse partem nobiliorem obiecti illius adæquati.

Obijcies Metaphysicam dici Theologiam, seu scientiam de Deo, ex quo sequi videtur Deum esse totale illius obiectum. Verum id non bene colligitur, quia ut Metaphysica dicatur scientia de Deo, sufficit quod de Deo disserat, siue agat de illo ut de obiecto totali, siue ut de partiali duntaxat. Quemadmodum dici potest visum esse potentiam colorum perceptiuam, etsi non solos colores percipiat.

Alij existimant ens prædicamentale esse obiectum adæquatum Metaphysicæ. Verum hoc etiam refellitur, nam Deus spectat ad obiectum Metaphysicæ, nec tamen est ens prædicamentale, ut dictum est in Logica: ergo solum ens prædicamentale non est obiectum Metaphysicæ. Major suaderetur, tum ex Arist. tum quia cum multa possimus de Deo cognoscere naturæ lumine, vel constituenda est specialis scientia naturalis agens de Deo, quod super-

suum videtur, & communi sententiæ repugnat: vel fatendum considerationem de Deo ad nostram Metaphysicam spectare.

Nec dicas in Physica agi de Deo, cum tamen Deus non spectet ad obiectum illius: non enim est par ratio, siquidem Deus in Physica consideratur tantum extrinsecè, & per accidens, nempe ut est causa efficiens, & primus motor corporis naturalis, quod est obiectum illius: in Metaphysica verò spectatur per se ut est ens infinitum, æternum, immensum, simplicissimum &c. adeoque ut habet rationem obiecti respectu illius.

Quod si instes, non posse dari scientiam de re indemonstrabili, qualis est Deus: respondeo plura posse demonstrari de Deo, tum à posteriori per effectus, tum aliquo modo à priori: quia per essentiam probamus attributa, & vnum attributum per aliud, v. c. æternitatem per immutabilitatem, voluntatem per intellectum, &c. non ut per veram & realem causam, sed tanquam per causam virtua-lem, seu rationem à priori à qua alia manare concipitur.

Itaque his opinionibus reiectis, dicendum est cum communi sententia, obiectum Metaphysicæ esse ens reale, quate-

nus ens est. Probatur tum quia seclusis obiectis allatis, nihil aliud superest in quo obiectum Metaphysicæ constitui possit. Tum quia enti reali ut ens est, competunt omnes conditiones obiecti huius scientiæ, cum habeat principia interna, ex quibus iuxta conceptum nostrum quodammodo constituitur, nempe essentiam & existentiam; habeat varias passiones quæ de illo demonstrari possunt, nempe unitatem, & bonitatem; habeat denique varias veluti species sub se contentas, nempe substantiam, accidens, Deum, intelligentias.

Obiicies, cum Metaphysica sit scientia nobilissima, debet habere obiectum omnium nobilissimum: at ens ut sic, non est obiectum nobilissimum, quin potius est omnium imperfectissimum; cum gradus eò sint imperfectiores quò sunt uniuersaliores, ut liquet ex arbore Porphyrij. Respondeo ens ut est obiectum Metaphysicæ, non debere sumi ita præcisum à suis inferioribus, ut non includat, saltem confusè, suas species, nempe substantiam & accidens, Deum & Angelos, qua ratione est nobilissimum. Neque mirum cuiquam videri debet, quòd Metaphysica ad specialem earum rerum considerationem descendat: non enim limites sui obiecti præ-

tergreditur quamdiu ea tantum considerat quibus conuenit abstractio ipsi propria, nempe à materia singulari, sensibili, & intelligibili, quales sunt entis species iam memoratæ.

Quæritur 4. qualis scientia sit Metaphysica. Respondeo & Dico 1. *Metaphysicam esse scientiam speculatiuam*. Probatur tum ex Arist. 6. Metaph. cap. 1. ubi Philosophiam contemplatricem diuidit in Physicam, Mathematicam, & Theologiam seu Metaphysicam: tum quia ea scientia est speculatiua, quæ versatur circa suum obiectum modo merè speculatiuo, seu quæ in cognitione sui obiecti conquiescit, neque illam ex se dirigit ad praxim, præscribendo regulas operationis: atqui Metaphysica versatur circa suum obiectum modo merè speculatiuo, ita ut in illius cognitione conquiescat: ergo est scientia speculatiua.

Neque dicas Metaphysicam agere de Deo ut summè bono, adeoque ut summè à nobis diligendo, sicque dirigere praxim: prior enim consequentia falsa est; quia etsi Metaphysica agat de attributis diuinis quæ naturali lumine cognosci possunt, agit tamen de illis speculatiuè duntaxat, quatenus scilicet Deus in se æternus, infinitus, & summè bonus est: neque



vllas præscribit regulas eum diligendi, sed id muneris relinquit Philosophiæ Morali, quæ Deum practicè considerat vt est summè bonus, & vltimus finis noster naturalis, adeoque vt à nobis diligendus & inquirendus. Vnde illud est discrimen inter Metaphysicam, & Theologiam; quod hæc considerat Deum sub altiori lumine, & tanquam obiectum adæquatum; nec quiescit in speculatione veritatum ad illius naturam spectantium, sed vterius præscribit modum quo illum vt finem nostrum consequi possimus; nempe eum diligendo, & illius mandatis obtemperando.

Dico 2. *Metaphysicam totaliter spectatam, non esse vnum simplicem habitum, sed complexionem multorum habituum partialium.* Probatur ratione generali, ad omnes scientias spectante, nam necessitas ponendi habitum aliquem scientiæ in intellectu, est ad superandam difficultatem quæ in obiecti alicuius cognitione reperitur; ergo vbi occurrunt multæ difficultates superandæ, quarum vna non pendet ab alia, necesse est vt ibi multiplicentur habitus: at in Metaphysica, vt & in qualibet alia scientia totali, occurrunt multæ difficultates superandæ, vt patet, nam v. c. etsi habeas habitum quo facilè cognos-

cas ens esse vnum, non ideo facile iudicas quid tenendum sit de conceptu, vel analogia entis, aut de locutione Angelorum, aliisve ad Metaphysicam considerationem spectantibus. Quare præter habitum quo priorem conclusionem facile percipis, requiruntur alij quibus reliquis eadem facilitate assentiaris.

Confirmatur, nam diuersæ conclusiones illæ diuersis rationibus & mediis probantur, ergo exigunt diuersos scientiæ habitus; sequela patet, quia si ex communi sententia, ad probandam eandem conclusionem diuersis medijs, requiruntur diuersi habitus, v. c. scientia & opinio ad idem probandum medio vno certo, & alio probabili; quidni requirentur diuersi scientiæ habitus, ad diuersas conclusiones probandas diuersis medijs scientificis?

Obiicies: non ponitur nisi vna potentia visua ad percipienda omnia obiecta visibilia, quæ sunt multiplicis speciei; ergo vnus scientiæ habitus sufficit ad omnia scibilia intelligenda. Respondeo negando consequentiam, & ratio discriminis est, quia cum potentia visua emanet naturaliter ab anima, non potest multiplicari iuxta diuersitatem obiectorum; cum autem habitus producat per actus, necesse est vt iuxta distinctionem actuum & obie-

etorum distincti producantur habitus. Alias non esset, ponendus in intellectu nisi vnicus habitus ad omnia intelligibilia percipienda, quod ne ab arguentibus quidem concedendum puto.

Obiicias 2. vnus fidei habitus sufficit ad credenda omnia reuelata, ergo & vna scientia ad omnia scibilia cognoscenda. Respondeo non sequi, & ratio discriminis est, quia fides vni tantum motiuo innitur, nempe testimonio diuino; quare qui ex fide aliquid credit ob hoc motiuum, paratus est ob illud aliis omnibus à Deo reuelatis firmiter assentiri; cum Dei testimonium æqualiter verum & certum sit in omnibus. At non omnibus conclusionibus Metaphysicæ, vel alterius scientiæ assensum damus ex eodem motiuo, sed ex diuersis, vt perspicuum est: quare etsi acquiramus facilitatem ad assentiendum alicui conclusioni, non sequitur quòd eandem aut similem propensionem experiamur ad assentiendum aliis; maximè si nullam habeant cum illa connexionem.

Dico 3. *Metaphysicam non esse propriè subalternantem respectu aliarum scientiarum.* Quod vt probetur

Notandum 1. subalternationem scientiarum posse variis modis contingere: primò ratione finis, cum scilicet finis vnius

refertur in finem alterius. Verùm hæc conditio non habet locum vt liquet, nisi in artibus, & scientijs practicis. Secundò ratione obiecti, cùm scilicet scientia subalternata addit obiecto scientiæ subalternantis rationem aliquam propriam & accidentalem, per quam ab illa distinguitur; quomodo Medicina, quæ agit de corpore humano vt sanabili, subalternatur Physicæ quæ sanabilitatem illam non considerat; & Musica subalternatur Arithmeticæ, quia hæc considerat simpliciter numerum vt numerus est, illa verò vt sonorum, seu harmonicum. Tertiò ratione principiorum, cùm scilicet principia scientiæ inferioris sunt conclusiones euidenter probatæ in scientia superiori; quo etiam titulo Medicina subalternatur Physicæ, quia huius conclusiones sunt principia illius; vnde vulgò dicitur ibi incipere medicum, vbi definit Physicus. Exempli causa, Physicus probat contraria contrariis curanda, cò quòd vnum contrariorum expellit aliud, medicus verò eam conclusionem assumit tanquam principium ex quo colligit, remedia frigida morbis calidis, & vice versa, calida frigidis adhibenda esse.

Notandum 2. ad veram & perfectam subalternationem duas illas posteriores

conditiones requiri, scilicet ut scientia subalternata assumat vel totale, vel partiale obiectum scientiæ subalternantis, eique addat aliquam formalitatem accidentariam & extrinsecam, ratione cuius illud consideret; assumat etiam pro principiis conclusiones in superiori scientia evidenter probatas. Ex quo patet 1. non esse propriam subalternationem, quando scientia inferior assumit partem obiecti materialis & formalis scientiæ superioris; quomodo scientia de cælo, vel de elementis non est propriè subalternata Physicæ generali; quia illa considerat cælum vel elementa ut sunt corpora naturalia, quæ est formalitas obiecti Physicæ generalis. Patet 2. non sufficere ad exactam subalternationem, quod principia vnius scientiæ utcumque probentur in alia, sed requiri quod in ea probentur demonstratiuè, & scientificè; quò fit ut Physica non subalternetur propriè Dialecticæ, etsi hæc possit probabiliter illius principia probare.

His positis probatur nostrâ assertio; nam in vera subalternatione requiritur ut scientia subalternata addat obiecto subalternantis rationem aliquam propriam, & accidentalem per quam ab illa distinguatur: Item ut principia illius sint conclusiones demonstratæ in scientia subalternante,

atqui hæ conditiones non reperiuntur in alijs scientijs, respectu Metaphysicæ: non quidem prior: quia rationes ab ijs additæ enti, non sunt illi extrinsecæ, sed extrinsecæ: cum naturale, quod est differentia obiecti Physicæ, quantum, quod est differentia obiecti Mathematicæ, sint intrinsicè & essentialiter entia. Non etiam posterior, quia etsi principia aliarum scientiarum demonstrantur à Metaphysica indirectè, & per deductionem ad impossibile: non tamen directè & ostensivè seu à priori. Quare Metaphysica non est propriè scientia subalternans respectu aliarum scientiarum.

Quæritur 5. quænam sint causæ Metaphysicæ. Respondeo & Dico 1. *quatuor causas Metaphysica, ut & aliis scientiis speculativis, posse assignari, nempe materialem, formalem, effectivam, & finalem.* Materialis seu subiectiva est intellectus, formalis ipse habitus Metaphysicæ, qui est in se intrinsicè forma quædam accidentalis: verum quia per ordinem ad obiectum speciem sumit, hinc fit ut etiam obiectum habeat rationem quandam formæ extrinsecæ respectu illius. Causa verò efficiens Metaphysicæ proxima sunt actus intellectus per quos est acquisita, ac denique finis absolutus & internus Metaphysicæ est contem-

platio veritatis, non cuiuslibet, sed eius quæ ad obiectum altissimum & nobilissimum spectat. Cum enim hæc scientia verferetur circa res altissimas, quarum cognitio est maximè propter se expetenda, & nullam operationem circa eiusmodi obiecta præscribat, hinc perspicuè sequitur finem illius absolutum & intrinsecum esse meram veritatum altissimarum contemplationem. Dubitatur autem de fine illius respectivo & extrinseco, pro quo

Dico 2. *Metaphysicam ex communi sententia, non modo propter seipsam esse valde convenientem, quatenus intellectum cognitione rerum præstantissimarum exornat, sed etiam ad alias scientias acquirendas esse valde utilem.* Quod non ita intelligendum est, ut hæc scientia tendat ad perfectionem aliarum tanquam medium ad finem: cum enim sit maximè propter se, non potest eo modo ad alias scientias ordinari: sed ita ut Metaphysica tanquam scientia superior, & eminentior alias iuvet, lucem aliquam & firmitatem ijs conferendo: partim plerosque terminos universales quibus passim aliæ scientiæ utuntur, scientificè explicando: partim varijs divisionibus entis, & graduum eius quos assignat, viam aperiendo ad distinguenda aliarum scientiarum obiecta: partim

earum principia contra peruicaces probando deductione ad impossibile : quod postremum vt clarius percipias,

Obseruandum est dari quædam principia complexa, quibus Metaphysica vtitur in demonstrationibus deducentibus ad impossibile, qualia sunt vulgata illa, *quodlibet est, vel non est; impossibile est aliquid simul esse, & non esse*; aliaque huiusmodi. Est autem non leuis controuersia, quodnam ex illis principijs censendum sit omnium primum & firmissimum, ita vt cum ad illud peruentum est, ultra progredi non liceat.

Quorundam est sententia, principium illud, *ens est ens*, esse omnium primum. Verum hoc rejicitur, quia etsi illud principium sit omnium primum in ratione propositionis, eò quod constat ex terminis simplicibus, & in alios priores minimè resolubilibus; non tamèn in ratione principij, quia cum sit propositio omnino identica & nugatoria, nulli vsui esse potest ad aliquid probandum, tantum abest vt principia omnium scientiarum per illam demonstrantur.

Alij dicunt hoc esse primum omnium principium, *de quolibet vera est affirmatio, vel negatio*. Sed contra, nam illud non est principium omnium primum, quod in



aliud resolui potest; at principium allatum in aliud resolui potest, puta in istud, *quodlibet est, vel non est*: Siquidem ex eo quod res est, vel non est, propositio affirmans, aut negans vera est.

Alij primitatem tribuunt huic principio, *quodlibet est, vel non est*, illudque præferunt isti, *impossibile est aliquid simul esse, & non esse*: tum quia est simplicius, tum quia est affirmatiuum. Verùm hæ rationes non concludunt, quia ad summum ostendunt principium illud esse prius in ratione propositionis, de quo non est quæstio.

Itaque dicendum est cum communi sententia, sumpta ex Arist. 4. Metaph. cap. 3. principium omnium primum & indemonstrabile esse illud; *Impossibile est aliquid simul esse, & non esse*. Licet enim non multum à præcedenti distinguatur, maiorem tamen vim probandi continet, cum non dicat simpliciter quidlibet esse, vel non esse, sed declaret esse impossibile ut aliquid simul sit, & non sit. Vnde demonstratio per deductionem ad impossibile in hoc principio sistere debet, cum nihil possit fingi impossibilius quam quod eo inferitur, nempe idem simul esse, & non esse. Quare cum aliunde principium illud sit vniuersalissimum, notissimum, & fir-



missimum , nihil illi deesse potest ad rationem principij omnium primi.

Nec dicas principium illud posse resolui in istud prius , & per illud probari , *impossibile est duo contradictoria simul esse vera* , hoc enim falsum est , quia potius è contra ideo impossibile est duo contradictoria simul esse vera , quia impossibile est idem simul esse & non esse ; vt impossibile est parietem esse simul album & non album , quia repugnat idem simul esse & non esse.

Quæritur 6. quis ordo constituendus sit inter Physicam , & Metaphysicam. Respondeo iuxta methodum Aristotelis , quam Philosophi communiter sequuntur , Physicam Metaphysicæ præponendam esse ; ille enim non nisi post tractationem rerum Physicarum egit de Metaphysicis. Vnde & hanc scientiam vocavit Metaphysicam , non vt quidam putant , quasi sit de rebus supernaturalibus ; siquidem non spectat ad Philosophum de eiusmodi obiectis sermonem habere , cum excedant lumen rationis naturalis quo in suis speculationibus ducitur , sed quia post Physicam tractari debet. Cuius ratio afferri potest , quia cum Metaphysica agat de Deo , & de Angelis , prout lumine naturali innotescunt , rectus ordo postulat vt Physica illi præ-

mittatur ; cùm non nisi per cognitionem rerum materialium & sensibilibum , ad spiritualium & insensibilibum contemplationem animus noster, in hoc vitæ statu, pro-  
uahi possit.

Verùm ordo iste non caret difficultate, quia etsi Metaphysica Physicæ postponi debeat, quatenus tractat de Deo, & Angelis ; aliunde tamen illi præmittenda videtur, quatenus nempe agit de summis rerum generibus, siquidem specialis ratio alicuius entis, substantiæ, vel accidentis, satis perspecta haberi nequit, quandiu quid in genere sit ens, substantia, vel accidens ignoratur. Quare cùm tractatio de Deo & Angelis, ut pote in Idea Theologiæ speculatiuæ satis fusè tradita, à nobis hoc loco omittenda sit, nil vetat quin pars ista Philosophiæ, quæ tota versatur circa gradus vniuersales rerum, disputationibus Physicis iure suo præmittatur. Vnde & eo titulo Prophysica potius quàm Metaphysica appellari debet.


Confirmatur, nam cùm Logica ante alias omnes scientias, adeoque ante Physicam explicari debeat, dubitari non potest quin etiam Metaphysica nostra, quæ est veluti supplementum quoddam Logicæ, quatenus fusè tractat varias difficultates ad vniuersalia & categorias spectan-

24      METAPHYSICÆ, &c.  
tes, quę in Logica à plerisque minùs com-  
modè agitari solent, ante Physicam tra-  
denda sit.

Porro tota hæc tractatio tribus libris ab-  
soluetur, quorum primo agerur de vni-  
uersali, secundo de ente secundum se, ter-  
tio de præcipuis speciebus entis, substan-  
tia nempe, & accidente.



LIBER



# LIBER I.

## DE VNIVERSALI.

*Suppositis ijs quæ breuiter in Logica dicta sunt de vniuersali, nonnullas hic quæstiones difficiliiores expendemus, quæ spectant partim ad vniuersale secundum se, partim ad species illius.*

### CAPVT PRIMVM.

#### DE VNIVERSALI A parte rei.

##### ARTICVLVS PRIMVS.

*Quid vulgò Philosophi intelligant nomine vniuersalis.*



Ramoneo 1. Vniuersale pro eo sumi generatim quod aliqua ratione dicit ordinem ad multa. Sic Deus dicitur vniuersalis in causando, quia ad omnes effectus creatos concurrit. Sic imago, quæ est in mente pictoris, dicitur vniuersalis in representando; quia multæ imagines ad illius

*Metaph.*

B

imitationem depingi possunt. Sic vox illa, *equus*, dicitur vniuersalis in significando, quia naturam omnium equorum significat.

Præmoneo 2. hic non agi de vniuersali in ijs significationibus, sed de vniuersali in essendo, aut prædicando, seu quod multis inesse potest, & de ijs prædicari: quorum illud definitur, *unum aptum inesse multis*, hoc verò, *unum aptum prædicari de multis*. Qua ratione homo censetur vniuersale in essendo, quia inest Petro, Paulo, alijsque indiuiduis naturæ humanæ; & in prædicando, quia de omnibus, & singulis hominibus prædicari potest.

Præmoneo 3. esse in multis, & prædicari de multis esse duas rationes distinctas in vniuersali, quarum illa est prior, hæc posterior; cum non possit aliquid prædicari de multis, nisi quia illis inest. Imò quia nihil prius concipitur in vniuersali, quàm quod possit inesse multis; posse esse in multis, dicit essentiam vniuersalis, adeoque prima definitio censetur essentialis. Quia verò secunda cum illa reciprocatur, hinc aiunt, posse prædicari de multis esse passionem seu proprietatem vniuersalis; ac proinde secundam definitionem esse tantum descriptiuam, non essentialem. Et prior quidem definitio communiter Metaphysica appellatur, quia ad Metaphysicum spectat considerare essentiam vniuersalium; posterior verò Logica, eo quod Logicus agit de prædicabilibus.

Ex his autem definitionibus colligitur, tria requiri ad constitutionem vniuersalis, primò vt res quæ dicitur vniuersalis, sit aliqua natura realis & positua; de hac enim procedit difficultas postea tractanda, an detur vniuer-

fale siue à parte rei, siue per mentis operam; cùm de entibus rationis, quæ ab intellectu nostro fingi constat, id meritò inquiri non possit.

Secundò vt ea natura sit vna, cùm enim vniuersale sit quid multis commune, necessariò in se debet habere vnitatem; quia aliàs non esset aliquid commune multis, sed tantùm multa essent in multis. Vnum autem dicitur quod est indiuisum in se, & diuisum à quouis alio, vt infra dicemus, vbi de proprietatibus entis.

Tertiò vt illa natura sit ex se apta inesse multis, per veram & realem sui multiplicationem in illis, ita vt ratio superior prædicetur de quolibet inferiori, non tantùm secundum aliquam sui partem, sed secundum se totam adæquatè. Quomodo animal dicitur prædicari de homine, & equo, & homo de Petro, & Paulo; siue illa multiplicatio fieri possit per potentiam naturalem in rebus creatis existentem, vt multiplicatio hominum & equorum; siue tantum virtute supernaturali, vt multiplicatio solis & lunæ; alterutrum enim, ex communi sententia, ad vniuersale sufficit.

Vnde intelligis naturam diuinam non esse vniuersalem, etsi sit in tribus personis, quia est vna in illis, non multiplex. Itemque animam rationalem non esse vniuersalem, etsi vna sit in pluribus corporis partibus, quia in illis non multiplicatur; siquidem ad verum vniuersale requiritur vt eadem natura sit in se vna, & in inferioribus multiplex, in eadem illa ratione in qua est vna.

Intelligis etiam lignum, aquam, aliaque corpora homogenea non esse vniuersalia, etsi

habeant multas partes eiusdem rationis , in quibus saluatur essentialis ratio aquæ, ligni, &c. Cum enim corpus homogeneous omnes suas partes positivè includat, ut esset uniuersale respectu illarum, deberent singulæ partes omnes partes includere, quod manifestè repugnat. Est autem grauis difficultas, an naturæ rerum sint eo modo uniuersales, siue ex se & à parte rei, quod hoc capite inquirimus, siue saltem per mentis operam, quod in sequenti inuestigandum erit.

## ARTICVLVS II.

*Refellitur primus modus sententia statuentis uniuersalia à parte rei.*

**D**VÆ sunt generales sententiæ circa existentiam uniuersalium, prior est eorum qui existimant admittenda esse uniuersalia à parte rei, & citra mentis operam, quod tribus modis intelligi potest. Primò ita ut uniuersalia sint naturæ realiter separatæ à singularibus, & extra illa existentes, qui modus vulgò tribuitur Platoni, quem ferunt posuisse Ideas quasdam uniuersales rerum omnium, ab ijs realiter separatas, v. c. Ideam hominis quam solam dicebat esse per se & essentialiter hominem: Ita ut Petrus & Paulus non sint homines nisi imitatione quadam & participatione illius; quemadmodum homo pictus dicitur homo, quia est quædam imitatio & participatio veri hominis.

Verum modus ille refellitur primò, quia nihil existit per se in rerum natura, quod non sit singulare; quare si idæ illæ existunt per se



& realiter vt supponitur , sunt singulares, adeoque non possunt esse simul vniuersales in essendo , sed ad summum in causando , quatenus res sensibiles ab ijs procedere dicuntur; aut in repræsentando , quatenus fiunt ad imitationem illarum.

Secundò , quia quando dico , Petrus est homo , est prædicatio essentialis , cum Petrus essentialiter sit homo , ergo significatum hominis est in Petro ; quæ enim spectant ad alicuius rei essentiam , sunt maximè illi intrinseca. Quare per vocem homo , non significatur Idea illa Platonica à Petro realiter separata , ac proinde cum verbis illis , Petrus est homo , vniuersale ex communi sententia , prædicetur de individuo , sequitur manifestè vniuersale non esse Ideam quandam à rebus singularibus realiter separatam.

Dices , hinc quidem sequi vniuersale non esse Ideam , vt ab indiuiduis separatam ; non tamen inde colligi non esse Ideam , vt indiuiduis coniunctam. Sed contra , tum quia gratis fingitur Ideam esse realiter à singularibus separatam , & illis realiter coniunctam , cum hoc contradictionem inuoluat. Tum quia vel Idea quæ supponitur esse in Petro , est eadem cum Idea quæ est in Paulo , vel distincta ; si eadem , iam Petrus & Paulus sunt vnus & idem homo , quod repugnat ; si distincta , iam in se est realiter vna , & in singularibus realiter multiplex , quod etiam contradictionem implicat. Verùm ad soluendas nonnullas obiectiones ,

Nota 1. non esse necessarias Ideas ad veram scientiam de rebus creatis habendam , vt vel ex eo patet , quòd nemo negat dari veram scientiam de cælis , de elementis , de animalibus , aliisque rebus corporeis ; cum tamen

in tradenda eiusmodi scientia nulla fiat Idearum mentio. Cuius ratio est, quia scientia de re aliqua versari debet circa essentiam & proprietates illius, de quibus dantur veritates certissimæ & necessariæ. Quare perperam & immerito ad scientiam alicuius rei comparandam, animus versaretur circa Ideam aliquam ab ea realiter distinctam & separatam.

Nota 2. non etiam esse necessariam Ideam separatam ad procreationem rei imperfectæ, quæ à sibi simili non generatur, quasi verò requiratur rana quædam Idealis ad procreandas ranas, & mus Idealis ad generandos mures qui ex putri materia formantur. Eiusmodi enim animalia vel generantur à sole, ut multi existimant, vel à prima causa, ut nobis probabilius videtur.

Nota 3. si Idea sumatur pro causa exemplari, ad cuius imitationem res fiunt, ad hoc sufficere Ideas quæ sunt in mente diuina; neque propterea fingendas esse aliquas Ideas extra Deum existentes, quales Plato dicitur admisisse.

### ARTICVLVS III.

*Refellitur secundus modus dicendi eiusdem sententia.*

**S**ecundò vniuersalia existere à parte rei ita intelligi potest, ut natura sit vniuersalis; non quidem extra singularia modo iam dicto, sed intra ipsa singularia; adeo ut v. c. natura humana existens in Petro, Paulo, aliisque hominibus sit verè & à parte rei vniuersalis, antequam intellectus de ea quidquam cogitet.

Quæ opinio communiter tribuitur Scotistis, etsi multi recentiores contendant eam à mente Scoti prorsus esse alienam.

Verum modus etiam iste, cuiuscunque sit, refellitur 1. quia ad vniuersale requiritur vt habeat vnitatem multis communem; at natura quæ est in indiuiduis, non habet vnitatem multis communem, sed potius multipliciter tali vnitati repugnantem. Siquidem in Petro, & Paulo duæ sunt humanitates realiter distinctæ, & non vna communis humanitas, ergo natura non est communis in indiuiduis.

Confirmatur, nam sicut Petrus & Paulus habent duo corpora, & duas animas distinctas, ita sunt duo homines realiter distincti, ergo non est in illis vna communis humanitas. Sequela patet, quia si in Petro & Paulo esset vna communis humanitas, non possent illi dici duo homines propter Petreitatem & Pauleitatem, sed ad summum vnus homo cum duabus differentiis numericis. Quemadmodum tres personæ diuinæ non dicuntur tres Di, sed vnus Deus cum tribus personalitatibus. Quare cum sint duo homines realiter distincti, cōsequenter non est in illis vna communis humanitas.

Refellitur 2. quia si natura est vniuersalis in ipsis indiuiduis, vel id habet quatenus est contracta ad indiuidua, vel secundum se; at prius ne quidem ab Aduersariis admittitur, cum natura vt contracta, sit singularis. Posterius etiam defendi non potest, quia quæ cōpetunt naturæ secundum se, seu ex principiis intrinsecis illius, cōueniunt singulis illius indiuiduis, vt patet in Petro & Paulo qui sunt rationales & risibiles, quia esse rationalem & risibilem cōpetit homini secundum se. Quare si natura esset vniuersa-

lis secundum se, sequeretur quemlibet hominem habere in se naturam communem omnibus hominibus, totque esse species hominis, quot sunt individua naturæ humanæ; quod planè absurdum & imaginarium est.

Vnde refelluntur qui dicunt id non sequi, eò quòd individuum non habet vniuersalitatē per se immediatē, sed ratione suæ naturæ. Nam sicut Petrus verè dicitur homo, etsi talis non dicitur nisi ratione suæ humanitatis, quæ est illius natura; ita etsi non habeat vniuersalitatem nisi ratione suæ naturæ, id non impedit quin verè & propriè debeat dici vniuersalis. Confirmatur, nam Petrus dicitur intellectiuus ratione animæ rationalis, quantus ratione quantitatis, qualis ratione qualitatis, &c. Ergo à fortiori debet dici species seu vniuersalis ratione propriæ naturæ, si hæc per se ipsam est species seu vniuersalis. Eò vel maximè quia inter Petrum, & naturam Petri nulla est realis distinctio, vt infra probabitur.

Repellitur 3. dicta sententia ab absurdo, nam si natura humana seu humanitas est realiter vna in omnibus hominibus, sequitur totam naturam humanam fuisse productam in Adamo, ac proinde nullam humanitatem produci cum alii homines generantur, sed tantam veterem cum nouis differentiis individualibus copulari. Hoc autē absurdum esse perspicuum est, tum quia copulatio illa est planè fictitia & inintelligibilis; tum quia cum alij & alij homines de nouo producātur, producuntur quoque cum illis alix, & alix humanitates quæ nunquam antea extiterant, quæque proinde sunt realiter distinctæ ab humanitate Adæ.

Confirmatur, nam sicut Adæ humanitas in-

trinsecè constabat ex corpore & anima simul unitis, ita in alijs hominibus sunt alia corpora, & animæ, & vniones omnino distinctæ, adeoque aliæ humanitates. Eò vel maximè quia etsi Adæ humanitas iamdiu interierit, nec amplius existat in rerum natura, id non impedit quin aliæ sint superstites, & realiter existant; cum tamen planè repugnet eandem rem simul existere, & non existere.

Nec dicas humanitatem interiisse quatenus erat in Adamo, non quæ erat in illo; id enim perinde est ac si diceres, Adamo pereunte naturam illius non periisse, sed tantùm fuisse separatam ab Adameitate, & ad nos saluam & integram transuolasse; quod quam à recta ratione alienum sit, nemo est qui non videat.

## ARTICVLVS IV.

*Soluntur nonnulla obiectiones.*

**O**bjicies 1. à parte rei & nemine cogitante, Petrus & Paulus sunt eiusdem speciei; ergo datur species, adeoque vniuersale à parte rei. Confirmatur, nam etsi Petrus & Paulus non sint vnum numero, sunt tamen vnum formaliter in natura humana, quod sufficit ad vniuersale. Respondeo antecedens falsum esse in sensu arguentium, quatenus putant esse in Petro & Paulo à parte rei vnâ communem humanitatem, & ita esse eiusdem speciei; oppositum enim iam ostensum est. Quare non aliter Petrus & Paulus possunt dici à parte rei eiusdem speciei, nisi quia conueniunt, & sunt reipsa similes in natura humana.

Vnde ad confirmationem dico , Petrum & Paulum aliaque indiuidua humana habere vnitatem formalem , non omnia eandem , sed singula proprias , ab vnitatibus aliorum distinctam. Cum enim singula habeant propriam & integram entitatem , ab entitatibus aliorum omnino realiter distinctam , vt ex eo manifestum est , quòd tota vnus entitas remanet tota entitate alterius destructa , aut nondum producta ; repugnat quod inter illa reperiatur aliquid , quod sit à parte rei formaliter vnum & indiuisum.

Obijcies 2. citra mentis operam , est relatio identitatis inter Petrum & Paulum; at ex Arist. relatio illa fundatur in vnitatem naturæ , sicut relatio similitudinis in vnitatem qualitatis. Respondeo relationem identitatis qua Petrus refertur ad Paulum , fundari in vnitatem conformitatis quæ est inter naturam Petri & Pauli , non autem in vnitatem reali quæ sit inter illas ; vt ex eo ostenditur , quia aliàs non esset realis relatio identitatis inter Petrum & Paulum ; sicut nec est inter personas diuinas , ob vnitatem naturæ. Potest etiam admitti inter homines vnitas quædam Logica , de qua aliquid dicitur cap. sequenti , articulo 4.

Obijcies 3. Petrus & Paulus à parte rei magis conueniunt inter se , quàm Petrus & Buccephalus , ergo habent naturam realiter communem ; sequela patet , quia si non habent naturam communem , nullo modo conueniunt , adeoque non magis quàm Petrus & Buccephalus. Respondeo negando sequelam , quia et si Petrus & Paulus non habeant vnā naturā communem , sed duas realiter inter se distinctas , maior tamen est conformitas & similitudo à parte rei inter naturas ipsorum , quàm

inter naturam Petri , & naturam Bucephali: quo fit vt magis conueniant inter se , quàm cum Bucephalo.

Obijcitur 4. vniuersale ex Arist. est vnum aptum inesse multis , seu quod ex natura sua potest multis inesse, at quod ex natura sua tale est, est tale à parte rei, & citra mentis operam. Ergo datur vniuersale à parte rei, & citra mentis operam. Respondeo non sequi, nam ad vniuersale requiruntur vnitas , & aptitudo ; at quamuis natura habeat à parte rei aptitudinem vt sit in multis, non tamen vnitatem ; cum à parte rei vna sit in vno , & alia in alio.

Dices, Petrus & Paulus sunt vnum à parte rei in ratione essentiali hominis ; ergo homo non tantum habet aptitudinem vt sit in Petro , & Paulo, sed etiam vnitatē. Probatur antecedēs, tum quia ratio essentialis hominis vnica definitione explicatur, tum quia si Petrus & Paulus non essent vnum in ratione essentiali hominis, essent diuisi in plures essentias hominis, sicque multiplicarentur essentia humanæ iuxta multiplicationem indiuiduorum , quod inauditum est. Tum denique quia aliàs æquē Petrus distingueretur à Paulo ratione humanitatis , ac ratione Petritatis, quod dici non potest. Respōdeo negando antecedēs, & ad primā illius probationem dico , vnitatem definitionis non arguere vnitatē realem rei definitæ, sed vnitatem conformitatis, vel ad summum rationis. Ad secundā , non esse absurdū dicere Petrū & Paulū esse diuisos in plures essentias, si diuisio sumatur pro reali distinctione, cū alter ab altero, quoad totū quod est, realiter sit distinctus, vulgō tamē dicitur Petrum & Paulum esse eiusdē essentia, vel non habere diuersam essentiam, quo nihil aliud indicatur quàm eorū essentias

et si re ipsa distinctas, posse vnica definitione explicari, propter conformitatem quam inter se habent. Ad tertiam, Petrum non minus distinguere à Paulo per humanitatem, distinctione reali, quam per petreïtatem; quia quia cum humanitas, & petreïtas sint eadem entitas in Petro, non potest Petrus à Paulo per vnā distinguere; quin eo ipso distinguatur per aliam: non tamen ab eo distinguere per humanitatem, sed per petreïtatem, si distinctio sumatur pro negatione conuenientię; cum ambo conueniant in ratione hominis, & discrepent in ratione Petri & Pauli.

---

## ARTICVLVS V.

*Refellitur tertius modus dicendi prædictæ sententiæ.*

**T**ertio nonnulli recentiores ponunt in natura vnitatem quandam, quam vocant præcisionis, cum aptitudine essendi in multis; non quidem realiter extra singularia, vt volebat Plato; neque in natura iam contracta in suis inferioribus, vt volunt Scotistæ, sed secundum se, quatenus naturæ ordine præcedit contractionem sui ad inferiora.

At modus etiam iste displicet 1. quia vel natura in eo statu est realiter indifferens vt contrahatur ad inferiora, vel tantum per rationem; si hoc posterius dicatur, sequitur non dari vniuersale nisi ad summum per rationem, contra arguentes. Si verò prius, hinc consequens est naturam secundum se esse rea-



liter distinctam ab inferioribus, quod communis Philosophorum sensui, ipsisque arguentibus repugnat.

Displicet 2. quia si natura quæ est in aliquo singulari, erat indifferens ex se ut contraheretur ad hoc vel illud indiuiduum, ergo humanitas quæ est in Petro, æque poterat ex se ante contractionem esse in Paulo, & vice versa quæ est in Paulo, esse in Petro. Imò jam posset Deus humanitatem Petri conferre Paulo, & eam quæ est in Paulo transferre in Petrum: Posset etiam similiter animalitas equi & asini in hominem transferri, quia ex se erat indifferens ut esset in bruto vel, in homine. Quis autem non videt eiusmodi transformationes planè absurdas & chimericas esse?

Displicet 3. quia quamuis gratis concederetur naturam Petri, in statu illo præcisionis fuisse indifferentem ut esset in Petro vel in Paulo, inde tamen non sequeretur eam fuisse indifferentem ut esset simul in Petro & in Paulo, adeoque in eo statu non esset vniuersalis. Siquidem ad vniuersale non sufficit quod possit esse in hoc, vel illo indiuiduo disiunctiue, sed requiritur ut possit esse simul in hoc & illo copulatiue.

Obijcies 1. actus essendi in pluribus non pendet ab operatione intellectus, ergo nec aptitudo quæ ordine naturæ præcedit actum; ergo vniuersalitas conuenit naturæ à parte rei. Respondeo dimisso antecedente, & priori consequentia, posteriorem negandam esse, nam etsi natura à parte rei sit in pluribus, & antequam esset in illis habuerit quandam aptitudinem ut in illis esset, inde non benè colligitur eam in illo priori fuisse vniuersalem.

Quia vt talis esset, deberet esse vna, vt patet ex dictis : at in eo priori non est vna, sed multiplex, sicut enim non vna sed multiplex natura est actu in pluribus ; ita non vna sed multiplex habuit aptitudinem vt in illis esset.

Obijcies 2. diuersæ naturæ rerum diuersas habent aptitudines, vt sint per modum identitatis in his aut illis, v. c. natura animalis in animalibus, non in lapidibus ; natura lapidis in lapidibus, non in animalibus. Hæc autem diuersitas non oritur ex operatione intellectus abstrahentis naturas communes à suis particularibus, cum omnes eodem modo abstrahat ; ergo prouenit ex ipsis rerum naturis, sicque res à parte rei sunt vniuersales. Respondeo ex iam dictis, non dari à parte rei naturam quandam communem animalis, quæ habeat aptitudinem essendi in his & illis animalibus. Nec naturam quandam communem lapidis, quæ possit esse in hoc & illo lapide, vt gratis supponitur : sed sola singularia animalium & lapidum quæ realiter existunt, habuisse antequam existerent, non repugnantiam existendi ; quod non sufficit ad vniuersale, vt perspicuum est.

Obijcies 3. in hoc res omnes creatæ à natura diuina differunt, quod natura diuina non est communicabilis pluribus inferioribus, quæ plures naturas diuinas contineant ; at verò natura omnis creata sit ex se eo modo apta esse in pluribus ; ita vt in illis multiplicetur, vt patet in natura humana quæ, nemine cogitante, est multiplex in multis particularibus hominibus. Respondeo discrimen illud frustra admitte, quia supponitur naturam quandam in

se vnā multiplicari in inferioribus , quod jam satis reiectum est , potestque exemplo ipsius naturæ diuinæ amplius refelli. Nam si illa , quia est in se vna , non constituit tres personas tres Deos , sed vnum tantum Deum ; quī fieri potest vt humanitas ex se sit vna , & tamen ita in Petro , Paulo , & Iacobo multiplicetur , vt eos constituat tres homines realiter inter se distinctos ?

---

## CAPVT II.

DE VNIVERSALI PER  
mentis operam.

## ARTICVLVS PRIMVS.

*Primus modus sentiendi excluditur.*

**H**Atenus de priori sententia , varijsque modis quibus defendi solet. Posterior , quæ est communis Thomistarum , & aliorum , statuit naturas non esse vniuersales nisi per operationem mentis ; quod tribus etiam modis , in hoc & sequentibus articulis expendendis , intelligi potest.

Primus modus est eorum qui putant vniuersale fieri per abstractionem intellectus agentis , cuius officium esse aiunt denudare phantasmata à conditionibus indiuiduantibus ; ita vt species quæ repræsentabat hunc vel illum hominem singularem , repræsentet tantum hominem præcisè & secundum

se . ſicque illum conſtituat in ratione vniuerſalis.

Verùm hic modus reiicitur 1. quia gratis ſupponit ſpeciem ab intellectu agente productam abſtrahere à ſingularibus , adeoque intellectum patientem non percipere niſi vniuerſalia : oppoſitum enim ex communi ſententia oſtendetur tertio libro Phyſicæ.

Reiicitur 2. quia quamuis gratis daretur ſecundum vniuerſale fieri per abſtractionem ſpeciei intelligibilis à ſingularibus , idem tamen dici non poſſet de primo , ſeu de genere ; quia cùm intellectus poſſibilis poſſit, etiam ex ſententia aduerſariorum, intelligere ſpecies ſub genere contentas, eò quòd ſunt naturæ vniuerſales , fruſtrà intellectus agens genus à ſuis ſpeciebus abſtraheret ; ſicut dicitur abſtrahere ſpeciem à ſuis indiuiduis , vt intellectus poſſibilis eam cognoſcat.

Reiicitur 3. quia tunc natura cenſetur fieri vniuerſalis per mentem, quando concipitur vt quid vnum aptum in eſſe multis ; hoc autem non fit per fabricationem ſpeciei intelligibilis , tum quia talis operatio non eſt eognitio obiecti, ſed efformatio instrumenti quo mediante obiectum poſtea cognoſcetur per intellectum poſſibilem. Tum quia ſpecies ab intellectu agente fabricata non poteſt abſtrahere à conditionibus indiuiduantibus , niſi naturam per phantaſma repræſentatam, quæ eſt ſingularis. At natura ab vno tantum ſingulari abſtracta non niſi in illo eſſe poteſt, quia cùm illo tantum identificatur, adeoque non eſt poſitiuè vniuerſalis ; ſed ad ſummum negatiuè , quatenus non cognoſcitur vt ſingularis. Hinc autem facile ſolui poſſunt nonnulla quæ pro allata ſententiâ afferri ſolent. Verùm adhuc

Obijcies 1. species impressa est imago & formalis representatio naturæ, non vt singularis, cum sit abstracta à conditionibus indiuiduantibus, ergo vt vniuersalis. Respondeo 1. antecedens falsum esse, species siquidem impressa ex communi sententia, non est formalis obiecti representatio, sed causa partialis cum intellectu possibili occurrens ad eiusmodi representationem, quæ in specie expressa seu in actuali intellectione consistit. Vnde ex communi sententia Thomistarum, natura non fit vniuersalis quando species illa effingitur, nisi ad summum remotè & improprie; quatenus illius beneficio intellectus possibilis poterit postea cognoscere naturas sine conditionibus indiuiduantibus, sicque eas facere vniuersales.

Respondeo 2. etsi gratis daretur obiectum formaliter per speciem impressam representari, non inde sequeretur illud esse vniuersale, eò ipso quo illa species fit per intellectum agentem: quia natura ab vno singulari præcisa non potest esse vniuersalis, vt dictum est. Et quamuis esset, non tamen talis deberet dici respectu intellectus agentis, cum illam non cognoscat; præsertim in eorum sententia qui nobiscum putant, intellectum agentem verbo tenus dici intellectum, & esse facultatem quandam ab intellectu patiente & cognoscente realiter distinctam de quo alibi.

Obijcies 2. eo ipso quòd natura intelligitur abstracta, seu à conditionibus indiuiduantibus denudata per intellectum agentem, censetur habere per intellectum totum id quod Plato in vniuersali separato realiter constituebat; ergo id sufficit ad constituendum

vniuersale. Respondeo 1. abstractionem illam gratis supponi, vt dictum est. 2. quamuis daretur, negandam esse paritatem, quia Plato constituebat naturam aliquam vniuersalem extra singularia realiter existentem; at intellectus agens fabricando speciem, non versatur circa ipsam naturam, cum eam non cognoscat; adeoque non potest illam constituere actu & formaliter vniuersalem. 3. etsi intellectus agens versaretur circa ipsam naturam, non tamen eo ipso eam vniuersalem constitueret; cum natura singularis non euadat vniuersalis, quatenus præcisè concipitur sine singularitate, vt ante dictum est, & ex dicendis clarius intelligitur.

## ARTICVLVS II.

### *Alius dicendi modus impugnatur.*

SECUNDUS modus est eorum qui docent, vniuersale resultare in natura per abstractionem præcisiuam intellectus possibilis; quod ita fieri putant vt intellectus possibilis specie intelligibili, directè naturam sine conditionibus indiuiduantibus representante, informatus, producat in seipso speciem expressam seu conceptum, quo formaliter cognoscat naturam præcisè secundum sua prædicata essentialia, non cognoscendo singularia, sed ab illis præscindendo, sicque naturam abstractam constituat vniuersalem.

Licet autem multi quoad hoc conueniant, adhuc tamen inter illos est controuersia circa actum quo fit vniuersale; quidam enim existimant illud fieri per comparisonem simpli-

cem intellectus possibilis, quod sic explicant. Supposita cognitione qua natura fuit præcisa à suis inferioribus, aduenit actio reflexa intellectus qua cognoscit naturam vt participabilem à suis inferioribus, & hæc cognitio dicitur comparatio, estque simplex quando fit per simplicem apprehensionem, ita vt intellectus concipiat naturam per ordinem ad inferiora, nihil affirmando aut negando.

Alij verò dicunt vniuersale fieri per comparisonem compositam, quæ tunc habet locum quando non tantum intellectus considerat naturam per ordinem ad sua inferiora, sed etiam eam illis attribuit per actuale prædicationem, dicendo v. c. Petrus est homo, homo est animal.

Sunt etiam nonnulli qui neutram comparisonem putant necessariam ad constitutionem vniuersalis, adeoque existimant vel solam abstractionem seu præcisionem naturæ à conditionibus indiuiduantibus sufficere vt sit vniuersalis; quia sic concipitur vt vna, & ipsa aliunde multiplicatur in indiuiduis, adeoque habet condiciones essentialiter requisitas & sufficientes ad vniuersale.

Verum hic dicendi modus, etsi longè probabilior & communior præcedenti, non satis solidè videtur excogitatus. Probatur 1. nam ad vniuersale requiritur vnitas, at vnitas non potest tribui alicui naturæ per mentem, siquidem non potest mens nostra tribuere vnitatem alicui naturæ, nisi quatenus eam concipit vt vnā, at certè longè aliud est concipere naturam vt vnā, & eam facere vnā: sicut aliud est concipere Æthiopem vt album, & eum facere album.

Probatur 2. quia cū natura quæ dicitur

vniversalis, debeat vna & eadem prædicari de multis, vt mens nostra faciat vniversale, debet consequenter facere vt natura eadem prædicetur de multis, v. c. eadem humanitas de Petro & Paulo: at hoc per mentem fieri nequit, siquidem vt natura prædicetur de Petro, debet esse in Petro; & vt prædicetur de Paulo, debet esse in Paulo: quare si eadem natura de utroque prædicatur, sequitur eandem naturam esse in illis, sicque eam esse re ipsa vnā & vniversalem, non autem per mentis operam.

Probatur 3. quia dum hominem per modum vnus concipis, vel conceptus tuus est verus, vel falsus; si verus, ergo est conformis rei, adeoque homo est vniversalis independenter à tuo intellectu; si falsus, ergo homo non est vniversalis nisi per fictionem mentis, ex quo sequitur totam fabricam vniversalis esse fictitiā & chimericā. At quis credat figmenta esse necessaria ad cognitionem veri? quo tamen sine vniversalia dicuntur inuenta.

Probatur 4. quia natura vniversalis debet intinè & adæquatè prædicari de quolibet inferiori; at homo ille quem abstrahis ab omnibus indiuiduis, nec potest intinè prædicari de Petro, cum repugnet id quod ab aliquo abstrahitur esse illi intimum; nec adæquatè, quia cum homo abstractus ab omnibus indiuiduis naturæ humanæ, contineat in se naturam communem omnium hominum, sequeretur Petrum in se habere naturam omnium hominum, & cum illa identificari; quo nihil absurdius cogitari potest. Vt autem huius rationis vim clariùs percipias, variasque resolutiones quibus eludi potest, facilius soluas,



recole quæ dicta sunt de natura vniuersalis  
cap. i. art. i.

Obiicies, illud est vniuersale, quod est vnum  
aptum inesse multis ; at cùm concipio homi-  
nem sine Petreitate, homo à me conceptus  
est vnus & indiuisus, habetque vt sic aptitu-  
dinem essendi in multis, ergo ratio vniuer-  
salis illi competit. Maior patet ex definitione  
vniuersalis superius allata, probatur minor  
quoad primam partem, quia cùm homo diui-  
datur & multiplicetur per differentias indiui-  
duales, eo ipso est indiuisus & vnus quo per  
mentem ab illis abstrahitur. Quoad secundam  
verò ostenditur, quia conceptus hominis vt  
sic, non minùs Paulo, aliisque indiuiduis na-  
turæ humanæ, quàm Petro applicari potest ;  
cùm omnes æqualiter conueniant in ratione  
præcisa hominis. Respondeo negando mino-  
rem quoad vtramque partem, & ad earum  
probationem dico, falsum esse quòd homo  
abstractus à Petreitate habeat vnitatem pro-  
priam vniuersalis, per quam aptus sit inesse  
multis ; licet enim humanitas Petri conside-  
reretur sine Petreitate, id non impedit quin ve-  
rè sit illius humanitas, planè distincta ab hu-  
manitate Pauli, de quo proinde prædicari  
non potest. Confirmatur nam quòd Petri hu-  
manitatem concipiam sine Petreitate, id non  
facit vt humanitas illa insit Paulo, ergo nec  
facit vt possit de Paulo prædicari ; cùm de illo  
prædicari nequeat, nisi illi insit. Nec refert  
quòd conceptus hominis vt sic, dicatur de  
Paulo ; hoc enim falsum est agendo de conce-  
ptu hominis, constantis ex humanitate ab-  
stracta à Petreitate ; cùm hæc nunquam pos-  
sit verè fieri Pauli, sed tantum per fictio-  
nem mentis, quæ ad veram prædicationem

vnius de alio non sufficit, vt perspicuum videtur.

Instabis, sicut natura fit singularis ex eo quod contrahatur per conditiones indiuiduantes, ita debet fieri vniuersalis per præcisionem ab eiusmodi conditionibus. Respondent aliqui hanc contractionem & præcisionem gratis fingi, quia cum natura ex se & per propriam entitatem sit singularis, hinc fit eam neque contrahi posse ex parte obiecti, neque præscindi. Verum data præcisione, dicendum est naturam per illam non fieri vniuersalem positivè, sed tantum negativè, quod non sufficit ad verum vniuersale de quo agimus; hoc enim dicit positivam aptitudinem ad essendum in multis, quæ nulli naturæ per opus mentis, nisi falso & fictè competere potest.

Urgebis adhuc, esto natura abstracta ab vno singulari sit vniuersalis tantum negativè; quæ tamen præcisa est à multis indiividuis est vniuersalis positivè; quia sic est vna apta inesse multis. Respondeo neque id sequi, nam sicut natura abstracta à Petro est vniuersalis tantum negativè, ita abstracta à Paulo est vniuersalis tantum negativè. Nec fieri potest vt ex duobus vniuersalibus negatiuis fiat vnum vniuersale positivum: aut quod natura abstracta à Petro verè dicatur de Paulo, & abstracta à Paulo verè prædicetur de Petro; cum eiusmodi abstractio planè extrinseca rebus & imaginaria earum entitatem nullo modo attingat.

Atque ex his constat nihil referre ad constitutionem vniuersalis, quod abstractioni præcisiuæ addatur cognitio comparatiua siue simplex, siue composita. Quia cum per illam

abstractionem natura non accipiat unitatem necessariam ad vniuersale, vt probatum fuit, consequens est comparationem ei superadditam per intellectum in ordine ad inferiora, cum talem defectum non corrigat, sed supponat, non sufficere vt natura verè sit vniuersalis.

Confirmatur nam intellectus non facit naturam vnã ex eo præcise quod illam comparat cum inferioribus, ergo supponit aliunde vnã, nempe per abstractionem præcedentem, quam tamen ad id non sufficere ostendimus.

---

### ARTICVLVS III.

#### *Tertius dicendi modus exploditur.*

**S**Vperest tertius modus defendendi vniuersalia per mentis operam, eorum nempe qui docent ea fieri non per præcisionem obiectiuam, qua dicuntur cognosci naturæ ex parte obiecti, vt abstractæ à conditionibus indiuiduantibus; sed per aliam quam vocant formalem, quæ in eo posita est, vt omnia indiuidua cognoscantur ex parte obiecti, intellectus tamen ea cognoscat confusè per modum vnius, sicque faciat vniuersale.

Verùm hic modus refellitur 1. ex doctrina communi de vniuersali, quam ipsimet Adversarij expressè defendunt. Dicunt enim ad vniuersale requiri & unitatem, & pluralitatem; unitatem in ipso vniuersali, pluralitatem in inferioribus in eadem omnino ratione quæ reperiatur adæquatè in pluribus; ita vt tota sit in quolibet, & non vna pars in vno,

alia in alio. Nam si hoc ita se habet, cum iuxta eorum sententiam, vniuersale includat omnia indiuidua, conceptus hominis v. c. omnes homines particulares, hinc manifestè sequitur omnia indiuidua debere reperiri in quolibet indiuiduo, & consequenter in quolibet homine esse omnes homines. Sequela patet, quia si in Petro non reperitur nisi vna & singularis humanitas, & in Paulo alia singularis humanitas, perspicuum est in quolibet inferiori hominis non reperiri totam hominis vniuersalis rationem, quæ omnes & singulas humanitates includit, sed vnâ tantum partem in vno, aliam in alio. Cum ergo repugnet in quolibet indiuiduo reperiri totam & adæquatam rationem vniuersalis, eo modo explicari; hinc manifestè concluditur vniuersale non fieri per actum illum confusum, quem præcisionem formalem appellant.

Confirmatur, nam ipsimet Aduersarij ea ratione probant vniuersale non fieri per præcisionem obiectiuam; quia natura sic præcisa obiectiuè non potest prædicari intrinsecè de quolibet indiuiduo; cum sic natura omnium hominum, & natura omnium hominum non possit prædicari intrinsecè de Petro, adeoque nec de quolibet indiuiduo: Quia alias quilibet homo haberet naturas omnium hominum sibi identificatas, essetque verè & realiter omnes homines. At hæc ratio, quæ optima est, æquè contra illos retorqueri potest, cum velint naturam formaliter præcisam includere omnia indiuidua. Imò maiorem vim habet contra illos, quia natura obiectiuè præcisa, est abstracta à differentiis individualibus; at formaliter præcisa, non abstrahit ab eiusmodi

di differentiis, sed eas includit; est autem absurdus attribuere cuilibet indiuiduo naturas omnium indiuiduorum, vt indiuiduatas, quàm vt abstractas.

Refellitur 2. quia ideo maximè statuuntur vniuersalia, vt dentur prædicationes vniuersales & scientificæ; at si vniuersale completitur omnia indiuidua, nulla dari potest prædictio vniuersalis; cum fieri nequeat vt omnia indiuidua prædicentur de quolibet inferiori; quare vniuersale eo modo constitui non debet.

Nec dicas cum Aduersarijs, ad prædicationem vniuersalem non requiri vt tota natura vniuersalis prædicetur de quolibet, sed solum vt prædicetur illa natura particularis quæ in apprehensione præcedenti fuerat vniuersalis, quatenus simul cum aliis confusè cognita fuerat. Nam in primis hæc responsio directe repugnat sententiæ communi, quam iidem auctores defendunt, & urgent contra Thomistas: sæpe enim inculcant totum vniuersale debere prædicari de quolibet inferiori, iam vero parum sui memores, existimant satis esse quod pars aliqua vniuersalis de inferiori prædicetur.

Illi etiam docent cum sententia communi, idem esse posse vniuersale Metaphysicum & Logicum; quia eo ipso quod res est apta esse in multis, est quoque apta vt prædicetur de multis. At contendunt vniuersale in essendo constitui per apprehensionem omnium naturarum; quomodo ergo iam fatentur ad vniuersale in prædicando sufficere, quod natura sic concepta sit prædicabilis de quolibet inadæquatè, id est vna de vno, & alia de alio? Ista enim inter se non bene coherent, vt perspicuum est.

*Metaph.*

C

Rursus, si natura in actuali prædicatione est particularis, nonne æquius est ut prædictio propter illam dicatur particularis, quàm quòd ob apprehensionem præcedentem, quæ amplius non est, dicatur vniuersalis? Cur vero necesse est ut concipiam omnes homines singulares per modum vnius hominis, ad hoc ut hominem de Petro enunciem? Et quo fundamento dicitur naturam Petri in præcedenti apprehensione fuisse vniuersalem, si vniuersale dicit intrinsecè multas naturas cognitæ ad modum vnius? Sanè ad summum dici potest, naturam Petri in illa apprehensione omnium singularium per modum vnius, fuisse partem vniuersalis: vnde sequitur prædicationem illam, Petrus est homo, ideo dici vniuersalem, quia et si non prædicetur de Petro nisi natura ipsius singularis, ea tamen ante prædicationem fuit pars naturæ vniuersalis; quod quàm sine fundamento dicatur; nemo non videt.

Obiicies, vnitas quam intellectus tribuit omnibus hominibus singularibus, quatenus illos confusè cognoscit, ac si essent vnus solus homo, non est vnitas singularis, quia per illum actum nullum indiuiduum in particulari cognoscitur, sed omnia confusè; ergo est vnitas vniuersalis. Respondeo non sequi, tum quia vnitas illa non descendit adæquatè ad singula inferiora, ut dictum est; tum quia si sufficeret ad vnitatem vniuersalem, quòd multa singularia confusè cognoscerentur, ciuitas esset nomen vniuersale, cum dicat multos homines confusè, & nullum particularem distinctè. Sequeretur etiam me facere vniuersale, quando eminus video confusè plura animalia, ac si essent tantum vnum animal; cum

tamen ex communi sententia, sensus non possit facere vniuersale. Atque ex his satis constare videtur, nullum dari vniuersale siue à parte rei, siue per mentis operam, eo sensu quo in Scholis intelligi, & defendi solet.

## ARTICVLVS IV.

*Soluantur nonnulla obiectiones.*

**O**biicies 1. nos pugnare contra omnes Philosophos, qui vno consensu vniuersalia admittunt; quod videtur temerarium, & periculosum. Respondeo 1. opinionem negantem vniuersalia fuisse communem inter Philosophos, ante tempora Arist. 2. Scotistas nostræ sententiæ fauere, quatenus negamus dari vniuersale per mentis operam; & Thomistas eidem subscribere, quatenus negamus illud dari à parte rei. 3. in rebus ad fidem minimè spectantibus, nullam temeritatis notam ab ijs incurri, qui non tam autoritate humana, quàm ratione ducuntur: & cuilibet licitum esse illud ex Arist. vsurpare, *amicus Plato, sed magis amica veritas.*

Obiicies 2. nullas dari scientias, si non sint vniuersalia, cum non sit scientia de singularibus. Respondeo etsi non sit scientia de singularibus, quatenus sunt corruptibilia; cum tamen non corrumpantur nisi quoad existentiam, nihil vetare quin de eorum prædicatis essentialibus vera scientia dari possit: v. c. de Petro vt est corpus, vivens, animal, homo; neque vlllo modo ad hoc requiri vt sit, aut fingatur quidam homo communis, cui ista prædicata per se primò conueniant.

Confirmatur, nam non datur scientia de homine communi, quia est homo communis; sed quia de illius prædicatis essentialibus dari possunt propositiones indefectibiles, & æternæ veritatis: at idem dici potest de homine particulari, ut homo est, cum eadem habeat prædicata essentialia, ac homo communis. Quare nihil vetat quin de illo ut sic, vera scientia detur.

Obiicies 3. ablato vniuersali nulla vera definitio assignari potest, quia quæ competit vni indiuiduo, alteri applicari non potest. Respondeo id non sequi, quia licet tale indiuiduum ut sic, non possit definiri, potest tamen definiri natura illius secundum prædicata sua essentialia, eaque definitio potest applicari aliis indiuiduis, quatenus similem habent naturam; ut Petrus quatenus homo, potest definiri *animal rationale*, hæcque definitio Paulo, aliisque indiuiduis naturæ humanæ, ut sunt homines, applicari potest.

Dices 1. eo ipso quòd natura Petri secundum se spectatur ut seiuncta à conditionibus indiuiduantibus, est vniuersalis; sicque recidimus in communem sententiam. Verùm antecedens falsum est, ut patet ex dictis, quia ea præcisio non sufficit ut natura Petri sit per se vna, & apta esse in pluribus indiuiduis, ut requiritur ad verum vniuersale. Quod etiam ex mente Thomistarum communiter recepta postea confirmabitur.

Dices 2. si indiuidua, ut supponimus, habent similem naturam, iam sunt vnum in natura, cum similitudo ex Arist. in vnitatem fundetur. Respondeo 1. hoc argumentum posse videri contra Thomistas quatenus docent vni-



nersale fieri per mentis operam; expressè enim statuunt intellectum occasionem sumere ex similitudine indiuiduorum concipiendi eorum naturam vt vnam, sicque fabricandi vniuersale. Quare ex eorum mente, similitudo non fundatur in vnitatem, sed potius vnitatem in similitudine.

Respondeo 2. quod sicut illi, vt huic difficultati satisfaciant; docent, cum ait Arist. ea esse similia quorum qualitas vna est, sensum esse, ea esse similia quæ habent vnam qualitatem non re, sed mente; ita nos dicimus, ea esse similia quæ habent vnam qualitatem non re, aut mente, sed Logice seu æquiuacenter; quatenus etsi distinctas qualitates habeant, perinde tamen se habent in ordine ad scientiam, ac si vnicam haberent qualitatem; vt ex definitione hominis superius allata facile intelligi potest.

Obiicies 4. destructo vniuersali, propositiones omnes fore identicas, & nugatorias; quia cum dico, Petrus est homo, sensus erit, Petrus est Petrus, & sic de aliis. Respondeo neque id sequi, nam ad propositionem identicam non sufficit quod attributum sit idem realiter cum subiecto; quia sic omnes propositiones affirmatiuæ essent identicæ, cum ad veritatem illarum necessaria sit identitas inter prædicatum & subiectum, vt omnes faterentur: sed requiritur vt idem sit prædicatum & subiectum etiam quoad voces, vt cum dico, Petrus est Petrus. Quò fit vt illa propositio, Petrus est homo, non sit identica, esto homo non sumatur pro homine vniuersali, quem supra ostendimus de Petro dici non posse, sed pro ratione essentiali hominis quæ est in Petro.

Atque hæc omnia ex sententia communi Aduersariorum euidenter confirmari possunt. Illi enim post S. Thomam considerant naturam in triplici statu, 1. vt contractam ad indiuidua, 2. vt abstractam per intellectum ab indiuiduis, qua ratione dicunt eam esse vniuersalem 3. secundum se, seu secundum sua prædicata essentialia, quomodo fatentur eam neque esse particularem, neque vniuersalem. Hinc enim manifestum est ad veram scientiam, aut definitionem, aut prædicationem non opus esse quod natura abstrahatur à singularibus, & fiat vniuersalis; sed sufficere quod illa quæ actu contracta est ad indiuidua, consideretur secundum sua prædicata essentialia.

Quæ omnia à nobis dicta sint, saluo meliori iudicio, potiusque disputandi gratia, quàm quidquam ex proprio sensu in perniciem vniuersalis innouandi. Quare quæ tractanda supersunt de hac materia, consentaneè ad communio rem opinionem, de vniuersalibus per mentis operam, accipienda erunt.

## ARTICVLVS V.

### *De nonnullis proprietatibus vniuersalis.*

**V**ariæ proprietates vniuersalis à Philosophis asserri solent, quæ hic breuiter proponendæ sunt. Prima est, esse quoddam totum quod vocant potestatiuum, quia non continet actu partes suas, sicut totum Physicum continet materiam & formam, sed potestate; ita vt etsi earum entitatem contineat, non ta-

men distinctè, sed per modum confusionis, sub aliquo gradu communi per intellectum facta.

Secunda est, vt sit prædicabile, essentia enim vniuersalis est quòd sit aptum inesse multis, vnde tanquam proprietas necessaria oritur, quòd possit prædicari de multis, vt animal de homine, & equo; homo de Petro, & Paulo. Cæterum vniuersale prædicatur tanquam totum de inferiori, etsi explicite vnã tantum illius partem contineat. Vnde dicimus homo est animal, non autem homo est materia; quia animal prædicatur vt totum, materia autem vt pars.

Tertia est, vt vniuersale sit intelligibile, quod ita à nonnullis accipitur vt intellectus non possit cognoscere nisi vniuersale; sed ab aliis melius explicatur vt sensus sit, vniuersale quatenus vniuersale, posse quidem percipi ab intellectu, quia intellectus habet vim non modo percipiendi directè naturas quibus tribuit vniuersalitatẽ, sed etiam reflectendi supra actum quo illis tribuit vniuersalitatẽ; non tamen posse vt sic percipi à sensu, etsi natura vniuersalitati substrata ab ipsis sensibus percipi possit.

Quarta est, vt vniuersale dicatur esse posterius singularibus; quod dupliciter intelligi potest 1. spectato vniuersali secundum naturam realem quæ denominatur vniuersalis; ea enim non existit nisi in singularibus. 2. sumpto vniuersali formaliter pro ipsa vniuersalitate, hæc enim fit per abstractionem intellectus à singularibus; quorum proinde aliqua cognitio præcedere debet.

Quinta est, vt vniuersale sit semper, &

vbique, quod non debet intelligi positivè, sic enim Deus solus est semper, & vbique, quia omni tempore & loco existit; sed negativè ut sensus sit, nullum esse tempus, nullumque locum in quo vniuersale secundum se non possit esse; quod de singulari creato affirmari nequit.

Sexta est, ut vniuersale dicatur esse æternum & incorruptibile; quod etiam intelligi debet negativè, iuxta iam dicta. Ita scilicet ut cum vniuersale abstrahat ab existentia, in qua variatio contingere solet, & dicat tantum prædicata essentialia, consequenter nullum habeat in se principium corruptionis, nec repugnet ex se quin sit ab æterno. Vnde quamvis nullus homo extiterit ab æterno, fuit tamen verum ab æterno, hominem esse animal rationale; adeo ut impossibile sit aliquem hominem vnquam existere, qui non sit animal rationale.

## CAPVT III.

### De Genere.

#### ARTICVLVS PRIMVS.

*Quodnam sit definitum in definitione generis.*

**E**X dictis in Logica constat genus à Porphyrio definiri, id quod pluribus & differentibus specie attribuitur in questione quid est. Iam verò inquiritur quodnam sit definitum huius definitionis, an natura quæ dicitur

genus; an talis vniuersalitas ob quam genus appellatur, seu genereitas; an aggregatum ex natura & genereitate; idque vel ita vt vtrumque ex equo definiatur; vel ita vt natura sit definitum materiale, & vt quod, genereitas verò definitum formale, & vt quo, aut vice versa.

Respondeo & Dico 1. *non definiri naturam secundum se, nec genereitatem per se spectatam, sed concretum ex natura & genereitate.* Prima pars probatur, quia natura secundum se spectata non prædicatur de multis specie differentibus in quid, sed tantum quatenus substat secundæ intentioni; ergo secundum se non est id quod definitur, cum id quod per definitionem explicatur, rei definitæ intrinsecè competere debeat. Confirmatur, quia alias species & indiuiduis generi subiectis competeret, posse prædicari de multis specie differentibus; quod absurdum est. Sequela patet, quia eadem natura, secundum se spectata, quæ est in genere, est etiam in speciebus, & indiuiduis generi subiectis: vt natura animalis in homine & equo; in Petro, & Bucephalo.

Secunda pars eodem modo ostendi potest, quia genereitas in abstracto non prædicatur de multis specie differentibus, adeoque non est id quod definitur in prædicta definitione. Confirmatur, nam genereitas non est genus, sed id quo genus constituitur; at definitur genus ipsum, non autem id quo genus constituitur.

Tertia pars ex præcedentibus colligitur, nam si non definitur natura secundum se, nec genereitas secundum se, consequens est vt concretum ex natura & genereitate definiatur. Confirmatur, quia hoc concretum est prædicabile de multis specie differentibus in quid, v. c. ani-

mal de homine & equo ; ergo definitio allata ei competit, adeoque est id quod definitur ; ad eum modum quo cū album definitur, *id quod disgregat visum*, definitum non est subiectum cui inhaeret albedo, præcisè spectatum, nec ipsa albedo per se spectata, sed concretum ex subiecto & albedine ; hoc enim est propriè quod visum disgregat.

Obiicies, ens per accidens non potest vnica definitione explicari, sed concretum ex natura & genereitate est ens per accidens, ergo, &c. Respondeo maiorem veram esse de ente omnino per accidens, seu cuius partes nullam inter se dicunt ordinē, quale non est genus ; cū natura consideretur vt substās genereitati, qua ratione vnum quodammodo cū illa constituit.

Dico 2. *naturam substantem genereitati esse definitum materiale, & vt quod, genereitatem verò definitum formale, & vt quo*. Primum patet, nam natura ipsa est id quod potest prædicari de multis specie differentibus, animal v. c. de homine & bruto ; ergo natura est definitum materiale, seu id quod definitur.

Secundum ostenditur, quia natura non est prædicabilis secundum se de multis specie differentibus, sed tantum quatenus genereitati substat : quare genereitas est definitum formale, seu vt quo. Quemadmodum quando album definitur, *disgregatum visus*, materiale significatum huius definitionis est id quod disgregat visum, nempe paries, nix, cygnus, &c. formale verò est albedo ipsa, quia est ratio formalis ob quam disgregare visum prædictis subiectis competit ; non enim visum disgregant secundum se, sed quatenus alba sunt.

Obiicies 1. si natura esset definitum quod, definitio ei accidentaliter competeret, quod

absurdum est. Respondeo id non sequi, quia etsi posse de multis prædicari naturæ per se spectatæ accidentaliter competat, non tamen si consideretur ut substantans vniuersalitati, & vnum cum illa constituens; sic enim animal essentialiter potest esse in multis specie differentibus, eique proprium est posse de illis prædicari in quid.

Obijcies 2. cùm definitio generis aliorūque prædicabilium sit logica, in illis secunda intentio, non natura definiri debet. Respondeo non sequi, quia etsi definitio naturæ secundū se non sit logica, est tamen logica definitio illius, ut substantat vniuersalitati; quomodo hic definitur.

## ARTICVLVS II.

*De genere prædictæ definitionis.*

**C**VM genus, ut dictum est, definiatur id quod prædicatur de multis specie differentibus, neque ijs verbis clarè exprimaturs genus, ex quo definitio constare debet; dubium est quidnam subintelligatur quod se habeat per modum generis, an vniuersale, an prædicabile, an vero subiectum ipsum generitatis substratum.

Respondeo & Dico 1. *Vniuersale non habere locum generis in illa definitione.* Probatur 1 quia si vniuersale est genus in illa definitione, ideo est quia quinque prædicabilia sunt veræ specie vniuersalis, & vniuersale est genus respectu illorum; hoc autem non satis certum videtur cum probabilius sit non dari nisi duo vniuersalia strictè sumpta, etsi ex vsu communi quinque admittamus, ut alibi dictum est.

Probatur 2. quia Porphyrius exponens illam

definitionem ait, per illam particulam, *predicari de pluribus*, excludi indiuiduum. Hoc autem falsum esset si vniuersale haberet locum generis, quia iam per illud exclusum esset indiuiduum; cum non sit vniuersale. Quare si illa definitio expendatur iuxta mentem Porphyrij, dici non potest vniuersale in ea habere locum generis.

Dico 2. in illa definitione subiectum non esse loco generis. Probatur, quia si Porphyrius definiisset genus per subiectum, iam per id quod haberet locum generis in illa definitione, exclusum esset Indiuiduum saltem substantiale, cum hoc nequeat esse in subiecto, adeoque immerito dixisset indiuiduum excludi per particulas quæ in definitione locum tenent differentiarum; cum per differentiam propriè non excludantur nisi quæ conueniunt in genere, & per illud iam exclusa non sunt.

Obiicies, illud est discrimen inter accidentia abstracta, & concreta, quod abstracta definiuntur per verum genus, & per subiectum loco differentiarum, vt cum simitas definitur, *curuitas nasi*; concreta verò per subiectum loco generis, vt cum simum definitur, *nasus curuus*; adeoque genus, cum sit concretum accidentale, per subiectum loco generis est definiendum. Respōdeo, non tam hic inquiri quomodo genus definiri debeat, quàm qua ratione à Porphyrio definitum fuerit. At nō constat ab illo definitum esse per subiectum loco generis, quin potius oppositum ex allata ratione non obscure colligitur.

Respondeo 2. etsi verum sit cōcreta accidentium sæpe per subiectum definiri, non minùs verum esse ea per genus posse definiri; vt patet: nam album definiri potest, vel *id quod est disgregatum visus*, quomodo definitur per subie-



atum, vel, *coloratum disgregatiuum visus*, qua ratione definitur per concretum superius loco generis. Quare etsi genus sit concretum accidentale, inde non sequitur illud per subiectum debuisse definiri.

Dico 3. *prædicabile esse genus in allata definitione*, Sequitur ex dictis, cum nihil aliud assignari possit exclusis vniuersali & subiecto. Confirmatur, tum quia cum Porphyrius agat de quinque prædicabilibus, eorumque definitiones, adeoque id in quo inter se conueniunt, aut discrepant, tradat, verisimile est eum rationem communem prædicabilis, in qua omnia conueniunt, pro genere in eorum definitione usurpasse, vt ipsa etiam verba quibus constant, satis indicare videntur.

Tum quia Porphyrius voluit assignare genus aliquod, in cuius ratione indiuiduum conueniret cum genere definito, vt ex antedictis colligitur. At nullum potest congruentius genus assignari, in cuius ratione indiuiduum cum genere definito conueniat, quodque per differentias generis & indiuidui proprias determinatur, quam prædicabile; vtrumque enim est prædicabile, sed genus de pluribus, & indiuiduum de vno: quare fatendum est prædicabile habere locum generis in prædicta definitione.

Obiicies, si definitio generis constat ex genere & differentia, iam datur genus generis, quod repugnat, quia quod subiicitur generi non est genus, sed species. Respondeo nõ repugnare quod idem sit genus & species diuerso respectu. Nam si primum vniuersale spectetur quatenus prædicatur tali modo de multis speciebus, sic dicitur genus; si autem quatenus conuenit cum aliis quatuor prædicabilibus in ratione prædicabilis, vt vult communis senten-

ria, & ab ijs differt in ratione talis prædicabilis, sub eo respectu, genus est species prædicabilis ab alijs quatuor speciebus distincta, & prædicabile est genus respectu earum quinque specierum.

### ARTICVLVS III.

*An genus necessario requirat plures species.*

**H**Oc duobus modis intelligi potest 1. an genus necessario requirat plures species actu existentes. 2. an saltem exigat plures species possibiles, siue sint possibiles physice, id est per potentiam naturalem in rebus existentem; siue logicè, id est per non repugnantiam, seu per potentiam supernaturalem.

Respondeo & Dico 1. *genus non requirere necessario plures species actu existentes.* Probatur, quia creata vna specie animalis potest ab illa, & ab alijs possibilibus abstrahi conceptus quidam genericus contrahibilis ad illas species, & de illis prædicabilis; hoc autem ad verum genus sufficit, quia genus non definitur quod actu est in multis speciebus, sed quod potest esse in illis; sicut vniuersale in cõmuni definitur, quod aptum naturæ est inesse multis. Imò hinc sequitur ad rationem generis non requiri actua-lem existentiam vllius speciei; quo fit vt flos in hieme sit verum genus, etsi supponatur nullam tunc speciem floris in toto orbe existere.

Obiicies 1. ex Arist. & Porphyrio, in genere debere esse plures species. Respondeo hoc verum esse de pluribus speciebus vel actu existentibus, vel possibilibus.

Obiicies 2. genus diuiditur per differentias specierum constitutiuas, & distinctiuas, vt animal

per rationale & irrationale, quibus homo & brutum constituuntur, & inter se distinguuntur. At differentia non distinguunt nisi species actu existentes, ac proinde genus necessario exigit plures species actu existentes. Respondeo minorem falsam esse, siquidem distinctio quæ inducitur inter species per differentias oppositas, cum sit essentialis, ab actuali existentia; ut satis patet exemplo florum, qui non minus inter se specie distinguuntur, quando non sunt, quam dum actu existunt.

Dico 2. *iuxta mentem Porphyrij, & Aristotelis, communiter probatam, ad verum genus requiri plures species saltem ut possibiles.* Probatur manifestè tum ex definitione generis quod dicitur prædicabile de multis specie differentibus in quid. Tum quia genus dici solet totum potentiale essentialiter diuisibile per differentias oppositas, at hæc necessario supponunt multas species possibiles quæ ijs constituentur.

Obijcies 1. si nullum animal esset possibile præter hominem, illa prædicatio, homo est animal, esset essentialis; nec tamen esset specifica, aut differentialis, cum animal non sit species, aut differentia; ergo esset generica, adeoque animal etiam tunc verum esset genus. Respondeo prædicationem illam in eo casu fore specificam; quia enim nullum tunc esset animal præter rationale, eo ipso quod enunciarem hominem esse animal, implicite saltem dicerem eum esse rationalem, sicque prædicatio illa esset specifica.

Obijcies 2. nonne tota & essentialis ratio animalis reperitur in homine, imò & in quolibet hominis indiuiduo? ergo falso dicitur genus necessario exigere plures species saltem possibiles. Respondeo non sequi, nam aliud

est loqui de animali secundum se, ut est corpus animatum sentiens, qua ratione animal non est genus nisi materialiter; aliud ut est formaliter genus, seu ut est prædicabile de multis specie differentibus in quid. Vnde etsi sub priora ratione possit animalis essentia conservari in vna specie, & in vno indiuiduo; non tamen sub posteriori, de qua tantum hic agimus.

Dico 3. *sufficere ad genus, quod species possint existere siue per potentiam Physicam, siue per potentiam Logicam.* Probatur 1. ex definitione generis; nam genus definitur præcisè quod potest prædicari de multis specie differentibus in quid, nihil determinando de modo quo species illæ sunt possibiles. Quare dummodo naturæ specie differentes existere possint, id sufficiet ad saluandam definitionem generis.

Probatur 2. nam cum ex communiore sententia, vniuersale fiat per mentis operationem, naturam communem abstrahentis ab inferioribus, tam facile potest intellectus abstrahere genus à speciebus logicè tantum possibilibus, quàm ab ijs quæ per vim naturalem existere possunt; & genus sic abstractum æquè prædicabitur in quid de speciebus non repugnantibus, ac de existentibus aut physicè possibilibus; ut animal de infinitis speciebus brutorum creabilibus, ac de ijs quæ hætenus productæ fuerunt, aut aliquando extituras sunt.

Obijcies, vniuersale non esse meram fictionem mentis, sed habere fundamentum in rei natura; adeoque genus non respicere nisi species naturaliter possibiles. Respondeo non sequi, quia ut vniuersale nō sit mera fictio mētis,

sufficit quod abstrahatur à naturis verè & realiter multiplicabilibus, siue sint multiplicabiles per potentiam naturalem, siue per supernaturalem. Sic enim omnes communiter intelligunt solem esse verum vniuersale, etsi præter vnicum solem qui realiter existit, alij non sint possibiles nisi per potentiam Logicam; de quo infra agetur.

---

## ARTICVLVS IV.

*Quomodo genus se habeat ad species, & ad individua de quibus predicatur.*

**P**REMONEO 1. genus prædicari de pluribus speciebus, & de earum indiuiduis, v. c. animal de homine & equo, itemque de Petro & Bucephalo; quo fit vt genus tam species quàm earum indiuidua intrinsecè respiciat. Est autem difficultas quomodo genus ad illa omnia referatur, seu quodnam sit tam proximum & immediatum, quàm adæquatum correlatiuum generis; an species, an indiuidua, an autem aliquid ipsis commune, nempe subiicibile in quid incomplete, vt nonnulli arbitrantur.

PRÆMONEO 2. Illud dici proximum & immediatum correlatiuum alicuius, quod sine interuentu alterius terminat illius relationem; remotum verò & mediatum quod alio mediante eam terminat. Rursus illud dicitur correlatiuum adæquatum, quod ita relationem terminat vt eam adæquet, seu vt nihil aliud præter ipsum eam terminet; inadæquatum autem quod non solum, sed simul cum

alio relationem terminat. Atque hoc totum explicatur exemplo potentia quæ fertur in actum & obiectum; actus enim est proximum & immediatum illius correlativum, obiectum verò remotum & mediatum: at actus solus, & obiectum solum sunt correlativa inadæquata, ambo autem simul constituunt correlativum totale & adæquatum. His positis,

Respondeo & dico 1. *Speciem esse proximum & immediatum generis correlativum*. Probatur 1. nam ex Arist. 6. Topic. cap. 2. relativum debet definiri per suum primum & immediatum correlativum; At Porphyrius cap. 2. Introduc. definiuit genus per speciem, & speciem per genus. Imò declaravit se necessitate compulsus ita definiisse, quia genus est speciei genus, & species est generis species; seu quia ad se mutuo respectu proximè referuntur. Quare negari non potest quin, saltem ex mente Porphyrij, species sit proximum & immediatum generis correlativum.

Probatur 2. nam illud est proximum & immediatum generis correlativum, cui genus proximè & immediatè communicatur; at genus proximè & immediatè communicatur speciebus; animal v. c. homini & bruto, ergo species sunt proximum & immediatum correlativum generis. Major negari non potest, minor verò perspicua est ex arbore Porphyrij ab omnibus admissa, in qua genus immediatè diuiditur per differentias specierum constitutivas, & per species descendit ad individua; quo ipso ostenditur species esse correlativum generis proximum & immediatum.

Obijcies, cum species & individua subij-

ciantur generi , non incongruè dici posse subijcibile commune speciebus , & indiuiduis , esse immediatum generis correlativum. Verùm hoc gratis affirmatur , quia sicut repugnat animal rationale abstrahi ab irrationali & rationali ; ita & subijcibile immediatum à subijcibili mediato , qualia sunt indiuidua , & immediato , cuiusmodi sunt species.

Dico 2. *Totale & adequatum generis correlativum non esse species solas , sed species simul cum indiuiduis.* Probatur 1. nam genus non tantum prædicatur de speciebus in quid incompletè , sed etiam de omnibus earum indiuiduis ; ergo non tantum refertur ad species , sed etiam ad earum indiuidua ; adeoque totale & adequatum generis correlativum ex speciebus & indiuiduis constituitur.

Confirmatur , nam genus definitur , quod prædicatur de multis specie differentiis in quid ; at quamvis diversæ species eiusdem generis primo inter se specie differant , earum tamen indiuidua secundario differunt specie , quatenus diversas rationes específicas participant , quare etsi genus immediatè & proximè species respiciat , negari non potest quin mediatè & remotè feratur ad earum indiuidua , ac proinde quin hæc spectent ad totale & adequatum correlativum generis.

Probatur 2. Nam cum animal v. c. referatur non modò ad hominem & equum , sed etiam ad Petrum & Bucephalum , vel illa relatio respectu Petri & Bucephali est generica , vel non ; si non est generica , qualis-nam est ? Certè non est specifica , cum species dicat totam essentiam indiuiduorum de quibus prædicatur , animal autem non dicat totam es-

sentiam Petri , & Bucephali vt perspicuum est : At nec dici potest illam prædicationem spectare ad aliquod ex tribus vltimis prædicabilibus , cum animal nec sit differentia , nec proprium , nec accidens commune respectu Petri & Bucephali : ergo fatendum est esse prædicationem genericam , cum non plura sint quàm quinque vulgaria prædicabilia , & ridiculum sit fingere cum Louanienfibus , sextum aliquod vniuersale innominatum , ad quod prædictio generis de indiuiduis reducatur.

Obijcies , si genus refertur ad species & indiuidua , vel refertur ad illa eadem relatione , vel diuersa : non eadem , quia termini sunt distincti , non etiam diuersa , quia sic genus essentialiter includeret diuersos respectus , adeoque esset quid æquiucum. Ergo genus non refertur simul ad species & indiuidua , sed ad species duntaxat. Respondeo genus referri ad species , & ad indiuidua eadem relatione , non obstante diuersitate terminorum , quia vnus respicitur immediatè , & alter mediatè : sicut potentia fertur eadem relatione in actum suum immediatè , & eo mediante in obiectum.





## CAPVT IV.

## DE SPECIE ET INDIVIDUO.

## ARTICVLVS PRIMVS.

*An species rectè definiatur, id quod subijcitur generi, & de quo genus prædicatur in quid.*

**R**espondeo definitiones istas admittendas esse, tum quia communiter approbantur à Logicis, tum quia quæ contra illas obijciuntur facile solui possunt, vt ex jam dicendis constabit: Si prius obseruatum fuerit, speciem hic non considerari vt est prædicabilis, sed quatenus est subijcibilis, quod non habet nisi per ordinem ad genus, per quem proinde definiri debuit.

Obijcitur 1. genus à Porphyrio fuisse definitum per speciem, adeoque si jam species definitur per genus, committi vitiosum circulum; quia sequeretur idem esse magis & minus notum respectu eiusdem, quod repugnat. Respondent aliqui genus non fuisse definitum per speciem, sed per ordinem ad ea quæ specie differunt, qualia sunt non tantum species, sed etiam specierum individua; ac proinde cum jam species definitur per genus, non committi circulum.

Verum quia negari non potest genus fuisse

præsertim definitum per speciem, tanquam per terminum proximum & immediatum, vt supra ostendimus, quin & ipse Porphyrius affirmat se genus per speciem, & speciem per genus definiisse; ideo aliter Respondemus; in hoc definiendi modo nihil esse reprehendendum, quia vt idem autor monet, hoc est proprium relatiuorum vt vnum definiatur per ordinem ad aliud; at genus & species sunt relatiua, quoniam genus est speciei genus, & species est generis species. Quare genus debuit definiri per ordinem ad species, & species per ordinem ad genus.

Confirmatur, nam vniuersale dicit intrinsecè ordinem ad multa, & per talem ordinem essentialiter definitur, vt patet ex dictis cap. 1. quare cùm primum vniuersale dicatur genus per ordinem ad multas species, per respectum ad illas definiri debet. Contra verò subijcibile non potest intelligi nisi per ordinem ad id cui subijcitur, quo fit vt cùm species subijciatur generi, non nisi per ordinem ad illud, vt subijcibilis, definiri possit. Dico vt subijcibilis, nam si species consideretur vt prædicabilis, sic per ordinem ad inferiora definiri debet.

Obijcitur 2. si species rectè definiretur per genus, ea posset etiam legitimè definiri per definitionem generis, adeoque per seipsam, hoc modo, *Species est id quod subijcitur prædicabili de multis specie differentibus in quid*, quæ tamen definitio absurda est & nugatoria. Sequela patet quia ex Arist. 2. Topic. cap. 5. quando aliquid ponitur in definitione, potest loco illius eius definitio in ea usurpari, vt si in definitione hominis loco animalis usurpetur corpus animatum sentiens. Respondeo ne-

gandam esse sequelam maioris, & ad illius probationem dicendum, Aristotelem intelligendum esse de eo quod ponitur in definitione, tanquam pars intrinseca rei definitæ, cuiusmodi est animal in definitione hominis; non autem de eo quod ponitur tantum ut terminus extrinsecus rei definitæ, quomodo genus ponitur in definitione speciei, & generatim vnum relatiuum in definitione illius.

Obijcitur 3. definitiones illas competere indiuiduo, adeoque non esse legitimas. Siquidem indiuiduum subijcitur generi, & genus de illo prædicatur. Respondeo antecedens falsum esse, quia definitiones prædictæ intelliguntur de subijcibilitate & prædicabilitate præstantiori, quæ est immediata & proxima, qualis non competit indiuiduo, sed tantum speciei; eò quod indiuiduum non subijcitur generi, & genus non prædicatur de indiuiduo, nisi mediante specie.

Quod si istes, animal prædicari immediatè de indiuiduis, & indiuidua immediatè subijci animali, ut patet in istis propositionibus ab omnibus admissis, Petrus est animal, Bucephalus est animal, ac proinde solutionem allatam non satisfacere. Respondeo prædicationem animalis de Petro & Bucephalo, etsi sit immediata quoad voces, in re tamen esse mediatam; quia cum animal non descendat ad indiuidua illa nisi mediante specie, adeoque nec Petrus sit animal, nisi quia est homo, nec Bucephalus, nisi quia est equus; hinc euidenter sequitur Petrum & Bucephalum non subijci generi, & genus de illis non prædicari nisi mediatè.

Urgebis adhuc, esto Petrus & Bucephalus qui sunt indiuidua completa & specifica, me-

diatè tantùm subijciantur generi; negari tamen non potest quin individua quæ vocantur generica, vt hoc animal, & hæc qualitas ei immediatè subijciantur; vt cùm dicimus, hoc animal est animal, hæc qualitas est qualitas; tunc enim inter individuum & genus nihil mediat, sicque allatæ definitiones speciei saltem individuuis genericis competunt. Respondeo 1. nullum dari à parte rei individuum genericum, seu quod non constitutur in aliqua specie, cùm repugnet genus immediatè contrahi per differentiam individua-lem. Quare cùm dico, hoc animal est animal, demonstro aliquod animal quod à parte rei est in aliqua specie animalis, etsi verbis expressè id non declaretur; eique ratio animalis, quia est in tali specie, adeoque mediatè competit.

Respondeo 2. etsi admitteretur individuum genericum, illudque immediatè generi subijceretur, non tamen eo modo quo species generi subijcitur; quia species subijcitur generi formaliter vt genus est, seu vt includit tantùm partem illius essentialem materiz respondentem; at individuum genericum si daretur, non subijceretur generi formaliter sub ratione generis, sed sub ratione speciei; quia genus quod respiceret, totam illius essentialiam ad modum speciei includeret; animal v. c. totam essentialiam huius animalis, & qualitas totam essentialiam huius qualitatis.

## ARTICVLVS II.

*An species infima rectè definiatur, quæ  
de multis numero differentibus præ-  
dicatur in quid.*

**H**anc etiam definitionem speciei infimæ omnes Philosophi communiter probant, tum propter autoritatem Porphyrij qui illam tradit, tum quia rectè per illam explicatur ratio speciei infimæ, vt constituit secundum vniuersale ab alijs distinctum. Triatamen contra illam obijci possunt, 1. solem, lunam, & mundum veras esse species, cum tamen non prædicentur, nisi de vnico individuo. Respondet quidam Neotericus solem, lunam, & mundum esse res singulares, non vniuersales. Quod si arguas hoc quidem verum esse de hoc sole, hac luna, hoc mundo, posse tamen ab hoc sole aliisque possibilibus abstrahi naturam specificam, quæ de illis ex æquo prædicetur, Respondet non posse esse plures soles, aut mundos, adeoque solem aut mundum non esse species.

Verùm hæc responsio parum tuta videtur; fides enim docet Deum posse efficere quidquid non implicat contradictionem; at non implicat contradictionem quod detur alius sol, alia luna, alius mundus. Vnde enim talis contradictio oritur? Nam sicut creato vno homine, vno leone, vno equo, alius creari potuit in eadem specie; ita non repugnat ex se creari alium solem, aliam lunam, alium mundum; adeoque si ista nihilominus mul-

*Metaph.*

D

tiplicari nequeunt, ideo est quia potentia Dei in creatione mundi fuit exhausta, nec ad tales effectus se extendere potest; quod non modò lumini naturali, sed etiam fidei Catholice repugnat.

Dicendum ergo ad objectionem allatam, solem, lunam & mundum posse abstrahi ab hoc sole, hac luna, hoc mundo aliisque possibilibus, sicque posse dici species. Et quamuis species illæ de facto non prædicentur nisi de vnico sole, vnica luna, vnico mundo, posse tamen de multis numero differentibus prædicari; quod sufficit ad rationem speciei. Fatendum tamen mundum non esse propriè speciem, cum sumatur pro hac vniuersitate ex cœlo, elementis, aliisque rebus non modo specie, sed etiam genere differentibus, coagmentata.

Obijcitur 2. ex mente S. Thomæ tot esse species Angelorum, quot sunt Angeli, ita vt nulla eorum species possit plura habere sub se indiuidua, numero tantum distincta, hinc enim apertè sequitur non esse de ratione speciei, vt possit prædicari de multis numero differentibus. Verum in primis hæc obiectio facillè refellitur primo ex dictis lib. 3. Ideæ Theologiæ speculat. Vbi ostendimus ex communi Scholasticorum sententia, non repugnare multiplicationem numericam in eadem specie Angelica, imò de facto dari plures Angelos solo numero distinctos.

Secundò, dato quòd species Angelorum essent immultiplicabiles in plura indiuidua solo numero distincta, ex non haberent veram rationem vniuersalis, & prædicabilis; cum omnium consensu vniuersale sit vnum aptum inesse multis, & prædicari de il-

lis. Quare sicut genus non potest conseruari in vnica specie, nisi alix sint possibiles saltem Logice, vt ostendimus capite præcedenti; ita nec species in vno indiuiduo, nisi alia sint possibilia, aut naturaliter, aut saltem per virtutem diuinam.

Respondent aliqui Thomistæ naturam v. c. Michaëlis, prout præcisam à sua differentia indiuiduali, esse indifferentem ad multa indiuidua, & posse determinari ad illa (si essent possibilia) per differentiam indiuidualem vniuscuiusque, sicque esse vniuersalem & prædicabilem.

Verum hæc responsio refellitur 1. quia Thomistæ communiter docent, rationem indiuidualem non distingui à specifica in Angelis, quia carent materia, & consequenter tot esse Angelorum species, quot sunt indiuidua Angelica. Isti vero supponunt naturam specificam Angeli distingui à differentia illius indiuiduali, quod non satis cohæret cum doctrina illa apud ipsos recepta.

Refellitur 2. quia valdè absurdum est ponere aliquam speciem vniuersalem, cuius indiuidua sint impossibilia, cum potius eo ipso censeretur species illa impossibilis, sub ratione vniuersalis, quod impossibile est indiuidua sub illa multiplicari; vt manifestum est tum ex definitione speciei communiter ab omnibus probata, tum ex definitionibus vniuersalis superius, ex consensu omnium, etiam Aduersariorum traditis.

Confirmatur, quia eadem libertate dici posset, Deum esse veram speciem vniuersalem, etsi non sit, nec esse possit nisi vnus numero Deus. Siquidem diuinitas ex se

posset reperiri in multis indiuiduis naturæ diuinæ, si illa essent possibilia.

Obijcitur 3. definitionem prædictam competere generi, cum de multis numero differentibus prædicetur, ut animal de Petro; & Paulo. Respondeo longè aliter genus prædicari de indiuiduis, quàm speciem: genus enim prædicatur de illis tantum mediaturè, & incompletè, species verò immediaturè, & completè: ac præterea genus de multis specie & numero differentibus prædicatur, cum species infima tantum de multis numero.

Instabis, duas animas rationales posse diuinitus informare materias specie distinctas, cum quibus proinde componerent duos homines specie distinctos, de quibus tamen homo essentialiter prædicaretur, sicque speciem posse prædicari de multis specie differentibus. Respondeo 1. casum illum esse fictitium, agendo de anima rationali qualis de facto existit; cum enim omnes animæ rationales sint omnino similes quoad essentiam, ita ex natura sua determinantur ad materiam eiusdem rationis, ut ne quidem diuinitus materias specie distinctas informare possint.

Respondeo 2. admissa ea hypothese, homo non esset species infima, sed genus eo ipso quod de multis specie distinctis prædicaretur, esto distinctio specifica non oriretur eo casu à formis, ut fit jam in speciebus distinctis, sed à diuersitate materiæ, ut supponitur. Et idem dicendum est si supponamus, posse dari homines specie distinctos ratione formæ, ut fert probabilior sententia; hoc enim supposito fateri de-



bemus non modo hominem forè genus , si crearetur noua hominum species , sed etiam de facto esse ; cum ad denominationem generis sufficiat quòd species sub illo diuinitus multiplicari possint , vt supra dictum est. Quare quoties loquimur de homine vt de specie infima , id accipiendum est iuxta vulgarem hominum sensum , qui sine examine supponunt tanquam certum, non posse creati homines alterius speciei; cuius oppositum tanquam probabilius amplectemur , vbi de anima rationali.

Si intes , hinc colligi nullam dari speciem infimam , adeoque speciem è numero vniuersalium eradendam esse , cum quod dicitur de homine , à pari de alijs omnibus speciebus infimis dici possit. Respondeo 1. id non benè ex dictis colligi , quia licet detur gradum hominis ex se esse genericum , & posse diuidi in plures species , inde non sequitur eandem illimitationem rebus omnibus competere ; cum saltem fatendum sit aliqua accidentia ita esse contracta & determinata ad vnicam speciem, vt in plures species diuidi non possint , vt manifestum est in figuris & numeris. Constat enim omnes circulos esse eiusdem speciei , omnesque ternarios , & sic de alijs; quod absolutè sufficit vt dicamus dari aliquas species infimas; etsi , vt verum fatear, satis operosum sit speciem infimam inter substantias reperire , spectata Dei omnipotentia , cui nihil denegare possumus nisi quod apertam inuoluit repugnantiam.

Respondeo 2. etsi nulla daretur species infima per ordinem ad omnipotentiam Dei, inde non sequi secundum vniuersale abo-

lendum esse, quia cùm dentur multæ species quæ de factò non habent, nec vnquam habituræ sunt sub se nisi indiuidua solo numero distincta, id sufficit vt secundum vniuersale ex eiusmodi speciebus constituatur. Præsertim cùm non pauci contendant repugnare etiam de potentia absoluta, quod de indiuiduis specie distinctis prædicentur. Alij verò qui id nobiscum possibile existimant, putent naturas illas quæ sub se non continent nisi indiuidua eiusdem rationis, dicendas esse species actu, & genera tantum in potentia; quatenus de potentia extraordinaria plures species habere possunt.

---

### ARTICVLVS III.

*An rectè assignata sint speciei habitudines seu respectus.*

EX dictis constat duplicem esse speciem, aliam subalternam, aliam infimam; cuius diuisionis ratio inde sumitur, quia cum species componatur intrinsecè ex genere & differentia, contingit interdum eam ita perfici per differentiam, vt per gradum aliquem vltiorem sit adhuc essentialiter perfectibilis; quomodo constituitur species subalterna potens sub se habere plures species. Interdum verò per differentiam ita actuatur vt suum habeat vltimum complementum essenziale, & jam immediatè sit capax differentiarum individualis; qua ratione dicitur species infima, quæ scilicet non po-

test in alias species diuidi , sed tantum in indiuidua : Quo posito ,

RESPONDEO & dico 1. *Speciem subalternam duplicem habere habitudinem , alteram ad genus , alteram ad inferiora : Et priori respectu dici speciem , posteriori vero genus , quia sic multa respicit specie distincta.* Ex quo patet duas illas habitudines esse formaliter inter se distinctas , cum earum termini adæquari sint formaliter distincti , & fieri nequeat ut denominationes generis & speciei ex eodem respectu eidem tribuantur. Est autem maior dubitatio quo sensu Porphyrius dixerit , speciem infimam non habere nisi unam habitudinem , cum constet eam habere supra se genera , & sub se indiuidua ad quæ refertur. Quod ut intelligas ,

Dico 2. *Speciem infimam seu specialissimam habere duas habitudines distinctas , alteram ad genus cui subijcitur , alteram ad indiuidua de quibus prædicatur.* Probatur quia tunc admittendæ sunt relationes distinctæ , quando termini sunt formaliter distincti , ut patet ex jam dictis : at species infima quatenus ex vna parte refertur ad genus , & ex alia ad indiuidua , habet terminos formaliter distinctos ; ergo ut sic , duplicem habet relationem , alteram ad genus , alteram ad indiuidua.

Confirmatur , nam ideo species subalterna habet duas habitudines distinctas , quia quatenus respicit superiora & inferiora , habet terminos formaliter distinctos , nempe ex vna parte genus , & ex alia speciem : ergo similiter in specie infima admittendæ sunt duæ relationes , cum supra se respiciat genus , & sub se indiuidua. Eo vel

maximè quia respectu generis se habet vt inferius, & subiectum de quo genus prædicatur; at respectu indiuiduorum se habet vt superius, & attributum quod de illis prædicatur.

Dico 3. *Etsi relationes prædictæ sint duæ, ambas tamen eandem denominationem speciei infimæ tribuere.* Probatum, quia siue species infima referatur ad genus, siue ad indiuidua, semper denominatur species, & in hoc differt à specie subalterna, quod hæc relata ad superiora dicitur quidem species, relata vero ad inferiora dicitur genus. Exempli gratia, animal vt relatum ad viuens, vel ad corpus dicitur species; vt relatum verò ad hominem, vel ad equum dicitur genus: at homo relatus ad animal dicitur species, & relatus ad Petrum, & Paulum dicitur etiam species.

Atque hoc sensu Porphyrius supra relatus dixit, speciem specialissimam vnam dicere habitudinem, *Quia*, inquit, *etsi superiora & inferiora respiciat, ea respicit tanquam species, inferiora quidem vt ea continens, superiora verò vt ab ijs contenta.* In quibus verbis duo obseruanda sunt 1. vnam poni habitudinem nomine, quatenus vnam tribuit denominationem. 2. non tamen esse propriè vnam habitudinem, sed duas essentialiter distinctas, alteram contenti ad continens, nimirum speciei ad genus; species enim continetur sub genere tanquam inferius sub superiori, & pars subiectiua sub toto potestatiuo: alteram continentis ad contentum, nimirum speciei ad indiuidua; species enim est superius, & totum respectu indiuiduorum.

Nota 1. speciem vt subijcibilem non constituere secundum prædicabile, sed vt dicit ordinem ad inferiora; cùm hoc tantum posteriori modo sit quid superius, & de multis prædicari possit.

Nota 2. speciem vt præcisè de multis prædicabilem, non constituere secundum prædicabile, cùm species subalterna de multis specie differentibus possit prædicari, nec tamen vt sic spectet ad secundum prædicabile, sed ad primum. Vnde sequitur speciem quæ constituit secundum vniuersale, esse illam quæ prædicatur tantum de multis numero differentibus; quod soli speciei infimæ competit.

## ARTICVLVS IV.

*Ad possit abstrahi communis & vniuoca ratio indiuidui ab omnibus indiuiduis.*

**N**ON quærimus an possit abstrahi communis & vniuoca ratio speciei ab omnibus indiuiduis quoad naturam spectatis, v. c. communis ratio hominis à Petro & Paulo, quatenus sunt homines. Iam enim supra non semel supposuimus, ex communi sententia, id fieri posse, sed dubium est an ex indiuiduis formaliter vt sunt indiuidua, abstrahi possit communis ratio indiuidui; adeo vt indiuiduum vt sic, sit terminus vniuersalis & vniuocus respectu huius & illius indiuidui, quatenus sunt indiuidua.

Respondeo & Dico 1. non facile à nobis in-

telligi quomodo abstractio illa admitti possit, iuxta sententiam communiorē inferius tractandam, de præcisione graduum obiectiua. Probatur, quia si ratio illa communis indiuidui abstrahi potest, ea eodem modo proportionē seruata abstrahi debet, ac ratio hominis abstrahitur à Petro & Paulo, & ratio animalis ab homine & bruto; at impossibile est iuxta illam sententiam, quòd ratio communis indiuidui eo modo abstrahatur, siquidem per præcisionem obiectiuam ita abstraho rationem communem hominis à Petro & Paulo, vt remaneant in ijs differentię indiuiduales quibus distinguuntur; & ab homine & equo sic abstraho rationem communem animalis, vt in ijs remaneant differentię specificę per quas distinguuntur, quatenus illę ab intellectu abstrahente non attinguntur, ac si verè à gradu communi distinguerentur: at si abstraho à Petro & Paulo, ipsam rationem indiuidualem, iam in ijs nihil remanet quod talis abstractionis fundamentum esse possit; siquidem indifferentia indiuidualis est, id quo *unum* indiuiduum *ultimò* differt à quocunque alio, adeoque non potest in illa poni aliqua formalitas communis omnibus indiuiduis, & ratione distincta à formalitatibus proprijs quibus inter se differunt; cū sine illa indiuiduum sufficienter constitutum intelligatur.

Confirmatur, nam etsi homo & equus conueniant in ratione animalis, per differentias tamen específicas *ultimò* differunt, ita vt nulla in ijs possit assignari formalitas homini & equo communis. Aliàs si conceptus differentię posset cum fundamento secari in duos conceptus, quorum vnus esset com-

munis , & alter proprius ; dicendum esset similiter conceptum hunc proprium posse rursus diuidi in duas formalitates , quarum alia esset communis , & alia differentialis , sicque in infinitum abiretur. Quare cum iste progressus sit impossibilis , fatendum est in differentia specifica esse vnā tantū formalitatem , per quam secundum se totā vna species distinguitur ab alia. Quod autem dicimus de differentia specifica , ad indiuidualem proportionē seruata applicandum est , ita scilicet vt Petrus per totā Petreitatem distinguatur à Paulo , neque in ea concipiatur cum fundamento , aliqua formalitas in qua cum Paulo conueniat.

Vbi aduerte me loqui , iuxta sententiam communiorē quæ præcisiones obiectiuas admittit ; nam si quæstio determinanda sit iuxta illos qui non nisi præcisiones formales amplectuntur , dicendum videtur non repugnare quod detur ratio communis indiuidui ab hoc & illo indiuiduo abstracta. Hoc enim fiet per actum intellectus quo omnia indiuidua confuse cognoscantur per modum vnius ; sicut homo dicitur in ea sententia fieri vniuersalis , per actum intellectus confundentem omnes homines , ac si esset vnus homo duntaxat. Verū contra responsionem in priori sensu negantem,

Obijcies 1. definitio allata communis est omnibus indiuiduis substantiæ ; ergo per illam aliquid commune definitur , non sola vox , ergo aliquid reale per vocem significatum. Respondeo per illam definitionem non defini solam vocem , nec aliquid om-

nibus indiuiduis realiter commune, sed singula indiuidua per se. Vnde cum homo in communi per se definiatur, non per Petrum, vel Paulum; indiuiduum è contra non per se definitur, sed per Petrum & Paulum.

Obijcies 2. legitimum esse hunc syllogismum, omne indiuiduum est incommunicabile, Petrus est indiuiduum, ergo est incommunicabilis: at hoc dici non posset si nihil daretur commune vniueum indiuiduis, quia sic medium, nempe indiuiduum, esset æquiuocum, vt pote nihil commune indiuiduis significans præter vocem. Respondeo negando minorem, quia vt syllogismus prædictus rectè concludat, sufficit quod maior propositio verificetur de omnibus & singulis indiuiduis, quotquot existunt, quia nullum est quod non sit incommunicabile. Quare verba illa, omne indiuiduum, non significant aliquid indiuiduis commune, sed confusè singula indiuidua, atque adeo perinde est ac si inductione probares, Petrum esse incommunicabilem, eo quod omnia alia indiuidua sunt incommunicabilia.

Obijcitur 3. Petrum & Paulum id habere commune vt sint incommunicabiles; ac proinde rationem aliquam communem ab ijs abstrahi posse. Respondeo id quod dicitur commune Petro & Paulo, non esse commune nisi quoad voces, vel ad summum quoad conceptum nostrum formalem, sine fundamento in re: nam à parte rei ea conuenientia in eo consistit, quòd Petrus non possit esse Paulus, nec Paulus esse Petrus; id est quòd summè inter se differant. Vnde id perinde est ac si diceres, Petrum & Paulum con-



venire in eo in quo summopere inter se discrepant; vel albedinem & nigredinem in eo inter se similes esse, quod sicut illa huic est dissimilis, ita hæc illi.

Dico 2. *etsi daretur conceptum commune individui abstrahi posse ab omnibus individuis, non tamen concedendum esset conceptum illum esse univocum, sed tantum analogum.* Probatur, nam, vel ratio communis quæ supponitur abstracta, relinquit aliquam rationem specialem, vel nihil; hoc posterius falsum est, quia sic non est abstractio, seu præcisio unius gradus ab alio, sed integra totius individui ablatio: si verò prius verum est, ut profectò esse debet, sicut quod post præcisionem remanet, debet necessariò esse ens, ita debet esse unum, & indivisum, adeoque individuum. Vnde cum ratio communis individui non perfectè præscindat à rationibus specialibus, sed eas transcendat eo modo quo ens transcendit suas differentias, ea non potest esse univoca, sed tantum analogica; ut ex infra dicendis, ubi de analogia entis, clariùs intelligetur.



## CAPVT V.

## De Differentia.

## ARTICVLVS PRIMVS.

*An dentur differentia infima, & simplices.*

**S**ensus est, an species infimæ constituantur per differentias infimas, quæ scilicet cum illis speciebus reciprocentur, ita vt nulli alteri conueniant; an verò eiusmodi species constituantur per combinationem plurium differentiarum, quarum singulæ alijs speciebus conueniant, non tamen omnes simul iunctæ; ad eum modum quo in Logica diximus ex Porphyrio, indiuiduum constare ex collectione multorum accidentium, quæ singula quidem esse possunt in alio, non tamen omnia.

Respondeo admittendas esse de facto differentias simplices, quibus species infimæ constituantur. Probatur 1. quia non est potior ratio cur species subalternæ constituantur per differentias simplices, quàm species infimæ; at species subalternæ eo modo constituuntur, vt patet, nam animatum additum corpori facit viuens, sensitium additum viuenti facit animal, &c. Ergo & species infima per vnâ simplicem differentiam constituitur.

Probatur 2. quia species infimæ habent proprietates vltimas & reciprocas, vt homo

risibilitatem, equus hinnibilitatem, &c. Ergo & differentias ultimas; sequela patet, quia cum proprietates à differentia oriantur, melius intelligitur vnam simplicem proprietatem ab vna simplici differentia oriri; quàm à multarum combinatione.

Confirmatur, nam dummodo intelligas hominem esse rationalem, ex eo satis intelligis eum esse aptum ad ridendum; adeoque sicut non requiritur alia differentia ad inferendam illam proprietatem, quæ cum homine reciprocatur, ita neque ad constituendam hominis speciem.

Probatur 3. nam ex omnium consensu, differentia respondet formæ, sicut genus materiæ, vt infra explicabitur: at forma reciprocatur cum composito naturali quod ex ea constituitur, ita vt neque magis, neque minus latè pateat; vt constat in forma lapidis quæ omnibus & solis lapidibus competit, in forma equi quæ in omnibus & solis equis reperitur; & sic de alijs: ergo similiter differentia reciprocatur cum specie quam constituit, adeoque vel negandæ sunt omnes species infimæ, vel admittendæ differentiæ aliquæ infimæ, seu quæ cum ijs reciprocantur; ita vt ijs omnibus, & nulli alij competant.

Obiicies 1. Aristotelem 2. poster. tex. 17. docere ad definiendam speciem infimam sumendas esse plures differentias subalternas, quarum singulæ latius pateant re definita, omnes verò simul sumptæ cum ea conuertantur. Respondeo Aristotelem id non dixisse quod putaret speciem infimam eo modo exactè definiri, aut non dari differentiam infimam: oppositum enim patet ex 7. Metaph.

tex. 42. ubi ait unius rei unicam esse differentiam, & per illam dandam esse definitionem; sed ut innueret per varias proprietatum combinationes essentiam speciei infimæ, ut plurimum nobis ignotam, aliquo modo declarari.

Obiicies 2. Porphyrium definisse differentiam, id quod *prædicatur de pluribus specie differentibus in quale quid*, ex qua definitione cum sit generalis, colligitur omnem differentiam esse genericam, adeoque nullam esse specificam seu infimam. Respondeo definitionem illam non comprehendere omnes differentias, ut vel ex eo patet quod Porphyrius aliis locis aperte fauet nostræ sententiæ; ut cum Introduct. cap. 12. ait, *Differentia in multis speciebus sæpe cernitur, ut quadrupes in pluribus animalibus specie differentibus*. Illa enim particula *sæpe*, clarè indicat non omnes differentias prædicari de multis specie differentibus, adeoque esse aliquas quæ cum specie infima conuertuntur: quare ex ea definitione nihil concludi potest contra differentiam infimam.

Putant autem aliqui ideo Porphyrium definisse solas differentias genericas, vel quia genericæ sunt valde notæ, & infimæ ignotæ; vel quia hic Porphyrius non agit nisi ex communi aliorum sententia, suo autem tempore Philosophi communiter negabant differentias ultimas; vel quia ex assignata definitione facile potest colligi generalis definitio competens etiam differentiis ultimis, si nimirum omittantur duo illa verba, *differentibus specie*, ut in Logica observatum est.

Obijcies 3. eundem Porphyrium in definitione speciei semper afferre plures differentias, quarum quolibet latius patet specie definita, vt cum hominem definit, *animal rationale mortale*; nam rationale dicitur de Deo & Angelis, mortale verò de omnibus animalibus, at vtrumque soli homini competit Respondedo, quòd Porphyrius eo modo hominem definierit, id, vt alibi aduertimus, ex Platoniorum errore profectum, qui falsò existimabant Deum, & Angelos esse animalia rationalia. Inde tamen non sequitur quòd nullam differentiam infinam admiserit, sed ad summum quòd pluribus vtendum putauit, quando veræ differentiz ignorantur, vt plerumque contingit.

## ARTICVLVS II.

*An differentia inferior superiorem formaliter contineat.*

**D**Ieo, formaliter, non enim dubitatur an differentia inferior includat materialiter seu identicè superiorem, cum ex communi sententia inter se realiter non distinguantur. Dubium est ergo an differentia inferior formaliter spectata, secundum gradum & perfectionem quam dicit, includat in conceptu suo differentiam superiorem, rationale v. c. includat sensitium, & hoc corporeum.

Qua in re pars negatiua amplectenda est, tum quia Aristoteles 4. Topic. cap. 2. ait differentiam non esse generis participem, quod sanè falsum esset si differentia inferior superiorem includeret; cum per illam genus constituatur.

Tum quia multa dicuntur de illis differentiis, quæ subsistere non possunt cum inclusione superioris in inferiori, putà quod superior constituat genus, & inferior speciem, quòd illa sit communior & latius patens ista, quòd superior contrahatur per inferiorem; quòd cum utraque concurrat ad compositionem totius Metaphysici, superior se habeat per modum potentiz, & inferior per modum actus, &c.

Tum quia si sensibile v. c. includeretur formaliter in rationali, sequeretur cum dico, homo est animal rationale, in ista definitione sensibile bis includi, semel ratione generis, semel ratione differentiz, atque adeo hominem duplici titulo habere quod sit sensibilis: hoc autem cum admitti non debeat, fatendum est differentiam superiorem ita præscindere ab inferiori, ut in formali illius conceptu non includatur.

Obiicies 1. quod prædicatur de alio in abstracto est de conceptu illius, atqui differentia superior prædicatur de inferiori in abstracto, ut patet ex Arist. 7. Metaph. tex. 43. cum ait, *Fissio pedum aliqua peditas est*, ergo differentia superior est de conceptu inferioris. Respondeo maiorem veram esse, si vnum prædicetur de alio in sensu formali, non autem si solum in sensu identico seu materiali, quo modo exemplum allatum intelligi debet. Non enim Aristoteles dicit simpliciter fissionem esse peditatem, sed aliquam peditatem, id est aliquam differentiam peditatis; quatenus animalium habentium pedes, alia habent fissos, alia non fissos. Ut si diceres, rationale est aliquod sensibile, sensus esset, rationale esse differentiam aliquam sensibilis, quatenus scili-

cet sensibile diuiditur in rationale & non rationale.

Obiicies 2. hunc syllogismum in Darapti: omnis homo est sensibilis, omnis homo est rationalis, ergo aliquod rationale est sensibile. Ex quo concluditur eodem modo sensibile dici de rationali, quo rationale & sensibile dicuntur de homine, adeoque formaliter. Sed malè id deducitur, non enim necesse est vt extrema tam arctè inter se vniantur, quàm cum medio, vt patet si in allato syllogismo loco rationalis ponatur risibile; nemo enim cõcludet risibile esse formaliter sensibile, cum illud dicat proprietatem accidentalem, hoc differentiam substantialem. Quare satis est ad veritatem syllogismi propositi, quòd conclusio sit vera tantum in sensu identico.

Obiicies 3. differentia equi est radix operationum equinarum, quæ sine sensibilitate intelligi nequeunt, ergo sensibile est de conceptu illius. Respondeo antecedens falsum esse, si intelligatur, vt debet, de conceptu directo & explicito; quia differentia equi dicit aliquid proprium equo, sensibile verò dicit aliquid commune omnibus animalibus; potest autem proprium intelligi, etsi commune explicitè non intelligatur.

Declaratur, nam sensibile dicit principium sentiendi, differentia verò equi dicit principium hinniendi; at hæc principia ita sunt distincta in ordine ad cognitionem nostram, vt vnum possit intelligi alio directè & explicitè minimè concepto: sicut etiam possum concipere rationale, tanquam principium discurrendi & ridendi, etsi directè non concipiam principium sentiendi.

## ARTICVLVS III.

*An genus sit extra conceptum differentia, & differentia extra conceptum generis.*

**R**espondeo . cum communi sententia, genus esse extra conceptum differentiarum, & differentias extra conceptum generis, adeoque vnum ab alio perfectè præscindere. Sequitur ex dictis præcedenti articulo, hic enim agimus de differentia speciei constitutiva, quæ cum præscindat à differentia generica, consequenter etiam ab ipso genere præscindit, vt rationale ab animali. Verum eadem assertio rursus

Probatur 1. nam quæ habent formalitates distinctas ea non se inuicem includunt, quin potius vnum excludit aliud: at genus & differentia habent formalitates distinctas, genus enim dicit formaliter aliquid ex se commune, potentiale, perfectibile, contrahibile; & differentia vice versa aliquid proprium, actuale, perfectiuum, & contractiuum; quæ rationes distinctæ sunt, imò & formaliter oppositæ, adeoque vna non potest includi in alia.

Probatur 2. nam quæ se inuicem formaliter includunt, ea de se possunt mutuò formaliter prædicari; siquidem aliquid prædicatur de subiecto, quia est in illo; & eo modo prædicari potest quo in illo est: vnde quia animal est formaliter in homine, ideo vera est illa prædicatio, homo est formaliter animal: at non potest genus formaliter prædicari de differentia, nec differentia de genere; non enim



valent istæ propositiones , in sensu formali sumptæ , rationale est animal , animal est rationale. Vnde sequitur genus & differentiam non se mutuò includere.

Probatur 3. Nam si genus est de conceptu differentiarum , cùm hæ species oppositas constituent , sequitur species illas inter se conuenire non tantum in ratione communi generis , sed etiam in rationibus peculiaribus propriarum differentiarum , quod planè implicat ; quia alioqui species illæ essent & non essent oppositæ per differentias , idemque esset gradus communis & proprius illarum. Si verò differentiæ essent de conceptu generis , cùm illæ sint oppositæ , sequeretur genus ex rationibus oppositis constare. Cumque differentia iuncta generi constituat speciem , iam genus esset species , eaque multiplex. Quare cùm hæc aliaque id genus nimis absurda sint , fatendum est genus & differentiam ita à se inuicem præscindere , vt vnum non sit de conceptu alterius.

Obijcies 1. quando substantia diuiditur in corpoream & spiritualement , corporeitas & spiritualitas sunt differentie substantiales , adeoque includunt rationem substantiæ. Respondeo non sequi , sicut enim modi substantiarum , qualis est subsistentia , sunt substantiales , non tamen substantiæ ; ita differentie prædictæ sunt substantiales , quia determinant & perficiunt substantiam , non tamen includunt propriè rationem substantiæ completæ & prædicamentalis ; qualis est illa quæ constituit summum genus , & diuiditur in corpoream & spiritualement .

Obijcies 2. qui dicit rationale , dicit viuens , ergo differentia includit genus. Respondeo

negando antecedens, si ita intelligatur vt rationale dicat formaliter viuens, illudque in suo conceptu includat; rationale enim non dicit viuens, vt sic, sed tale viuens, sicut non dicit animal, sed tale animal. Et hoc apertius constat si prædicta sumantur in abstracto, non enim rationalitas dicit formaliter vitalitatem, sed talem modum vitæ, non vegetantis, aut sensitivæ, sed rationalis seu intellectivæ.

Obijcies 3. ex Arist. 7. Metaph. text. 43. ultimam differentiam esse totam substantiam speciei; at genus est de substantia speciei, ergo differentia includit genus. Confirmatur, quia ob inclusionem illam Aristoteles prohibet, quando differentia inferior ponitur in definitione, ne aliqua superior differentia simul in ea vsurpetur; quia fieret inutilis repetitio, vt si homo definiretur animal rationale sensibile. Respondeo ad obiectionem, ultimam differentiam esse totam substantiam speciei, non integraliter, sed completivè, quatenus addita generi speciem cum illo constituit. Vnde non sequitur quod genus formaliter includat, sed ad summum identicè & materialiter, quatenus cum eo identificatur.

Ad confirmationem autem dico, Philosophum non prohibere ne differentia superior simul cum inferiori in definitione vsurpetur, quod illa in hac formaliter contineatur, sed quia continetur in genere, vt sensibile in animali; vnde sequeretur inutilis illa repetitio quam cavere intendit.

## ARTICVLVS IV.

*Quo sensu genus sumatur à materia & differentia à forma.*

**N**onnulli hoc ita volunt intelligi, vt genus verè à sola materia sumatur, nullo modo à forma; differentia verò à sola forma, nullo modo à materia. Verùm communis sententia statuit genus & differentiam desumi à tota natura, cùm eo tamen discrimine quòd genus ab ea sumitur, quatenus dicit aliquid potentiale & perfectibile; differentia vero vt dicit aliquid actuale & perfectiū. Quod vt declaretur apertius,

Respondeo & Dico 1. *Genus non posse vniuersim desumi preciso à materia, nec differentiam precise à forma.* Probatur manifestè, nam sunt aliqua quæ componuntur ex genere & differentia, etsi non constent ex materia & forma, vt patet in Angelis quos certum est non repugnare inter se specie differre, etsi non constent ex materia & forma, vt alibi ostendimus.

Idem suadetur in accidentibus, ea enim habent genera & species, adeoque componuntur ex genere & differentia, licet ex materia & forma non coalescant. Exemplum sit albedo quæ est species coloris, & definitur *color visum disgregans*, ita vt in illa definitione, color sit genus, & visum disgregans, differentia. Et tamen nemo dicet colorem, cùm sit qualitas, constare ex materia & forma.

Dico 2. *Neque in substantijs materialibus genus semper posse desumi precise à materia, & differentiam à forma.* Prior pars probatur inductione,

discurrendo per varia genera quæ à materia sola adæquate sumi non possunt. In primis substantiæ materiales coueniunt in genere substantiæ cum immaterialibus ; quare sicut genus in istis non sumitur à materia, ita neque in illis.

Rursus corpora terrestria cum cœlestibus in genere corporis conueniunt, etsi in materia non conueniant, vt supponimus ex dicendis vbi de cœlo. Id autem fieri non posset, si genus sumeretur à sola materia..

Præterea genus viuientis non potest sumi à materia, sed potius à forma sumi debet, cum hæc, non illa sit principium vitæ. Et similiter genus animalis seu sentientis non potest sumi à sola materia, cum non illa, sed anima sit principium sensationum; & ita de aliis plerisque.

Posterior pars suadetur, nam cum differentia debeat commensurari generi, sicut hoc non sumitur à sola materia, ita neque illa à sola forma peti debet. Confirmatur, nam v. c. rationale quod est differentia hominis, non petitur à sola anima, sed etiam à corpore; cum non dicat solum gradum intelligendi, sed intelligendi tali modo, nimirum per conuersionem ad phantasmata, & discurrendo; quæ in re homo non modo à bruto, sed etiam ab Angelo distinguitur.

Dico 3. *genus & differentiam desumi à tota natura aliter, & aliter spectata.* Sequitur ex dictis, quia cum genus non sumatur à sola materia, neque verisimile sit illud sumi tantum à forma, consequens est sumi à tota natura: & vice versa cum differentia non sumatur à sola forma, nec verisimile sit eam sumi tantum à materia, hinc sequitur illam à tota natura sumendam esse.

Verum

Verum quia est aliqua distinctio inter genus & differentiam, consequens est aliter genus, aliter differentiam à rei natura desumi: ita nimirum ut genus desumatur à natura, quatenus hæc dicit aliquid potentiale & perfectibile; differentia verò, quatenus dicit quid actuale & perfectum.

In idem recidit quod dicunt varij, in qualibet specie esse duo genera attributorum, alia communia, alia propria & specialia: v. c. in homine esse substantiam, corpus, viuens, sentiens, & similia attributa sibi cum brutis communia, & rationale quod sibi est proprium & peculiare; genus autem sumi ab attributis communibus, differentiam verò à proprijs.

## CAPVT VI.

## De Proprio, &amp; Accidente.

## ARTICVLVS PRIMVS.

*Due Proprij definitiones expenduntur.*

**P**roprium ex Porphyrio definiri solet, *Id quod omni, semper, & soli speciei conuenit, & cum ea recipitur.* Potest etiam definiri, ut est quantum vniuersale seu prædicabile; *Quod inest multis seu prædicatur de multis accidentariò, necessariò, & per se.* Vbi tres particule obseruandæ sunt: 1. quod inest multis, seu dicitur de multis, per quam conuenit cum alijs omnibus vniuersalibus. 2. accidentariò, per quam differt à tribus prioribus. 3. necessariò, & per se per quam differt ab ultimo.

Contra priorem definitionem obijcitur 1. in *Metaph.*

ea non debere fieri mentionem speciei, cum Porphyrius quando illam insinuat, speciei non meminerit. Verum hoc refellitur, quia etsi Porphyrius eo loco speciem non nominauerit, quod tamen ex mente illius debeat subintelligi, inde perspicuum fit, quia in alijs proprijs acceptionibus species exprimitur: quare sicut proprium in prima acceptione sumitur pro eo quod soli alicui speciei conuenit, etsi non omni; & in secunda pro eo quod accidit omni speciei, etsi non soli; ita in quarta sumi debet pro eo quod omni, & soli speciei competit, estque vox speciei ibi prætermissa fuerit; cum par sit ratio.

Obijcitur 2. malè in dicta definitione nomine speciei intelligi speciem infimam, cum non modo species infimæ, sed etiam subalternæ, & ipsa quoque summa genera sua habeant propria. Nam hæc omnia habent suas naturas, & essentias ex quibus proprietates proportionatæ naturaliter fluunt: Imò enti ut ens est, etsi non sit propriè genus, proprietates aliquæ assignantur, ut sequenti libro ostendemus. Respondeo 1. etsi fateamur naturas omnes siue genericas, siue específicas sua habere propria, sicque alia dici posse propria generica, alia specifica; non tamen inde bene colligi quod intenditur, quia Porphyrius voluit tantum definire proprium strictè & maximè propriè sumptum, quale non est nisi proprium specificum. Siquidem illud dicitur proprium alicui, quod alteri commune non est; quare proprium genericum cum multis essentialiter distinctis comperat, non tam propriè proprium dici potest, quàm proprium specificum quod non nisi vni speciei conuenit.

Respondeo 2. si definitionem prædictam

etiam ad propria generica extendi velis, nomine speciei intelligi posse naturam vel essentiam rei; vt sensus sit proprium esse id quod alicui naturæ quæcunque sit ita competit, vt omni, & soli, & semper conueniat. Neque propterea existimes dari duo prædicabilia proprij, alterum specifici, alterum generici. Cum enim eodem modo prædicentur de natura ad quam spectant, nempe in quale necessarium, non nisi vnum prædicabile constituunt; vt in Logica aduertimus.

Obijciatur 3. proprium non rectè definiri *Id quod soli, & semper competit*, vt ex eo ostenditur, quia primæ qualitates sunt propria elementorum, neque tamen ijs solis, aut semper competunt; cum ex vna parte calor, frigus, humiditas, & siccitas in mixtis reperiantur, & ex alia, aqua non sit semper frigida, nec aër semper humidus, nec terra semper sicca. Respondeo 1. qualitates elementares in summo gradu esse propria elementorum, eoque modo mixtis non competere, sed tantum in aliquo gradu remisso; aut si interdum in summo gradu ijs competunt, vt summus calor ferro candenti, id non oriri ex principiis internis, sed ab extrinseco.

Respondeo 2. non esse proprium aquæ quòd actu sit frigida, sed quòd ex natura sua summam frigiditatem postulet; quemadmodum non est proprium hominis quòd actu rideat, sed quòd ex natura sua sit aptus ad ridendum; ea autem exigentia competit aquæ, etiam cum intensè calida est. Et similiter alia elementa exigunt qualitates connaturales, etiam cum ijs actu priuata sunt.

Ex quibus collige, quid dicendum sit ad eos qui obijciunt, intellectiuum esse proprium

hominis, nec tamen soli homini competere, sed etiam Angelo; falso enim & gratis supponitur intellectuum inter propria hominis strictè sumpta collocandum esse, cum vel eò ipso quòd competat homini & Angelo, dicendum sit esse proprietatem fluentem ex gradu substantiali homini & Angelo communi. Si tamen intellectuum restringatur ad vim quandam & aptitudinem intelligendi tali modo, nimirum per discursum, & per conuersionem ad phantasmata; sic dici potest intellectuum esse proprium hominis, cum ille modus intelligendi homini competat, non autem Angelo.

Contra posteriorem definitionem obiicitur 1. multa accidentia communia esse naturaliter inseparabilia à subiectis suis, & necessario ijs competere, ut patet in candore cygni, & nigredine corui, aliisque eiusmodi quæ ad quantum prædicabile pertinent. Vnde sequitur proprium non bene distingui ab accidente communi, quatenus dicitur multis competere necessario, & per se. Respondeo consequentiam istam nullius esse roboris, quia illud tantum dicitur alicui competere necessario & per se, quod fuit ab illius essentia: at accidens proprium fuit à subiecti sui essentia, commune verò ex alia causa oritur. Quare etsi naturaliter & necessario alicui competat, nec possit naturæ viribus ab eo separari, non tamen ei dicitur competere necessario, & per se, sicut proprium.

Obiicitur 2. illud est discrimen inter proprium & accidens, quòd accidens dicitur primò de indiuiduis, secundò de specie; ideo enim homo est albus, quia Petrus est albus: Contra verò proprium primò dicitur de specie, secundò de indiuiduis, nam ideo Petrus



est risibilis , quia homo est risibilis ; ergo proprium vt vniuersale , debet potiùs definiri per ordinem ad speciem , quam per ordinem ad indiuidua , adeoque allata definitio non est legitima. Respondeo id non sequi , nam quomodocunque proprium speciei & inferioribus conueniat , certè illud non potest constitui in ratione vniuersalis , nisi per ordinem ad multa. Quare etsi Petrus & Paulus sint risibiles , quia homo est risibilis ; risibile tamen non potest habere rationem vniuersalis in ordine ad hominem , sed in ordine ad Petrum & Paulum , vt latius probatum est in Logica.

## ARTICVLVS II.

*Dua Accidentis definitiones declarantur.*

**Q**UÆRITUR I. Vtrum Accidens à Porphyrio rectè definiatur , *Quod adest , & abest sine subiecti interitu*. Respondeo hanc definitionem vt legitimam vulgo à Philosophis defendi. Vt autem illius sensus melius percipiatur , & objectionibus , quæ contra illam fieri possunt , satisfiat,

Obseruandum est subiectum accidentium & proprietatum duobus modis spectari posse , primò quoad existentiam , secundò quoad essentiam ; & illud esse discrimen inter accidens , & proprium , quòd præsentia , vel absentia accidentis potest quidem subiectum immutare & corrumpere quoad existentiam , non tamen quoad essentiam ; proprium verò sine corruptione essentia à subiecto abesse non potest. Cùm enim rei essentia postulet intrinsecè & necessariò proprium , ablato proprio , tolli-

tur à posteriori exigentia illius, adeoque non manet eadem essentia. Quia verò essentia non sic accidens commune postulat, sed illud recipit aliunde; hinc fit ut præsentia, vel absentia accidentis rei essentiam non immutet, esto interdum illius existentiam destruat. Atque hinc solvuntur varix obiectiones, quæ aduersus allatam accidentis definitionem vrgeri solent.

Obijcitur 1. quædam accidentia non posse esse in aliquo subiecto sine illius interitu; ut patet in summo frigore, quod nequit esse in homine, sine illius destructione. Respondeo summum frigus destruere hominem quoad existentiam, non quoad essentiam. Facit quippe ut homo moriatur, sed non ut homo non sit animal rationale.

Obijcitur 2. quædam accidentia non possunt abesse à subiecto sine illius interitu; ut nigredo à coruo, albedo à Cygno, calor ab animali, &c: Respondeo similiter eiusmodi accidentium absentiam causare interitum subiecti, quoad existentiam, non quoad essentiam. Etsi enim Coruus, detracta nigredine, naturaliter intereat; manet tamen essentia illius integra, cum non propterea desinat esse talis speciei. Præterquàm quòd Porphyrius probat definitionem accidentis, ex eo quòd possumus Coruum album intelligere. Imò non modo intelligi, sed & de facto existere Coruos albos à viris fide dignis iamdiu accepimus, idque testatur doctissimus Aldrouandus Ornithologiæ lib. 12.

Obijcitur 3. esse quædam propria quæ non tantum mente, sed etiam reipsa possunt, saltem diuinitus, separari à subiecto sine illius interitu; ea nimirum quæ realiter ab essentia di-

stinguuntur, vt frigiditas ab aqua, siccitas à terra, &c. Respondeo eiusmodi propria duobus modis spectari posse, primò formaliter secundum suam realem entitatem præcisè, secundò radicaliter ratione exigentiæ intrinsicæ & necessariæ qua postulatur à principijs naturæ: ac priori modo posse propria illa, virtute diuina separari ab essentia, sine illius interitu, non posteriori. Etsi enim essentia aquæ maneat, etiam naturaliter, sine actuali frigiditate, non tamen sine intrinseca exigentia Frigiditatis; adeo vt desinat esse essentialiter aqua, eò ipso quòd ex se non postulet habere frigiditatem: sicut homo desineret esse essentialiter homo, si ex se non postularet risibilitatem. Et hoc tantum modo videtur posse defendi allata definitio, & constitui verum discrimen inter proprium & accidens commune, quod cum ab essentia rei nõ exigatur, potest illà intactà, & quoad se, & quoad suam radicem ab ea auelli.

Quæritur 2. an accidens rectè à Porphyrio definiatur, *Quod neque est genus, neque differentia, nec species, nec proprium, semper autem in subiecto inheret.* Nonnulli existimant definitionē illam esse vitiosam, quia cum tradatur per negationem, non tam explicat quid sit accidens, quàm quid non sit. Verum alij eam defendunt primò quia Arist. 1. Topic. cap. 5. eam tradit, vt alibi monuimus; neque eam vt illegitimam damnat, sed tantum ait secundam esse meliorem.

Secundò quia si definitio illa est vitiosa, ideo est vel quia traditur per negationem, vel quia traditur per talem negationem, nèpe generis, speciei, &c. At neutra ex causa vitium habet, non ex prima, quia duo sunt rerum genera quæ melius per negationem, quàm per affirmationem explicari possunt, nimirum perfectissima

& imperfectissima, qua ratione describitur Deus quod neque est cœlum, neque ignis, neque homo, neque Angelus, neque quidquam creatum. Et materia prima, quæ est minimæ entitatis, describitur ab Arist. 7. Metaph. cap. 3. quæ per seipsam neque est quid, neque quantum, neque aliud quidpiam dicitur quibus ens determinatur. Quare cum accidens sit, ultimum inter prædicabilia, non incongruè per negationem definitur.

Non etiam ex secunda, quia cum iam dictum sit quid sit genus, quid species, quid differentia, quid proprium, non est inconueniens per eorum negationem explicare quid sit accidens; sic enim facile omnes partes definitionis intelliguntur. Eset tamen vitiosa descriptio accidentis, si antequam actum sit de alijs prædicabilibus, per eorum negationem traderetur.

Accedit quod definitio illa non est totaliter negatiua, cum addat Porphyrius illa verba, semper autem in subiecto inhæret. Vbi vox *semper* non significat subiectum numquam existere sine accidente, hoc enim aperte falsum esse vel ipsa experientia satis ostendit; sed numquam accidens esse in rerum natura, quin sit in subiecto, eò quod accidentis esse est inesse.

Verum etsi hoc, spectatis solis naturæ viribus, certum & explicatum sit, si tamen habeatur ratio potentæ Dei extraordinariæ, indubitatum est apud Catholicos, accidens posse existere sine vilo subiecto, vt patet in sanctissimo Eucharistiæ sacramento, & infra libro 3. latius dicetur.



# LIBER II.

## DE ENTE SECVN- dum se.

*EXPLICATA RATIONE  
vniuersalis, ad Entis in genere tra-  
ctationem progredimur, in qua de  
conceptu entis, de gradibus essen-  
tialibus rerum, alijsque ad eandem  
materiam spectantibus, breuiter agen-  
dum erit.*

### CAPVT PRIMVM.

De conceptu, & analogia entis.

#### ARTÍCVLVS PRIMVS.

*De duplici acceptione entis.*

**Q**UÆRITUR 1. quid nomine entis intel-  
ligatur. Respondeo ex aliquorum  
sententia, ens dicere entitatem  
actuale seu actu existentem: quia  
cum ens sit participium verbi, *sum*  
quod significat actum existendi, hinc colli-

gunt ens sumi pro eo quod est actu existens.

Alij dicunt ens formaliter quidem dicere existentiam, de materiali verò id quod habet esse, idque vel actu, vel potentia: nam rosa etiam non existens actu, est ens, sicut est substantia, & flos. Verum addunt ens non dici essentialiter de rebus creatis, quia dicit ordinem ad actualem existentiam, quæ non est de quidditate vel essentia creaturæ.

Approbanda tamen vulgaris distinctio entis participialiter, & nominaliter sumpti. Ens sumptum participialiter, seu vt est participium verbi *sum*, idem significat ac rem actu existentem; sumptum verò nominaliter, seu substantiuè vt nomen quoddam neutrius generis, significat essentiam rei vel actu, vel potentia existentis. Ad eum modum quo viuens vt participium, significat rem quæ vsu actuali vitæ potitur; vt autem nomen deductum à vita, significat substantialem gradum viuentis, seu principium potens vitæ operationes exercere, quomodo in arbore Porphyriana vsurpatur.

Atque hoc posteriori modo sumitur ens, cum dicitur esse objectum Metaphysicæ; non enim id debet intelligi de ente actu existente, sed de eo quod vel actu existit, vel saltem potest existere. Quo etiam sensu ens diuiditur in decem prædicamenta, quia scientiæ non considerant rerum existentias quæ possunt esse vel non esse, sed quidditates & essentias earum, aliaque quæ ipsis inuariabiliter, & necessariò competunt.

Quæritur 2. quid sit ens, seu quomodo definiatur, Respondeo ens non posse propriè definiri, cum definitio debeat constare genere & differentia, ens autem non habeat supra

se vllum genus. Quare potest tantum ratio entis vtcunque explicari per descriptionem aliquam, aut vocis declarationem.

Vnde cum ens sumatur dupliciter ex dictis, primò vt est participium, secundo vt est nomen, dicendum est si priori modo spectetur, rationem illius formalem in eo consistere, vt sit aliquid actu existens; si autem posteriori, sic rationem illius in eo positam esse, quod sit habens essentiam potentem realiter existere, siue actu existat, siue non. Ex quo intelligis ens vtroque modo esse nomen concretum, nostro concipiendi modo; adeoque non significare præcisè existentiam, vel essentiam, cum hæc sint abstracta, sed aliquid habens existentiam, vel essentiam.

## ARTICVLVS II.

*De predicabilitate Entis.*

**Q**Uæritur i. quomodo ens in ea duplici acceptione prædicetur de inferioribus entibus completis, substantia nempe & accidente,

Respondeo & dico i. *Ens sumptum participialiter, seu vt dicit actuale existentiam, non prædicari essentialiter de vlla creatura.* Ratio est, quia cum sit Deo liberum creaturas omnes producere, vel non producere, consequenter creaturæ omnes sunt ex se indifferentes vt existant, vel non existant; adeoque non est earum essentia quod existant. Aliàs, sicut non potest concipi essentia hominis, nisi concipiatur quatenus animal rationale; ita non posset concipi nisi sub ratione existentis, quod dici non potest.

Confirmatur, nam omnes Theologi illud discrimen ponunt inter Deum, & creaturas omnes quæcunque sint, quod existentia actualis est de essentia Dei, ita ut illius essentia concipi non possit, nisi concipiatur ut ens infinitum actu existens; non est autem de essentia ullius creaturæ quod actu existat, cum homo v. c. semper sit animal rationale, siue actu existat, siue non.

Dico 2. *Ens sumptum nominaliter, seu ut dicat essentiam realem, predicari essentialiter de suis inferioribus.* Probat, quia nihil potest magis dici essentialiter de re aliqua, quam ipsa eius essentia, ut patet cum dico, hominem esse animal rationale; atqui ens sumptum nominaliter significat rei essentiam, ergo maxime de illa dicitur essentialiter. Vnde illæ propositiones, homo est ens, equus est ens, & similes sunt essentielles.

Confirmatur, quia primum quod alicui rei conuenit, est quod habeat essentiam, inde enim reliqua omnia ut à radice proueniunt. Ergo ens ut significat essentiam, est primum & essentialiter rei prædicatum.

Obijcies. 1. fieri non potest quod aliquid sit ens reale independenter ab existentia, cum id quod non existit, nihil sit; quare repugnat quod ens sumptum nominaliter, seu abstrahendo ab existentia dicat essentiam realem, & prædicetur essentialiter. Respondeo duobus modis aliquid posse dici ens reale, primo quia realiter existit, secundo quia potest realiter existere: Vnde etsi nihil dicatur ens reale nisi dependenter ab existentia, ut tamen aliquid tale dicatur, non opus est quod actu existat, sed sufficit quod possit actu existere.



Instabis, hoc modo ens reale semper dicit ordinem ad existentiam, at existentia non est de essentia vllius creaturæ, ergo neque ens siue verbaliter, siue nominaliter sumatur, potest prædicari essentialiter de aliqua creatura. Respondeo ens dicere ordinem ad existentiam, vel quam actu habeat, vel quam saltem habere possit; licet autem actualis existentia non sit de essentia creaturæ, possibilem tamen esse illi essentialem, & eatenus ens nominaliter sumptum dici essentialiter de creatura.

Obijcies 2. Si ens dicitur essentialiter de creaturis, ergo creaturæ sunt essentialiter ens, ergo sunt ens per essentiam, quod repugnat, cum solus Deus sit ens per essentiam; creaturæ verò sint entia tantum per participationem. Respondeo creaturas esse entia potentialia per essentiam, non autem actualia, Deum verò esse ens actuale per essentiam, sicque distinguere a creaturis; quia vt sint actu, necessario indigent concursu diuino, quo actualem existentiam recipiant, & eatenus dicuntur entia per participationem.

Quæritur 2. Vtrum ens nominaliter acceptum dicatur essentialiter, non modo de entibus completis, sed etiam de modis entis, & differentiis illius.

RESPONDEO & dico 1. *Ens dici essentialiter de omnibus modis realibus, & ab intellectu minimè confectis.* Ratio est, quia inter ens & nihil non datur medium, adeo vt illud sit ens, quod non est nihil, & vice versa illud nihil sit, quod non est ens: at modi de quibus agitur, non sunt nihil, vt supponimus, ergo habent veram rationem entis.

Confirmatur, tum quia modi illi realiter producantur, & realiter subiectum in quo sunt, modificant; tum quia realiter corrumpuntur & esse desinunt, hæc autem & similia intelligi nequeunt sine reali aliqua entitate.

Nec refert, quod modus vocari soleat entis modus, non enim est sensus, modum non esse verum ens, sed tantum modificare ens: hoc enim in terminis repugnat, cum nequeat quod nihil est, aliquid modificare; sed ideo id dicitur, quia nomine entis absolute intelligi solet aliqua entitas completa, qualis non est entitas modalis, etsi sit realis & minime fictitia. Ad cum modum quo accidens interdum dicitur entis ens, non quod verè non sit ens reale & positivum, sed quia habet entitatem imperfectam, quæ indiget subiecto cui innitatur.

Dico 2. *Ens predicari essentialiter de omnibus differentijs rerum.* Probatur eodem modo, nam vel illæ differentię sunt nihil, vel includunt in se rationem entis: prius dici non potest, quia entia inferiora per proprias differentias intrinsecè constituuntur, & ab alijs realiter distinguuntur; at ens reale non potest intrinsecè constitui, & ab alio realiter distinguui per nihil, ut manifestum est: ergo posterius affirmari debet, adeoque fatendum, ens predicari essentialiter de differentijs entium inferiorum.

Confirmatur, nam differentia substantię ab accidenti est, quod illa sit ens per se, hoc verò sit ens in alio; at esse per se, & esse in alio non sunt meræ negationes, sed aliquid reale & positivum. Conveniunt etiam

illis, alijsque differentijs proprietates entis, nempe vnum, verum, bonum, adeoque vera sunt entia.

## ARTICVLVS III.

*De conceptu Entis.*

**P**RAMONEO 1. duplicem esse conceptum, alium formalem, alium obiectiuum; formalis est actualis conceptio seu intellectio alicuius rei, obiectiuus verò est ipsa res concepta seu intellectu percepta. Vt cum intelligo hominem, intellectio hominis est conceptus formalis; homo verò à me intellectus est conceptus obiectiuus.

PRAMONEO 2. Vtrumque conceptum posse esse dupliciter vnum, nempe re, aut ratione. Conceptus formalis est vnus re, quando vnica tantum rei, quæcunque sit, intellectio elicitur; vnus verò ratione, quando intellectio plura concipit sub eadem ratione, vt cum Petrum & Paulum sub ratione hominis, hominem & equum sub ratione animalis concipio. At conceptus obiectiuus est vnus re, quando quod concipitur est vnica entitas à parte rei, vt Petrus; vnus verò ratione, quando quod intelligitur siue sit vnum, siue multiplex, est eiusdem rationis, vt Petrus, homo, animal.

Ex quo intelligis 1. Illud esse discrimen inter rem singularem, & vniuersalem, quòd singularis est vnus conceptus obiectiuus re & ratione: vniuersalis verò est vnus conceptus obiectiuus ratione, non re; quia etsi natura humana sit eiusdem rationis in omnibus ho-

minibus , non tamen est vna numero , sed multiplex.

Intelligis 2. Conceptum obiectiuum non esse re & ratione vnum , quoties conceptui formali vtraque hæc vnitas competit ; siquidem conceptus formalis quo concipitur natura vniuersalis est re & ratione vnus , cum tamen conceptus obiectiuus eiusmodi naturæ non sit realiter vnus , sed tantum ratione , vt dictum est.

Præmonco 3. Prædictos conceptus dupliciter dici præcisos , nempe re , & ratione. Conceptus formalis dicitur re præcisus , quando est vna intellectio ab alijs realiter distincta , vt est intellectio hominis ab intellectione lapidis ; ratione verò præcisus dicitur , quando ex pluribus rationibus conjunctis & identificatis , vnā exprimit sine alia , vt cum concipitur animal , non concipiendo rationale , vel irrationale. Eodem modo conceptus obiectiuus realiter præcisus est ens realiter ab alijs distinctum , vt homo , equus , lapis inter se comparata ; præcisus vero ratione est quidam gradus obiecti ab alijs per solum intellectum separatus ; vt gradus animalis in homine , vel in equo sine differentijs spectatus. His præmissis

Quæritur 1. Quomodo formalis conceptus entis sit vnus , & præcisus à conceptibus formalibus inferiorum entis.

Respondeo & dico 1. *Formalem conceptum entis esse realiter vnum , & præcisum à conceptibus formalibus inferiorum entis.* Probatur , nam audito entis nomine , intellectus noster efformat vnā notionem , & speciem expressam entis distinctam realiter à notionē substantiæ , accidentis , aliarumque rerum ; cum tunc

concipiat tantum confusè essentiam potentem existere, non autem distinctè substantiam, vel accidens, vel aliquod aliud ens determinatum; & cognitio actualis entis sit formalis & expressa illius representatio, quam repugnat ulli alteri rei competere.

Confirmatur, nam etsi ens infinita entia sub se contineat, id non impedit quin vnico conceptu reali exprimi possit, cum illa omnia entia includantur in ente per modum vnus, quatenus in communi ratione essendi conueniunt, & dubium non sit quin vnica ratio obiectiua possit vnico conceptu exprimi. Aliàs vel conceptus entis essent necessario infiniti, cum possibilia sint entia infinita; vel si vnico conceptu multa entia sub ratione communi entis percipi possunt, nihil impedit quin omnia eodem modo simul intelligi possint.

Dico 2. *conceptum formalem entis esse ratione vnum, & præcisum à formalibus conceptibus inferiorum.* Prior pars probatur, nam ille conceptus est ratione vnus, qui aliquid representat sub vna ratione; atqui formalis conceptus quem effingimus de ente, representat res omnes sub vna entis ratione; quatenus nempe id habent commune quòd possint existere, ergo est vnus conceptus ratione.

Posterior ostenditur, nam conceptus quem formamus de ente, nec substantiam, nec accidens, nec animal, nec hominem, aut equum, vel aliquid aliud determinatum distinctè representat, sed præcisam tantum rationem entis omnibus rebus communem. Quare non potest conceptus ille non esse ratione præcisus à formalibus conceptibus rerum inferiorum.

Obiicies, ille conceptus formalis est ratione vnus, qui vnā rationem obiectiuā repræsentat; atqui conceptus formalis entis non repræsentat vnā rationem obiectiuā, cū repræsentet ens cuius ratio, vt pote analogā, ex dicendis, non potest esse vnā. Respondeo minorem falsam esse, etsi enim ens sit analogum, id non impedit quin ratio illius sit sufficienter vnā in omnibus analogatis, quatenus omnia id habent commune vt veram entis rationem participant. Quare formalis conceptus entis est vnus ratione per ordinem ad suum obiectum.

Vnde notandum est illud discrimen inter conceptum formalem sani, & entis, quod quia sanum significat formam quæ intrinsecè est tantum in animali, in alijs verò extrinsecè, & per denominationem à sanitate quæ est in animali, hinc fit vt conceptus formalis sani non possit esse ratione vnus: ens verò è contra quia significat formam in rebus omnibus realiter existentem, nempe entitatem veram & realem iis communem, inde sequitur conceptum entis formalem esse vnum ratione; esto ratio entitatis non conueniat omnibus entibus vniuocè.

Quæritur 2. an conceptus entis obiectiuus sit vnus, & ratione præcisus à conceptibus obiectiuis rerum inferiorum.

Respondeo & Dico 1. *dari unicam rationem obiectiuam entis respondentem conceptui illius formali ante explicato.* Probat, quia quando concipio ens, non concipio explicite substantiam, vel accidens, vel Deum, vel intelligentias; sed essentiam potentem existere. Hæc autem ratio obiectiua est vnā, cū omnibus inferioribus entis sit communis, & non

potest esse nisi ratio entis obiectiua; cum sit simplicissima, vniuersalissima, & omnium prima; ergo admittenda est vna ratio obiectiua entis, respondens conceptui illius formali.

Confirmatur, nam formalis conceptus entis est vnus ratione, vt probatum est, at non esset vnus ratione nisi omnia entia sub aliqua ratione vna conciperet, quatenus nempe conueniunt à parte rei in ratione essendi, ergo hanc vnā rationem in omnibus entibus concipit, adeoque omnia entia vt sub illa vnitāte concordant, vnum conceptum obiectiuum constituunt.

Dico 2. *conceptum entis obiectiuum esse ratione præcisum à conceptibus obiectiuis rerum inferiorum.* Probatur ex dictis, nam quando concipio ens, non concipio formaliter Deum, aut Angelum, vel aliquod aliud ens determinatum, sed rationem entis omnibus rebus communem, & ab earum rationibus particularibus aliquo modo præcisam. Ergo conceptus entis obiectiuus ad quem mea intellectio terminatur, est quid præcisum à rationibus propriis entium inferiorum.

Confirmatur, nam vel conceptus formalis entis terminatur ad plures & multiplices entium particularium rationes, vel ad vnā rationem iis communem; non ad plures, vt patet vel ipsa experientia, cum intellecto ente nullam rationem particularem entis distinguamus; si verò ad vnā rationem communem, ergo hæc ratio est præcisā à propriis rationibus, cum aliter vna & communis esse non possit.

Fatendum tamen eam non esse perfectam & adæquatam præcisionem ex parte obiecti, sed

tantum imperfectam & inadæquatam : ut enim animal v. c. perfecte præscindat ab homine & equo, necesse est ut totam animalitatem in se includat, & id tantum relinquat quod non habet rationem animalitatis; quia si animalitatem ex parte relinqueret, immerito diceretur illam perfecte præscindere. At ens non potest eo modo ab inferioribus præscindere, quia vel nihil relinquit, sicque nullo modo præscindit, cum præcisio sit unius ab alio separatio; vel relinquit ens aliquod, adeoque non nisi imperfecte & inadæquate rationem entis præscindit; quatenus scilicet aliquid apprehenditur confuse & inadæquate sub communi ratione entis, non autem sub speciali ratione talis, vel talis entis.

Vnde si quis obiiciat, cum differentiarum entis sint ens, ut supra dictum est, rationem communem entis ab iis præscindi non posse: Respondendum est non posse quidem præscindi perfecte & adæquate, posse tamen imperfecte & inadæquate modo explicato. Et in idem redit quod aliqui dicunt, inter ens & differentias illius non esse præcisionem mutuam, sed tantum non mutuam: quatenus etsi esse in se, & esse in alio, quæ sunt differentiarum entis, non possint præscindere à ratione entis, potest tamen concipi ens non concipiendo quod sit in se, vel in alio, sed ab utroque abstrahendo. Eo modo quo animal potest ab homine & equo præscindere, non tamen homo vel equus ab animali; cum animal sit de conceptu essentiali hominis, & equi.



## ARTICVLVS IV.

*De analogia entis.*

**Q** Væritur 1. vtrum ens sit æquiuocum respectu Dei, & creaturarum. Respondeo. Negatiuè, quia si hoc esset, sequeretur sola nomina esse communia Deo, & creaturis; hoc autem admitti non potest, tum quia ens significat veram essentiam & existentiam, at Deus habet veram essentiam & existentiam; creaturis etiam competit vera essentia & existentia, non autem ficta & imaginaria.

Tum quia per creaturarum perfectiones colligimus perfectiones Dei, & ob aliquam similitudinem quam inter illas deprehendimus, eadem nomina iis aptamus, vt nomina entis, substantiæ, intellectus, voluntatis, &c. hoc autem manifestè indicat non solas voces esse Deo & creaturis communes, adeoque ens non esse merè æquiuocum respectu Dei, & creaturarum.

Tum denique quia in æquiuocis nomen solum est commune, vt patet cum canis diuiditur in terrestrem, marinum, & cœlestem; at cum ens diuiditur in creatum, & increatum, hic non solum concipimus vocem ens Deo, & creaturis communem, sed etiam rationem aliquam ea voce significatam, vt vel ipsa experientia sufficienter ostendit.

Quæritur 2. vtrum ens sit vniuocum respectu Dei & creaturarum.

Respondeo 1. grauem esse hac de re controuersiam inter Philosophos, aliis cum Scoto

contententibus ens esse vniuocum respectu Dei & creaturarum, aliis verò cum S. Thoma id negantibus. Verum hæc quaestio magis videtur voces quàm ad rem ipsam spectare; si enim constaret quid per terminum vniuocum debeat intelligi, inde statim vno omnium consensu, quid de proposita difficultate tenendum sit, concluderetur.

Nam in primis si vniuocum illud dicatur, quod exigit vnum conceptum communem, siue perfectè siue imperfectè præscindentem ab inferioribus, hoc modo clarum est, ens esse vniuocum respectu Dei & creaturarum; quia vt patet ex præcedenti articulo, ens dicit formaliter vnum conceptum imperfectè saltem præcisum ab omnibus entibus inferioribus.

Si verò vniuocum illud tantum censeatur, quod dicit vnum conceptum perfectè præcisum ab inferioribus, quomodo animal præscindit ab homine & equo, relictis differentiis per quas contrahitur, hoc sensu perspicuum est ens non esse vniuocum respectu Dei & creaturarum; cum antè ostensum sit entis conceptum non esse perfectè vnum, & præcisum à suis inferioribus; eò quòd ratio entis intimè imbibitur in conceptu differentiarum per quas contrahitur. Idem dici potest proportionè seruata, discurrendo per alias vniuoci conditiones quas nonnulli probant, alij reprobant.

Respondeo 2. absolutè probabilius videri ens non esse vniuocum respectu Dei, & creaturarum. Probatur 1. ex Arist. 4. Metaph. cap. 2. vbi expressè docet ens multis quidem modis, sed tamen ad vnum, & vnā quandam naturam, non tamen æquiuocè dici; quibus

verbis clarè innuit, ens non esse vniuocum, nec æquiucum, sed analogum.

Probatur 2. quia cum omnes fateantur animal esse vniuocum respectu hominis & equi; inde sequitur, vt ens sit vniuocum respectu Dei & creaturarum, Deum & creaturas debere participare rationem entis, eo modo quo homo & equus participant rationem animalis. At dici non potest quòd Deus & creaturæ participant rationem entis, eo modo quo homo & equus participant rationem animalis. Ergo dici etiam nequit quod ens sit vniuocum respectu Dei & creaturarum. Major à nemine negari potest; suadetur minor, nam homo & equus ita participant rationem animalis, vt ex æquo eam participant, ita vt nihil sit in homine, spectans ad rationem animalis, quod etiam non sit in equo, & vice versa. At Deus & creaturæ non sic participant rationem entis, siquidem creatura quæcunque sit, in ratione entis est à Deo essentialiter dependens; cum tamen Deus sit essentialiter independens à quacunque creatura, in ratione entis. Ergo ratio entis non competit Deo & creaturis, eo modo quo ratio animalis competit homini & equo; at proinde non competit illis vniuocè.

Confirmatur, nam cum exploratum sit creaturam essentialiter pendere à Deo, vel dicendum est eam pendere à Deo quatenus est ens, vel quatenus est quid creatum & finitum; at hoc posterius non excludit dependentiam creaturæ à Deo in ratione entis, quin potius eam includit; siquidem id quo creatura dependet à Deo, cum non sit nihil, debet necessario esse ens, atque ita verum est creaturam à Deo pendere in ratione entis. Vnde

intentum concluditur contra vniuocationem entis respectu Dei & creaturarum.

Obiicies, etsi habitus scientiæ pendeat ab intellectu, id non impedit quin ratio qualitatis vniuocè dicatur de scientia & de intellectu. Ergo similiter dependentia creaturæ à Deo non impedit quin ratio entis Deo, & creaturæ vniuocè conueniat. Respondeo negando sequelam, & ratio discriminis est, quia scientia non pendet in ratione qualitatis ab intellectu, sed quatenus est talis qualitas, ad perfectionem cognitionis intellectuum ordinata; qua ratione necesse est ut intellectui inhaereat, adeoque ab illo ut à subiecto proximo dependeat. At verò creatura pendet à Deo in ipsa ratione entis, cum ab illo pendeat secundum se totam, & secundum se totam sit ens. Quare etsi dependentia scientiæ ab intellectu non impediat quin ratio qualitatis utriusque vniuocè conueniat; dependentia tamen creaturæ à Deo cum vniuocatione entis non rectè cohzret.

Probatur 3. eodem exemplo, ut ens sit vniuocum respectu Dei & creaturarum, debet eodem modo respicere Deum & creaturas, quo animal respicit hominem & equum. At non respicit eodem modo, ergo non est vniuocum respectu Dei & creaturarum. Maior perspicua est, tum quia nemo dubitat quin animal sit vniuocum per ordinem ad hominem & equum. Tum quia sicut genus & speciemprehendimus penes modum quo sua inferiora respiciunt, ita an quidam conceptus communis sit vniuocus, nec ne, non melius intelligi potest quàm per ordinem quem habet ad sua inferiora.

Minor ostenditur, nam animal ita respicit homi-

LIBER SECVNDVS. 121

hominem & equum, vt sit mutua præcisio inter gradum communem animalis, & differentias per quas ad hominem & ad equum contrahitur. Neque enim rationale & hinnibile sunt de conceptu intrinseco animalis, neque vice versa animal de conceptu rationalis & hinnibilis. At ens non eodem modo respicit sua inferiora, quia licet possit concipi ens non concipiendo differentias per quas contrahitur ad Deum & creaturas; non tamen possunt concipi eiusmodi differentiz nisi concipiendo ens, cum verè & essentialiter rationem entis obtineant. Vnde ob eiusmodi transcendentiã cõceptus entis nõ potest dici propriè vniuocus.

Confirmatur, nam ideo animal dicitur vniuocè de homine & equo, quia cum non includatur formaliter in differentiis, non afficitur per se earũ inæqualitate, adeoq; omnino equaliter, & secundũ eandem rationẽ ab homine & equo participatur. At verò ens includitur formaliter in differentiis suorum inferiorum, quare cum illæ differentiz sint inæquales, etiam in ratione entis, hinc fit vt ratio entis eodem modo prædicari non possit de suis inferioribus, ac proinde non sit vniuoca.

Obicies, vnica & eadem est ratio abstracta entis in communi, ergo id sufficit ad vniuocationẽ entis; esto ratio illius non eodem modo in contractione participetur. Sequela patet, quia aliàs sequeretur gradum communem animalis non esse vniuocum, cum certum sit hominem esse animal longè nobilius quocunque bruto. Respondeo distinguendo antecedens, licet enim communis ratio entis vtcunque sit eadem, vt suprà explicatum est, non tamen in sensu ab obiciente intento, ita scilicet vt ratio illa sit adæquatè participabilis ab omnibus

*Metaph.*

F

entibus; cum enim ens transcendat omnes differentias rerum, inter quas maxima, imo infinita reperiatur inæqualitas perfectionis, hinc fit ut ens non vno modo, sed variis & infinite inæqualibus sit participabile à suis inferioribus.

Nec idem dici potest de animali, quia licet homo sit animal nobilius bruto, ille nobilitatis excessus non oritur formaliter ex animalitate quæ in illo est, sed ex coniunctione & identitate animalitatis cum rationalitate, quæ neque in suo conceptu includit animal, neque ab eo includitur. Unde præcisè & formaliter loquendo, homo in quantum animal, non est quid nobilius cane, vel equo, cum ut sic nihil aliud habeat quàm quod sit corpus animatum sentiens, sicut & brutum quodlibet. At differentie entium sunt entia præcisè & formaliter; quare cum, ut differentie, sint inter se inæquales, hinc sequitur quod etiam in ratione formali entis, inæqualitatem habeant; ac proinde ens non sit uniuersum respectu suorum inferiorum, sicut animal est uniuersum per ordinem ad hominem & brutum.

Quæritur 3. utrum ens sit analogum respectu Dei & creaturarum. Respondeo affirmatiue, quod ex iam dictis sufficienter colligitur; nam cum ostensum sit ens neque esse purè æquiuocum, neque etiam proprie uniuersum, per ordinem ad Deum & creaturas; hinc euidenter sequitur illud esse analogum per eiusmodi respectum.

Confirmatur, nam ille gradus communis ex communi sententia censetur analogus, qui partim eodem modo, partim diuerso inferioribus suis communicatur: atqui ens communicatur Deo & creaturis, partim eodem modo,

partim diuerso ; eodem, quatenus non tantum Deus est ens, sed etiam creaturæ veram & minimè fictitiæ entis rationem participant ; diuerso, quatenus creaturæ in ratione entis essentialiter dependent à Deo, & ab illius perfectione infinitè distant. Quare ens est analogum respectu Dei, & creaturarum.

Obiicies, vt aliquid sit propriè analogum, requiritur vt ratio per nomen significata sit partim eadem, partim diuersa; at ratio per nomen entis præcisè significata non est partim eadem, partim diuersa, respectu Dei & creaturarum ; Ergo ens non est propriè analogum sub eo respectu. Respondeo distinguendo maiorem, non enim requiritur ad veram analogiam, quod ratio per nomen significata sit partim eadem, partim diuersa in actu signato, seu quatenus præcisè obiicitur intellectui eam speculanti ; sed sufficit quod talis sit in actu exercito, seu quatenus ratio illa iam concipitur vt contracta ad sua inferiora ; quomodo ens habet diuersitatem illam quæ requiritur ad analogiam, vt satis probatum est.

Dubitatur autem qualis sit hæc analogia. Respondeo 1. posse dici analogiam inæqualitatis, cum enim vniuoca dicantur quæ æquè primò, & eo sensu æqualiter sua inferiora respiciunt ; ea possunt dici vice versa analogæ inæqualitatis, quæ non æquè primò ad inferiora referuntur ; cuiusmodi est ens, vt visum est.

Respondeo 2. posse etiam dici analogiam attributionis, non quidem ita vt forma significata sit intrinsecè in Deo duntaxat, in creaturis vero sola denominatio extrinseca ad illam formam ; siquidem creaturæ omnes rationem entis essentialiter participant : sed ita vt forma significata nomine entis, à creaturis participetur

dependentem à Deo. Verum hæc analogia non distinguitur reipsa à præcedenti, ut ex utriusque expositione intelligi potest.

Respondeo 3. non nullos existimare hic quoque contingere analogiam proportionis, seu proportionalitatis, quatenus sicut se habet Deus ad suum esse, ita creatura ad suum. Verum hanc non esse propriam analogiam proportionalitatis inde patet, quia proportio illa habitudinum etiam uniuocis competere potest: dicimus enim equum ita se habere ad suam animalitatem, sicut homo se habet ad suam, & ita de alijs.

Quare ut vera sit analogia proportionalitatis, necesse est ut alterum membrum non sit tale absolute & in se, sed respectiue, & ut confertur cum alio; quomodo pes est analogum proportionalitatis, quia pes montis vel scamni non est propriè pes, sed habet rationem pedis per proportionem, quatenus confertur cum pede animalis. Sic autem perspicuum est ens non esse analogum respectu Dei & creaturarum; quia licet creaturæ à Deo esse acceperint, non tamen dicuntur existere per habitudinem ad existentiam Dei, sed absolute per propriam existentiam quam in se habent.

Quæritur 4. quomodo ens se habeat respectu substantiæ, & accidentis. Respondeo ens sub eo respectu non esse æquiucum, nec uniuocum, sed analogum. Non quidem æquiucum, cum substantia & accidens sint entia vera & realia. Non etiam uniuocum, eo quod ratio entis non competit accidenti nisi dependenter à substantia, quod fit ut vulgò non tam ens, quam entis ens appelletur. Quare superest ut ob eiusmodi dependentiam sit analogum attributionis, ut ex dictis intelligi potest.



Nec dicas accidens non pendere à substantia præcisè in ratione entis, sed tantum in ratione talis entis, accidentis scilicet quod exigit subiectum cui inhæreat. Nam contra hoc est, quia accidens est formaliter ens inhærens, adeoque inhæret in ratione entis, & cum inhærentia formaliter dicat dependentiam, hinc sequitur accidens esse dependens in ratione entis. Confirmatur, quia accidens vel dependet per nihil, quod dici non potest, vel per aliquid, ac proinde per rationem entis.

Et quamvis ratio dependentiæ non concluderet analogiam entis respectu substantiæ & accidentis, transcendentia tamen eam efficaciter euinceret; quia cum ens transcendat differentias substantiæ & accidentis, & in ijs intime imbibatur; sicut differentia substantiæ est perfectior differentia accidentis, ita ratio entis perfectius in substantia reperitur quàm in accidente, sicque analogicè de ijs dicitur.

Quæritur 5. quomodo ens se habeat respectu entis realis, & rationis. Respondeo se habere æquivocè, quia æquivoca dicuntur quorum nomen commune est, ratio autem significata per nomen, omnino diuersa; at præterquam quod ens reale & ens rationis non omnino conveniunt in nomine, cum illud absolutè dicatur ens, aut ens reale, hoc verò ens rationis appelletur; perspicuum est rationem nomine entis significatam non esse in illis eandem, imò esse planè diuersam, cum ens reale veram entitatem significet, ens verò rationis entitatem ab intellectu confictam. Quare ens respectu illorum dicitur æquivocè.

## CAPUT II.

De essentia gradibusque rerum  
essentialibus.

## ARTICVLVS PRIMVS.

*De essentia rerum.*

**Q**UÆRITUR 1. quid nomine essentia intelligatur. Respondeo nomen essentia ab esse, prout significat nudam rationem essendi in abstracto deductum fuisse, sicut sapientia à sapere; vulgò tamen apud Philosophos. significare rationem primam, qua res in tali specie vel gradu entis constituitur, & ab alijs distinguitur, quæque est radix reliquorum.

Vnde idem significari solet nominibus essentia, quidditatis, naturæ, & rationis formalis. Nam essentia est id quo res constituitur in tali genere vel specie entis: quidditas sumitur vel pro definitione qua explicatur rei essentia, vel pro ipsa essentia quatenus per illam respondetur cum quæritur, quid res sit; natura sumpta abstractè, prout competit rebus etiam non materialibus, est ipsamet essentia quatenus est principium proprietatum, & operationum; ratio verò formalis significat rei essentiam secundum prædicta propria per quæ constituitur, & ab alijs distinguitur.

Quo loco aduerte 1. essentiam non posse propriè definiri à priori, cum sit primum quod in vnaquaque re concipi debet: quo fit vt tan-

tum à posteriori possit describi, nempe vel per ordinem ad proprietates & operationes, vt cum dicimus essentiam esse primam radicem à qua passioncs emanant; vel per respectum ad conceptum nostrum, vt cum dicimus essentiam esse id per quod res primò intelligitur constitui, vel quod per definitionem explicatur.

Aduerte 2. essentiam variis modis posse diuidi, vt alia sit actu, alia potestate; alia sit substantialis, alia accidentalis; alia sit simplex, alia composita. Essentia actu dicitur quæ actu existit; potestate quæ potest existere; substantialis quæ substantiæ, accidentalis quæ accidenti competit; simplex quæ nullam compositionem admittit, composita quæ aliquam.

Quæritur 2. an essentia habeat proprium quoddam esse actuale seclusa existentia, seu etsi actu non existat, nimirum antequam actu existere incipiat, & postquam desinit existere; an v. c. dici possit reperiri in rerum natura esse actuale essentia hominis nondum geniti, illudque esse permanere etiam post mortem talis hominis, adeo vt ipsius essentia sit semper & inuariabiliter, idque ab æterno, & omnino independentem à Deo.

Nonnulli affirmant, sed periculosè & sine fundamento, quia quouis modo explicetur illa æternitas essentiarum, profecto non vacat periculo erroris affirmare, dari aliquam entitatem actualem distinctam à Deo, & ab eo independentem; cum à Catholicis nulla vera entitas agnoscatur media inter creatorem & creaturam, ac proinde essentia quacunque actualis vel sit Deus, vel à Deo dependeat.

Deinde ille haud dubie erraret qui assereret, hominem quoad esse actuale existentia non pendere à Deo, vt omnes fatentur; ergo & ille

errat qui asserit hominem à Deo non pendere, quoad esse actuale essentiz; sequela patet, nam ideo ille erraret, quia affirmaret dari in rerum natura aliquod esse actuale independēs à Deo; at iste idem affirmat, ergo similiter errat. Imò illius error videtur peior errore alterius, quia si essentia est ex se entitas actualis, seclusa existentia, cum aliunde entitas essentiz sit nobilior entitate existentiz, cō quod existentia debet concipi saltem in ea sententia, tanquam modus aliquis adueniens essentiz, ille sanè turpius errare videtur qui agnoscit essentiam actualem à Deo independentem, quàm qui talem independentiam existentiz actuali tribuit.

Eò vel maximè, quia homo posset sine mendacio affirmare, se propriam & actualem essentiam à se solo habere, nec nisi modum existendi teneri Deo acceptum referre; quod sanè parum cum pietate & fide Catholica congruit. Cum negari non possit essentiam cuiuslibet creaturæ esse creaturam, & non solum de existentia, sed de quidditate & essentia creaturæ sit esse dependenter à creatore.

Vt hoc incommodum caueatur, dicunt aliqui, omne esse creaturarum dependere à Deo, sed cum discrimine: esse enim existentiz dependet à Deo vt à causa efficiente, esse verò essentiz pendet ab illo vt à causa exemplari; quia per suam cognitionem tribuit cuiuslibet essentiz esse quidditatiuū & intelligibile. Verum hoc gratis dicitur, quia res non dependent ab intellectu diuino nisi adiūcta voluntate, & omnipotentia per quā ad extra operatur; quia aliàs rerū essentiz essent actu dependentes à Deo sine dependentia ab illius voluntate, sicq; Deus ex necessitate naturæ tribueret esse quidditatiuū & intelligibile rerū essētis; quod

planè absurdum est, & admitti non debet. Quare dicendum essentias rerum à Deo eatenus tantum dependere, quatenus ab illo in tempore accipiunt actualem existentiam.

Tandem illa essentiarum æternitas refellitur, quia ex ea sequeretur nihil à Deo posse creari: Siquidem creari est produci è nihilo, at nihil produceretur in tempore è nihilo, si essentia cuiusque rei iam actu esset ab æterno; unde etiam sequeretur nihil posse in nihilum redigi, quia post rei destructionem illa remaneret tota illius essentia. Confirmatur, nam illud non creatur quod fit ex præsupposito subiecto, neque illud annihilatur quo destructo, illius subiectum remanet; ergo à fortiori si tota essentia præcedit rei productionem, & illius corruptionem sequitur, nihil dici potest creari, vel annihilari. Ista autem non bene cohærent cum fide Catholica, quæ docet Deum in principio creasse, id est è nihilo produxisse cælum & terram, & eadem facilitate qua creaturas è nihilo eduxit, posse illas in nihilum reducere.

Obijciens 1. scientiæ versantur circa rerum essentias, vt præcisas ab existentia, & sunt de obiectis realibus; ergo essentiæ antequam existant, sunt aliquid reale. Respondent aliqui scientias esse de obiectis realibus vel actu vel potestate, essentias autem non existentes esse reales potestate, quod ad scientiam realem sufficit. Verùm etsi simpliciter concedatur rerum essentias esse quid reale antequam existant; inde non sequitur eas habere tunc esse reale actu, vt arguentes existimant. Quod vt clariùs percipias,

Nota aliquod discrimen posse constitui inter entitatem realem actu, realem potestate,

& realem ab actu & potestate præcisam; ita ut dici possit essentiam ut existentem, esse entitatem realem actu, ut non existentem, esse entitatem realem potestate; at verò secundum se in ratione essentiae, præscindendo ab existentia, & à negatione existentiae, posse dici simpliciter & sine addito entitatem realem, seu ens reale; quomodo qui dicit hominem, animal, viuens, corpus, substantiam, &c. dicit ens verum & reale, non autem chimericum & ab intellectu effictum.

Instabis, essentia non alio titulo est ens reale antequam existat, nisi quia potest realiter existere, at hæc potentia dicit aliquam entitatem actualem in qua fundatur. Respondeo minorem falsam esse, si potentia illa attendatur ex parte ipsius essentiae, quia sic consistit in mera illius non repugnantia ad existendum; aliunde tamen connotat realem entitatem, nimirum ex parte Dei potentis essentiae conferre actualem existentiam.

Obijcies. 2. si essentia antequam existat, non esset actu, esset non ens, adeoque numquam posset, existere, quia repugnat ut quod est non ens, fiat ens. Respondeo 1. hoc argumentum posse retorqueri, quia si essentia est ens antequam existat, non potest fieri ens; cum repugnet rem aliquam fieri id quod iam est. Respondeo 2. negando consequentiam, nam etsi essentia antequam existat, non sit ens actuale, est tamen ens possibile, ac proinde fieri potest ens actu existens. Unde illud obseruandum est. discrimen inter chimeram, & Antichristum futurum, quod chimera quia est merum non ens & actu & potestate, non potest per ullam potentiam fieri ens; at verò Antichristus fieri potest ens, quia est ens potestare, etsi non actu.

Neque aliter possunt respondere aduersarij, si hoc ipsum argumentum retorqueatur contra illos, quatenus fatentur produci de facto existentiam quæ ante non erat; dicent enim existentiam antequam producat, esse non ens actu, potestate verò esse ens; sicque per productionem fieri ens actu:

Obijcies 3. essentia rerum sunt planè immutabiles, etiam respectu Dei, cum Deus nequeat efficere v. c. ut homo non sit animal rationale; ergo habent aliquod esse independentes à Deo, ac proinde æternum, minimeque generationi, vel interitui obnoxium. Respondeo essentias rerum tripliciter posse considerari 1. quoad esse actuale, quomodo necessario dependent ab influxu Dei, sine quo repugnat esse aliquid actu extra Deum. 2. quoad esse mere possibile, idque vel absolutum & intrinsecum, quod consistit in non repugnantia ad existendum, quæ cum sit negatio, à Dei influxu dependere non potest; vel respectuum & extrinsecum consistens in denominatione extrinseca à causa potente rem producere, quomodo possibilitas creaturarum pendet à Deo, seu potius inuoluit potentiam Dei ut ad illas terminatam, eò quod creaturas sic esse possibles nihil est aliud quàm Deum habere potentiam ens producendi. 3. sine ordine ad existentiam & actualitatem, attendendò tantum ad prædicata quæ illis necessario conueniunt, quæ ratione præcisè à Deo non pendunt; verum cum sic nihil sint actu, inde non potest colligi dari actu aliquod esse essentia æternum, & à Deo independentes, ut falsò contenditur; sed tantum esse necessariam connexionem inter prædicata rei essentialia, ita ut nequeat v. c. esse

homo , quin sit animal rationale.

Quòd si inſtes , verum eſſe ab æterno hominem eſſe animal rationale , ac proinde eſſentiam hominis habere aliquod eſſe actuale ab æterno. Reſpondeo negādo id ſequi, nam non ideo verum eſt ab æterno hominem eſſe animal rationale , quòd hominis eſſentia ſit actu ab æterno; ſed quia Deus videt ab æterno eſſe cōnexionem neceſſariam inter hominem & animal rationale , ita vt homo nequeat exiſtere, aut definiri, aut concipi, quin exiſtat , aut definiatur, aut concipiatur animal rationale.

## ARTICVLVS II.

*Qualiter ſe habeat exiſtentia creaturarum ad earum eſſentiam.*

**R**eſpondeo & Dico 1. *Exiſtentiam creaturarum non diſtingui realiter ab earum eſſentia.* Probatur 1. nam eſſentia non eſt ens actu niſi per exiſtentiam, at eſſentia per ſe ipſam eſt ens actu , ergo & per ſeipſam exiſtit; adeoque eſſentia & exiſtentia non ſunt duæ entitates actu & realiter diſtinctæ. Maior patet ex dictis: minor oſtenditur , nam eſſentia cū antea eſſet ens tantū in potentia, fit ens actu per productionem terminatam ad illam; ergo res exiſtit per actualem entitatem ſux eſſentix , ac proinde exiſtentia creaturæ non diſtinguitur realiter ab illius eſſentia.

Confirmatur , tum quia vt duo realiter diſtinguantur, quodlibet debet eſſe ens actu ſine alio; ſi enim vnum nihil eſt niſi per aliud , præter ipſum nihil eſt, ac proinde ab eo non di-



stinguitur : Atqui essentia non est ens actu sine existentia, vt probatum est, ergo ab illa realiter non distinguitur. Tum quia eò ipso essentia intelligitur existere, quo illius entitas ponitur extra nihil, & conseruatur in rerum natura. Quare existentia non est aliqua realitas distincta ab actuali entitate essentia.

Probatur 2. nam si existentia creaturæ distinguitur realiter ab illius essentia, ergo se habet ad illam tanquam forma quædam illius, adeoque existentia respicit essentiam tanquam subiectum in quo recipitur. Hoc autem planè repugnat, quia non potest essentia exercere officium subiecti erga existentiam, quin iam existat in se; at existere nequit antequam habeat existentiam, ergo fieri non potest quod existentia realiter distinguatur ab essentia.

Confirmatur, nam cùm natura quæ producit, dicatur accipere existentiam, si existentia realiter distinguitur à natura producta, necesse est vt hæc existat antequam accipiat existentiam, cùm repugnet id quod non existit, recipere in se aliquid realiter à se distinctum, vt inductione manifestum est in omnibus subiectis quæ aliquam formam, realiter à se distinctam, recipiunt.

Probatur 3. nam si existentia ab essentia realiter distinguitur, poterunt illæ diuinitus separatim existere & conseruari; adeoque poterit hominis essentia conseruari sine existentia hominis, & vice versa poterit hominis existentia conseruari sine essentia hominis; hoc autem quis non videt esse omnino absurdum & impossibile? si enim conseruaretur essentia hominis separata, verè homo existeret, quia conseruatio tendit ad continuandam rei existentiam.

& tamen ex hypothefi non existeret, quia conferuaretur separatus à propria existentia. Aliunde vero si existentia hominis conferuaretur separata ab effentia illius, posset dici dari existentiam hominis, & non existeret hominem, cum nequeat homo existerē sine hominis effentia; quæ & similia adeo per se ridicula sunt, vt vltiori refutatione non indigeant.

Obijcies 1. non potest eadē realis entitas esse simul dependens & independens, necessaria & contingens, & habere alias cōditiones oppositas: effentia autem & existentia sic se habent, nam illa est independens à causa effectiua, hæc dependens; illa est necessaria, hæc contingens; illa est æterna, hæc tēporalis, &c. ergo effentia & existentia distinguuntur realiter. Respōdeo minorem distinguendam esse, effentia enim vt ens actu, est dependens & contingens, nō secus ac existentia; vt autē abstracta per intellectum ab actualitate essendi, est indepēdens & necessaria in sensu superius explicato; ex quo ad sūmum sequitur, existentiam ab effentia ratione distingui. Et sanē cum distinctio rationis sufficiat vt dicamus, Deū intelligere per intellectū, non per voluntatē; amare per voluntatem, non per intellectū; punire per iustitiam, non per misericordiam; parcere per misericordiam, non per iustitiam, esto intellectus, voluntas, iustitia, & misericordia in Deo sint eadē realis entitas simplicissima; mirū non est quod nōnulla dicatur de effentia vt sic, quæ de existētia enūciari nō possunt, etsi nō distinguantur inter se realiter.

Obijcies 2. quod recipit aliquid, distinguitur ab illo realiter; atqui in creatis effentia recipit existentiam, ergo distinguitur ab illā realiter. Maior per se patet, & paulo ante à nobis probata est, minor verò ostenditur, quia cum crea-

tura non habeat esse à se, habet illud ab alio receptum. Respondeo 1. hoc argumentum posse retorqueri in arguentes, ipsa enim entitas essentia etiam vt ponitur ab ipsis distincta ab existentia, est entitas creata, sicque non habet esse à se, sed à Deo receptum; quare inquiri potest an intra ipsam entitatem essentia distingui debeant duæ entitates, quarum altera sit recipiens, altera recepta, an non: si affirmant, sequitur in qualibet entitate reperiri infinitas essentias, & infinitas existentias, quod absurdum est: si verò negent, & consequenter fateantur eandem entitatem essentia esse receptam, hinc colligere poterunt quàm inane sit argumentum ex ea receptione sumptum, ad realiter distinguendam essentiam ab existentia. Itaque

Respondeo 2. distinguendo maiorem, quod recipit aliquid vt in subiecto, distinguitur ab illo realiter, concedo; quod recipit aliquid vt ab alio, nego. Vnde ad minorem, essentia recipit existentiam, ita vt essentia sit subiectum, & existentia sit forma in ea recepta, nego; ita vt essentia à Deo producat, & fiat actu existens, concedo. Ex quo non sequitur essentiam distingui realiter ab existentia, sed tantum non habere à se quod existat.

Instabis, si existentia non reciperetur in alio vt in subiecto, esse creaturæ esset irreceptum, & consequenter infinitum, quod repugnat: sequela patet; quia cum forma limitatio oriatur à subiecto, quæ in nullo est subiecto, debet esse illimitata & infinita. Respondeo negando maiorem, nam quamvis existentia creaturæ non sit in subiecto à se realiter distincto, sicque non sit esse receptum in alio, est tamen esse receptum ab alio, nempe à Deo; quod sufficit vt sit esse finitum & limitatum. Aliàs dicendum esset contra arguentes, etiam ipsum esse essentia, quod di-

stinguunt ab esse existentiz, esse infinitum & illimitatum; cum verisimiliter affirmare non possint illud recipi in aliquo subiecto.

Vnde ad probationem sequelæ dicimus, limitationem formæ non oriri ex solo subiecto; siquidem accidentia Eucharistiæ sunt æquè limitata ac antea, etsi nulli substantiæ inhæreant: quia etiam in eo statu separationis, cum pendeant essentialiter à Deo, habent rationem entis participati, proindeque finiti & limitati. Hæc autem limitatio potest oriri extrinsecè à Deo, tum vt à causa efficiente, quatenus tantam tribuit effectui perfectionem, non maiorem, vel minorem: tum vt à causa exemplari, quatenus res producitur iuxta perfectionis mensuram, quæ in ideis diuinis exprimitur. Oritur etiam limitatio illa vt à causa formali & intrinseca, ab ipsa entitate creaturæ, quatenus in se tot perfectionis gradus non plures, vel pauciores includit.

Obijcies 3. quod est indifferens ad aliquid, & ad oppositum eius, non est idem realiter cum illo: atqui essentia creaturæ est indifferens ad existentiam, & non existentiam, cū possit existere, & non existere: ergo non est idem realiter cum illa. Respondeo minorem falsam esse, si intelligatur de essentia vt est ens actu, quomodo de ea hic agimus quando inquirimus, an habeat entitatem distinctam realiter ab entitate existentiz. Nam sic clarum est essentiam non esse indifferentem vt existat, vel non existat, sed necessario existere, & si non existit, ipsam quoque quoad totam suam entitatē actuale destrui, & tantum remanere obiectivè, & per mentem. Vnde existimandum non est manere eandem entitatem realem & actuale essetiz sub existentia, & sub negatione existentiz, sicut v. g.

manet eadem aqua sub frigore , & sub calore: aqua enim est substantialiter aqua , siue sit frigida , siue calida ; essentia verò cum non existit , nullam habet entitatem actualem , quæ tali negationi subesse possit , & qua abiecta existentiam recipiat.

Obijcies 4. humanitas Christi habet propriam essentiam , non autem propriam existentiam , cum existat per existentiam Verbi: ergo essentia & existentia realiter differunt. Respondeo humanitatem Christi habere propriam existentiam per quam est ens actu , & extra suas causas constituta ; subsistere autem per subsistentiam verbi , vt ex communi sententia dictum est in Idea Theologiæ speculat. lib. 2. cap. 11. Resol. 2.

Instabis , humanitas Christi inexistit Verbo , ergo existit per existentiam Verbi. Respondeo non sequi , siquidem inexistere alteri non est existere per existentiam illius , sed existere dependenter ab illo , vt patet in accidente quod etsi habeat propriam existentiam realiter distinctam ab existentia subiecti cui inhæret , dicitur tamen illi inexistere , quia existit dependenter ab illo , vt à subiecto materiali à quo sustentatur. Ita ergo licet humanitas Christi propriam habeat existentiam , non immeritò dicitur inexistere Verbo ; quia existit dependenter ab illo , non vt à subiecto materiali ; cum nec ipsa sit accidens , nec Verbum possit se habere instar subiecti materialis in quo aliquid informatiue recipiatur ; sed tanquam à supposito à quo substantialiter terminatur & completur , in defectum propriæ & connaturalis subsistentiæ.

Dico 2. *Existentiam in creatis aliquo modo di-*

*stingui per rationem ab essentia.* Probatur, quia ea aliquo modo distinguuntur per rationem, quorum vnum potest cognosci sine alio explicitè cognito: at essentia rerum creaturarum potest concipi sine existentia explicitè cognita, vt cum concipimus hominem vel equum, nihil cogitando expressè de illius existentia, & considerando tantum prædicata essentialia quæ illi competunt.

Vnde illud est discrimen inter essentiam Dei & creaturæ, quòd essentia Dei non potest bene concipi nisi illius existentia explicitè intelligatur; essentia vero creaturæ potest concipi, etiam illius existentia animo non obuersetur. Et ratio discriminis ex eo sumitur, quia Deus est ens omnimode necessarium, nec potest non existere, adeoque essentia illius non potest verè & adæquatè intelligi, nisi concipiatur vt ens actu existens: creatura vero cum sit ens contingens quod potest esse, vel non esse, rectè concipi potest quoad essentiam, etiam de illius existentia nihil cogiretur.

Est autem difficultas, quomodo intelligenda sit hæc distinctio rationis, an ex parte modi intelligendi dumtaxat; an vero etiam ex parte conceptus obiectiui. Non pauci vtramque distinctionem admittunt, ita vt velint existentiam se habere non modo ex parte conceptus formalis, sed etiam ex parte conceptus obiectiui, seu obiecti vt cogniti, per modum cuiusdam formalitatis distinctæ a formalitate essentia, quarum vna non includatur in alia, sicut exempli gratia, animal & rationale in homine sunt duæ formalitates, quarum neutra est de conceptu alterius, vt libro præcedenti dictum est.

Hæc tamen sententia , etsi communior in scholis , non caret difficultate , quia tanta est connexio inter essentiam & existentiam , vt essentia possibilis nihil aliud sit quàm essentia quæ potest existere , & essentia actualis idem planè sit ac essentia quæ actu existit. Quò fit vt conceptus essentia quouis modo sumatur , à conceptu existentia proportionato obiecti- uè præscindere non possit.

Confirmatur , quia nulla est formalitas in re existente , quæ in illa non præfuerit dum esset possibilis , neque vlla erat in ea formalitas possibilis antequam existeret , quæ in illa non existat postquam producta est. Vnde sequitur eundem esse planè conceptum essentia , & existentia se tenentem ex parte obiecti ; quia aliàs quædam formalitas reperiretur in vno rei statu , quæ non esset in alio.

Hinc autem collige , ex essentia & existentia creaturarum non resultare propriè compositionem rationis ; quia sicut compositio realis resultat ex duabus entitatibus realiter distinctis ex parte obiecti , ita compositio rationis resultat ex duabus formalitatibus obiectiuis , quæ inter se vniuntur ad vnum quid constituendum. Talis autem compositio non potest oriri ex essentia & existentia , cum non distinguantur ex parte obiecti , sed tantùm ex parte modi cognoscendi , vt ostensum est.

## ARTICVLVS III.

*Quomodo se habeant inter se gradus rerum  
essentiales.*

**P**RAMONEO rerum essentiam non ita esse indiuisibilem, quin constet varijs gradibus intrinsecis, è quorum vno veluti ascenditur ad alium tanquam ab inferiori ad superiorem, vt patet in homine in quo est gradus animalis, viuentis, corporis, substantiæ, & entis. Dubitatur ergo quomodo se habeant inter se gradus illi qui vulgò essentiales appellantur, imò & Metaphysici, quia sunt considerationis abstractæ & Metaphysicæ; an scilicet distinguantur realiter, an verò tantum per rationem.

**R**ESPONDEO & dico 1. *Gradus essentiales nature alicuius inter se non distingui realiter.* Probatur 1. quia nulla est necessitas admittendi talem distinctionem, vt patebit ex solutione argumentorum; ergo admitti non debet. Sequela ostenditur ex vulgari illo Philosophorum proloquio, *non sunt multiplicanda entia sine necessitate.*

Probatur 2. Nam si gradus essentiales realiter distinguerentur, possent à se inuicem saltem diuinitus separari, & separatim existere; hoc autem fieri nequit, quia repugnat quòd homo non sit animal, quòd animal non sit viuens, quòd viuens non sit corpus, quòd corpus non sit substantia, quod substantia non sit ens, & ita de alijs: Ergo gradus essentiales non distinguuntur inter se realiter.



Confirmatur, nam in creatis non possunt assignari entitates aliquæ realiter distinctæ, quæ non possint etiam virtute diuina separari ab inuicem; ergo cum gradus essentialis à se mutuo auelli nequeant, gratis ponitur realis distinctio inter illos. Dico in creatis, nam personæ diuinæ etsi nequeant à se separari, quia habent eandem naturam, aliunde tamen præbent sufficiens fundamentum distinctionis realis, eò quòd Pater producit Filium, & vterque Spiritum S. cum nihil se ipsum producere possit. Hoc autem non habet locum in gradibus essentialibus, quòd fit ut nulla sit ratio eos distinguendi realiter, cum sint inseparabiles.

Probatur 3. quia si ponenda est distinctio realis inter gradus Metaphysicos, maxime inter genus & differentiam, quia hæc magis inter se distare videntur: at neque inter istos gradus constituenda est realis distinctio, ergo nec inter alios. Minor suadetur, nam v. c. ratio substantiæ in Angelo est ex se, & selecta alia quacunque entitate, spiritualis, cum totum esse Angeli sit omnino independens à corpore, & ex natura sua spirituale; quare cum substantia Angeli contrahitur ad esse spiritus, per differentiam spiritualis, hæc contractio non fit per entitatem aliquam à substantia Angeli realiter distinctam. Et similiter ratio substantiæ in ligno est ex se corporea, cum quidquid est in ligno pendeat intrinsecè à materia; quòd fit ut cum dico, lignum esse substantiam corpoream, hæc differentia per quam substantia ligni, contrahitur ad esse corporis, non addat aliquam realitatem supra rationem substantiæ ligni.

Probatur 4. gradus communes non distin-

guantur realiter in indiuiduo à differentia indiuiduali, seu à singularitate, vt ex eo manifestum est, quòd natura Petri necessario est singularis per suam propriam entitatem, etiam seclusa quacunque entitate ab ea realiter distincta: aliàs enim natura cuiuslibet indiuidui esset realiter communis, quod longè magis absurdum est quàm admittere vniuersale Platonium in rebus. Posita autem reali identitate attributorum communium cum singularitate, concedenda necessario est realis identitas inter ipsa attributa communia; tum quia in creatis quæ sunt eadem vni tertio, sunt eadem inter se; tum quia nulla est ratio cur vnum attributum essenziale distinguatur realiter ab alio, si omnia sunt indistincta à differentia indiuiduali.

Dico 2. *Admittendam esse quandam distinctionem rationis inter gradus Metaphysicos, hancque sufficere ad saluanda quacunque de eorum distinctione afferri solent.* Prior pars facile ab omnibus admittitur, constat enim nos aliter in Petro concipere rationem Petri, seu petreïtatem, aliter rationem hominis, aliter rationem animalis, vruentis, corporis, substantiæ, entis. Quare etsi hæc omnia attributa sint vna simplex natura Petri, ea per varios actus intellectus cognoscimus, ac si essent distincta à parte rei, sicque illa per rationem distinguimus.

Confirmatur, nam ea distinguuntur ratione, quorum vnum potest concipi & defini sine alio; at possumus concipere Petrum sub ratione entis, vel substantiæ, etsi cum non concipiamus explicitè sub ratione hominis, vel animalis vt experientia constat. Possumus

etiam illum definire sub aliqua ex ijs rationibus, & non sub alijs; vt si dicamus eum in quantum substantiam esse ens per se subsistens, in quantum animal esse corpus animatum sentiens, in quantum hominem esse animal rationale. Ergo id plusquam sufficiens est vt constituamus distinctionem rationis inter gradus essentialis rei creatæ.

Posterior pars ostenditur, quia rationes quæ præferri solent ad stabiliendam distinctionem realem inter gradus essentialis creaturæ, ad summum ostendunt ponendam esse distinctionem rationis inter illos, vt patebit ex solutione obiectionum, potestque efficaciter confirmari ex eo quod eadem aut similes rationes æquè habent locum in attributis diuinis, inter quæ tamen nulla est distinctio realis, vt fides docet, potestque intelligi ex dictis in *Idea Theologiæ speculat. lib. 1. ca. 2.*

Obijcies 1. non pendere à conceptu nostro quod alia sit ratio formalis sensitui in homine, alia rationalis, &c. sed illi conuenire à parte rei, vt ex eo patet, quod sensituum reperitur interdum à parte rei sine rationali, nempe in bruto. Respondeo maiorem negandam esse, nam etiam non pendeat à mente nostra quod homo sit sensituius & rationalis, pendet tamen ab ea quod alia sit in eo ratio sensitui, alia rationalis; cum sensituum & rationale à parte rei in eo idem sint. Ad probationem verò illius dico, ea non concludi rationate & sensituum realiter distingui in homine, sed tantum rationale hominis reipsa distingui à sensituiuo bruti, quod vltro admittimus.

Obijcies 2. homo per sensituum conuenit cum bruto, & per rationale ab illo differt,

idque à parte rei ; at non potest vna simplex entitas esse ratio conuenientiz , & distinctionis realis cum altera : ergo sensitiuum & rationale sunt dux entitates realiter distinctæ in homine. Respondeo minorem falsam esse , quando vna simplex entitas pluribus æquiualeat, ita vt diuersos effectus producat quorum vnus conueniat cum effectu alterius, alter verò ab eo discrepet, quomodo se res habet in proposito : eadem quippe entitas hominis, vt est principium sensationum , conuenit cum bruto in quo etiam sunt sensationes ; vt autem est principium ratiocinandi, ab illo discrepat, quia brutum non ratiocinatur. Et sanè cum omnes fateantur vnicam tantum esse animam in homine , eamque realiter simplicissimam, necesse quoque est fateri eam esse principium radicale vegetandi, sentiendi, & ratiocinandi ; & consequenter hominem conuenire cum plantis, & cum brutis , simulque ab ijs discrepare per eandem entitatem , & formam simplicissimam.

Obijcies 3. ea quæ constituunt compositum , distinguuntur inter se ; atqui genus & differentia constituunt compositum , nempe speciem, ergo distinguuntur inter se. Respondeo ea quæ constituunt compositum, distinguuntur inter se eo modo quo constituunt compositum ; ita vt si realiter constituent, realiter distinguantur , si verò tantum per rationem constituent , per rationem distinguantur : Atqui genus & differentia non constituent compositum realiter , sed ad summum per rationem , quare hinc tantum colligi potest ea inter se ratione distinguui.

Contrà, Theologi vulgò non audent ponere  
in

in Deo compositionem ex genere & differentia, quod indicio est eos existimare eiusmodi compositionem esse realem; si enim esset tantum per rationem, nullo modo derogaret simplicitati, vel alteri perfectioni diuinæ, cum inter attributa diuina distinctio rationis, ex omnium sententia, constituatur. Respondeo compositionem ex genere & differentia reijci à Deo, non quòd sit realis, sed quia etsi sit tantum per rationem, genus & differentia à se mutuo perfectè præscindunt, ita vt alterum sit omnino extra conceptum alterius, vt suprà probatum est: at non possunt in Deo assignari duæ rationes sic à se mutuo præscindentes. Et aliunde cum repugnet plures esse Deos numero distinctos, repugnat etiam quod Deus vt sic sit species, & consequenter quod sit sub genere, vt diximus in Idea Theologiæ specul. lib. I. cap. 3. Resol. 3.

---

#### ARTICVLVS IV.

*De gradu singularitatis seu indiuiduationis.*

**P**Ræmoneo in indiuiduo v. c. naturæ humanæ, puta in Petro, duas rationes posse considerari, alteram communem, nempe naturam humanam vt à Petro, Paulo, aliisque hominibus singularibus abstractam; aliam singularem nempe differentiam indiuidualem per quam determinatur & contrahitur ad Petrum. Sicut enim genus per differentiam specificam contrahitur ad speciem, vt animal ad hominem per rationale; ita species contrahitur ad indiuiduum per differentiam indiuidualem, seu per singularitatem, de qua hic inquirendum est

*Metaph.*

G

quid addat supra naturam communem, an solam negationem, an vero aliquid positivum, non quidem realiter distinctum ab illa, ut patet ex art. præcedenti, sed tantum per rationem.

Respondeo & dico 1. *Differentiam individua- lem non addere naturæ communi solam negationem, sed præterea aliquid positivum per quod res constituitur singularis.* Probatur, nam etsi individuum idem sit ac non divisum, adeoque includat tum negationem divisionis à seipso, tum negationem identitatis cum quolibet alio ente; id tamen non sufficit ad constituendum singulare, primo quia singulare dicit talem naturam in se indivisam, & divisam à quacunque alia, v. c. Petrus dicit hanc humanitatem per quam est hic homo singularis in se indistinctus in plures homines, & distinctus à quovis alio homine; constat autem talem naturam, & hanc humanitatem dicere aliquam entitatem positivam, quæ sit fundamentum negationis prædictæ.

Secundò, quia vnum individuum non distinguitur ab alio per solam negationem, sed per propriam entitatem, quatenus entitas unius non est entitas alterius: at differentia individualis est id quo vnum individuum distinguitur ab alio, ergo dicit aliquid positivum. Tertiò quia productio terminatur ad rem singularem & individua, terminus autem productionis est realis & positivus.

Dico 2. *Differentiam individualem non esse collectionem talium accidentium quæ in alio non sint.* Probatur, tum quia etsi omnia accidentia mente præscindantur à subiecto, illud adhuc censetur idem numero ac antea; adeoque differentia numerica in ea congerie accidentium consistere non potest.

Tum quia individua substantiæ ponuntur in

Categoria substantiæ, vt patet ex arbore Porphyrij; at in ea non ponerentur, si constituerentur in ratione indiuidui per collectionem accidentium.

Tum quia etsi illa accidentium collectio sufficeret ad indiuiduandam substantiam, adhuc inquirendum superesset per quid accidentia ipsa essent indiuidua & singularia.

Dico 3. *Differentiam indiuidualem non esse representandam à causa productiua indiuidui.* Probatur, tum quia causa efficiens est extrinseca indiuiduo, adeoque non potest spectare ad intrinsecam constitutionem illius; at differentia indiuidualis spectat ad intrinsecam constitutionem indiuidui, sicut differentia specifica ad intrinsecam constitutionem speciei.

Tum quia res intelligitur indiuidua & singularis abstrahendo ab illius causa efficiente, satis enim concipimus Petrum esse hominem singularem ab alijs distinctum, etsi nihil de illius patre cogitemus. Imo Deitas etsi causam nec habeat nec habere possit, est intrinsecè vna numero & singularis substantia. Tum quia homo generat filium à se numero & realiter distinctum, adeoque tribuit illius naturæ differentiam indiuidualem & numericam.

Dico 4. *Differentiam indiuidualem non consistere præcisè in existentia rei singularis.* Probatur, quia indiuiduum non potest concipi sine differentia indiuiduali, cum ad intrinsecam illius constitutionem spectet: Potest tamen præscindi per mentem ratio indiuidui ab actuali existentia, cum possimus cogitare de homine singulari vt singulari, etsi non cogitemus illum existentem, & Deus cognoscat distinctè infinitos homines singulares possibiles qui numquam existent: quare ratio indiuiduationis non potest consi-

stere formaliter in rei existentia. Confirmatur, nam Categoriz abstrahunt à rei existentia, & tamen indiuidua in Categoria directè collocantur, vt dictum est.

Dico 5. *Differentiam indiuidualem substantie non esse subsistentiam, neque accidentium inherentiæ.* Probat, nam substantia non desinit esse singularis, etsi præscindatur siue per mentem, siue etiam realiter à propria subsistentia; vt patet in humanitate Christi quæ est. hæc singularis, distincta ab humanitatibus aliorum hominum, licet careat propria subsistentia. Contrà verò etsi eadem natura terminaretur pluribus subsistentijs, id non impediret quin esset vna numero & singularis; quemadmodum vna est natura diuina cum tribus subsistentijs. Constat etiam accidentia nulli subiecto inherentiæ, qualia sunt Eucharistica, habere propriam singularitatem per quam constituuntur, & ab alijs distinguuntur.

Obijcies, differentia indiuidualis debet sumi ab vltimo actu rei, atqui vltimus actus substantiæ est subsistentia, & accidentis inherentiæ, ergo differentia indiuidualis in ijs constitui debet. Respondeo maiorem absolutè non esse veram, cum enim inquiramus hoc loco per quid gradus essentia vniuersales fiant singulares, consequenter agimus de illis præscindendo ab eorum existentia, & à fortiori præscindendo ab eorum subsistentia, vel inherentiæ; qui sunt quidam modi existentia, de quibus infra agitur. Quare etsi essentia, vt est in rerum natura, vltimus actus sit subsistentia, vel inherentiæ, hinc non sequitur differentiam indiuidualem in ijs constituendam esse.

Accedit quod cum subsistentia & inherentiæ possint considerari & in communi, & in sin-



gulari. Semper explicandum superest quid addatur illis ut fiant singulares, seu quid dicat hæc substantia, & hæc in hærentia, supra substantiam, & in hærentiam in communi.

Dico 6. *Substantiam materialem non indiuiduari formaliter per quantitatem.* Probatur tum quia indiuiduum substantiale quoad suam entitatem est ens, & hoc ens singulare distinctum numero ab omnibus alijs entibus; at repugnat quod entitas substantialis constituatur intrinsecè per quantitatem, quæ est accidens; ergo etiam fieri nequit quod indiuiduatio substantiæ oriatur formaliter à quantitate. Confirmatur, quia aliàs indiuiduum substantiale non posset directè constitui in Categoria substantiæ, contra ante dicta.

Tum quia cum quantitas sit forma materiæ, & hæc sine illa numquam existat, sicut eadem materia successivè reperitur in diversis indiuiduis, ita & eadem quantitas; adeoque repugnat quod res sit indiuidua per quantitatem.

Confirmatur, quia cum substantia alimenti transeat in substantiã al'ti, sequeretur illi qui carne vitulina nutritur, fieri idè numero indiuiduum cum vitulo; quod satis durum videtur.

Tum quia posset Deus duas substantias numero distinctas spoliare quantitate, easque sic conservare, imò & creare, & tamen non coalescerent tunc in eandem numero substantiam, sed æquè essent distinctæ ac antea; ergo substantiæ materialis indiuiduatio nõ sumitur à quantitate.

Tum denique quia una quantitas distinguitur numero ab alia, quantitas v. c. Petri à quantitate Pauli, adeoque inquirendum superest per quid quantitates illæ indiuiduentur: si dicatur indiuiduari per seipsas, quærã cur etiam substantia per seipsã non indiuiduetur; cum nõ minùs

per suam entitatem sit hæc substantia, quàm quantitas per suam entitatē sit hæc quantitas.

Dico 7. *Substantiam materialem non individuari formaliter per materiam signatam, seu stantem sub certis dimensionibus quantitatis.* Probatur tum quia eadem materia affecta eadem quantitate potest successiuè reperiri in diuersis rebus, non modo numero, sed etiam specie distinctis, vt patet ex Physica; ergo non potest materia signata esse principium individuationis substantiarum materialium.

Tum quia autores sententiz oppositz existimant, in rerum corruptione & generatione fieri resolutionem vsque ad materiam primam, ita vt forma & materia omnibus accidentibus destitutæ simul vniantur, & constituent compositum substantiale. At perspicuum est in eo instanti tale compositum esse verum indiuiduum substantiale, distinctum numero à quolibet alio indiuiduo; etsi tamen non possit illius indiuiduatio sumi à materia signata, seu vt affecta quantitate. Ergo aliquod aliud principium individuationis querendum est.

Tum denique quia sicut res spirituales per proprias entitates sunt indiuisæ in se, & diuisæ à quouis alio, ita & substantiæ materiales; quare sicut illæ non possunt individuari per materiam, aut quantitatem, quia vtraque caret; ita affirmandum est istarum individuationem à materia signata repetendam non esse. Confirmatur, quia cum omnia tam spiritualia quàm materialia in eo conueniant, quod sunt indiuidua, debet assignari quædam ratio individuationis quæ illis omnibus aptari possit, cuiusmodi non est materia signata, vt perspicuum est.

Neque refert quod Arist. interdum dicat, ea esse vnum numero quorum materia est vna, &

plura numero, quorum materia est diuisa; duplex enim est vnitas, alia quantitatiua, quæ cōsistit in in diuisione rei quantæ in plures partes quantitatiuas, & in diuisione seu discontinuatione ab omni alia quantitate; alia entitatiua, quæ consistit in indistinctione rei in plura seipsa, & distinctione à qualibet alia entitate. Loquitur autem Aristot. de priori vnitate, quæ solis rebus materialibus & quantis competit; nos verò agimus de posteriori, quæ rebus non modo materialibus, sed etiam spiritualibus conuenit, quam contendimus à materia, vel quantitate sumi non posse.

Dico 2. *Nec materiam, nec compositum indiuiduari per formam.* Prior pars probatur, nam materia præcedit formam, non modo in communi, sed etiam in indiuiduo; ita vt hæc singularis materia præexistat antequam forma ei vniatur, sicque habeat indiuiduationem independentem à forma.

Confirmatur, nam vna & eadem numero materia modo est sub vna, modo sub alia forma numero, Imò specie distincta; ergo non potest materia habere vnitatem numericam seu indiuidualem à forma. Vnde non potest dici materiam indiuiduari per ordinem ad certam formam, cum indifferenter se habeat ad omnes.

Posterior pars ostenditur, quia sicut non tantum forma, sed etiam materia est de ratione compositi, vt in Physicis dicemus; ita hæc forma, & hæc materia sunt de ratione huius compositi. Quare compositum non potest habere à forma saltem sola, quod sit hoc singulare compositum, sed id partim etiam à materia habere debet.

Est autem difficultas an id habeat sufficien-

ter ab hac materia, & hac forma simul vnitis. Respondeo id habere Physicè loquendo, nam cum compositum vt sic, dicat materiam & formam simul vnitas; Hoc singulare compositum dicit hanc numero materiam, & hanc numero formam. Si tamen res Metaphysicè consideretur, quatenus hic agimus de differentia indiuiduali, qua species contrahitur ad hoc singulare, certum est principium indiuiduationis non sufficienter explicari per hanc materiam, & hanc formam; cum inquirendum super sit quidnam sit id quod addit hæc materia, & hæc forma supra rationem communem materię & formę.

Dico 9. *Accidens non indiuiduari per subiectum cui inheret.* Probat, tum quia accidens habet entitatem propriam realiter & essentialiter distinctam ab entitate subiecti: repugnat autem aliquid constitui hoc ens singulare per entitatem à se realiter distinctam, cum singularitas non distinguatur à gradu communi in eadem re, vt supra ostendimus. Confirmatur, nam non modo albedo distinguitur à pariete, sed etiã hæc singularis albedo; quare non potest ab illo formaliter accipere suam singularitatē.

Tum quia Deus potest creare & conseruare accidens extra quodcumque subiectum, potest etiam efficere per potentiam absolutam, vt idē accidens transeat ab vno subiecto ad aliud, aut etiam vt simul sit in subiectis distinctis. In his autem casibus non posset accidens sumere suam vnitatem & distinctionem numericam à subiecto inhesionis, vt manifestum est, sed aliunde eam haberet. Ergo dicendum est generatim accidens aliunde suam indiuiduationem quam à subiecto accipere. Confirmatur, quia idē numero subiectum multa accidentia

numero distincta successiuè potest recipere, vt idem aer aliam & aliam lucem, aqua alium & alium calorem, &c. Ergo dici non potest accidens sumere vnitatem & distinctionem numericam à subiecto cui inhaeret.

Nec refert quòd in vno subiecto materiali sit v. c. vna albedo, in duplici duplex, &c. hinc enim sequitur tantum vnitatem quantitativam oriri à subiecto quanto, non autem entitativam; quia de qualibet albedine, vt & de qualibet quantitate, imò & de qualibet parte materix inquirendum restat, vnde habeat quòd sit hæc, non illa, vt patet ex dictis.

Dico 10. *principium formale & proximum individuationis in re qualibet singulari esse differentiam positivam illi intrinsecam, per quam species contrahitur ad tale individuum, vocaturque ex Scotto generatim hæcitas, & speciatim Petreitas, Patellitas, &c.* Sequitur ex dictis, tum quia nihil aliud superest ex quo possit desumi ratio propria individui, cum alia omnia reiecta sint.

Tum quia sicut genus contrahitur ad speciem per differentiam specificam, ex qua & genere species intrinsecè constituitur; ita species contrahitur ad individuū per differentiam individualē, ex qua & ratione specifica constituitur intrinsecè individuū: est enim par ratio.

Tum quia sicut species addit aliquid intrinsecum supra genus, ita æquum est vt individuū includat aliquid intrinsecum supra speciem; cum illi subijciatur in recta linea Categoriæ, sicut species subijcitur generi.

Tum quia individua eiusdem speci ei per aliquid inter se realiter conveniunt, & per aliquid differunt; ergo sicut id quo conveniunt est ipsis intrinsecum, ita & id quo differunt; at non differunt per attributa specifica, aut gene-

rica, sed tantum per propria, & individualia, quæ proinde ipsi intrinseca esse debent.

Obijcies 1. omnis actus singularis præexigit potentiam singularem quam actuat, atqui differentia individualis actuat naturam, ergo debet natura esse singularis ante talem differentiam. Respondeo maiorem falsam esse, nam sicut differentia specifica non supponit naturam specificam, sed facit; ita differentia singularis non supponit naturam singularem, sed facit.

Obijcies 2. quod conuenit vni individuo, & repugnat alteri, supponit ea esse distincta: sed differentia individualis conuenit vni individuo, & repugnat alteri; ergo supponit ea distincta, adeoque non primò causat talem diuersitatem. Respondeo maiorem absolute falsam esse de eo quod primò vnum individuum constituit, hoc enim non inuenit distinctionem numericam, sed facit; ad eum modum quo differentia specifica non supponit distinctionem specificam, sed facit.

Obijcies 3. si differentia individualis est intrinseca & positua, sequitur speciem non constituere totam essentiam rei, item individua essentialiter inter se differre; quæ & familia communi Philosophiæ repugnant. Respondeo hæc non repugnare communi Philosophiæ quoad rem ipsam, sed tantum quoad modum loquendi: communiter enim nomine essentia intelliguntur gradus multis communes, quia res considerantur à Philosophis ut cadunt sub scientiam, & possunt definiri; at essentia ut singulares non cadunt sub scientiam, nec possunt definiri, sed tantum vel secundum se, vel, ut statuit communis sententia, quatenus sunt vniuersales.

Quare hoc tantum modo sub nomine essentia comprehenduntur, etsi verè & à parte rei etiam differentia indiuiduales ad essentiam rerum pertineant.

## CAPVT III.

De proprietatibus entis tam in genere, quàm in specie.

## ARTICVLVS PRIMVS.

*De proprietatibus entis in genere.*

**Q**UÆRITUR I. an quædam proprietates seu passiones entis admittendæ sint. Respondeo affirmatiuè, cuius ratio est, quia nullum est subiectum scientia de quo aliqua passio demonstrari non possit; atqui ens est subiectum Metaphysicæ, ergo aliqua passio de ente demonstrari potest. Confirmatur, nam nomine passionis intelligimus hic aliquod attributum consequens ad rationem essentialem: atqui nonnulla sunt attributa quæ consequuntur ad rationem entis, vt quod sit vnum, verum &c. Ergo ens habet aliquas passiones.

Obijcies I. si ens habet proprietates aliquas, vel ex sunt ens, vel nihil; neutrum dici potest, ergo nullas habet proprietates. Maior perspicua est quia inter ens, & nihil non datur medium. Minor verò suadetur, quia quod est ens, non est passio entis, sed ipsummet ens; quod verò nihil est, non potest enti reali, tanquam proprietas competere. Res-

pondeo proprietates entis non esse entitates reales ab ipso ente distinctas, sed formaliter consistere in negatione aliqua, aut relatione rationis; quod etsi non sufficiat ad rationem proprietatis, ut de ea communiter agitur in Physicis, quia hæc ut sic dicit entitatem aliquam realiter à subiecto fluentem, adeoque realiter ab illo distinctam; sufficit tamen ad rationem passionis latiori modo sumptæ, cum ex usu communi prædicata secundaria quæ ab aliquo subiecto, siue per modum negationis, siue per denominationem extrinsecam, aut respectum rationis consequuntur, locum teneant passionum; ut ex variis passionibus quæ ab Arist. prædicamentis assignantur intelligi potest.

Obijcies 2: si ens habet aliquas proprietates, ex possunt demonstrari per definitionem entis: at ens non potest definiri, quia quod definitur, constat genere & differentia, ens autem non habet genus, cum sit supra omnia genera; ergo ens nullas habet proprietates. Respondeo ens non posse quidem exactè definiri, posse tamen aliquo modo describi, & per illius descriptionem posse proprietates de eo demonstrari: ut si dicamus, omne quod habet veram essentiam, est unum, ens habet veram essentiam, ergo est unum.

Quæritur 2: quid proprietas entis addat supra ens: ut huic quæsito satisfaciam,

Respondeo & Dico 1: proprietates entis non dicere aliquas formalitates positivas & reales ex natura rei ab ente distinctas, eique superadditas. Probat, quia cum omnis formalitas positiva & realis sit intrinsecè & essentialiter ens;



impossibile est eam esse aliquid ex natura rei ab ente distinctum, eique superadditum. Ens enim includit omnia entia, adeoque non potest illi superaddi aliquod ens, sed tantum non ens; quare vel passiones non superadduntur enti, vel non sunt aliquid positivum.

Confirmatur 1. nam secunda per intellectum quacunque realitate, aut formalitate positiva distincta ab ente, adhuc concipimus ens esse unum, verum, & bonum; adeoque habere omnes proprietates quæ illi vulgò assignantur. Ergo passio entis non consistit in quadam realitate, aut formalitate positiva distincta ex natura rei ab ente.

Confirmatur 2. nam si passio entis esset ens distinctum, illud haberet suas passiones, quæ si essent entia, ijs etiam aliæ proprietates assignandæ essent, sicque daretur progressus infinitus inter entia, & eorum passiones. Quod cum sit absurdum, sistendum est in primis entis passionibus, & fatendum eas non addere aliquam realitatem supra ens.

Obijcies, unum, verum, bonum sunt proprietates entis; at illæ dicunt entitatem aliquam realem, cum nihil non sit unum, verum, bonum. Respondeo passiones illas tripliciter spectari posse 1. fundamentaliter, quomodo non distinguuntur ab ente. 2. in concreto, quomodo includunt pro materiali ens, & se ipsas pro formali. 3. formaliter, ut passiones entis superadditas, qua ratione nihil positivum includunt. Unde

Dico 2. *proprietates entis non dicere intrinsecè ipsum ens, & aliquid ei superadditum.* Probatum nam sicut risibilitas v. e. non dicit rationalitatem & formam ei adiunctam, sed præcisè talem formam; & hinnibilitas non dicit naturam.

equinam, sed accidens ei superadditum: ita similiter passiones entis non debent includere in suo conceptu ipsum ens, sed tantum aliquid enti superadditum.

Confirmatur, nam ens per se non est passio entis, ut perspicuum est, ergo nec ens alteri iunctum dici potest passio entis; sicut nec rationalitas iuncta risibilitati est passio rationalitatis. Quod enim subiectum passionis concipiat simul cum passione per modum vnius aggregati, id non sufficit ut totum illud aggregatum sit passio; cum ut sic, ab alio tanquam ab essentia non procedat.

Obijcies, passiones debent definiri ex Arist. per additamētum, hoc est per suum subiectum; atqui id per quod res definitur est de essentia illius, ergo est de essentia suarum passionum. Respondeo passiones non debere definiri per subiectum, ut per aliquid ipsis intrinsecum, sed tanquam per aliquid ad quod habent ordinem intrinsecum; ut ex eo manifestum est, quod modus ille definiendi competit generatim omnibus accidentibus: at dici non potest omnia accidentia includere in suo conceptu subiectum cui insunt, cum pleraque ab illo realiter distinguantur.

Dico 3. *proprietates entis formaliter spectatas nihil aliud dicere quàm aliquam negationem, aut relationem rationis enti superadditam.* Sequitur ex dictis, nam cum assignandæ sint enti aliquæ proprietates, neque in earum conceptu includatur siue ens cuius sunt proprietates, siue alia formalitas positiua enti superaddita; hinc manifestè colligitur proprietates entis in quadam negatione, aut relatione rationis constituendas esse.

Quæritur 3. quot sint passiones entis. Res.

pondeo tres communiter assignari, nempe unitatem, veritatem, & bonitatem. Huius autem numeri sufficientia ex eo probatur, quod unitas, veritas, & bonitas veluti sequuntur ad primariam entis rationem, sicut aliz proprietates sequuntur ex subiecto cui competunt; conuertuntur etiam cum ente, ita vt nullum sit ens quod non sit vnum, verum, bonum, & vice versa nihil sit vnum, verum, bonum quod non sit ens. Sicut enim ens rationis est ens fictum, ita non nisi unitatem, veritatem, & bonitatem fictam habet.

Denique nulla entis passio assignari potest quæ ad illarum aliquam non possit reduci, quare faciendum est tres assignatas esse veras entis passiones, nec plures admittendas esse. Nec audiendi sunt qui rem & aliquid inter passiones entis enumerant; cum illa ab ente non distinguantur, nisi quoad voces.

Nota proprietates illas variis modis concipi posse, sicque etiam diuersimode inter se ordinari. Communiter tamen unitas præcedit veritatem, & hæc bonitatem; cuius ratio est, quia quod est absolutum, est prius respectiuo, at unitas dicit indiuisiōem rei in se, veritas verò dicitur per respectum ad intellectum, & bonitas per ordinem ad voluntatem: quare unitas præcedit veritatem, & bonitatem; quia verò actio intellectus est prior actione voluntatis, hinc fit vt veritas sit prior bonitate: Quare de illis etiam hoc ordine sequentibus articulis agemus.

## ARTICVLVS II.

*De unitate Entis*

**Q**Uæritur 1. quid sit unitas, an rationem aliquam positiuam, vel tantum negationem addat supra ens. Respondeo non dicere aliquid positiuum, sed tantum negationem diuisionis. Probatum tum quia Arist. 5. Metaph. cap. 6. & aliàs docet vnum idem esse ac indiuisum; at indiuisum nihil dicit præter negationem diuisionis: Ergo & vnum eiusmodi tantum negationem in conceptu suo includit.

Tum quia si unitas diceret formaliter aliquam rationem positiuam, sequeretur eam esse ens, adeoque addere enti ens; quod repugnat, ut patet ex artic. præcedenti. Confirmatur, nam si unitas diceret ens, illud ens esset haud dubie vnum, utique per distinctam formalitatem positiuam, quæ similiter esset ens vnum, sicque progressus abiret in infinitum; qui ut caueatur, sistendum est in prima unitate, adeoque fatendum eam ex se non dicere nisi negationem diuisionis.

Tum quia præcisa quacunque formalitate positua, distincta ab ente, concipimus ens ipsum præcisè per suam entitatem esse vnum seu indiuisum; sicque unitatem non dicere formaliter aliquid positiuum, sed solam negationem diuisionis.

Obiicies 1. negatio fundatur in aliqua formalitate positua; at non in formalitate entis, quia datur ens non vnum, seu multiplex; ergo in formalitate aliqua distincta. Respondeo

negando minorem, ens enim præcise ratione suæ entitatis est vnum: & ad probationem dicimus, ens multiplex non esse propriè ens, sed entia.

Obijciēs 2. vnitas est perfectio, Deus enim quatenus vnus, est perfectus; at perfectio dicit aliquam formalitatem positiuam, ergo & vnitas. Respondeo vnitatem fundamentaliter esse perfectionem positiuam in ente fundatam; formaliter verò dicere quādam perfectionem negatiuam, seu remotionem imperfectionis, puta diuisionis, & multiplicatis.

Obijciēs 3. etsi vnum dicat indiuisiōem, & indiuisiō sit vox negatiua, debet tamen significare formam aliquam positiuam, eò quòd per illam negatur diuisiō: siquidem diuisiō ipsa est negatio vnius de alio, at non datur negatio negationis, sed cuilibet negationi immediate opponitur forma positua qua destruitur; ac proinde indiuisiō inclusa in vnitatem dicit formam positiuam. Respondeo diuisiōnem dupliciter posse considerari, primò vt dicit plura entia in se completa, secundo vt eorum vnum non est aliud; ac posteriori modo dicere negationem, priori verò dicere aliquid positiuum, cuius indiuisiō est entis negatio: ita vt cum dicimus ens esse vnum, vel indiuisum, sensus sit, ens non esse plura entia. Accedit quòd gratis supponitur cuilibet negationi immediate opponi formam positiuam; cum constet v. c. in lapide esse negationem excitatis, quæ omnium consensu, non est forma positua. Quare etsi diuisiō esset negatio, inde non sequeretur vnitatem in negatione non consistere.

Quæritur 2. an vnitas dicat propriam & strictam negationem, an vero priuationem. Ref-

pondeo aliquo sensu dicere priuationem, simpliciter tamen in negatione constituendam esse. Et quidem dicit priuationem, quatenus ens quod dicit aliquid reale, ab illa denominatur vnum: est enim illud discrimen inter priuationem & puram negationem, quod illa non conueniat nisi enti reali, hæc verò etiam nulli subiecto conueniat. Aliunde tamen est negatio, quia negatio sumitur communiter pro priuatione formæ in subiecto illius incapaci, & priuatio è contra pro negatione formæ in subiecto apto; atqui vnitas est negatio formæ in subiecto inepto, cum repugnet enti diuisum esse, statim enim ac diuiditur, non amplius est ens, sed entia. Vnde vnitas est passio entis simpliciter negatiua, seu magis negatiua quàm priuatiua.

Obijcies, vnitas quæ coniuncta est cum aptitudine essendi in multis, est vnitas priuatiua, non negatiua; atqui vnitas cuiusque naturæ vniuersalis est coniuncta cum illa aptitudine, vt patet ex definitione vniuersalis superius tradita; ergo vnitas earum rerum est priuatiua, non negatiua, & consequenter falsum est omnium entium vnitates esse negatiuas. Respondeo hanc posteriorem consequentiam negandam esse, quia cum agimus hic de omni ente, & illius vnitate, agimus de vnitate quæ competit enti realiter & secundum se; at verò vnitas vniuersalis de qua procedit obiectio, est vnitas effecta per intellectum; quare etsi sit priuatiua, ex ea non licet aliquid simile concludere de alia vnitate, quæ cuilibet enti singulari per se & realiter competit.

Queritur 3. quænam sit forma quæ negatur per vnitatem. Respondeo cum vnitas sit ne-

gatio diuisionis , & diuisio dicat multitudinem , per vnitatem & diuisionem , & multitudinem negari , seu hæc duo esse formam negatam per vnitatem. Itaque patet ex communi vsu loquendi & concipiendi , quia vulgò dicimus & intelligimus illud esse vnum , quod non est diuisum , nec est multa.

Obijcies, vnitas præcedit multitudinem, cum hæc constet ex variis vnitatibus , ergo non potest dicere negationem multitudinis. Sequela patet , quia negatio supponit formam quam negat , estque illa posterior. Respondeo 1. hoc argumentum posse retorqueri in nonnullos qui eo vtuntur contra negationem multitudinis ; cum tamen existiment vnum dicere negationem diuisionis. Constat enim diuisionem non magis esse priorem vnitatem , quàm multitudinem ; cum diuisio intelligi non possit sine multitudine , & nisi præcedant plures vnitates.

Respondeo 2. vnitatem esse priorem diuisione & multitudine quoad rem ipsam , prout res in natura existunt , & hoc modo vnum non dicere negationem diuisionis , & multitudinis ; esse tamen illis posteriorem quoad conceptum nostrum. Non enim possumus concipere vnum dicere negationem diuisionis , & multitudinis , quin prius diuisionem & multitudinem concipiamus ; sicut non possumus intelligere hominem dicere negationem equi , vel ligni , quin prius equum , vel lignum concipiamus.

Quæritur 4. cum ens vulgò dicatur quod est indiuisum in se , & diuisum à quouis alio , vtrum non modo indiuisio in se , sed etiam diuisio à quouis alio ad primariam rationem vnitatis spectet. Respondeo negatiuè , prius enim est quòd res sit constituta in se vna & in-

diuisa, quàm quòd comparatur cum alijs. Unde Deus non desineret esse perfectè vnus, etsi nullæ essent creaturæ possibiles à quibus diuidi posset; quia nihilominus esset in se indiuisus in plures Deos.

### ARTICVLVS III.

#### *De veritate entis.*

**Q**Uæritur I. an veritas, quæ est proprietas transcendentalis entis, dicat negationem, aut aliquid positiuum. Aliqui existimant eam dicere negationem entis ficti & apparentis, dicimus enim verum hominem, verum aurum, &c. ad distinctionem hominis ficti, & falsi auri. Hoc tamen refellitur, quia etsi interdum veritas in communi vsu loquendi ita sumatur, non debet sic accipi cum Philosophice & exactè agitur de passione entis: quia si ens verum diceret negationem ficti, cum ens fictum sit quod non habet realitatem entis veri, sed solam apparentiam, sequeretur ens verum dicere negationem suæ negationis, quomodo proprietas entis non satis congruè explicatur. Eo vel maximè quia ens per suam entitatem præcisè, abstrahendo à quacunque proprietate ex ea consequente, dicit negationem negationis sui ipsius; quò sit vt non possit veritas, quæ est entis passio, in illa negatione constitui.

Alij existimant veritatem entis duplicem esse, externam, & internam; externam consistere in conformitate illius cum suis principiis, maxime cum exemplari ad cuius similitudinem offingi debet; internam vero seu en-



titatiuam consistere in cōformitate cum principijs internis seu essentialibus, ex quibus componi debet: ita vt illud dicatur verum aurum, quod constat ex materia & forma quæ auro debentur; ille sit verus homo, qui ex corpore humano, & anima rationali constat. Verum hic etiam modus reiicitur, quia iuxta illum, veritas nullo modo distinguitur ab ipsa rei natura & entitate, ideoque non est passio entis; qualis hic inquiritur. Vt enim aliquid sit passio alterius, debet illius naturæ & essentix quandam formalitatem, si non realem, saltem negatiuam, aut rationis superaddere, vt supra monuimus.

Dicendum ergo cum communi sententia, veritatem entis consistere in conformitate illius cum intellectu. Potest enim distingui duplex veritas, alia formalis tenens se ex parte intellectus, alia transcendentalis tenens se ex parte obiecti; & sicut prior dicitur consistere in conformitate conceptus formalis cum obiecto, ita posterior potest legitimè constitui in conformitate obiecti cum actu intellectus.

Vbi nota hanc entis conformitatem à nonnullis explicari per denominationem extrinsecam à conceptione intellectus, importando directè ipsam cognitionem, & connotando obiectum, vt si dicam, cognitio repræsentat hominem vt est in se. Verum id non satis solidè dictum videtur, quia sic veritas rei non esset illius conformitas cum intellectu, sed potius conformitas intellectus cum ipsa, & consequenter veritas formalis confunderetur cum transcendentali.

Vnde malum dicere veritatem entis constitui in conformitate illius ad intellectum, non

quòd ipsa rei entitas sit de conceptu directo veritatis, debet enim passio à suo subiecto distinguì, sed quòd præbeat fundamentum ei affingendi relationem quandam conformitatis ad intellectum cognoscentem. Neque quæ contra hoc obijciuntur de perfectionibus veritati attributis, sunt alicuius momenti, cum de veritate materialiter spectata, seu de ente vero facile intelligi possint.

Adhuc tamen obijci potest, veritatem non bene constitui in relatione rationis; quia seclusa quacunque relatione, ens per se, quatenus est ens, est intelligibile, habetque proportionem & conuenientiam cum intellectu cognoscente, adeoque sine vlla relatione est verum. Respondeo enti per se competere veritatem fundamentalem, non tamen illam quæ ab omnibus vt quædam passio entis constituitur: quia, vt dictum est, passio non debet in suo conceptu includere subiectum, sed dicere aliquam formalitatem ei quodammodo superadditam. Vnde cum passio entis non possit dicere aliquam formalitatem positiuam & realem, vt supra ostensum est, consequenter debet dicere tantum negationem, vel relationem rationis. Et cum veritas nihil neget, adeoque non consistat in negatione, superest vt in solo rationis respectu constituatur.

Confirmatur, nam omnes fatentur veritatem dicere conformitatem ad intellectum, quæ sine ordine aliquo & respectu intelligi nequit: at respectus ille non est realis, vt patet ex dictis, ergo est relatio rationis. Neque aliud videntur velle qui dicunt cognoscibilitatem entis, in qua ponunt veritatem transcendentelem, distinguì ab ente, non ex parte obiecti, sed ex parte actus intellectus, &

esse illo posteriorem, sicque esse passionem illius; quia ens prius apprehenditur in ordine ad se, quomodo dicitur ens, & posterius in ordine ad cognitionem veram, quomodo dicitur verum; & hæc causalitas nostro concipiendi modo est vera, quia est ens, est cognoscibile, & hæc falsa, quia est cognoscibile, est, ens. Iste enim dicendi modus, etsi veritatis transcendentalis fundamentum in ipso ente constituat, formalitatem tamen illius, de qua præcipue est quæstio, ad respectum quendam rationis reducit.

Queritur 2. ad quem intellectum veritas entis dicat relationem conformitatis, Non pauci existimant dicere relationem illam ad intellectum diuinum, qui est prima veritas formalis & regula omnis veritatis. Alij docent veritatem dicere respectum ad intellectum creatum, quatenus in eo causat sui notitiam. Alij verò putant dicere respectum ad intellectum in communi siue sit creatus, siue increatus, quod videtur probabilius.

Ratio est, quia conformitas illa consistit in eo quod ens sit intelligibile, non autem quod sit intelligibile per hunc, vel illum intellectum determinatè: Ergo sicut visibile dicit conformitatem ad visum in communi, appetibile ad appetitum, & sic de alijs, ita entis intelligibilitas dicit conformitatem ad quemcunque intellectum. Confirmatur, nam sicut veritas formalis est in quocunque intellectu, ita & transcendentalis ad quemcunque intellectum terminari debet.

Obijcies 1. qui rei alicuius veritatem inquirunt, eam considerant ut in se est, non autem quatenus habet conformitatem cum intellectu siue diuino, siue humano; ut patet cum

quis auri, vel argenti veritatem inuestigat. Ergo veritas non consistit in conformitate ad intellectum, vt supponitur. Respondeo hoc argumentum procedere tantum de veritate rerum Physica, non autem de transcendentali, de qua nunc agimus.

Obijcies 2. si veritas esset conformitas cum intellectu, sequeretur ex hypothese impossibili, quod nullus esset, nec esse posset intellectus, & aliquod ens reale existeret, illud non fore verum; quia non haberet conformitatem cum villo intellectu, quod tamen absurdum videtur. Respondeo in ea hypothese rem quæ existeret fore veram fundamentaliter, quia quantum esset ex se, cognoscibilis esset ab intellectu, si is esset possibilis; non tamen formaliter, quia cum hæc formalitas dicat respectum rationis, vt ostensum est, & respectus rationis esse nequeat sine intellectu, hinc sequeretur rem existentem non esse formaliter veram, sed tantum materialiter seu fundamentaliter.

Obijcies 3. veritas entis debet explicari tantum per conformitatem ad suam primam regulam, at solus intellectus increatus est prima regula veritatis, cum ille solus necessarius, & actu, & semper, & verè res omnes intelligat vt sunt. Respondeo maiorem negandam esse, quia etsi intellectus creatus non sit prima regula veritatis, cum tamen verè possit res intelligere, id sufficit vt ex dicantur veræ etiam per ordinem ad illum, etsi non tam perfecte, ac per ordinem ad intellectum diuinum.

Instabis res esse veras ab æterno, adeoque per ordinem tantum ad intellectum diuinum, cum creatus ab æterno non existerit. Respon-

deo

deo hoc argumento rectè ostendi, res non fuisse veras ab æterno, respectu intellectus creati, si per veritatem intelligatur conformitas rei actualis cum intellectu creato. Id tamen non impedit, quin absolute dici possint veræ ab æterno etiam per ordinem ad intellectum creatum, quatenus tales sunt ut etiam ab illo cognosci possint, si ab æterno existat. Veritas enim, quæ est proprietas entis, non tam significat illius conformitatem actualem cum intellectu, quàm aptitudinalem quæ, etiam intellectu non existente, subsistit.

Obijcies 4. cum veritas formalis causetur ab obiectiua, dicendum est istam in eo consistere, quod veram sui cognitionem in intellectu producat; ac proinde eam non dicere ordinem ad intellectum diuinum, sed tantum ad humanum, cum in hoc tantum possit aliquid causare. Respondeo absurdum esse limitare veritatē transcendentalem entis per ordinem ad intellectum humanum, cum potiori titulo ad diuinum extendi debeat, ut patet ex dictis. Quare veritas illa non debet sumi ex causalitate rei cognitæ in intellectum cognoscentem, sed præcisè ex conformitate illius cum intellectu, quæ ut sic, omni enti respectu omnis intellectus competere potest.

Quæritur 3. quotuplex sit veritas. Respondeo triplicem communiter assignari, nempe veritatem rei, seu transcendentalem, de qua iam egimus, veritatem signi, seu in significando, qualis reperitur in vocibus, scripturis, aliisque signis externis quibus cōceptus interni repræsentantur, & veritatē cognitionis, quæ vulgo formalis appellatur, & consistit in cōformitate cognitionis cum re cognita. Ut autem ista clarius pateant, nonnulla obseruanda sunt.

*Metaph.*

H

Primò sicut cognitio duplex est, alia intellectiua, alia sensitiva, ita & duplicem esse veritatem formalem; aliam intellectiuam & spiritualem, aliam sensitivam & materialem: quæadmodum enim cognitio intellectiua dicitur vera, quâdo conformis est suo obiecto, ita & sensitiva dicenda est vera, quando percipit suû obiectum vt est, cû par sit ratio. Quanquam fatendum est longè sublimiorem esse veritatē intellectus quàm sensus, tum quia sensus nō nisi pauca obiecta, eaque materialia percipere potest, intellectus vero habet pro obiecto adæquato totam latitudinē entis; tum quia sensus verè quidem obiectum percipit, non tamen cognoscit se verè illud percipere; at verò intellectus & verè obiectum cognoscit, & se vere illud percipere intelligit, se reflectendo supra seipsum.

Secundò veritatē formalem reperiri aliquatenus in prima apprehensione intellectus, vt patet tum quia apprehensio potest esse conformis rei, sicque esse vera, vt cû concipio hominē qui verè existit; tum quia definitio dicitur vera, quando est conformis rei definitæ, at definitio ad primam mētis operationem spectat. Tum quia dicimus esse veram Regis imaginem quæ simpliciter Regem repræsentat vt est; ergo similiter. Veritas tamen dicitur esse perfectiori modo in secunda mentis operatione, quia ille dicitur verè rem cognoscere, qui determinatè iudicat rē esse sicuti est, aut nō esse sicuti nō est.

Ex quo intelligis iudiciū esse intrinsecè verū ratione veritatis in eo existentis, & non tātum extrinsecè per denominationem à veritate cognita primæ apprehensionis, vt quidā immeritò opinantur. Sicut enim iudiciū nō dicitur cognitio, quia cognoscit primam apprehensionē, sed quia cognoscit idem obiectū per præcedē-

tem apprehensionem cognitum; ita non dicitur verum, quia cognoscit apprehensionem veram, sed quia verè secundū se obiectū repræsentat, imo nobiliori modo quàm apprehensio.

Tertiò posse etiam falsitatē aliquo modo in prima mentis apprehensione complexa reperiri, nam quemadmodum apprehensio quā cognosco Petrum vt rationalem, est quodāmodo vera, quatenus est conformis obiecto; ita vice versa illa est falsa quā apprehendo Petrum sub ratione hinnibilis, cū sit difformis obiecto.

Est autem difficultas, an falsitas cadere possit in apprehensionem incomplexam qua concipitur aliquis terminus simplex, v. c. subiectum, vel attributum, non autem vnio vtriusque. Quā in re sententia negans est communis, & tenenda. Cuius ratio est, quia cognitio tunc est vera, quando est conformis suo obiecto; atqui simplex illa vnus termini apprehensio non potest non esse conformis suo obiecto, cū sit actualis imago & repræsentatio illius; ergo non potest non esse vera, sicque repugnat eam esse falsam.

Obijcies, qui apprehendit vulpem pro lepore, decipitur, sicque illius apprehensio est falsa. Respondeo non sequi, ille enim non apprehendit falsò leporem, sed verè apprehendit vulpem, ac proinde illius apprehensio est vera, cū sit conformis obiecto. Decipitur autem quia apprehensioni leporis aliam ignoranter substituit.

Quartò vtramque veritatem antedictam nempe formalem seu repræsentatiuam, & entitatiuam in eadem cognitione simul reperiri, sub diuerso respectu. Nam si cognitio spectetur quatenus est conformis obiecto, sic in ea est veritas prioris generis; si verò spectetur qua-

tenus est ens cognoscibile, seu habens conformitatem ad intellectum cognoscentem, eo modo veritas transcendentalis in illa locum habet, sicut & in aliis omnibus entibus, quatenus sunt entia.

Quæritur 4. quid sentiendum sit de falsitate veritati hætenus expensæ opposita.

Respondeo 1. falsitatem dici varijs modis: 1. quando opus deficit à regula artis, & à bonitate quam habere debet, quomodo falsas merces, falsam monetam, &c. dicere solemus. Hic tamè loquendi modus videtur improprius, & parum vsitatus, præsertim apud Philosophos.

2. Quando obiectum mouet intellectum ad falsam de eo conceptionem eliciendam, quo sensu aurichalcum dicitur falsum aurum, & stannum falsum argentum; quia propter similitudinem apparentem quam habent cum auro & argento intellectum decipiunt, eum ad falsum iudicium adigendo. Verum nulla res hoc sensu dici potest falsa respectu Dei, cum Deus nulla rei similitudine decipi possit, vt aliter rem concipiat quam in se sit.

3. Contingit falsitas per simplicem rei terminationem, ita vt aliter cognoscatur quam sit, etsi non sit causa deceptionis. Et hic etiam modus falsitatis non competit rebus per ordinem ad intellectum diuinum, quia cum sit infinite perspicax, res omnes intimè obtutu suo peruadit, easque intuetur vt sunt.

Respondeo 2. vt res dicatur falsa, eam debere esse causam vel occasionem falsitatis intellectus. Cum enim res quælibet ex se sit cognoscibilis vt est, adeoque ex natura sua fundet veram sui cognitionem, si id quod cognoscitur aliter quam sit, non esset causa vel occasio talis deceptionis, falsitas tota se teneret



ex parte intellectus, sicque obiectum non diceretur falsum nisi per denominationem extrinsecam à falsitate cognitionis. Quare sicut illud verum obiectum vocatur quod fundat veram cognitionem sui, seu qua intelligitur vt in se est; ita ad falsitatem obiecti requiritur vt fundet falsam sui cognitionem, seu vt sit aliquo modo causa cur cognoscatur aliter quàm est in se; quod præstat ob similitudinem quam habet cum aliqua re alia, supposita tamen imperfectione intellectus cognoscentis, qui ob suæ lucis inopiam similitudinem pro identitate sumit.

Respondeo 3. falsitatem non esse passionem entis transcendentalem. Probatur ex dictis, tum quia vox competit enti respectu Dei; tum quia omne ens, quantum est ex se, petit intelligi vt est, adeoque omne ens ex se est verum, & consequenter non potest simul ex se esse falsum. Quare falsitas rebus competit tantum per accidens, ratione cuiusdam adiuncti, & supposito defectu intellectus cognoscentis, qui rem ex se etiam in iisdem circumstantiis verè cognoscibilem, aliter intelligit quàm sit.

## ARTICVLVS IV.

*De bonitate Entis.*

**P**Ræmoneo triplicem assignari posse bonitatem, nempe moralem, Physicam, & Metaphysicam seu transcendentalem. Bonitas moralis ea est quæ est conformis rectæ rationi, & honestati de qua agitur in Ethica: Physica est perfectio realis congruens rebus na-

turalibus, qualis est vis illuminandi in sole, calefaciendi in igne, de qua tractatur in physica. Bonitas verò metaphysica est illa, quæ enti reali ut ens est, convenit, de qua hic nonnulla inquirenda sunt.

Quæritur 1. an bonitas metaphysica, seu transcendens rebus omnibus conveniat. Respondeo affirmatiuè; quod probatur, tum quia quidquid est vel est Deus, vel creatura, at Deus non modo bonus est, sed etiam summè bonus, quòd verò etiam creaturæ omnes sint bonæ, manifestum est ex scriptura Genes. 1. his verbis, *vidit Deus cuncta quæ fecerat, & erant valde bona*. Tum quia omne ens per suam entitatem est perfectum, conueniens, & appetibile: quæ autem talia sunt, bona sunt, ex communi sententia. Ergo entia omnia bona sunt.

Nec dicas 1. entia mathematica ex Arist. 2. metaph. tex. 3. non esse bona, non enim sensus est ea ut sunt vera entia realia, non esse bona, sed non spectari à mathematicis disciplinis ut sunt bona, quod apertè innuit ipse Arist. cum postea ait, mathematicas nullam de bonis, & malis facere mentionem; ac si diceret non considerare an obiectum circa quod versantur, bonum vel malum sit.

Nec dicas 2. relationes ut sic non esse bonas, quia aliàs sequeretur aliquam bonitatem seu perfectionem esse in vna persona diuina, quæ non est in alijs. Hæc enim obiectio soluta manet ex alijs dictis in Idea Theologiæ speculat. lib. 2. cap. 2. resol. 3. Hic solum moneo eam repugnare Aristoteli qui 1. Ethic. cap. 6. docet, bonum æquè per omnes Categorias diffundi ac ens, & non modo dici de alijs accidentibus, sed etiam de ipsa relatione.

Ex quibus collige bonitatem non tantum extendi ad omnia entia realia, de quibus hæc debent intelligi, sed etiam ad omnes partes & gradus cuiuslibet entis. Quia sicut ens non potest constitui nisi ex partibus & gradibus qui sunt entia, ita cum bonum & ens conuertatur, nihil in se admittere potest quod non sit entitativè & transcendentaliter bonum. Vnde quodlibet ens est bonum, & ratione suæ essentia, & ratione existentia, & ratione omnium accidentium quæ ad illius integritatem spectant. Cum enim ista omnia contineantur sub ente, adeo ut etiam ipsa essentia præcisè, antequam existat considerata, dicatur ens, ex supradictis, nulla ratio est cur attributum bonitatis illis omnibus non conveniat.

Quæritur 2. quid sit bonitas ista transcendentalis, quæ dicitur passio entis. Respondeo autores duplicem hic bonitatem distinguere, aliam absolutam & intrinsecam, aliam relatiuam & extrinsecam; & priorem vocant perfectionem rei, qua in se sine ordine ad aliud perfecta & completa est; posteriorem verò dicunt esse convenientiam, ob quam quælibet res dicitur bona alteri, quatenus ei per suam entitativam perfectionem accommodatur. Ex quo etiam sequitur illius amabilitas seu appetibilitas, bonum enim seu conveniens est id quod omnia appetunt, ut vulgò dicitur in Ethica.

Dicunt ergo aliqui bonitatem entis transcendentalem, quæ est propria passio illius, esse potius bonitatem illius interiorem & absolutam, quàm exteriorem & respectivam: eò quod prius est rem aliquam in seipsa constitui, quoad ea quæ ipsi necessaria sunt ad integritatem & perfectionem illius, quàm alteri

congruere ; at res in illo priori est bona & perfecta , quare bonitas illius non est intelligenda per ordinem ad aliud

Verum etsi certum sit bonitatem illam absolutam comperere enti , & esse quodammodo priorem bonitate respectiva , non tamen solide dici potest bonitatem quæ est propria passio entis, de illa priori bonitate , non de posteriori intelligendam esse. Siquidem bonitas illa absoluta non distinguitur ab ipso ente , sed est ipsa prima entis quidditas , quæ omnes illius passionem ratione antecedit .

Nec refert quod voces entis & boni distinguantur, sunt enim voces synonymæ, quia entitas rei non potest consistere nec intelligi , sine ijs quæ spectant ad ipsius integritatem & perfectionem, adeoque sine bonitate eo modo sumpta ; & vice versa non potest rei bonitas in dicto sensu intelligi sine illius entitate. Aut certe si est aliqua distinctio inter entitatem & bonitatem illam absolutam , ea non debet sumi nisi ex parte conceptus nostri, quatenus bonitas expressius significat rei perfectionem & integritatem , quàm ens; quod ad veram passionem non sufficit, cum etiam ex parte obiecti debeat aliquid enti superaddere.

Quare dicendum est bonitatem transcendentalem entis, ut est passio illius, esse intelligendam per ordinem ad aliud , quatenus nempe illud dicitur bonum quod alicui est conueniens. Quidquid enim est , alteri est conueniens, ut materia formæ, forma materiæ, causa effectui, effectus causæ, totum partibus, partes toti, & ita de alijs , adeo ut hæc conuenientia non incongruè constitui possit adæquata passio entis.

Est autem difficultas quomodo id intelligatur, nam tripliciter concipi potest conuenientia vnius ad aliud, primo vt dicat ens cum connotatione alterius entis, sicque bonitas sit realis denominatio ab vtraque entitate sumpta: Secundo vt dicat relationem realem conuenientie ad aliud; Tertio vt per bonitatem intelligatur respectus rationis vnius ad aliud. Et quidem nonnullis dicendum videtur bonitatem; cum sit passio entis realis, debere primo aut secundo modo explicari; quia alias ens non esset bonum nisi per operationem intellectus, quod dici non potest.

Verum sententia opposita amplectenda est, quia si exactè loqui velimus, passio entis debet esse aliquid superadditum enti, adeoque non debet esse aliquid reale, cum quidquid est reale sit ens, & ens non superaddatur enti: at bonitas primo modo sumpta dicit directè vnā entitatem realem, & aliam connotat; Secundo etiam modo est ens reale, vt perspicuum est, ac proinde neutro modo esse potest propria passio entis. Vnde superest vt bonitas formaliter sumpta, quatenus est proprietas entis, addat tantum supra ens reale respectum quendam rationis ad aliud cui consentaneum est.

Neque inde colligi potest, ens non esse bonum nisi per operationem intellectus, est enim in qualibet re bonitas illa absoluta de qua egimus, quæ à conceptu nostro non pendet; sed tantum bonitatem quæ est passio superaddita enti reali, non illi competere nisi per operationem intellectus, quod nemini absurdum videri debet, vt patet ex dictis.

Dubitatur præterea vtrum bonitas, quatenus est passio entis, dicat conuenientiam ad appetitum, seu appetibilitatem; sicut veritas dicit conuenientiam ad intellectum, seu intelligibilitatem ex supradiſtis. Et ratio difficultatis est, quia cum ens non appetatur nisi quatenus bonum & conueniens, ratio bonitatis videtur prius enti competere quam ratio appetibilitatis; adeoque non potest appetibilitas esse passio illa entis quæ bonitas appellatur, sed ad summum quædam secundaria proprietas illam consequens.

Verum etsi appetibilitas eo modo spectata supponat bonitatem, alio tamen sensu eam non supponit: quia sicut conuenientia ad res alias fundatur immediatè in entitatiua rei perfectione, ita & conformitas ad appetitum in ea fundari potest; quatenus potest voluntas complacere in obiecto cognito, secundum perfectiones intrinsecas spectato, seclusa quacunque conuenientia ad aliud. Imò nil impedit quin possim amare obiectum aliquod, secundum suam essentiam spectatum, abstrahendo à varijs perfectionibus quæ ad integritatem, aut complementum, adeoque ad absolutam illius bonitatem spectant. Et tunc appetibilitas non modò non supponit bonitatem sumptam pro conuenientia ad aliud, quin etiam antecedit aliquo modo ipsam entis bonitatem absolutam, quæ in complexu omnium perfectionum sibi debitum consistit. Quare nil vetat quin conuenientia cum voluntate, seu appetibilitas sit passio entis, æquè primò ac conuenientia cum rebus alijs; & rursus si conuenien-

tia entis ad res alias rectè bonitas appellatur, nulla ratio est cur illius conuenientia ad voluntatem non debeat quoque bonitas appellari.

Quæritur 3. Quid dicendum sit de malitia, vt opposita bonitati transcendentali.

RESPONDEO & dico 1. *Tot modis posse dici malum illud, quot modis dicitur bonum ei oppositum*: Vnde cum bonum transcendentalitè sumatur tum absolute pro rei perfectione siue essentiali, siue integrali, siue accidentali, tum respectiue pro conuenientia rei ad res alias, & ad voluntatem; potest etiam malitia huic bono opposita sumi tum pro defectu perfectionis alicuius, tum pro defectu opposito conuenientiæ & appetibilitatis.

Dico 2. *Malitiam non posse in rebus reperiri quatenus dicit defectum perfectionis essentialis, posse tamen quatenus alios defectus includit*. Prior pars probatur, quia malitia illa in eo consistit quod res careat aliqua perfectione essentiali, quod fieri non potest; cum nulla res possit esse sine tota sua essentia, vt homo sine corpore & anima.

Posterior verò ostenditur, nam inprimis bonitas integralis in eo posita est quod res habeat quæcumque spectant ad ipsius integritatem; at fieri potest vt res maneat etsi careat aliqua parte integrante, vt homo sine pede, vel manu: ergo dari potest in rebus malitia opposita bonitati integrali.

Deinde bonitas accidentalis in eo consistit, vt res non modo habeat omnes partes quæ siue ad essentiam, siue ad integritatem illius spectant, sed etiam ijs omnibus.

accidentibus prædita sit, quæ ad conuenientem illius statum & perfectionem spectant. Potest autem dari malitia huic bonitati opposita; cum pleraque accidentia connaturalia possint à suis subiectis separari, vt frigiditas ab aqua, siccitas à terra, &c.

Rursus bonitas respectiua prioris modi consistit in conuenientia rei ad res alias; at quamuis fieri non possit vt sit aliqua res quæ cum nulla alia conuenientiam habeat, verbi causa, cum sua causa, vel cum suo effectu; contingit tamen plerumque vt quæ res vni est conueniens, sit alteri disconueniens; vt calor igni valde congruit, sed aquæ non parum nocet.

Denique etsi bonitas, quæ dicit conuenientiam ad appetitum, rebus omnibus sub quodam respectu competat, certum tamen est malitiam oppositam seu debilitatem non paucis alio respectu competere; cum ea quæ sunt vni appetitui commoda & vtilia, alteri sint ingrata & noxia, vt vel ipsa experientia satis compertum est.





## CAPVT IV.

DE VARIIS RERVM  
distinctionibus.

## ARTICVLVS PRIMVS.

*De distinctione reali.*

**P**REMONEO 1. hic meritò agi de varijs rerum distinctionibus, postquam actum est de vnitatem entis. Cum enim vnum idem sit ac indiuisum in se & diuisum seu distinctum à quouis alio, non incongruè disputationi de vnitatem alijsque proprietatibus entis, subiicitur tractatio de varijs distinctionibus, quæ inter entia reperiri possunt.

Premoneo 2. Innumeras à nonnullis afferri distinctiones, quarum omnium notitia nobis minimè necessaria est. Quare eas hic tantùm breuiter expendemus, quæ frequentius à Philosophis & Theologis vsurpantur, videlicet distinctionem realem, & rationis; item virtualem, & formalem, quam aliqui vocant ex natura rei. Itaque

Quæritur 1. Quid intelligatur per distinctionem realem. Respondeo intelligi distinctionem quæ reperitur inter duas res vel entitates, quarum vna à parte rei, & nemine cogitante, non est alia; qualis est inter

Petrum & Paulum , inter hunc & illum lapidem.

Vbi aduerte distinctionem realem , etſi propriè ſit tantùm inter res poſitiuas , à nonnullis tamen extendi ad omnem diſtinctionem quæ non oritur ex operatione intellectus. Quò ſit vt realis diſtinctio non ſolùm ſit inter Petrum & Paulum exiſtentes , ſed etiam inter eoſdem futuros , imò & inter poſſibiles. Siquidem citra vllam mentis fictionem Petrus ſiue exiſtens , ſiue futurus , ſiue poſſibilis diſtinguitur à Paulo exiſtente , vel futuro , vel poſſibili. Nec tantùm tribuitur diſtinctio illa rebus poſitiuis , ſed etiam negationibus , & entibus rationis ; quia antecedenter ad intellectus operationem negatio lapidis diſtinguitur à negatione ligni , & hirco-ceruus ab hippocentauro.

Nec refert quod hæc figmenta per intellectum primò fiant , licet enim hoc ita ſit , talia tamen ſunt vt poſtquam ſuum eſſe ab intellectu acceperunt , non indigeant nouo actu intellectus per quem inter ſe diſtinguantur , ſicut ea indigent quæ per rationem diſtingui cenſentur ; ſed ipſa per ſe & ex propria entitate qualiſcumque ſit , inferant illam diſtinctionem , ita vt ſimpliciter verum ſit vnum non eſſe aliud.

Quæritur 2. Per quid vna res poſitiua diſtinguatur ab alia realiter. Reſpondeo ab ea diſtingui per propriam entitatem. Probat , nam qualibet res per id diſtinguitur ab alia per quod in ſeipſa conſtituitur ; at in ſeipſa conſtituitur per propriam ſuam entitatem : ergo & per eandem entitatem ab alia diſtinguitur.

• Confirmatur , nam ſi res non diſtinguitur

per seipsam ab alia, vel distinguitur ab ea per relationem prædicamentalem, vt putant aliqui, vel per negationem identitatis vt alij arbitrantur: at neutrum dici potest, non prius; nam repugnat quòd relatio prædicamentalis exurgat inter duo extrema, nisi illa iam sint inter se distincta; vt pater in relatione similitudinis aut dissimilitudinis quæ exurgit inter duos parietes. Non etiam posterius, quia quod vnus homo habeat negationem identitatis cum alio, id iam supponit quemlibet habere suam identitatem ab alterius entitate distinctam. Quia enim alia est entitas Petri, alia entitas Pauli, hinc fit vt Petrus non sit idem cum Paulo, nec Paulus idem cum Petro. Vnde relinquitur res posituias inter se distingui realiter per proprias entitates, vt contendimus, esto non raro eiusmodi distinctio per negationem exprimi soleat.

Obijcies, vna res distinguitur ab alia eo ipso quod non est idem cum illa; at quod non sit idem cum illa, id habet per negationem identitatis: ergo per negationem identitatis vna res distinguitur ab alia. Respondeo maiorem veram esse de secundaria ratione distinctionis, non autem de primaria, quam hic solam inquirimus. Negatio enim identitatis inter duas res necessario supponit eas esse duas, adeoque distinctas.

Contrà, per te in illo priori sunt duæ res, & distinctæ; ergo in illo priori vna non est alia, adeoque primaria distinctio illarum includit negationem. Respondeo negando priorem consequentiam formaliter loquendo, quia cum negatio necessario supponat subiectum quod suo modo afficit, prius est

secundum rationem quod Petrus sit Petrus & Paulus sit Paulus, adeoque quod sint duo homines distincti, quorum quilibet habet propriam humanitatem, quam quod Petrus non sit Paulus, & Paulus non sit Petrus. Quare prius concipiuntur distincti, quam in vno concipiatur negatio identitatis cum alio.

Quæritur 3. Quænam sint indicia distinctionis realis inter res aliquas. Respondeo certum huius distinctionis signum esse, quando duæ res possunt à se mutuo separari, & separatæ in diuersis locis existere. Tunc enim euidens est vnâ non esse realiter aliam, cum nihil possit naturæ viribus à se ipso totaliter & adæquatè separari, & in locis distinctis existere. Dico naturæ viribus, nam per virtutem diuinam idem corpus potest simul poni in pluribus locis totalibus & adæquatis, vt fides docet.

Præterea dubitari non potest quin eæ res distinguantur realiter inter se, quæ ita se habent ad inuicem vt vna sit produciens respectu alterius, & alia producta. Siquidem lumine ipso naturali constat nihil posse seipsum producere, quia vt se produceret deberet actu existere, cum nihil agat nisi actu sit; vt autem produceretur à se, deberet non existere, cum id quod producitur accipiat de nouo existentiam; repugnat autem eandem rem simul existere, & non existere.

Quod intellige de vnica productione quæ cuilibet rei naturaliter competere potest, si enim agatur de potentia extraordinaria, non repugnat quod res iam producta & existens, possit seipsam reproducere, vt patet in Christo Domino, cum seipsum reproduxit in Eucharistia. Vnde in hoc casu non potest sumi

ex productione, sufficiens indicium realis distinctionis inter producentem & productum, sed tantum virtualis, de qua aliquid dicetur in *Physica*, ubi de corpore in duobus locis diuinitus constituto.

Rursus cum sit euidentissimum lumine naturæ, idem non posse simul esse & non esse, perspicuum est ea realiter inter se distingui, quorum alterum altero corrupto, existere potest. Cum enim quod existit, sit, & quod corruptum est, non sit; sequeretur idem simul esse, & non esse, quod planè repugnat. Et hoc intellige non tantum si illa independentia sit mutua, vt inter Petrum & Paulum, sed etiam si non sit mutua, vt inter parietem & albedinem: licet enim hæc non possit naturaliter existere sine pariete, potest tamen paries existere sine albedine; quod sufficit vt inter illa ponatur distinctio realis.

Non tamen existimandum est sufficiens indicium sumi indistinctioris realis inter aliqua, ex eo præcisè quod vnum ne quidem per virtutem diuinam possit separari ab alio; siquidem fides docet personas diuinas inter se realiter distingui ob rationem allatam, quia scilicet Pater producit Filium, & Pater ac Filius producunt Spiritum sanctum; etsi tamen à se mutuò separari non possint ob identitatem naturæ, per quam sunt vnus numero Deus.

Quæritur 4. an distinctio rei à modo, v. c. naturæ à substantia, dici possit realis. Quidam negant, sed oppositum est probabilius, nam vt patet ex dictis, distinctio generatim diuiditur in realem & rationis; at distinctio inter rem & modum non est ra-

tionis seu per intellectum , vt omnes qui modos agnoscunt , fatentur , ergo est realis.

Confirmatur , nam vel modus est nihil , vel est vera aliqua & realis entitas ; prius dici non potest , quia modus rem intrinsecè afficit & modificat , de nouo producitur , & destruitur , &c. adeoque non est merum nihil , cum ista de nihilo dici non possint. Quod si posterius verum est , vt sanè est , quidni dicemus distinctionem modi à re , esse verè realem ? Licèt enim modus non possit esse sine re quam modificat , potest tamen esse res sine modo : ac proinde sicut antè diximus , ex communi sententia , distinctionem esse realem inter duas res , quarum vna potest separari ab alia , etsi hæc vicissim ab illa separari non possit ; ita dicendum est ob eandem rationem , distinctionem inter modum & rem esse verè realem.

Obijcies , distinctio realis debet poni inter rem & rem , ergo illa quæ est inter rem & modum realis dici non debet. Respondeo non sequi , nam etiam modus est verè res aliqua , vt fatentur arguentes. Quòd si per rem & rem intelligantur duæ entitates , quarum neutra sit modus , sic negandum est antecedens ; quia distinctio realis illa est quæ actu in rebus reperitur ante mentis operam , qualis non illa tantum est quæ contingit inter res à modis distinctas , sed ea etiam quæ inter modum & rem modificatam intercedit.

Instabis , ea magis distinguuntur quæ magis possunt separari ; at duæ res magis possunt separari quàm res & modus , ergo magis distinguuntur : adeoque cum duæ res di-

stinguantur realiter, res & modus non ita distinguui possunt. Respondeo 1. maiorem falsam esse, quia nemo negat quin personæ Trinitatis propriè realiter inter se distinguantur, etsi à se mutuo sint prorsus inseparabiles. Vnde etsi modus nequeat separari à re modificata, inde non sequitur rem & modum non distinguui realiter. Maximè cum res à modo possit separari, vt dictum est.

Respondeo 2. negando posteriorem consequentiam, quia etsi concedatur non tantam esse distinctionem inter rem & modum, quanta est inter duas res, inde non sequitur rem & modum non distinguui realiter, cum intra distinctionem realem possit dari aliqua latitudo. Quo fit vt vulgo Philosophi doceant, duas res distinguui realiter maiori realitate; rem autem & modum minori. Verùm hæc nimis de questione, quæ magis ad modum loquendi, quàm ad rem ipsam spectat.

## ARTICVLVS II.

*De distinctione rationis.*

**D**istinctio rationis illa est quæ fit per mentem nostram, cùm ea distinguit quæ à parte rei sunt vnum: estque duplex, ex communi sententia, quarum alia dicitur rationis ratiocinantis, alia rationis ratiocinatæ, de quibus hic breuiter agendum est.

Quæritur 1. quænam sit distinctio rationis ratiocinantis. Nonnulli docent per hanc distinctionem eam posse intelligi, quæ consistit in vario modo rem eandem concipiendi quoad explicitum, & implicitum; quatenus ex-

dem res concipitur duplici conceptu quorum alter altero est clarior: quomodo se habent v. c. definitio, & res definita; animal rationale, & homo. Et hæc acceptio satis probabilis videtur.

Communiter tamen per distinctionem rationis ratiocinantis ea intelligitur, quæ fingitur à nostro intellectu sine ullo fundamento ex parte rei, ut cum dico, homo est homo; ibi enim homo se habet tanquam subiectum, & tanquam prædicatum, adeoque variis conceptibus intelligitur, etsi ex parte obiecti nullum offeratur fundamentum intellectui talis distinctionis effingendæ.

Verum acceptio ista, etsi sit communis, omnino voluntaria & inutilis apparet. Non enim ea bene vocatur distinctio rationis, in qua ratio nihil distinguit: at in casu allato ratio nihil distinguit, cum intellectus idem omnino tam ex parte subiecti, quam ex parte prædicati concipiat, adeoque non intercedant duo conceptus distincti, sed idem conceptus repetitus, quod ad distinctionem rationis non sufficit; cum hæc locum non habeat, ut patet ex ipsis terminis, nisi ratio aliquid distinguat.

Neque dicas eo ipso fieri distinctionem rationis, quo intellectus concipit aliquid modo ut subiectum, modo ut prædicatum. Id enim conceditur, si verè & non tantum apparenter, seu quoad externam vocum ordinationem ita concipiat; at in exemplo allato aliisque similibus intellectus de facto non format propriè conceptum subiecti, aut prædicati: ad rationem enim subiecti non sufficit quod terminus aliquis ponatur primo loco in propositione; nec ad rationem prædicati quod ponatur posteriori; imò neque id requiritur ut patet in



istis propositionibus, albus est paries, calidus est ignis, in quibus prædicatum subiecto præmittitur; sed requiritur maximè vt subiectum se habeat tanquam materia formæ substrata & ab ea determinabilis, prædicatum verò vt forma materiæ adueniens, eamque determinans; quorum neutrum habet locum, etiam per mentem, in homine respectu hominis, alijsque similibus.

Queritur 2. quid intelligatur per distinctionem rationis ratiocinatæ. Respondeo eam intelligi quæ sit ab intellectu cum fundamento in re, ita scilicet vt eadem res varijs conceptibus inadæquatis concipiatur, quibus veluti in varias partes dissecetur; vt cum homo qui à parte rei est ens, substantia, corpus, viuens, animal, & ratione præditus, modo concipitur sub ratione entis, modo sub ratione substantiæ, &c. ac si in illo ratio entis à ratione substantiæ actu distingueretur, cum qua tamen perfectè identificatur. Vnde ad distinctionem rationis ratiocinatæ duo requiruntur, alterum ex parte obiecti cogniti, alterum ex parte intellectus cognoscentis. Ex parte obiecti cogniti requiritur vt virtualem multipliciter perfectionum intra se contineat, & intellectui spectandam offerat; ex parte verò intellectus, vt vnâ perfectionem attingat seu representet sine alia, ac si essent inter se discretæ. Ex quo vterius sequitur in distinctione rationis ratiocinatæ reperiri tum duos conceptus formaliter præscindentes, tum etiam duos conceptus obiectiue præscindentes; ita vt vni conceptui formali respondeat vnus conceptus obiectiue virtualiter distinctus, & alius alij.

Est autem non levis difficultas, an eiusmodi distinctio admittenda sit. Nonnulli enim

Nominalium sectatores acerrimè contendunt eam explodendam esse, neque aliam admittendam præcisionem quàm formalem, quæ se tenet ex parte intellectus. Quare in eorum sententia, quando concipio hominem sub ratione animalis, animal ex parte obiecti ut cogniti non est præcisum à rationali, adeoque totum hominem concipio; sed præcisio se tenet ex parte solius intellectus, quatenus hominem concipio per ordinem ad operationes animales. Et similiter quando hominem ut rationalem concipio, totum hominem ex parte obiecti concipio; & præcisio se tenet ex parte solius intellectus, qui hominem concipit per ordinem ad opera rationalia. Quò fit ut illi duo actus habeant idem obiectum adæquatum, & diuersa connotata; cum eo tantum discrimine, ut cum clarè concipio animal, rationale confusè concipiam, & vice versa cum hoc clarè intelligo, illud obscurè percipiam.

Verùm opposita sententia, quæ est communis in Scholis, videturque probabilior, non tantum conceptus formales, sed etiam obiectiuos distinguit: ita ut cum concipio animal, conceptui non obijciatur rationale, & cum concipio rationale, menti meæ non obuersetur animal; sed quilibet ex his conceptibus inadæquatè hominem repræsentet, sub hac ratione, non sub alia, sicque tot sint conceptus obiectiui seu ex parte obiecti, quot sunt formales seu ex parte intellectus.

Ratio est, quia dubium non est quin sint admittendæ præcisiones obiectiuæ, si datur distinctio virtualis ex parte obiecti. At hæc datur, ergo illæ negari non debent. Maior ab aduersarijs admittitur, qui proinde tam distinctionem virtualem quàm præcisiones obie-

Atque negant. Nec immeritò quia si animal v. c. distinguitur virtualiter à rationali in homine, nulla ratio est cur non possim vnum intelligere sine alio, adeoque præscindere obiectivè inter illa. Minor ostenditur, nam tunc ponitur distinctio virtualis in rebus, quando vnica entitas multis realiter distinctis, citra mentis operam æquivaleret: ibi enim est multitudo virtualis entitatum, quæ sine distinctione virtuali intelligi non potest; sicut neque multitudo actualis sine distinctione actuali: at sæpe contingit vnicam entitatem multis æquivalere, citra mentis operam; vt patet v. c. in homine qui simul est rationalis & sensitivus, tam perfectè quàm si in eo principium ratiocinandi esset realiter distinctum à principio sentiendi, cum quo tamen reipsa identificatur. Ergo virtualis illa perfectionum multitudo distinctionem virtualem in rebus, ante mentis operam necessariò infert.

Confirmatur, nam etiam Aduersarij fatentur cum omnibus Theologis, in Deo esse distinctionem virtualem attributorum, ante mentis operam; eò quòd Deus in vnica simplicissima entitate continet vim multorum principiorum realiter distinctorum, cum per illam intelligat, velit, amet, odio habeat; misereatur, puniat, &c. ac si verè in illo essent attributa realiter distincta, ad singulos eiusmodi actus eliciendos. Ergo negare non debent quin similis aliqua distinctio virtualis reperiatur in rebus creatis; cum in illis eadem entitas multis entitatibus realiter distinctis æquualeat, vt dictum est.

Dicent fortè non esse parem rationem, quia cogimur ponere in Deo distinctionem virtualem perfectionum, vt saluentur propo-

sitiones contradictoriae quæ de illo efferuntur ; ut quod per intellectum generet, non per voluntatem, quod per iustitiam puniat, non per misericordiam, &c. hæc autem ratio non habet locum in creatis. Sed contra, nam si ideo ponenda est distinctio virtualis inter diuinas perfectiones, quia idem non potest simul affirmari, & negari de eodem sub eadem ratione ; nos similiter dicemus in creatis admittendam esse distinctionem virtualem, quia alioqui idem affirmaretur & negaretur de eodem, sub eadem ratione : ut v. c. quod planta sit similis lapidi, & non sit illi similis ; est enim illi similis in ratione substantiæ & corporis, non in ratione viuentis : & similiter quod homo sit similis equo, & non sit illi similis ; siquidem illi similis est quatenus continet gradum entis, substantiæ, viuentis, sentientis, non autem sub ratione intelligentis, discursiui, risibilis, &c. Ne ergo hæc aliaque similia contradictoria cogamur admittere respectu eiusdem, dicendum est in rebus creatis rationes entis, substantiæ, corporis, viuentis, &c. esse diuersas formalitates, si non actu, virtualiter saltem distinctas, ante opus intellectus ; sicque in illis facile dari posse præcisiones obiectiuas, quatenus vna ex illis rationibus potest intelligi sine alia.

Nec dicas eiusmodi contradictiones posse tolli per conceptus formales, hoc enim falsum est, cum à parte rei & nemine cogitante, vna res sit alteri similis, & dissimilis secundum varias rationes & formalitates quas in se complectitur, quæ proinde se tenent ex parte obiecti. Cumque non distinguantur realiter vel actu, ut etiam fatentur Aduersarij ; fatendum,

fatendum est eas vt minimum virtualiter distinguui, & vt sic distinctas ab intellectu posse cognosci per conceptus partiales & inadæquatos, quorum vni vna formalitas seu potius virtualitas, alij alia respondeat. Confirmatur, quia similiter sufficeret, contra arguentes, exclusa à Deo virtuali distinctione, quidquid de illo contradictoriè dicitur, per præcisiones purè formales in concordiam redigere.

Obijcies 1. cum animal & rationale sint idem in homine, si intellectus cognoscit vnum alio non cognito, idem simul cognoscitur & non cognoscitur, quod repugnat. Respondeo 1. hoc argumentum ab ipsis arguentibus soluendum esse, cum fateantur intellectum nostrum posse hic concipere vnum attributum diuinum alio non cognito, cum quo perfectè identificatur.

Respondeo 2. eo argumento tantum concludi, idem quod cognoscitur inadæquatè, seu secundum vnā tantum formalitatem, non cognosci secundum aliam virtualiter distinctam; qua in re nulla est repugnantia, cum faciliè possit intellectus noster effingere speciem expressam animalitatis, quæ rationalitatem ipsam nullo modo repræsentet, atque adeo illam concipere sine ista. Confirmatur, nam cum à longè video aliquid moueri, non discernens vtrum sit homo, an bellua; etsi quod intueor à parte rei sit homo, non tamen dici potest quod obiectum illud cognoscā sub ratione hominis, sed tantum sub ratione animalis. Quia cum nihil sit in intellectu, quod prius non fuerit in sensu, fieri nequit vt intellectus adæquatè aliquid percipiat, quod non nisi inadæquatè per sensum repræsentatur.

Obijcies 2. cognosci & non cognosci non minùs contradictoriè opponuntur, quàm existere & non existere, produci & non produci; sed repugnat animalitatem hominis existere aut produci, & non existere, aut non produci illius rationalitatem, ergo & repugnat illam sine ista cognosci. Respondeo 1. hoc argumentum posse retorqueri ex duplici capite contra Aduersarios, primò quatenus fatentur vnum attributum diuinum posse cognosci sine alio, non tamen posse existere sine alio. Secundò quatenus docent, etsi intellectus formaliter præscindens simul cognoscat animalitatem & rationalitatem in homine, vnâ tamen ex illis rationibus cognoscere clarè; non aliam. Siquidem non minùs repugnat idem cognosci clarè, & non cognosci clarè, quàm cognosci & non cognosci, existere & non existere, produci & non produci. Quare si hoc argumento, solidè refelluntur præfationes obiectiuæ, eodem euerti necesse est illas quas formales appellant.

Respondeo 2. negando maiorem, nam existere & non existere, produci & non produci versantur circa idem eodem modo, nempe circa rem secundum suam entitatem spectatam, vt est quid singulare; quare non possunt ambo simul eidem competere. Cognitio verò fertur in eandem rem sub alia & alia ratione virtuali; quare quòd cognoscatur secundum vnâ rationem, non secundum aliam, in eo nulla est contradictio.

## ARTICVLVS III.

*De distinctione quam aliqui ex natura rei, alij formalem appellant.*

**P**rzomoneo 1. distinctionem aliquam posse dici formalem varijs modis, primò quatenus formale idem est ac essentialè, quo sensu inter hominem & equum est distinctio formalis, quia habent diuersas essentias; non autem inter duos homines, vel duos equos, quia habent similes essentias. Secundò, quatenus fundatur in formis realiter distinctis, quo sensu aqua frigida distinguitur formaliter à calida. Tertiò, ita vt illa distinctio reperiatur inter quasdam formalitates, actu quidem & à parte rei seu ante omnem intellectus cogitationem, non tamen propriè realiter distinctas; quo sensu aliqui ponunt distinctionem formalem inter gradus entis Metaphysicos, & inter diuina attributa.

Przomoneo 2. non esse hic questionem de distinctione formali in prima aut secunda acceptione, cum omnes eam vt sic admittant, sed in tertia duntaxat quam Scotistæ omnes acriter propugnant. Vnde ex eorum sententia, præter distinctionem realem propriam, quæ est inter rem & rem, vel inter rem & modum, & distinctionem virtualem aut rationis; admittenda est distinctio aliqua veluti inter illas media, quæ nec sit per rationem, nec tantum virtualis, sed actualis & à parte rei; nec tamen sit propriè realis, sed tantum formalis, vt pote consistens in duabus formalitatibus actu distinctis, quæ sunt vnum ens & vna res.

Opposita tamen sententia, vt est longè com-

minior apud Philosophos, & Theologos, ita & nobis videtur probabilior. Ratio est, quia non potest concipi quod illa non distinguantur propriè realiter, quæ actu & à parte rei, seu nemine cogitante formaliter distinguuntur: cum ad verum & essentialem conceptum distinctionis realis propriè sumptæ frustra aliud requiratur, quàm quod sit inter duas formalitates actu à parte rei & nemine cogitante distinctas. Sicut enim illud est propriè verum & reale ens, quod est ens actu à parte rei, & nemine cogitante; ita ea est propriè vera & realis distinctio, quæ est actu à parte rei, & nemine cogitante. Quare si formalitates aliquæ distinguuntur actu à parte rei, & nemine cogitante, eo ipso distinctio, quæ inter illas reperitur, est propriè realis.

Confirmatur, nam si est distinctio ex natura rei, seu à parte rei, cum nulla natura, nulla res distinguatur actu à seipsa (eo quod omnis distinctio est inter duo quorum vnum non est aliud) ea distinctio debet esse inter duas naturas, & duas res, ac proinde vera est distinctio realis. Imò non minus est realis, quàm illa quæ reperitur inter Petrum & Paulum, vel inter parietem & albedinem illi inhaerentem; cum hæc non sit propriè realis, nisi quia versatur inter duas naturas, seu inter duas res.

Quod adhuc suadetur, nam animalitas in eo præcisè quo distinguitur à rationalitate, vel est nihil, vel aliquid; prius dici non potest, neque est ad mentem aduersariorum, ergo posterius dicendum est. Atqui animalitas non distinguitur à rationalitate, per aliquid quod sit idem cum rationalitate, quia aliàs esset distincta ab illa, & indistincta secundum idem, quod planè repugnat. Ergo ab illa distinguitur per aliquid quod non est idem cum illa; sic-



que aliquid est in animalitate, quod non est in rationalitate, & vice versa aliquid in rationalitate, quod non est in animalitate. Vnde cum aliquid & aliquid idem sint ac ens & ens, res & res, inde planè sequitur animalitatem & rationalitatem esse duo entia, seu duas res realiter distinctas, & non tantum duas eiusdem entis vel rei formalitates. Vnde vltèrius colligitur distinctionem verè & propriè realem inter illas intercedere.

Obiicies, animalitas & rationalitas distinguuntur à parte rei & citra mentis operam, nec tamen distinguuntur realiter, ergo distinguuntur formaliter seu ex natura rei. Sequela ab omnibus admittitur, antecedens verò probatur, quia contradictoria non possunt dici de eodem, atqui contradictoria dicuntur de animalitate & rationalitate, nempe quòd illa sit principium sensationum, non hæc, quòd ista sit principium ratiocinandi, non illa, &c. ergo animalitas & rationalitas non sunt idem, adeoque distinguuntur formaliter. Respòdeo falsitatem & implicantiam in antecedente contineri, falsitatem quatenus docet animalitatem & rationalitatem distinguì à parte rei; implicantiam verò quatenus cum distinctione actuali & à parte rei coniungit indistinctionem realem: siquidem repugnat ea non distinguì realiter, quæ distinguuntur à parte rei & citra mentis operam. Ad probationem verò dicimus, vt contradictiones verificentur de animalitate & rationalitate, non requiri quòd distinguantur à parte rei, sed satis esse vel quòd distinguantur tantum per ordinem ad diuersa connotata, vt volunt aliqui, vel quòd inter illa distinctio virtualis constituatur, iuxta ante dicta.

Instabis, vel distinctio illa virtualis est per

mentis operam, vel ante opus mentis; si primum dicatur, non soluitur obiectio allata, eum distinctio rationis non sufficiat ad verificandam contradictoria de eodem: si verò posterius, iam à nobis admittitur aliqua distinctio à parte rei quæ propriè non est realis, quæque proinde coincidit cum distinctione formali Scotistarum. Respondeo distinctionem virtuales non esse per mentem, sed à parte rei, eamque valde distinguere à formali quam impugnamus. Siquidem Scotistæ putant inter animalitatem & rationalitatem esse à parte rei & actu distinctionem formalem, ita ut nemine cogitante ibi sint duæ actu formalitates, quarum una non est alia. Nos verò dicimus animalitatem & rationalitatem non esse reipsa & actu duas formalitates, sed unam tantum duabus æquivalentem; quatenus illa unica & eadem entitas potest sola præstare, quod animalitas & rationalitas efficerent si inter se essent formaliter & realiter distinctæ. Illa verò entitas, ratione talis distinctionis virtualis, præbet fundamentum intellectui nostro distinguendi per conceptus inadæquatos animalitatem à rationalitate, sicque inter illas constituendi distinctionem formalem rationis. Vnde cum Scotistæ dicant animalitatem & rationalitatem esse duas formalitates actu & à parte rei distinctas; nos è contra dicimus, eas quidem esse duas formalitates per mentem nostram distinctas, esse autem actu & à parte rei unam tantum formalitatem virtualiter duplicem, adeoque duabus æquivalentem. Plura de hac distinctione tractari solent à Theologis ad primam partem S. Thomæ; ubi de attributis diuinis, & nos breuiter eam attigimus in Idea Theologiæ speculative. lib. 1. cap. 2.

## CAPVT V.

DE RERVM CAUSIS  
in genere.

## ARTICVLVS PRIMVS.

*De causa definitione, & causalitate.*

**P**rimoneo 1. etsi ad Physicum spectet agere speciatim de causa materiali & formali, hic tamen agendum esse de causis in genere, cum ratio causæ tam enti increato, quam creato; tam substantiæ, quam accidenti competat; ac speciatim de causa efficiente & finali, eò quòd rationes istæ causandi ab ente materiali abstrahunt, rebusque perfectissimis competere possunt.

Præmonco 2. non esse inquirendum an sit causa, cum nimis notum sit causas aliquas existere à quibus varij effectus oriuntur: sed tota dubitatio versatur circa essentiam & definitionem causæ, qua in re non satis inter se consentiunt Philosophi, eò quòd definitio causæ in genere nullibi tradita est ab Aristotele. Itaque

Quæritur 1. quid sit causa. Respondeo causam vulgò definiri, *principium à quo aliud per se accipit esse*. In primis dicitur *principium*, quia licet non omne principium sit causa, omnis tamen causa est principium. Vnde per hanc particulam quæ habet locum generis, causa cōuenit cum principijs quæ non sunt causæ, vt cum priuatione in rebus Physicis, quæ quidem est principium generationis, non tamen causa. Itemque in di-

uinis cum personis producentibus, quæ habent rationem principij respectu productarum, sed non causæ, vt monuimus in Idea Theologiæ specul. lib. 2. cap. 4. resol. 1.

Deinde dicitur *à quo aliud accipit esse*, per quam particulam causa distinguitur à priuatione, hæc enim est principium generationis vt terminus à quo, sed non vt causa; cum generatio non accipiat esse ab illa. Excluduntur etiam à causæ definitione personæ diuinæ producentes, quia etsi Filius accipiat esse à Patre, & Spiritus sanctus ab utroque, tamen persona procedens non est aliud à producente, quia esse aliud dicit distinctam vel specie vel saltem numero essentiam; personæ autem diuinæ habent omnes eandem numero essentiam, per quam sunt vnus numero Deus.

Tertiò dicitur *per se*, qua particulā excluduntur causæ quæ vocantur per accidens, seu quæ concurrunt ad aliquem effectum, non ex propria ratione, sed quia per accidens reperiuntur coniunctæ cum causis per se in illum influentibus; vt cum medicus cantat, aut saltat, hæc enim non procedunt per se ab illo, vt medicus est, sed quatenus canendi, aut saltandi peritiam habet, cui scientiæ medicinæ per accidens in eo coniuncta est.

Excluduntur etiam conditiones ad causandum requisitæ, quia etsi per se videantur requiri vt effectus producat, propriè tamen effectus non dicitur per se pendere ab illis; cum in illum realiter non influant, sed sint tantum quædam veluti circumstantiæ requisitæ vt causa effectum producat.

Nota 1. ad iam explicatam definitionem alias quasdam posse reduci, vt cum causâ de-

finitur *Principium per se influens esse in aliud*, vel, *id à quo aliquid per se pendet*, vel, *id ad quod aliud sequitur*, nam in vltima quæ magis à nostra distare videtur, vox *sequitur* non debet sumi pro qualibet consecutione, cùm vnum possit sequi ad aliud sine vlla causalitate, puta loco, tempore, &c. sed pro ea quæ includit influxum realem precedentis insequens, quomodo soli causæ conuenit.

Nota 2. causam congruentius definiri per *principium*, quàm per *id*; sicut homo melius definitur per *animal*, quàm per *substantiam*; quia ratio principij proximius accedit ad naturam causæ, quàm ratio entis.

Nota 3. esse mutuam relationem transcendentalem inter causam & effectum; causa enim non est nisi effectus causa, nec effectus nisi causæ effectus. Quare non est absurdum quod causa definiatur per ordinem ad effectum, imò illius essentia aliter perspicui clarè non potest, sicut effectus essentia intelligi nequit nisi per ordinem ad causam; vnde definitur, *id quod ab alio per se pendet, seu recipit esse*.

Quæritur 2. in quo consistat ratio formalis causæ constitutiva, seu causalitas. Quod vt clariùs intelligas;

Aduerte 1. non posse concipi effectum aliquem prodire à causa, nisi mediante causatione seu causalitate per quam causa in illum influat, eique esse tribuat.

Aduerte 2. dubium esse quidnam sit eiusmodi causalitas, an ipsa entitas causæ, an aliquid ei superadditum, siue per modum potentiz, siue per modum actus.

Aduerte 3. causam duobus modis spectari posse, vel in actu primo, seu quatenus potest

causare ; vel in actu secundo , seu quatenus actu causat. His positis,

Respondeo & Dico 1. *Causam constitui causam in actu primo , per potentiam communicandi esse effectui.* Ratio est evidens , nam eò ipso quòd causa tali potentia prædita est , censetur posse effectum producere , adeoque esse constituta in actu primo ad eum producendum : ut homo est constitutus in actu primo ad generandum , quatenus habet potentiam generandi ; ignis ad calefaciendum , quatenus habet potentiam calefaciendi.

Dico 2. *Causam constitui causam in actu secundo , per actualem influxum in effectum quo illi esse communicat.* Probatur , nam cum inter potentiam influendi , & actualem influxum non detur medium , sicut causa constituitur causa in actu primo per potentiam influendi , ita & per actualem influxum causa in actu secundo constitui debet. Confirmatur , nam eò ipso intelligimus ignem actu causare , seu esse causam in actu secundo , quò actu influit in effectum.

Hinc autem colligitur 1. causalitatem istam non esse entitatem causæ secundum se sumptam , siquidem causa per suam entitatem præcisè non est causa in actu secundo , alioquin semper causaret quamdiu existit , quod absurdum est.

Colligitur 2. causalitatem non esse relationem prædicamentalem , sed potius fundamentum talis relationis ; siquidem ideo causa refertur ad suum effectum prædicamentaliter , quia illum actu causat , & effectus ad suam causam , quia ab illa actu causatur. Quare causatio seu causalitas est prior relatione , adeoque in illa consistere nequit.

Colligitur 3. causalitatem illam nihil esse aliud quam actuale influxum quo causa tribuit esse effectui. Quod ita puto debere intelligi, ut eadem realiter causalitas diuersimode spectata, sufficiat tam ex parte causæ, ut dicatur in effectum influere, quam ex parte effectus, ut dicatur à causa influxum recipere.

Verum obijcies contra prædictam assertionem, vel causalitas pendet à causa immediate, vel mediante alia causalitate; at posterius dici nequit, quia sequeretur progressus infinitus inter causalitates, ergo prius admittendum est. Vnde consequens videtur etiam effectum posse immediate à causa oriri, adeoque causalitatem nihil esse aliud quam entitatem causæ, quatenus effectus ab ea dependet. Respondeo admissio argumenti, negandam esse consequentiam ex eo deductam, siquidem causalitas non pendet à causa ut id quod dependet, sed ut id quo mediante aliud dependet, nempe effectus. Quare etsi causalitas non indigeat alia causalitate, sed per seipsam pendeat à causa, id non impedit quin effectus mediante causalitate produci debeat. Exempli causa, cum ignis aquam calefacit, ista calefactio est immediate ab igne, non autem per aliam calefactionem; at calor in aqua receptus, mediante calefactione productus est.

## ARTICVLVS II.

*Quotuplex sit causa.*

**A** Ristoteles 2. Physic. cap. 3. assignat quatuor causarum genera, nempe materialem, formalem, efficientem, & finalem; cuius numeri rationem tradit postea cap. 7. quia nimirum cum causa sit ratio quæ affertur ad respondendum quæstioni, quæ de re aliqua fieri potest, tot admittendæ sânt causæ, quot quæstiones fieri possunt. At hæc sânt quatuor, nam imprimis inquirimus à quo res sit, & respondetur per causam efficientem à qua producta est, vt si dicas Alexandrum esse genitum à Philippo. Secundo inquirimus propter quid res sit, & respondetur per causam finalem ob quam producta est, vt si dicas animalia esse producta propter hominem. Tertio inquirimus ex quo res sit, & respondemus per causam materialem ex qua componitur, vt si dicas hominem ex corpore corruptibili compositum esse. Quarto inquirimus per quid res sit, & respondemus per causam formalem; vt si dicas hominem constitui in ratione hominis per animam rationalem.

Potest etiam idem numerus causarum ex eo colligi, quod omnes fatentur dari materiam tanquam primum subiectum ex quo res fiunt, cum ex nihilo nihil naturaliter fieri possit; at hæc requirit formam substantialem, vt cum ea constituat compositum, cum se sola ad id sufficere nequeat, vt perspicuum est. Vt autem forma produ-



catur in materia, requiritur agens distinctum cuius vi illa productio fiat, eo quod nihil seipsum producere potest. Agens vero non producit determinatum effectum, nisi ex fine aliquo certo & determinato. Quare admittendæ sunt quatuor causæ memoratæ, quarum duæ priores sunt intrinsecæ composito physico, duæ verò posteriores extrinsecæ.

Verum quod non detur nisi vna causa, nempe efficiens, sic ostendi potest. Causa est quæ tribuit esse effectui, vt patet ex supradictis; at tribuere esse spectat solum ad causam efficientem. Respondeo quando dicimus causam esse quæ tribuit esse effectui, vocem *tribuit* non debere sumi strictè pro causalitate effectiua, sed latè pro quocunque modo quo vnum per se dependet ab alio; qua ratione materia & finis tribuunt esse formæ corporeæ, quatenus hæc producitur dependenter ab illis. Vnde admissa eo sensu maiori propositione, minor neganda est.

Deinde obiici potest, non esse maiorem rationem cur materia & forma sint causæ, quàm partes integrantes, cum tam ex his, quàm ex illis constituatur compositum; adeoque vel materiam & formam non esse causas, vel plures esse causas quàm quatuor. Respondeo negando paritatem quæ gratis supponitur, ideo enim materia est causa, quia forma fit dependenter ab illa; & forma est causa, quia materiâ actuat & perficit: at partes integrantes nullam inter se mutuam causalitatem exercent, & proinde inter causas numerari non debent.

Obijcitur rursus, obiectum habere rationem causæ respectu actus ab illo dependentis, vt coloratum respectu visionis, hancque causam ad

nullam ex quatuor vulgaribus reduci posse. Resp. hoc posterius falsum esse, nam si obiectū consideretur ut per sui speciem effectiue concurrat ad actum, sic ad causam efficientem reduci debet; si vero spectetur ut tribuit speciem actui, hoc modo ad causam formalem referri potest, eo quod proprium est formæ tribuere speciem. Quod si obiectum attendatur, quatenus ratione suæ bonitatis terminat appetitionem animalis, eo sensu ad causam finalem reduci debet.

## ARTICVLVS III.

*Quomodo causa mutuo se habeant inter se.*

**Q**UÆRITUR 1. an omnes causæ sint inter se formaliter & realiter distinctæ.

Respondeo & Dico 1. *Esse distinctionem formalem seu essentialem inter omnes causas in ratione considerandi.* Ratio est, quia alia est causalitas causæ efficientis, alia materialis, alia formalis, alia finalis, neque vna formaliter includi potest in alia. Causa enim efficiens causat effectiue influendo in effectum, materia sustentando formam, forma actuando materiam, & finis mouendo causam efficientem ad agendum, modo infra explicando. Quare omnes illæ causalitates essentialiter inter se distinctæ sunt.

Dico 2. *Non tamen repugnare quod eadem res possit plures ex his causalitatibus exercere.* Nam in primis ex Arist. 2. physic. cap. 7. tex. 70. forma & id cuius gratia, seu finis, sunt vnum; finis quippe proximus generationis est ut forma producat, ac proinde eadem realis entitas habet simul rationem causæ formalis, & finalis.

Rursus forma per generationem producta est principium efficiens respectu suarum operationum: Ex quo sequitur non modo rationem finis, & formæ, sed etiam causæ efficientis eidem entitati competere.

Quod si materia latè sumatur pro subiecto accidentium, cum forma proprias potentias naturales & actiones immanentes in se recipiat, hinc fit vt etiam causalitas materiz eo modo sumptæ ei competat.

Quæritur 2. quomodo ordo prioris & posterioris inter causas constituendus sit, siue quoad causalitatem, siue quoad dignitatem.

Respondeo & Dico 1. *quoad ordinem causandi primam esse causam finalem, secundam efficientem, tertiam materialem, & ultimam formalem.* Ratio est, quia cum agens educat formam ex materia ob finem aliquem, in rei generatione prius est motio seu causalitas finis, qua agens excitatur ad agendum; Deinde causalitas agentis qua forma educitur ex materia, tum causalitas materiz vt subiecti suppositi ad receptionem formæ, ac tandem formæ vt actus materiam perficientis.

Vbi nota, etsi materia non causet prius tempore quàm forma, quia non causat nisi recipiendo formam, quo ipsò forma iam suam causalitatem vicissim exerceat erga materiam eam actuando; posse tamen poni prioritatem aliquam naturæ vel rationis in causalitate materiz; quatenus materia præexistit formæ, ad illam disponitur, ad eius educationem concurrit, & productam sinu suo exiipit.

Dico 2. *Quoad ordinem dignitatis, primam esse causam efficientem, secundam materialem, tertiam formalem, quartam finalem.* Probatum supponendo me hic agere de dignitate causarum.

in ratione causandi, quæ sumi debet ex modo influendi in effectum, ita ut eo causa aliqua sit nobilior, quo effectus magis ab illa penderet. Constat enim causam efficientem aliis omnibus causis præstare, cum illius causalitas in reali actione, quæ magna quædam est perfectio, consistat, eaque propriè esse effectui sola tribuat.

Deinde, materiæ causalitas videtur simpliciter perfectior, seu maior causalitate formæ; saltem si agatur de forma materiali; qua materia est subiectum è cuius gremio forma educitur, & sine quo subsistere nequit: cum tamen materia non pendeat quoad esse à forma, ut ex dicendis in Physica supponimus.

Rursus, causalitas formæ præferenda est causalitati finis, quia forma causat seipsam communicando materiæ, eamque perficiendo; finis verò cum moueat antequam sit, realiter in effectum influere non potest, sed tantum moraliter seu metaphoricè, ut infra explicabimus.

Nota causas prædictas sub alijs respectibus posse considerari, siquæ inter earum causalitates alium ordinem dignitatis à nonnullis constitui, quod nobis minimè aduersatur.

Quæritur 3. an causæ sibi sint mutuò causæ. Aristoteles affirmat 2. Physic. cap. 3. tex. 30. ubi ait deambulationem esse causam sanitatis, & sanitatem deambulationis, non quidem in eodem genere, sed in diuerso; siquidem deambulatio est causa efficiens sanitatis, sanitas verò est causa finalis deambulationis.

Verum ad maiorem huius difficultatis intelligentiam, Nota 1. dupliciter concipi posse causas esse sibi mutuò causas, nempe vel ratione causalitatis, vel ratione existentia.

Nota 2. causam finalem & efficientem esse

mutuò causas prior modo, quatenus causalitas finis necessario infert causalitatem agentis, & hinc illam. Et similiter materia & forma sunt eo modo sibi inuicem causæ, cum neutra possit suam causalitatem exercere sine causalitate alterius.

Nota 3. causam efficientem interdum causare finalem secundum illius existentiam, vt deambulatio causat sanitatem, & interdum finem esse causam efficientis, vt in eodem exemplo; nam deambulatio fit sanitatis causa. At quamuis materia causet formam materialem quoad existentiam, non tamen vicissim forma materiam. Verum ista clariùs percipiuntur vbi agetur de qualibet causa in particulari.

## ARTICVLVS IV.

*De habitudine causa ad effectum.*

**Q**UÆRITUR 1. an causa sit semper prior suo effectu prioritate naturæ, temporis, & dignitatis.

Respondeo & dico 1. *Inter causam & effectum posse poni simultatem naturæ, prioritatem naturæ, & prioritatem temporis, iuxta varios modos quibus spectari, & inter se conferri possunt: Quod ita explico.*

In primis si causa & effectus considerentur vt sunt relata, eo sensu sunt simul natura; quia relata sunt simul natura, vt patet ex Logica.

Deinde si causa spectetur secundum causalitatem per quam in<sup>o</sup>uit in effectum, sic omnis causa est prior natura suo effectu; liqui-

dem id quo mediante aliquid producitur, est prius illo, ut generatio actiua est prior natura homine genito.

Tandem si causa spectetur præcisè quoad suam entitatem, hoc modo potest tempore precedere effectum, qua ratione pater ut homo præcedit filium. Id tamen non semper euenit, ut constat in sole qui non tempore, sed tantum natura lucem à se diffusam præcessit.

Dico 2. *Omnem causam formaliter ut causam, esse nobiliorem suo effectu, ut effectus est.* Ratio est manifesta, quia dare ut sic est nobilius quam accipere; at causa, ut causa, dat esse effectui, & effectus, ut sic, esse accipit à causa, & ab illa dependet: quare causa formaliter spectata est nobilior effectu. Verum difficultas superest de causis & effectibus entitativè spectatis, pro quo

Dico 3. *Finem interdum esse nobiliorem effectu suo, interdum ignobiliorem.* Primum patet, cum homo aliquem actum moralem ex fine excellentiori elicit, ut cum tribuit elemosynam propter Deum. Secundum verò ostenditur, quia potest homo ob libertatem qua pollet, actum aliquem ex se bonum in finem malum dirigere; ut cum quis dat elemosynam ex vana gloria.

Nota hoc esse discrimen inter finem naturalem alicuius rei, seu à natura præstitutum, & finem liberum, seu ab hominis libertate pendentem, quod prior semper est perfectior effectu ad illum ordinato, non autem posterior.

Dico 4. *Causam efficientem principalem interdum esse nobiliorem effectu, interdum æquè nobilem.* Est nobilior, si causa sit æquivoca, ut sol respe-

Aut lapidum & metallorum, quorum creditur causa. Est autem æquè nobilis, si causa sit vniuersa, vt homo generans respectu hominis geniti. Non tamen potest hæc causa esse ignobilior effectu, quia nemo dat quod non habet, vel formaliter, vel eminenter. Verum causa instrumentalis, cum non opere-  
tur vi sua, effectu suo ignobilior esse potest.

Dico 5. *Materiam collatam cum forma materiali, qua est effectus illius, esse uno respectu ea nobiliorem, & alio ignobiliorem.* Est illa nobilior, quatenus est substantia per se existens & incorruptibilis; est autem eadem ignobilior, quatenus ab illa actuatur, & quodammodo perficitur.

Quod si hæc causæ conferantur cum composito, sic dicendum est 1. compositum non esse quid perfectius materia & forma simul unitis, & collectiue sumptis; quia sic ab ijs non distinguitur, vt dicetur in Physica. 2. esse quid perfectius alterutra, nam cum includat materiam & formam, nemo negat quin sit perfectus materia sola. Verum eum etiam materia dicat perfectionem aliquam entitativam, vt alibi ostendemus, negari non potest quin compositum sit perfectius sola forma.

Quæritur 2. An eadem causa possit diuersos & contrarios effectus edere.

Respondeo & dico 1. *Eandem causam posse diuersos effectus habere.* Probat, nam eadem materia potest esse subiectum diuersarum formarum tam substantialium, quam accidentalium; cum eo tamen discrimine, vt simul plures & diuersas formas accidentales habere possit, substantiales vero saltem adæquatas & totales non nisi successiue. Forma tamen non nisi vnum effectum formalem habet, vt calor effi-

est formaliter calidum, albedo album, &c.

Potest etiam idem finis diuersos effectus obtinere, vt patet cum quis sanitatis causa modo ambulat, modo portiones sumit, modo alia pleraque præstat, quæ ad hunc finem consequendum ipsi videntur vtilia.

Ac præterea sunt multæ causæ efficientes quæ effectus diuersos producant vt sol, anima, aliæque causæ quæ vulgò æquiuocæ dicuntur; cum vniuscæ non nisi effectus vnius rationis producant.

Nec refert illud vulgatum ex 2. de generatione sumptum, *Idem manens idem, facit tantum idem*, sensus enim est, idem cum talibus dispositionibus & circumstantiis, facere tantum idem; quod non impedit quin absolutè plura efficere possit; nimirum cum aliis dispositionibus & circumstantiis; vt sol potest cum arboribus suo modo concurrere ad productionem fructuum, & cum animalibus ad generationem animantium.

Hoc autem intellige de causis efficientibus quæ naturaliter & necessario operantur, nam si agatur de causis liberis, hæc possunt manentibus iisdem conditionibus, hunc vel illum actum elicere; cum à nulla re externa ad agendum determinentur, vt alibi non semel ostendimus, & in Ethica iterum inculcandum erit.

Dico 2. *Eandem causam posse habere effectus oppositos.* Id patet ex Arist. 2. Physic. cap. 3. tex. 30. Vbi ait idem esse causam contrariorum, quod probat exemplo gubernatoris, cuius præsentia est causa salutis navis, absentia submersionis. Verùm gubernatoris absentia non est per se causa submersionis navis, sicut solis recessus non est causa per se frigoris, sed tantum per accidens.



Aliter ergo probatur de causa per se, exemplo tum hominis, qui ut est agens liberum potest elicere actus contrarios, nempe amoris & odij &c. tum solis, qui concurrit ad productionem albedinis in cygno, & nigredinis in coruo; dulcedinis in fructibus domesticis, & amaritudinis in sylvestribus: tum eiusdem cibi qui alijs placet, alijs displicet; his est salubris, & illis nocet, ut patet experientia.

Atque idem habet locum in causa materiali, cum eadem formas oppositas saltem successivè recipere possit; & in finali, siquidem ex eodem fine potest quis usurpare media opposita, saltem successivè, ut cum quis sanitatis tuendæ causa modo comedit, modo abstinet à cibis; modo vigilat, modo dormit. Non tamen in formali, quia cum effectus formalis ab ipsa forma realiter non distinguatur, repugnat quod eadem forma habeat plures effectus formales oppositos, ut quod calor efficiat formaliter calidum, & frigidum, &c.

## ARTICVLVS V.

*De habitudine effectuum ad causas.*

**Q**UÆRITUR I. an idem effectus à pluribus causis simul produci possit. Ut huic difficultati satisfaciam.

Præmoneo I. satis constare plures causas diversi generis ad eundem effectum producendum concurrere, imò omnes ad productionem cuiuslibet compositi naturalis requiri, cum intrinsecè constet ex materia & forma, & ab agente extrinsecò ob finem aliquem producat. Quare dubium est an plures cau-

sz eiusdem generis eundem effectum producere possint.

Præmoneo 2. non dubitari quin plures causæ partiales eiusdem generis ad eundem effectum possint simul concurrere, ut patet cum duo homines trahunt nauim quam neuter solus trahere posset; sed difficultas est an plures causæ totales, quarum neutra sit alteri subordinata, eundem simul effectum producere possint, ut plures ignes eundem ignem, &c. Dico, quarum neutra sit alteri subordinata, nam quod idem effectus pendeat à causa particulari, simulque ab vniuersali cui essentialiter subordinatur, ut ignis genitus ab igne generante, & à Deo, vel etiam, ut vult communis sententia, à sole, id tanquam certum ab omnibus supponitur.

Præmoneo 3. hic nomine causæ totalis non intelligi eam quæ excludit quamuis aliam, sic enim perspicuum est eundem effectum non posse à duabus causis totalibus procedere; sed eam quæ se sola habet sufficientem & adæquatam vim in suo genere ad effectum producendum, ut homo ad generandum hominem, ignis ad producendum ignem.

Præmoneo 4. difficultatem istam præcipue versari circa causam efficientem, nam si agatur de causis internis, constat idem compositum non posse ex duplici materia, aut forma totali coalescere; quia sic non esset vnum per se, & vnius essentia, sed potius aliquod aggregatum per accidens. Constat etiam eundem effectum posse oriri à pluribus finibus totalibus, ut patet cum quis vadit Romam tum ut inuisit loca sacra, tum animo consequendi aliquod beneficium, ita ut eò pergeret vel ex altero ex his motibus, etsi aliud

deficeret. Quibus pzmissis,

Respondeo & dico. 1. *Non posse naturaliter eundem effectum simul produci à pluribus causis totalibus.* Probatur, tum quia sicut natura non deficit in necessarijs, ita abhorret à superfluo: at posito influxu vnus causæ totalis in effectum, alius quicunque est superfluous. Tum quia experientia constat, quando duo agentia simul operantur circa idem subiectum, vt cum duo ignes eandem aquam calefaciunt, effectum longè celerius produci, quàm si vnum tantum concurreret. Hoc autem euidentis signum est neutrum concurrere vt causam totalem, sed vt partialem duntaxat; siquidem causæ totalis est illa quæ sola sufficiens est vt totum effectum, cum eadem intensione, & æquali tempore producat, quod hic non contingit.

Idemque de omnibus agentibus naturalibus affirmari potest, eò vel maximè quia cum plura simul naturaliter esse nequeant, sed in locis aliquantum distantibus, fieri nequit quod æqualiter distent ab omnibus partibus subiecti in quod agunt, sicque quodlibet fortius agat in partem sibi viciniorē, & remissiùs in remotiorē, adeoque erit causa tantum partialis effectus. Imò quamuis duo agentia diuinitus essent simul penetratiuè, si sibi relinquerentur, non agerent nisi partialiter, quia vel maiorem effectum, vel breviori tempore producerent.

Obijcies 1. Potest idem effectus produci à duabus causis totalibus inter se subordinatis: ergo & à duabus minimè subordinatis. Respondeo non sequi, & ratio discriminis est, quia causa alteri subordinata non potest sine illa agere, & effectus vtramque necessario

respicit : causa verò alteri non subordinata potest sine illa agere , nec effectus vtramque respicit , sed vnam dumtaxat : quare cum earum altera sit superflua , non possunt ambæ ad eundem effectum concurrere naturaliter.

Obijcies 2. Idem effectus potest pendere à duobus finibus totalibus ; ergo & à duobus efficientibus totalibus. Respondeo non sequi , quin' potius oppositum inde colligi debet : Siquidem effectus finis est medium & causa illius quantum ad executionem ; at frustra adhibentur duo media ad consecutionem duorum finium , quando vterque æquè per vnum comparari potest. Ergo similiter frustra concurrerent duæ causæ totales ad productionem eiusdem effectus , cum per vnam illarum integrè produci possit.

Obijcies 3. Plures sacerdotes possunt simul eandem hostiam consecrare , & eundem baptismum conferre , idque vt causæ totales : ergo plures causæ efficientes totales possunt eundem effectum producere. Respondeo non sequi , tum quia in nostra sententia , antecedens procedit de causalitate morali , hic autem agimus de Physica : tum quia etsi sacerdotes in consecratione Sacramentorum agerent vt causæ Physicæ , id fieret supernaturaliter , non autem per vires naturæ , de quibus hic agimus.

Dico 2. *Eundem effectum posse supernaturaliter produci simul à pluribus causis totalibus.* Ratio præcipua est , quia ex communi Theologorum pronuntio , nihil est denegandum potentia Dei , nisi quod manifestam inuoluit contradictionem : at quod idem effectus possit simul produci à duabus causis totalibus , id manifestam non inuoluit contradictionem ,

vt

vt ex solutione obiectionum patebit ; ergo id denegandum non est potentiz Dei absolutz.

Confirmatur , quia non magis videtur implicare quod vnus effectus procedat simul à duabus causis , quàm quòd eadem natura terminetur simul à duobus suppositis extraneis , aut quòd idem locus simul occupetur à duobus corporibus. Quare cum hæc supernaturaliter fieri possint , vt fatentur omnes Catholici , idem de illo affirmandum est.

Obijcies 1. Causz distinctz non possunt agere nisi per distinctas actiones ; at distinctarum actionum distincti sunt termini , adeoque distincti effectus per eas producti. Respondeo minorem veram esse naturaliter , non supernaturaliter , cum enim actio sit causalitas agentis , distincta saltem modaliter ab effectu , non repugnat quod diuersz actiones ad eundem realem effectum terminentur.

Obijcies 2. Si effectus produceretur simul à duabus causis , sequeretur eum dependere ab vtraque , vt supponitur , & à neutra dependere , quia posset existere sine alterutra. Respondeo hoc posterius non sequi , quia vt effectus verè dependeat ab vna causa , sufficit quod accipiat esse ab illa , siue illud etiam accipiat ab alia , siue non. Quare in dicto casu effectus verè dependeret ab vtraque causa , quia ab vtraque esse acciperet ; sicut forma dependeret à duplici materia , si in vtraque diuinitus constitueretur : quia quilibet eam sustentaret , esto alterutra deficiente , in alia posset conseruari.

Instabis saltem hinc sequi , neutram fore causam per se effectus , sed per accidens. Verum id negatur , nam causz illz verè &

*Metaph.*

K

realiter influent in effectum, non minus quàm si quolibet seorsim effectum peculiarem produceret; quare utraque esset causa per se effectus, causa enim per accidens non influit realiter in effectum, sed tantum coniuncta est cum causa in illum influente; ut cum medicus cantat, aut musicus sanat.

Obijcies 3. Non potest effectus dependere ab ea causa cuius influxu non indiget; at effectus qui producitur ab una causa totali, non indiget influxu alterius, ergo ab ea dependere non potest. Respondeo maiorem absolute negandam esse, nam quod effectus non indigeat influxu alterius causæ, hinc tantum sequitur eum non necessario ab illa pendere; at non sequitur Deum non posse efficere ut actu ab illa pendeat, quemadmodum potest Deus efficere ut natura terminetur à duabus subsistentiis, etsi una tantum indigeat; & ut locus repleatur à duobus corporibus, esto ab eorum altero sufficienter repleti possit; vel ut idem corpus simul constitutur in duobus locis adequatis, etsi unum tantum illorum naturaliter exigit.

Quæritur 2. An idem effectus à pluribus causis diuisim, & secundum se produci possit. Ut autem status huius quæsi melius percipiatur,

Aduerte 1. Difficultatem non procedere de causis internis, & effectum illarum; constat enim si varietur materia, aut forma, non esse idem numero compositum, adeoque ut idem homo resurgat, requiri eandem materiam, modo alibi explicando. Dubitatio ergo procedit de causis efficientibus.

Aduerte 2. Sensum propositæ quæstionis esse, an idem numero effectus qui ab una

causa productus est, potuisset æquè ab alia produci, si ad idem subiectum fuisset applicata. Vtrum verbi causa idem calor qui productus est in aqua ab igne A, æquè fuisset productus ab igne B, si loco ignis A, eadem aquæ in iisdem circumstantiis applicatus fuisset.

RESPONDEO & dico 1. *Id fieri non posse naturaliter.* Probatur 1. quia duo totalia agentia & minimè subordinata non possunt agere nisi per distinctas actiones; at distinctæ actiones non possunt naturaliter tendere ad eundem effectum, siquidem actio non distinguitur nisi ad summum modaliter à termino per eam producto, quare repugnat quod duo agentia naturaliter eundem numero effectum producant.

Probatur 2. Quia ex opposita sententia sequitur, quemlibet ignem quoslibet ignes producere, & à quibilibet produci posse naturæ viribus; & similiter quemlibet hominem quoslibet homines producere, & à quibilibet produci posse, quod sanè per se absurdum & incredibile videtur; potiusque dicendum est quemlibet effectum dicere ordinem ad certam causam à qua produci potest, non ad alias omnes eiusdem speciei indifferenter.

Confirmatur quia si quilibet effectus posset ex se æquè produci ab omnibus causis eiusdem speciei, sequeretur posse fieri spectata rei natura, vt Petrus non sit genitus à Paulo, sed ab alio quolibet, sitque pater ipsius Pauli, quod sane à nobis admitti non potest.

Probatur 3. Quia si quilibet effectus contineretur in potentia actiua cuiuslibet causæ eiusdem speciei; vt supponitur in sententia opposita, posset idem effectus per se lo-

quando millies , imò & infinities produci, etiam naturæ viribus ; v. c. quilibet homo ab omnibus hominibus possibilibus , quilibet equus à tota equorum specie, sicque reproductio eiusdem hominis , vel equi non esset miraculosa ; quod dici non potest. Maximè quia aliàs nulla esset ratio cur non interdum ; imò sæpe , in tanta rerum multitudine idem numero indiuiduum non reproduceretur , non modo postquam interijt , sed etiam quandiu adhuc superstes est.

Obijcies 1. Si repugnat quod v. c. calor productus ab igne A , potuerit produci ab igne B , vel id repugnat quia est calor , vel quia est hic numero calor ; non quia est calor , quia calor à quouis igne produci potest ; at nec quia est hic numero calor , quod enim talis sit numero , id non habet ratione ignis à quo de facto productus fuit , sed per suam propriam entitatem : Ergo ex nullo capite repugnat quod potuerit produci ab igne B. Respondeo repugnare quia per talem numero actionem , quæ alteri igni competere nequit, productus fuit.

Obijcies 2. Idem calor ab vno igne in aqua productus , ab alio potest conseruari , ergo & produci. Respondeo non sequi , quia vt calor conseruetur , sufficit quod impediatur frigus oppositum à quo destrueretur ; vt autem producat , requiritur influxus realis in illum.

Dico 2. *Nil repugnare quin effectus ab vna causa productus , ab alia supernaturaliter produci possit.* Probat ex supradictis , nam si duo ignes simul iuncti eundem calorem diuinitus producere possunt , quidni singuli seorsim possent illum producere ? In hoc sane non maior apparet repugnantia quàm in illo , imò



minor reperitur, vt patebit intuenti. Atque hoc valide confirmatur ex dictis in Idea Theol. log. speculat. lib. 1. cap. 14. in fine, vbi iuxta communem sententiam Theologorum docuimus, vnionem Verbi cum hac humanitate potuisse decerni, prius ratione quàm decerneretur illius assumptio ex tali foemina. Hinc enim manifestè sequitur, Christum secundum se ab hac aut illa foemina generari potuisse, adeoque effectum aliquem non ita determinatè à sua causa connaturali procedere quin diuinitus ab alia oriri potuerit.

## CAPVT VI.

## De Causa efficiente.

## ARTICVLVS PRIMVS.

*De Causa efficiente in genere.*

**Q**VRITUR 1. Quid sit causa efficiens. Respondeo eam definiri ab Aristotel. 2. Physic. cap. 3. tex. 29. *Id vnde mutationis, aut quietis primum est principium, qualis causa, inquit, est is qui consulit, & Pater Filij, & vno verbo id quod efficit eius quod fit, & quod immutat, eius quod immutatur.* Verum clariùs definiri potest causa efficiens, *Id à quo tanquam à primo principio est motus aut quies.*

In primis dicitur *id à quo*, quibus verbis indicatur specialis modus cauſandi cauſæ efficientis, vt ab alijs cauſis distinguitur; mate-

ria enim est, *Id ex quo*; forma, *id per quod*, finis *id propter quod*, & efficiens *id à quo aliquid fit*.

Secundò dicitur *tanquam à primo principio*, quibus verbis videtur excludi ab hac causæ definitione causa instrumentalis, quæ cum non causet vi propria, sed ex motione causæ principalis à qua ad agendum impellitur, primum principium dici nequit.

Nec dicas, esse primum principium competere tantum primæ causæ, quæ Deus est; hoc enim apud Christianos certissimum est: Verum de ea non cogitavit Aristoteles, cum causam efficientem definiuit, sed tantum de causa efficiente creata, quæ inter alias causas creatas est quoad executionem, primum principium à quo omnis mutatio oritur.

Terziò dicitur *motus, aut quietis*, ubi per motum intelligi solet mutatio qua res fit & producitur è subiecto aliquo, & per quietem conseruatio rei productæ; vt cum ignis calorem productum in suo esse, velut in statu quietis conseruat.

Quòd si opponas, naturam in Physicis definiri, *Principium motus, & quietis*: Respondeo eam definitionem intelligi de principio interno, causam verò efficientem esse absolute principium motus & quietis non modo internum, sed etiam externum.

Quæritur 2. Quotuplex sit causa efficiens. Respondeo plurimàs tradi à Philosophis illius diuisiones, inter quas istæ sex videntur maxime obseruandæ.

Prima est in causam primam, & secundam; prima dicitur, quæ cum vult agit independentem à quacunque alia causa, qualis est solus Deus. Secunda verò, quæ agere

nequit nisi dependenter à prima ; cuiusmodi sunt omnes causæ creatæ , quæ etsi realiter operentur , vt infra dicemus , non tamen sine cooperatione causæ primæ ad eundem effectum.

Secunda est , in causam per se , & per accidens : Prior est à qua vt talis est , procedit effectus , vt homo est per se causa alterius hominis , quia quatenus homo eum genuit ; posterior verò à qua vt tali , effectus non procedit , sed quia est coniuncta cum causa per se ; vt homo quatenus Philosophus , vel musicus , est causa per accidens hominis geniti.

Tertia in causam Physicam , & Moralem ; Physica dicitur quæ realiter & per se influit in effectum , siue id faciat necessario , vt cum ignis aquam calefacit , siue liberè , vt cum pictor imaginem effingit. Moralis verò ea vocatur quæ talem influxum non habet , ei tamen effectus imputatur , vt homicidium consulenti , præcipienti , aut etiam non impediendi , qui cum teneretur , & posset impedire , neglexit.

Quarta in causam vniuocam , & æqui-uocam ; vniuoca est quæ producit effectum sibi similem , vt homo hominem , ignis ignem ; æqui-uoca verò quæ producit effectum diuersæ rationis , vt dum sol producit aurum. Vnde illa est essentialiter æqualis effectui , hæc verò perfectior , cum effectum non formaliter vt prior , sed eminenter , adeoque nobiliori modo contineat.

Quinta in causam vniuersalem , & particularem ; vniuersalis est quæ ad multos effectus concurrat , quomodo præter Deum , qui causa vniuersalissima dici potest , sol &

cælum, dicuntur causæ vniuersales effectuum qui in mundo inferiori producuntur : Vnde est illud vulgatum apud Philosophos, sol & homo generant hominem, quod quo sensu intelligendum sit alibi dicitur. Particularis verò illa dicitur quæ habet vim producendi tantum quendam effectum determinatum & certæ speciei, vt ignis ignem, canis canem, &c.

Sexta in principalem, & instrumentalem; principalis ea dicitur quæ vi sua effectum producit, vt in exemplis allatis; instrumentalis verò quæ agit virtute alterius, vt dum calor generat ignem virtute ignis agentis; vel dum semen producit fœtum virtute animalis à quo excisum est.

Queritur 3. Quænam sit causalitas causæ efficientis. Respondeo causalitatem in actu primo esse potentiam agendi, causalitatem verò in actu secundo esse actionem qua effectus producitur: Posita enim tali actione agens dicitur effectum causare actu, & effectus actu causari; ea verò ablata, tale quid dici non potest. Ergo causatio seu causalitas actualis causæ efficientis in actione illa consistit.

Confirmatur, nam causare effectum est illi tribuere esse, at agens non tribuit esse effectui, nisi actu influendo in illum, seu agendo; Ergo actio est causalitas illius in actu secundo. Eò vel maxime quia inter causam & effectum nihil aliud medium concipi potest, præter actionem qua effectus producitur.

Obijcies 1. actio est effectus agentis, cum ab illo pendeat in esse, ergo ad illam requiritur causalitas, sicque causalitas in ea non consi-

stit. Respondeo 1. hoc argumentum posse retorqueri contra causalitatem quæ fingitur à nonnullis præiua actioni. 2. actionem non pendere ab agente vt quod, seu tanquam terminum qui efficitur, sed vt quo, seu tanquam medium quo aliquid producit: vnde in ea ponenda est causalitas agentis.

Obijcies 2. agens non denominatur actu causa nisi à causalitate in eo existente, at actio transiens non existit in agente, sed in patiente. Respondeo antecedens falsum esse, vt vel ex eo patet, quod Deus verè est causa efficiens actu, sine vlla causalitate in eo recepta. Quare vt agens denominetur actu causa, sufficit quod effectus ab illo pendeat, siue causalitas in eo recipiatur, vt cum agit immanenter; siue in subiecto extrinseco, vt cum agit transeun-  
ter.

Obijcies 3. agens non constituitur actu causa per effectum, vt notum est, ergo nec per actionem; sequela patet, quia actio non distinguitur ab effectum qui per illam fit. Respondeo negando sequelam, & ad illius probationem dicimus, actionem distingui modaliter ab effectum, quod sufficit vt causa ab illa denominetur actu agens, non ab effectum, vt sol denominatur actu illuminans per productionem lucis, quæ est modus quidam dependentiæ ab ipsa luce distinctus.

## ARTICVLVS II.

*De causa efficiente creata.*

**Q**UÆRITUR 1. an causæ creatæ aliquid verè operentur, vel Deus tantùm agat ad præsentiam earum, vt quidam olim opinati sunt. Respondeo eas verè operari, & oppositum sine manifestò errore sustineri non posse, vt patet ex verbis illis Genesi 1. *germinet terra herbam virentem, & facientem semen*, & ex illis Luca 21. *videte ficulneam, & omnes arbores, cum producant iam ex se fructum*, alijsque id genus permultis quæ planè ostendunt, ex communi Catholicorum sensu, res creatas verè & effectiue aliquid producere.

Idem ostenditur speciatim de homine qui cum sit liber, potest agere & non agere, bene & malè operari, sicque est capax meriti & demeriti, præmij & pœnæ. Quò fit vt sententia opposita destruat omnino libertatem, omnemque rationem virtutis, & peccati; quia si homo non potest elicere actum aliquem, intelligi nequit quomodo sit liber, aut qua ratione sit capax virtutis & peccati, meriti & demeriti. Quare damnantur in Concilio Trid. Sess. 6. Can. 8. qui dicunt liberum hominis arbitrium à Deo motum & excitatum, nihil cooperari assentiendo Deo excitanti, atque vocanti, sed velut inanime quoddam nihil omnino agere, merèque passivè se habere.

Accedit quòd frustra rebus naturalibus datæ essent à creatore variæ potentix & facultates, nisi per illas aliquid operarentur; quia: què posset Deus in ea hypothesis his non exi-

stentibus, ac existentibus effectus varios producere; v. c. aquam calefacere etsi ignis ei admotus non esset calidus, terram illustrare etsi sol lucidus non esset, &c. Imò nulla ratio esset cur Deus presente igne, potius calorem in ligno quàm frigus deberet producere.

Quæritur 2. per quid agentia creata operentur, an per propriam substantiam, an per accidentia tantum.

Respondeo & Dico 1. *agentia creata non operari per accidentia tanquam per causas principales, quando producunt aliquam substantiam.* Probatur tum ex Arist. 2. de generat. cap. 9. ubi defendit efficientiam formæ contra Platonem qui rerum effectiorem in Ideas referebat, & contra alios Philosophos qui materiæ vim effectivam tribuebant.

Tum euidenti ratione, quia causa principalis non potest esse ignobilior effectu, cum illum in virtute sua contineat; at. accidens est longè ignobilius substantia, ergo non potest illam producere tanquam causa illius principalis.

Nec dicas accidens etsi improporcionatum substantiæ in ratione entis, habere proportionem cum illa in ratione principij productiui. Hæc enim mera est petitio principij, quia cum virtus agendi fundetur in rei entitate, repugnat quòd agens improporcionatum effectui quoad entitatem, sit illi proportionatum quoad vim agendi: quia sic haberet vim agendi nobiliorem propria entitate, quod planè repugnat.

Dico 2. *agentia creata immediatè non operari per proprias formas substantiales, quando substantiam aliquam producunt, sed tantum per ac-*

*cidentia ipsis ad agendum concessa.* Probatur tum quia sol communiter creditur in his inferioribus multos effectus producere per suam lucem, quos per seipsum attingere nequit, ut perspicuum est. Tum quia animalia producantur per virtutem seminalem, ab eorum progenitoribus, vel absentibus, vel mortuis relictam; clarum est autem animal absens vel mortuum non posse per se immediate concurrere ad productionem alterius animalis.

Nec placet quod aliqui dicunt, Deum supplere defectum generantis, sic enim omnes rerum generationes in solum Deum essent referendæ, nec simpliciter verum esset Alexandrum fuisse genitum à Philippo, sed à Deo: sequela patet, nam filius non dicitur genitus à parente sui patris, etsi mediatè ab illo processerit.

Obijcies 1. si forma immediate non influit in effectum, ergo solum accidens immediate operatur, adeoque est causa principalis effectus producti quicumque sit. Respondeo negando posteriorem consequentiam, quia cum forma substantialis producat substantiam mediantibus accidentibus, hinc sequitur accidentia non producere substantiam, nisi ut instrumenta formæ substantialis.

Obijcies 2. ex nostra sententia sequi, formam principalem se habere tantum per accidens ad effectum, huncque ei tantum tribui denominatiuè, quia ab ea dependet accidens quo fit operatio. Verum negatur id sequi, nam sicut artifex non se habet per accidens ad effectum, quem mediante artis instrumento effingit; ita forma substantialis non se habet per accidens, & merè denominatiuè ad effe-



ctum substantialem, quem per suam qualitatem naturalem producit. Illa enim qualitas non tantum dependet quoad esse à forma substantiali, sed etiam est virtus illius naturalis per quam effectum sibi similem & proportionatum producit.

Obijcies 3. instrumentum non agit nisi motum & adiutum à causa principali, quæ proinde cum illo influere debet. Respondeo 1. antecedens ad summum verum esse de instrumentis artis, quæ ut operentur egent actuali motione artificis, ut patet in calamo, penicillo, aliisque instrumentis artis quæ nihil operantur, nisi actu moueantur & dirigantur secundum artem: At qualitates naturales sufficienter consentur motu & adiutu, quatenus à natura tributæ sunt substantiæ ut propria quædam instrumenta, quorum beneficio effectus suos producere debet; de quo capite sequenti fusiùs agetur.

Respondeo 2. etsi talis aliqua motio recepta in instrumento admitteretur, non propterea forma substantialis agentis immediate in substantiam productam influeret, adeoque antecedente gratis admissio, consequentia neganda esset. Id patet exemplo allato, nam etsi artifex moueat instrumentum quo agit, non tamen ipsemet attingit immediate opus quod per illud efficit.

Dico 3. *agentia creata interdum per proprias formas substantiales influere immediate ad productionem accidentium, interdum verò tantum mediate.* Primum ostenditur, nam primæ passionnes quæ ab essentia dicuntur fluere & emanare, debent immediate produci à forma substantiali; cum nulla alia sit virtus media à qua oriri possint.

Confirmatur, nam cum passiones illæ sint quidam effectus Physici & reales qui de nouo fiunt, dicunt ordinem ad aliquam causam realem & Physicam à qua verè producuntur. Hæc autem nulla alia probabiliter assignari potest præter formam substantialem agentis, cuius sunt proprietates.

Nec dicas produci à generante, nam quando aqua calefacta amoto igne paulatim frigit, illa noua frigoris productio non potest tribui generanti, cum fortè non existat; sed formæ substantiali aquæ cui frigiditas tanquam propria passio debetur, adeoque illam, ablato impedimento, ex se veluti effundit. Quòd si frigiditas in eo casu ab aquæ forma dependet, nulla est ratio cur etiam ab illa non acceperit esse, cum primum aqua producta est.

Vbi nota à nonnullis negari passiones à formis substantialibus fluere mediante vera aliqua & Physica actione: sed contrà, nam cum passiones illæ sint veri effectus reales & Physici, negari non potest quin per veram actionem fiant.

Secundum probatur, perspicuum enim est calorem à calore, frigus à frigore produci, &c. & ne quis putet istos & similes effectus referendos esse in substantiam, cui qualitates operatiuæ inhereant, isto aquam calidam posse calorem in alio subiecto producere, etsi constet eiusmodi productionem in aquam vt in causam agentem refundendam non esse. Ac præterea experimur accidentia panis & vini eisdem effectus producere post consecrationem, quos ante edebant; etsi nulli tunc substantiæ inhereant, vt fides docet.

Verum hic leuis occurrit dubitatio, an acci-

dens in productione accidentis se habeat: vt causa principalis, an verò vt instrumentalis duntaxat. Dico leuem esse dubitationem, quia magis est de nomine quàm de re; constat enim accidens cum sit entis ens, à natura desiderari vt sit virtus agendi ipsius substantiæ; item vnum accidens ab alio productum non excedere illius perfectionem. Cùm ergo de his duobus apud omnes constet, restat solum quæstio de nomine, an propter primum affirmandum sit accidens se habere vt instrumentum in productione accidentis, an verò propter secundum id negandum sit:

Qua in re ij congruentius loqui videntur, qui partem negatiuam sequuntur; quia illud communiter poni solet discrimen inter causam principalem & instrumentalem, quòd principalis habet virtutem adæquatam effectui, instrumentalis verò inadæquatam. Et aliunde intrinseca dependentia causæ ab alio non impedit, quin illa sit principalis in suo genere, vt patet in forma corporea, quæ etsi pendeat quoad esse & conseruari à materia, producit effectus suos tanquam causa principalis; & in omnibus causis creatis quæ magis pendent à Deo, quam accidens à subiecto; nec tamen negari merito potest quin se habeant, vt causæ principales respectu propriorum effectuum.

## ARTICVLVS III.

*De causa efficiente increata.*

**P**ramoneo 1. ab omnibus hic supponi contra Atheos, Deum existere, itemque res omnes ab eo initio mundi fuisse creatas, & facultatibus ad agendum necessariis ornatas. Ex quo fit vt saltem remotè & mediatè ad omnes causarum secundarum effectus concurrat. Sed dubium est, an etiam proximè & immediatè influat in omnes operationes, & effectus qui ab agentibus creatis oriuntur.

Præmoneo 2. dupliciter intelligi posse Deum concurrere cum agentibus naturalibus quando operantur, primò ita vt influat intime in eorum operationes, sicque eadem v. c. calefactio procedat immediatè tum ab igne, tum à Deo. Secundò, ita vt in ipsis causis secundis operetur aliquid, quo eas moueat & applicet ad agendum quoties operantur. Et quidem prior concursus dicitur simultaneus, quia' exhibetur eodem momento quo causa secunda simul cum Deo operatur; posterior verò dicitur præuius, & vulgò prætorio Physica vocatur, quia actionem præcedit, & est causa quòd fiat, iuxta eos qui talem influxum admittunt. Est ergo difficultas an Deus non tantum primo, sed etiam secundo modo concurrat cum causis creatis ad earum operationes.

Respondeo & Dico: *Deum concurrere immediatè concursu illo simultaneo, ad singulas operationes rerum creatarum.* Ita omnes communiter

contra Durandum, probaturque 1. Ex scriptura sacra 1. ad Corinth. cap. 3. *Neque qui plantat est aliquid, neque qui rigat, sed qui incrementum dat Deus.* Act. 17. *In ipso vivimus, movemur, & sumus.* Ioan. 5. *Pater meus usque modo operatur, & ego operor*, quibus verbis utitur Augustinus 5. de Genesi ad litteram cap. 20. ad eos refellendos qui docebant, Deum quidem fecisse mundum, cætera verò subinde à mundo fieri iussu & ordinatione Dei, eo minime operante: simulque ad ostendendum Deum non modo magna & præcipua, sed etiam terrena & infima operari.

Nec dicas verba allata posse intelligi de concursu Dei mediato, hoc enim manifestè absurdum est, cum ij quos refellit Augustinus, talem concursum non negarent; & prædicta testimonia præsentem Dei operationem perspicuè innuant. Et sanè quid absurdius dici posset quàm Deum dare omnibus rebus incrementum, & operari usque modo, si nihil in his inferioribus operatus esset, ex quo mundus factus est? Nonne similiter dici posset Adamum usque modo operari, & ad generationem omnium hominum concurrere?

Probatur 2. nam non est potior ratio cur agens pendeat à Deo quoad entitatem, quàm quoad actionem, cum tam hæc, quàm illa sit ens per participationem: atqui entitas agentis pendet intrinsecè ab actuali & immediato influxu Dei, ut omnes fatentur; ergo & actio illius. Imò cum actio sit accidens, ea multò magis videtur egere influxu causæ primæ conservantis quàm substantia, quæ cum sit ens per se, ut sic, minùs videtur dependens ab alio.

Probatur 3. nam si Deus non concurrat per

se ad actionem, ergo nec ad rem quæ fit; cum non sit nisi modalis distinctio inter utramque; v. c. inter calefactionem, & calorem per eam productum, neque concipi possit quod calefactio fiat sine Dei cooperatione, & calor ipse ea indigeat. Quare cum calor productus egeat intimo influxu Dei conseruantis, idem de actione qua producitur calor, sentiendum est. Confirmatur, nam si ex mente Aristotelis, aliorumque Philosophorum sol & homo generant hominem; à fortiori dicendum est Deum ad hominis, & quarumcunque aliarum rerum generationem concurrere.

Obijcies 1. si Deus concurrit cum agentibus creatis, vel concurrit eadem actione, vel diuersa; non eadem, cum diuersæ causæ non possint eandem actionem profundere: non diuersa, quia diuersarum actionum non potest idem esse terminus. Respondeo Deum & causam secundam influere eadem actione, diuersimode spectata. Nec refert quod diuersa sint agentia, cum enim vnum alteri sit essentialiter subordinatum, eadem realis actio ab utroque profluere potest; vt eadem scriptio à manu, & à calamo.

Obijcies 2. causa secunda habet vim agendi effectui adæquatam, vt cum ignis producit ignem, homo hominem, ergo non indiget ad agendum consortio primæ causæ; sequela patet, quia tunc tantum causa indiget auxilio alterius concausæ, cum non habet sola vim adæquatam effectui; vt cum duo equi simul iunguntur ad trahendum pondus, quod neuter seorsim tollere potest. Respondeo ad antecedens, causam secundam habere vim adæquatam in suo genere; vnde negatur consequentia, quia etsi inde sequatur eam non in-

digere confortio alterius causæ creatæ ad agendum, non tamen sequitur non indigere influxu primæ causæ. Et ad probationem dicimus, tunc tantum causam creatam indigere auxilio alterius concausæ creatæ, quando non habet vim adæquatam effectui: indigere tamen concursu diuino, etiamsi talem vim habeat; quia cum essentialiter sit primæ causæ subordinata, nihil sine illa operari potest.

Obijcies 3. illud amplectendum est quod maiorem dicit in Deo perfectionem; at sententia quæ docet Deum posse tribuere causis creatis vim agendi se solis, maiorem ponit in Deo perfectionem, ergo illa sententia amplectenda est. Respondeo 1. quamuis hoc totum gratis concederetur, inde non esse consequens Deum de facto non concurrere ad operationes causarum secundarum: cum non sit necesse vt Deus semper faciat quidquid maiorem in illo arguit perfectionem, vt vel ex eo manifestum est, quod alios mundos longè isto perfectiores creare potuerit, vt fatentur omnes Theologi.

Respondeo 2. minorem negandam esse, nam sicut non esset maioris perfectionis in Deo, quod creatura posset sine illo existere, ita nec quod posset independenter ab illo operari. Imò hinc valde minueretur absolutum illud dominium quod Deus habet in res omnes creatas.

Obijcies 4. si Deus concurrit immediatè ad omnes actiones creaturarum, ergo & ad actus malos creaturæ rationalis; at hoc absurdum est, quia aliàs Deus esset auctor peccati. Respondeo negando minorem, & ad probationem illius dicimus, ideo Deum non esse causam peccati, quia non impellit ad illud, & ex

modo quo concurrat ad illius entitatem, ea non habet rationem peccati: exhibet enim tantum concursum quem ex munere primæ causæ concedere tenetur, quoties homo ad malum propria sponte & liberè deflexerit, ut latius diximus in varijs tractatibus Theologicis, & iterum in Idea Ethicæ inculcabitur.

Dico 2. *Deum non promovere causas naturales ad agendum influxu quodam reali & Physico in hīs recepto.* Ita omnes communiter contra recentiores Thomistas. Probatur 1. quia talis præmotio est superflua, cum enim causæ secundæ sint sufficienter constitutæ, & determinatæ in actu primo ad agendum per vires naturales effectui proportionatas, nihil aliud expectant à Deo ad operandum, quàm influxum simultaneum quo cum illis intimè concurrat ad earum operationes. Et sanè per se ridiculum est existimare, ignem v. c. qui ex natura sua calidissimus est, adeoque ut sic intrinsecè determinatissimus, ut ita loquar, ad producendum calorem, & ignem in subiecto apto, indigere motione aliqua Dei in eo recepta, qua promoveatur & prædeterminetur ad comburendam stuppam debitè sibi approximata.

Probatur 2. quia intelligi non potest quid sit illa entitas quæ ponitur in causis secundis, præviè ad earum operationes: vel enim est actus primus, vel actus secundus, non enim datur medium; at non est actus secundus seu actio, cum potius detur ad actionem eliciendam, adeoque tanquam quid ab illa distinctum. Neque etiam actus primus, quia actus primus nihil est aliud quàm vis agendi, seu potentia quædam ad agendum necessaria, quæ nequit esse quantitas, nec relatio, nec vlla



alia entitas realis præter qualitatem aliquam effectiuam ab actione realiter distinctam. At eiusmodi qualitas, aut quæcunque sit alia virtus, cum sit creatura, non magis potest agere sine præmotione Dei, quàm ignis, & alia agentia creata. Vnde de hac illius præmotione iterum inquiretur, an sit actus primus, vel secundus, sicque res in infinitum abibit. Quod vt caueatur, omnis præmotio ab agentibus naturalibus ableganda est, fatendumque concursum Dei simultaneum ad eorum actiones sufficere.

Neque dicas non esse parem rationem in præmotione, ac in qualitatibus rerum naturalium; quia cum sit actualis præmotio, non indiget alia præmotione, qualitates verò rerum naturalium cum non sint præmotiones, indigent præmotione. Hoc enim est ludere verbis, quia quòd qualitas illa dicatur præmotio, id non impedit quin sit virtus aliqua agendi creata, quæ necessario & essentialiter debet pendere ab influxu causæ primæ vt agat, sicut negari non potest quin ab ea pendeat vt sit. Eo modo quo ex mente Aduersariorum, impulsus ille quo lapis ex communi sententia, mouetur sursum, pendet ab influxu Dei, etsi sit quædam actualis præmotio.

Probatur 3. nam si præmotio illa requiritur in causis necessariis, ob dependentiam quam habent à prima causa, ea etiam poni debet in causis liberis ad omnes earum operationes; cum hæ non minus pendeant à causa prima quàm operationes agentium naturalium. At hoc sanè dici non potest, quia etià in actibus bonis vulgò ab omnibus concedatur aliqua præmotio quæ quoad entitatem sit realis & Physica, eam tamen in actibus prauis admit-

tere nefas putauimus; cùm impossibile sit concipere Deum non esse propriè, directè, & primariò causam peccati, si voluntatem creatam pramouet ad illius entitatem, vt saepe obseruauimus, maxime in suaui concordia disput. 2. sect. 6. & 7.

Obijcies 1. causa secunda non mouet nisi mota à prima ex 7. & 8. Physicorum. Ergo requiritur pramotio ex parte Dei ad singulas actiones creaturarum. Respondeo antecedens nihil aliud significare quàm causas secundas non agere nisi dependenter à prima, ad quod sufficit concursus simultaneus. Et quamuis ex mente Arist. aliquid primum in causis ipsis receptum admittendum esset, sufficeret virtus agendi ijs indita, vt ex eo patet quod ex sententia illius, grauia & leuia dicuntur moueri à suis progenitoribus; non quòd pramotionem aliquam ab ijs recipiant, quoties in propria loca tendunt, sed quia viam se ad propria loca mouendi ab ijs in puncto generationis acceperunt.

Obijcies 2. creaturæ magis dependent à Deo quoad modum agendi, quàm instrumenta ab artifice; at hæc indigent pramotione ad agendum, vt patet in penicillo, calamo, ferra, &c. Ergo & illæ. Respondeo maiorem falsam esse in sensu arguentium, cùm enim causæ secundæ non sint propriè instrumenta Dei, eò quòd habent vires proportionatas effectibus quos producant, non est necesse vt quoad modum agendi, magis vel æquè dependant à Deo quàm instrumenta ab artifice. Quare etsi instrumenta pramoucantur ad agendum, non sequitur quod etiam ipsæ à Deo pramoueri debeant. Et sanè absurdum est existimare ignem, qui ex naturali impetu tendit ad gene-

rationem ignis, lapidem qui intrinsecè inclinatur ad motum deorsum, æquè egere præmotione Dei ad actus sibi tantopere connaturalis, ac indiget instrumentum præmotione artificis, ad opus ad quod nullam habet propulsionem naturalem.

Obijcies 3. si causæ secundæ agerent sine præuia Dei motione, iam non agerent vt causæ secundæ, sed vt primæ; at hoc repugnat, ergo & illud. Respondeo maiorem falsam esse, illud enim quod agit dependenter ab alio, non agit vt prima causa, etsi in se nihil recipiat: at causæ secundæ agunt dependenter à Deo. cum sine intimo illius influxu operari non possint; ergo non agunt vt causæ primæ, sed vt secundæ. Confirmatur ad hominem, nam hinc sequeretur qualitatem præmouentem quam Aduersarij constituunt, esse causam primam, cum non agat dependenter ab alia præmotione.

Obijcies 4. actus secundus est nobilior primo, ergo non potest causa se reducere ab actu primo ad secundum, nisi per nouam entitatem qua de nouo actuetur & perficiatur. Sequela perspicua viderur, antecedens ostenditur, quia actus primus includit aliquam potentialitatem quam actus secundus non dicit. Respondeo 1. negando antecedens, & ad illius probationem dico, actum primum includere potentiam effectiuam actus, quæ absolute actu perfectior est, vt intellectus intellectione, visus visione, &c. Respondeo 2. antecedente gratis admissio, negando consequentiam, nam entitas illa de nouo adueniens esset quidam actus primus, qui etiam esset ignobilior actu secundo, ac proinde egeret noua actualitate ad eum elicendum, sicque

res in infinitum abiret. Quare etsi causa secunda esset simpliciter imperfectior actione, non oporteret in ea fingere aliquam pramotionem, sed sufficeret concursus Dei ad actionem intrinsecus, modo ante dicto.

---

#### ARTICVLVS IV.

##### *De causa determinationis effectuum.*

**P**RAMONEO 1. varias esse causas quæ possunt ex se producere plures effectus diuersæ speciei, vt capite præcedenti ostendimus. Dubitatur autem vnde oriatur quod eiusmodi causæ producant potius effectum huius quàm illius speciei.

PRAMONEO 2. cùm quzlibet causa quæ potest producere effectum certæ speciei, possit plures numero effectus producere, dubitari vnde oriatur quod hic numero effectus potius quàm ille ab ea producat: cur v. c. ignis hunc numero ignem producat potius quàm alium, quem æque potest ex se producere, & qui in virtute illius continetur.

Respondeo & Dico 1. *Non esse recurrendum ad causam primam, vt reddatur ratio quare cause secundæ habeant potius effectum vnius speciei quàm alterius.* Probatum manifestè, nam in primis materia cum ex se possit recipere omnes formas; ad talem specie determinatur ab agente, & à dispositionibus præuijs quarum vi ex illa educitur; vt ab igne ad concipiendam formam ignis, ab animali ad recipiendam formam animalis, &c.

Deinde quare sol potius producat ex putri materia ranam, quàm murem, causa huius  
rei

rei sumitur ex parte materiæ, quæ disposita est ad formam ranæ, non muris: sicut etiam eadem causa determinatur ab equo ad producendum equum, à leone ad leonem generandum. Quod dictum sit, supponendo communem sententiam alibi expendendam, de productione eiusmodi effectuum à sole.

Rursus ex occurſu obiectorum oritur quòd fiat actus vitalis huius aut illius speciei; vt occurſus obiecti visibilis, vel audibilis est causa quòd homo videat vel audiat: siquidem non potest exerceri nisi visio circa obiectum visibile, nec nisi auditio circa audibile. Ex quibus sufficienter colligitur determinationem effectus quoad speciem, à rebus creatis accipiendam esse, neque in Deum refundi debere. Maxime quia Deus paratus est ad concurrendum ad hunc vel illum specie effectum, iuxta causæ secundæ exigentiam, sed maior est difficultas de determinatione effectus quoad individuum pro quo

Dico 2. *Neque etiam quoad hoc ad Deum recurrendum esse.* Probatur 1. quia si Deus me determinat ad hunc numero actum amoris, non sum liber in eo eliciendo; sequela patet, nam quæ ratio est cur cum non sum liber ad speciem actus, si Deus me ad illam determinat, vt ij farentur qui specie actus in Deum refundere non audent; sim tamen liber ad illius indiuiduationem, ex hypothesi quòd Deus ad illam me determinet? utrobique sanè est paritas. At nonne absurdum est affirmare hunc numero actum non esse mihi liberum, cum hinc aperte sequatur me nihil agere liberè, eò quòd omnis actus qui fit est talis numero: sequatur etiam me non magis mereri vel demereri per actum quem elicio, quàm per illum quem nunquam eliciam?

*Metaph.*

**L**

Probatur 2. refellendo modum quo talis determinatio fieri dicitur; qui enim eam admittunt, docent Deū videndo causam secundam esse veluti in procinctu ad eliciendū actū certæ speciei, & aliunde esse indifferentem ad hunc vel illum numero actum intra illam speciem, determinare efficaciter talem concursum in individuo potius quā aliū. At profectò modus iste non caret difficultate, tum quia cum gradus specificus non sit quid distinctū à numerico, nisi per nostros conceptus, vt iidē auctores fatentur; non potest intelligi quòd causa secunda sit determinata ad speciem actus, & non ad individuum illius, aut quòd Deus qui res cognoscit vt sunt, vnā rationē videat sine alia. Tum quia cum non fiat actus nisi singularis, nō potest Deus determinare ad indiuiduationem actus, quin simul determinet ad illius exercitium, adeoque quin tollat libertatem exercitij.

Confirmatur, nam etsi gratis concedatur Deum videre causam secundam velut in procinctu ad agendum modo dicto, nondum tamē videt eam actu agere; cumque in eo instanti decernat eam determinare ad indiuiduationem actus, hinc manifestè sequitur eiusmodi determinationem præcedere exercitium actus, sicque vsum libertatis tollere; cum ea determinatione posita, non possit actus non fieri.

Probatur 3. nam quamuis opinio nostræ opposita minimè noceret libertati, adhuc tamen non satis videretur consentanea diuinæ sanctitati: quia si Deus voluntatem peccatoris determinat ad indiuiduationē actus, sequitur apertè Deum esse causam primariā & directam talis numero peccati, imò omnium peccatorum quæ sunt, cum nullum fiat peccatum nisi in individuo. Hoc autem, vt verum fatear, nobis proba-

ri non potest. Et sanè quis credat valde consentaneum esse diuinæ bonitati, & muneri primæ causæ, vt cum quis paratus est ad patrandum adulterium, Deus illum determinet ad peccandum cum hac fœmina; & similiter quando quis iaculatur sagittam, Deus eam dirigat vt non hostem, sed amicum, vel parentem iaculatoris interficiat?

Dico 3. *Quod talis actus in indiuiduo fiat potius quam alius, id ex varijs circumstantijs repetendū esse.* Sequitur ex dictis, nam cum ea determinatio non possit sumi à Deo, vt. ostensum est, oportet vt ex circumstantijs petatur; cum nihil aliud supersit vnde sumi possit.

Confirmatur, nam quod ignis producat hunc numero calorem, hoc ex eo commodè peti potest, quod operetur tali loco, & tempore, & maximè circa tale subiectum eo modo dispositum, alium producturus si in alijs circumstantijs, & circa aliam materiam operatus esset. Cum enim ista iuuent ad productionem caloris, non video cur non etiam possint iuuare ad productionem talis caloris: cum non producat calor nisi in indiuiduo, & ratio specifica caloris non distinguatur à numerica, vt dictum est.

Quod rursus suadetur, quia omnes concedunt eundem numero effectum semel productum non posse iterum naturaliter produci. Hoc autem vix potest defendi in sententia quam impugnamus, quia iuxta illam productio indiuidui à solo Deo dependet; at nemo negat; quin possit Deus eundem numero effectum reproducere. In sententia verò nostra sufficiens causa illius impossibilitatis traditur, quia tot circumstantiæ occurrunt ad productionem talis indiuidui, vt ex omnes simul nunquam

alias contingere possint: quò sit vt reproductio eiusdem effectus sit naturaliter impossibilis.

## CAPVT VII. DE CAUSA FINALI, ET quibusdam causis minùs proprijs.

### ARTICVLVS PRIMVS.

*Deijs qua spectant ad causam finalem.*

**Q**UÆRITUR 1. an finis sit causa vera & realis. Respōdeo 1. si strictè loqui hac in re velimus, finem non videri dicendum causam physicam & realem. Quia cum non existat realiter quando causat, nō potest per se habere influxum realem & physicum: at illa non est propriè causa physica & realis, quæ per se non habet influxum realem & physicum. Confirmatur exemplo aliarum causarum, quæ ideo vocantur causæ reales & physice, quia per se realiter influunt in effectum, quolibet in suo genere.

Respondeo 2. non propterea tamen recedendum à communi sententia quæ finem ponit inter causas veras & reales; tum quia Aristoteles assignat quatuor genera causarum, haud dubiè realium & physicarum, in quibus est finis; tum quia ea potest dici causa realis, quæ quouis modo habet actum causandi realem, esto entitatiuè seu materialiter non sit ens reale: at finis habet actum causandi realem, quatenus efficiens realiter operatur propter



finem; & ex motione finis, vt ex postea dicendis clariùs intelligetur. Tum quia ea est vera causa & realis à qua effectus verè & citra mentis operam dependet; at effectus dependet hoc modo à fine, cum finis sit *id cuius gratia aliquid fit*, ex 2. physic. cap. 3. tex. 29. vt sumptio medicinæ reipsa dependet à sanitate sperata.

Quæritur 2. an finis causet secundum esse reale, an verò secundum esse intentionale. Respondeo causare secundum esse reale; Probatur nam finis causat secundum illud esse quod agens vult obtinere, at agens non vult obtinere esse finis intentionale, sed esse illius reale: Ergo finis causat secundum esse reale. Maior perspicua est in ægroto qui non mouetur à sanitate ad sumendam potionem, nisi secundum illud esse quod per potionem assequi intendit. Minor etiam est manifesta in eodem ægroto, qui per sumptionem medicinæ non intendit assequi esse intentionale sanitatis, seu cognitionem sanitatis, cum illam iam habeat, sed ipsam sanitatem realem. Quare sanitas eum mouet, secundum esse reale, non secundum esse intentionale.

Confirmatur, quia finis mouet secundum illud esse quo obtento agens conquiescit, & censetur finem intentum consecutus: at ægrotus non quiescit obtenta sanitate secundum suum esse intentionale, seu obtenta cognitione sanitatis, sed ea obtenta secundum esse reale, neque aliàs finem suum consequutus censetur: ergo finis mouet secundum suum esse reale, non secundum intentionale.

Obijcies 1. agens mouetur à fine ad consecutionem illius secundum entitatem realem, quo ipso realis entitas finis est effectus non modo causæ efficientis, sed etiam finalis.

Ergo si finis secundum idem suum esse reale mouet agens, sequitur finem esse causam & effectum sui ipsius secundum suam entitatem realem: Respondeo id verum esse sub diuersa consideratione, qua ratione absurdum nemini videri debet: entitas enim sanitatis\* vt futura & absens, mouet ægrotum ad sumendam potionem tanquam mediū necessarium quo eandem illam sanitatis entitatē producat, & realiter præsentē exhibeat.

Obijcies 2. nihil causat nisi secundum esse quod habet, dum causat; at finis dum causat, nullum habet esse præter intentionale: ergo causat tantum secundum esse intentionale: Respondeo maiorem falsam esse in causa finali, quia cum causet agens mouendo ad sui productionem, necesse est vt moueat antequam sit actu, adeoque secundum esse quod non habet: quare sufficit quod illius esse sit futurum. Imò etiā futurum nunquam sit, mouere potest dummodo speretur futurum; vt patet in ægroto qui mouetur ad pharmaca sumenda à nunquam obtinenda sanitate.

Obijcies 3. intellectus mouet voluntatem per modum finis, ex S. Thoma 1. p. q. 82. art. 4. id est finis vt cognitus mouet voluntatem; adeoque secundum esse intentionale, non secundum esse reale. Respondeo negando consequentiam, intellectus enim mouet voluntatem per modum finis, quatenus ostendit illi bonitatem obiecti à qua ad amandum allicitur. Vnde tantum sequitur cognitionem finis esse conditionem necessariam vt causet, non autem esse id quod causat, seu quod mouet agens ad operandum.

Queritur 3. quotuplex sit causalitas finis, & qua in re constituenda sit.

Respondeo & Dico 1. *Duplicem assignari posse finis causalitatem, aliam in actu primo, aliam in actu secundo.* Prior causalitas nihil est aliud quam ratio illa motiua qua finis potest agens impellere ad agendum, seu bonitas finis; vt in sanitate causalitas in actu primo est id quo sanitas potest xgrotum mouere ad sumendam potionem amaram, id est bonitas ipsius sanitatis: sic enim finis constituitur in actu primo potens ad causandum in suo genere, seu ad mouendum efficiens vt illius gratia operetur.

Posterior verò causalitas seu actualis causatio consistit in ea motione qua finis de facto mouet agens ad operandum: hæc enim motionem posita finis concipitur iam vt actu causans suum effectum; v. c. sanitas est actu causa finalis respectu xgroti, cum illum actu mouet ad sumendam potionem, vel ad eam optandam.

Obijcies, Deus est finis beatorum, nec tamen eos mouet ad operandum, cum ipsum possideant. Respondeo 1. quod iam dictum est de motione finis, debere præsertim intelligi de fine absente & obtinendo; ille enim propriè mouet & trahit ad sui assecutionem. 2. id etiam aliquatenus competere Deo respectu beatorum; quia illos continuo mouet & excitat ad actus beatificos, per quos ab ijs possidetur.

Dico 2. *Actualem causalitatem finis non esse quid realiter distinctum ab actione agentis que fit propter ipsum.* Probatur, quia actualis causalitas finis est id quo agens mouetur ad agendum, at agens non mouetur ad agendum nisi quatenus actionem elicit; ergo actio agentis est ipsa causalitas finis.

Confirmatur, nam quidquid finxeris ex parte finis ante operationem agentis, certè in eo priorum verum erit dicere nihil fieri propter finem;

ergo verum erit finem actu nondum causare: non enim intelligitur finis causare, nisi quatenus aliquid fit illius gratia. Contrà verò statim atque agens operatur, concipis aliquid fieri propter finem, & finem actu causare. Quare omnino dicendum est actuale finis causalitatem non esse quid realiter distinctum ab operatione agentis, quæ fit propter illum.

Nec refert quod dici solet, finem esse causam primam per quam mouetur agens ad operandum; hoc enim verum est iuxta conceptum nostrum, quia cum agens non operetur nisi propter finem, causalitas finis videtur prior causalitate agentis; cum tamen à parte rei sit vnica & eadem sub diuersa ratione. Eadem quippe actio qua ægrotus optat sanitatem, est effectiue à voluntate ægroti, & motiue à bonitate sanitatis per intellectum ei repræsentata.

## ARTICVLVS II.

### *De causa instrumentali.*

**P**rxmoneo 1. omnem causam alteri vt principali subordinatam posse dici aliquo modo instrumentalem, vt sunt dispositiones respectu materiæ, & fines intermedij respectu vltimi; sumi verò magis propriè instrumentum pro causa alteri subordinata in genere causæ efficientis, quomodo calor est instrumentum ignis ad generandum alium ignem.

Præmoneo 2. instrumentum sic sumptum assumi ad attingendum efficienter effectum vires illius superâtem, & causæ principali proportionatum; vt manifestum est in exemplo alla-

to caloris, qui cùm sit accidens, assumitur ad productionem substantiæ ignis, vt suprà diximus. His positus

Quæritur 1. An sit de ratione instrumenti, vt non moueat nisi motum à causa principali per aliquid reale in eo receptum. Respondeo negatiuè, ex communi sententia, contra Thomistas; nam etsi id interdum ita fiat, nempe in instrumentis artis, vt cùm pictor mouet penicillum ad pingendum, non tamen generatim est necessarium ad rationem instrumenti, vt patet, quia ignis per calorem vt per naturale instrumentum producit ignem, neque probabiliter dici potest ignem calori imprimere aliquam motionem, qua eum eleuet ad producendum ignem. Eò vel maximè quia cum calor sit per se naturalis virtus ignis, sufficienter est proportionatus in suo genere ad producendam formam ignis, & quæuis alia virtus ad hoc est superflua: alioqui pari iure dici posset ad hanc virtutem præquiri aliam, & sic in infinitum.

Confirmatur, nam non raro instrumentum operatur causa principali non existente, à qua proinde moueri non potest, vt cum mortuo animali generatur fœtus ex semine ab illo deciso. Potest etiam ignis extinguì paulo antequam alius generetur per dispositiones in subiecto aliquo ab eo productas; quo casu calor ignem generans ab igne extincto realiter moueri non potest, vt perspicuum est.

Obijcies 1. Instrumentum non agit nisi vt eleuatum à causa principali; at non potest eleuari nisi in se motionem aliquam virtuosam recipiat. Respondeo 1. hoc argumentum non satis cohærere cum sententia communi Thomistarum qua censent, substantiam non esse

per se immediatè operatiuam; illa enim motio instrumenti ab ipsa substantia causæ principalis immediatè profluere debet.

Respondeo 2. Instrumentum eleuari id aliud nihil esse quàm agere in virtute causæ principalis, & hoc sumi intransitiuè, vt sensus sit, instrumentum esse virtutem causæ principalis per quam effectus sibi proportionatos producit.

Obijcies 2. Instrumenta artis indigent præuia motione, cur non & alia? Respondeo esse se manifestum discrimen, nam ferra v. c. nullam ex se habet vim effectiuam ad scindendum lignum, adeo vt etiam dum actu concurrat ad scissionem, non tam videatur se habere efficienter ad illam, quàm subiectiuè, nempe sustentando impulsu agentis, à quo fit scissio. Quare mirum non est quod eiusmodi instrumenta dissita assumi debeant, & moueri ab artifice ad effectus artis producendos. Calor verò est virtus naturalis ignis, quæ habet vim intrinsecam adæquatam & principalem ad producendum calorem sibi similem, inadæquatam verò & instrumentalem ad producendum ignem.

Quæritur 2. An instrumentum necessariò debeat habere aliquam operationem propriam, antecedenter ad eam quam elicit virtute causæ principalis.

Respondeo negatiuè, ex communi sententia, contra eosdem auctores, qui entia & motiones multiplicant sine necessitate. Probatur, nam quamuis in causa instrumentali propriè dicta admittenda sit vis quædam & appetitudo ad effectum producendum, non tamen apparet cur debeat habere actionem aliquam propriam, quæ antecedit actionem qua operatur vt instrumentum; cum neque in ca-

lore quo producitur ignis, neque in plerisque alijs instrumentis duplex illa actio distingui possit. Et sanè quænam est alia actio caloris magis propria quàm calefactio? at hæc ipsa quoque est per quam disponitur subiectum ad productionem ignis, sicque calor elicit actionem illam vt instrumentum ignis.

Confirmatur exemplo instrumentorum artificialium, quæ non efficiunt aliquid proprium antequam moueantur à causa principali: serra enim non habet effectum aliquem præuium ad scissionem, nec calamus ad scriptionem: tunc autem operantur vt instrumenta, cum non agant nisi mota à causa principali.

Vnde refelluntur qui dicunt duos hic esse distinguendos effectus, nempe in actione serræ scissionem, & formam cathedræ, vel scamni, & priorem effectum esse proprium serræ, posteriorem verò artificis. Cum enim serra non scindat nisi moueatur ab agente principali, hinc perspicuum est eam non scindere nisi vt causam instrumentalem, & scissionem esse proprium effectum causæ principalis, ex quo alius præcipuè intentus resultat, nempe figura rei artefactæ.

### ARTICVLVS III.

#### *De causa exemplari seu idealis.*

**P**RAMONCO 1. Nomine exemplaris seu ideæ vulgo intelligi formam illam intellectualem, ad cuius similitudinem agens per intellectum intendit producere aliquem effectum externum. Quo sensu dicunt Theologi Deum

producere hominem iuxta ideam hominis, quam in mente habet; & constat pictorem effingere imaginem iuxta illius exemplar, quod mente concepit.

Pramonco 2. Exemplar seu ideam communiter definiri, *Formam quam effectus imitatur ex intentione agentis intellectualis*, quasi diceretur exemplar esse imaginem ad cuius similitudinem agens intellectuale intendit producere effectum. Verum ut hoc clarius percipiatur, duæ difficultates proponendæ sunt.

Quæritur 1. in quo propriè consistat ratio ideæ seu exemplaris, an in conceptu formali qui aliud nihil est quam actualis intellectio seu formalis repræsentatio rei faciendæ; an verò in conceptu obiectiuo, seu in obiecto cognito & per actualem cognitionem repræsentato, quod dicitur esse obiectivè in mente. Quod si dicatur Ideam esse conceptum obiectivum, dubitatur rursus an id intelligatur de ipso opere faciendo, an autem de quodam alio obiecto ad cuius imitationem opus faciendum sit.

Respondeo & dico 1. *Priorem questionem magis videri de nomine, quam de re.* Cum enim omnes admittant duos illos conceptus in agente intellectuali, tota dubitatio eo voluitur, cuinam ex illis nomen ideæ seu exemplaris potius tribuendum sit.

Et fortè ad conciliandas sententias oppositas, congruentiùs dicemus duplicem admittendam esse ideam, aliam formalem, aliam obiectivam. Siquidem effectus producitur tum ad similitudinem conceptus formalis non quoad esse sed quoad repræsentationem; quatenus opus eo modo quo per actualem cognitionem & speciem expressam repræsentatur: tum ad similitudinem conceptus obiectivi, quia artifex



intendit assimilare opus obiecto, quod illius menti obuersatur.

Fatendum tamen ideam seu exemplar magis propriè sumi hoc posteriori modo; quia nomine exemplaris solet intelligi obiectum aliquod, ad quod respiciens artifex conatur effingere opus illi simile; vt cum pictor intuen- do imaginem Regis, aliam ei similem efformat. Hocque videtur magis consentaneum scripturæ, cum ait Exod. 25. *Inspice & fac secundum exemplar quod tibi in monte monstratum est.* Vt autem satisfiat posteriori difficultati,

Dico 2. *Exemplar non esse obiectum ipsum quod faciendum est, sed aliud ad cuius imitationem fieri debet.* Probat 1. nam cum pictor intuens Regem, effingit imaginem illius, dici non potest illius exemplar esse imaginem quam pingit, sed Regem ipsum ad cuius imitationem effingere conatur imaginem.

Confirmatur, nam opus cēsetur rectè factum, quando est conforme suo exemplari; at imago regis non cēsetur rectè facta eo quod est sibi conformis, sic enim nullus artifex in effigendo suo opere errare posset; cum nullum opus quantumlibet imperfectum, possit non sibi esse planè consentaneum, sed quatenus ipsum Regem perfectè repræsentat.

Probat 2. Nam si exemplar esset opus ipsum quod fieri debet, sequeretur ideas diuinas non esse intra Deum, sed in rebus ipsis ab eo creabilibus, quas proinde teneretur intueri vt ad earum similitudinem istas procrearet. Hoc autem etsi à nonnullis admittatur, diuinæ perfectioni non satis videtur consentaneum, adeoque à nobis reiectum est in Theol. spec. l. 1. c. 12. vbi ostendimus, ideas diuinas non esse res ipsas factibiles, sed essentiam Dei vt variè imitabilem à creaturis.

Queritur 2. Ad quam causam exemplar reducendum sit. Respondeo videri reducendum ad causam efficientem: Ratio est, quia ita se habet idea operis ad artificem, sicut forma naturalis ad agens quod constituit, at hæc spectat propriè ad principium effectuum, ergo & illa ad idem principium reduci debet. Probatur maior, nam sicut agens naturale constituitur per formam, ita & agens artificiale per ideam; & sicut illud intendit producere effectum sibi similem quoad formam, ita & hoc quoad ideam; adeoque hæc spectat ad causam efficientem.

Confirmatur, nam ars est habitus effectivus per modum dirigentis & regulantis; ergo & idea, cum ad artem pertineat, ad causam effectivam reduci debet.

Obijcies, Idea ut est præcisè quid imitabile ab ipso effectui artificioso, habet tantum rationem causæ formalis; esto quatenus est principium operandi in artifice, ad causam effectivam reduci debeat. Respondeo antecedens falsum esse, cum id quod non informat aliquid neque est pars illius intrinseca, sed est omnino illi extrinsecum, nullo modo nisi abusive illius forma dici possit. Quod verò effectus fiat ad illius imitationem, id non sufficit ad rationem causæ formalis; quin potius spectat ad rationem causæ effectivæ, eo quod causa efficiens intendit producere effectum sibi similem.

Instabis, id quod tribuit speciem alicui est forma illius; atqui exemplar tribuit speciem effectui, ergo est forma illius. Respondeo distinguendo maiorem, quod tribuit speciem intrinsecè concedo, extrinsecè nego: at exemplar non tribuit speciem effectui priori modo, sed tantum posteriori; quatenus artifex

eo informatus producit effectum illi similem, adeoque in tali specie.

## ARTICVLVS IV.

*De casu, fortuna, & fato.*

**Q**UÆRITUR 1. An & quid sit casus. Respon-  
deo per casum hic intelligi, *Effectum*  
*aliquem insolitum ex causa naturali, præter inclinā-*  
*tionem illius ortum.* Quo sensu dari casum du-  
bitari non potest, cum multa eo modo eue-  
niant, vt quando regula decedens prætereun-  
tem lædit. Ille enim effectus est de raro con-  
tingentibus, & est præter inclinationem nati-  
uam regulæ decedentis, aut venti eam impel-  
lentis; vnde læsio illa est effectus per accidens,  
& casualis respectu regulæ, & regula est cau-  
sa per accidens illius læsionis.

Vbi nota effectum casualem reperiri in rebus  
respectu causarum creatarum, non autem res-  
pectu Dei, vt diximus lib. 1. Theolog. spec. c. 18.  
Quia etsi effectus aliquis possit subterfugere  
ordinem causæ particularis, non tamen causæ  
vniuersalis, quæ est Deus; cum nihil fiat nisi  
Deo præsciente & volente, aut saltem per-  
mittente. Vnde multò mirùs casus admitten-  
dus est in ijs quæ immediatè à Deo fiunt, quia  
cum Deus sit omniscius, & omnipotens, fieri  
nequit quòd aliquid ab eo prodeat præter  
scientiam & intentionem illius. Quare cum  
Deus per se immediatè mundum produxerit;  
repugnat quòd mundus ex fortuito atomorum  
concurso factus fuerit: vt Democritus, & qui-  
dam alij veteres somniarunt.

QUÆRITUR 2. An, & quid sit fortuna. Respon-

ded per fortunam intelligi *effectum raro contingentem præter intentionem agentis* : Quibus verbis illud ponitur discrimen inter fortunam & casum, etsi plerumque pro eodem vsurpentur, quod casus præcipue spectat ad res naturales intellectu carètes, fortuna vero ad intellectuales.

Quod autem fortuna eo sensu admittenda sit nimis perspicuum est, cum multa hominibus operantibus eueniant præter eorum intentionem, ut si quis fodiens terram, thesaurum inueniat. Illi enim fossioni, quæ est opus per se intentum à fossiore, adjungitur omnino per accidens, & præter illius intentionem, thesauri inuentio. Vnde hæc inuentio est effectus fortuitus & fossor causa fortuita.

Vbi aduerte eos vulgò dici benè aut malè fortunatos, quibus incogitantibus bona aut mala eueniunt. Verùm etiam effectus illi dicantur fortuiti respectu causarum secundarum, non tamen respectu Dei, cum præter cognitionem & dispositionem eius non eueniant. Quare in illius providentiam dispensatio illa bonorum aut malorum referenda est, non in Deam illam fictitiam, quam antiqui fortunam appellarunt.

Quæritur 3. An, & quid sit fatum. Respondeo nomine fati ab antiquis Philosophis intelligi causam aliquam casui & fortunæ omnino oppositam, qua scilicet res omnes fiant ex absoluta determinatione & necessitate, ita ut impossibile sit aliter euenire, adeoque tollatur omnis effectuum non modo libertas, sed etiam contingentia: vel certam aliquam dispositionem & ordinem in causis rerum constitutum, quo fiat ut omnia inenitabili necessitate eueniant. Hanc autem causarum ordinationem & necessitatem alij in ipsarum naturam, alij in influxus astrorum, alij in voluntatem Dei, vel

necessario, vel efficacissimè operantem referebant.

Verùm hæc opinio vt veræ Philosophiæ, ac fidei opposita ab omnibus Catholicis communiter reijcitur; cùm planè destruat libertatem hominis, & consequenter rationem omnem virtutis & vitij, meriti & demeriti, præmij & supplicij tollat. Pessimè etiam sentit de Deo, quatenus supponit eum agere ad extra ex necessitate naturæ: si enim nos homunciones præditi sumus libertate ad agendum, vel non agendum, quæ sane magna est perfectio; quanto magis Deus omnium creator, ensque absolutissimè perfectum in omni genere, agendi vel non agendi libertate potitur? qua de re aliquid diximus in Theol. specul. vbi de voluntate Dei. Ineptè quoque supponit astra, cùm sint agentia corporea, influere directè in voluntatem nostram quæ est potentia spiritualis, eamque ad vnam partem immobiliter determinare, de quo in Idea Ethicæ aliquid fortè dicitur.

Quare fatum in eo sensu reijciendum est tanquam impium & hæreticum; admittendum verò si sumatur pro dispositione in rebus creatis à Deo posita, qua fit vt causæ naturales effectus suos naturaliter & necessario, causæ vero contingentes & liberæ effectus suos contingenter & liberè, infallibiliter tamen operentur. Cùm enim res omnes creatæ subsistent prouidentiz Dei, hæcque sit certa & immobilis, fatum eo sensu admittendum esse perspicuum est. Ne tamen detur occasio errandi, nomine prouidentiz, aut voluntatis Dei, potius quàm fati vtendum est.

## CAPVT VIII.

## De ente rationis.

## ARTICVLVS PRIMVS.

*De existentia, & natura entis rationis.*

**P**RAEMONEO 1. cùm Metaphysica agat per se de ente reali, ad eam quoque spectare agere de ente rationis, per reductionem ad ens reale; adeoque illius existentiam, naturam, & causas inuestigare, quod in hoc capite exequemur.

PRÆMONEO 2. nomine entis rationis non hic intelligi aliquid realiter existens in ratione seu intellectu, quomodo species intellectuales & scientiarum habitus dici possunt entia rationis; neque aliquid ab intellectu realiter productum, quomodo actus intellectus, & opera externa ex artis directione facta, entia rationis appellari possunt; sed aliquid quod existit tantum obiectiue in intellectu, ita ut nullam habeat vel habere possit realem existentiam extra intellectum, sed tantum habeat existentiam, quam vocant obiectiuam, in ipso intellectu. Hoc enim propriè intelligitur nomine entis rationis, cum de eo sine alia declaratione agitur, sine in Metaphysica, sine in alijs scientijs. His præmissis

QUÆRITUR 1. an detur ens rationis in sensu iam explicato. Respondeo affirmatiue, ex communi omnium sententia, quæ in manifesta

experientia fundatur. Quotidie enim multa entia rationis mente offingimus, quæ nullum aliud esse habent quàm obiectiũ, vt cùm concipimus cæcitatem, tenebras, aliasque priuationes in modum cuiusdam formæ realis subiecto inexistentis: nam licet cæcitas, & tenebræ suo modo rebus conueniant citra mentis operationem, non tamen in ratione formæ positivæ, vt ab intellectu concipiuntur. Concipimus etiam cerberum tricipitem, hydræ, chimæram, aliaque impossibilia quæ nullum habent esse præter obiectiũ in mente concipientis.

Obijcies 1. quidquid est, debere prius esse quàm cognosci, adeoque ens rationis nullo modo esse, cùm non sit antequam cognoscatur. Respondeo antecedens verum esse de eo quod existit independenter à cognitione, non autem de eo quod per cognitionem accipit esse, quale est ens rationis.

Quod si insites, omnem cognitionem supponere obiectum circa quod versatur; Respondeo id verum esse de obiecto per se vel per speciem sui ad cognitionem concurrente, non autem de eo quod non cognoscitur nisi per species alienas; fieri enim potest vt tale obiectum non existat, nisi per operationem intellectus eiusmodi species sic disponentis, vt ex repræsentent tanquam existens aliquid quod verè non existit, nec existere potest; vt cùm per species hirci & cæri concipit hircocærum, ad modum vnius animalis ex hirco & cæro compositi.

Obijcies 2. terminum cuiusque actionis realis debere esse realem, ac proinde ens rationis, quod est terminus intellectionis realis, esse aliquid reale. Respondeo antecedens verum

esse de termino intrinseco actionis realis & productiuz, quomodo per intellectiōem producitur species expressa seu verbum mentis, quod est aliquid reale; non autem de termino illius extrinseco, quale est ens rationis per speciem illam expressum & repræsentatum. Ad eum modum quo terminus picturæ internus est realis, nempe imago à pictore efficta; at verò terminus externus potest esse non realis, & fictitiuz, vt cum pictor varia monstra impossibilia effingit.

Obijcies 3. relatio rationis creatoris, Domini, & similes competunt Deo citra operationem intellectus, ergo saltem concedendum est aliqua entia rationis existere independenter ab intellectu cogitante. Respondeo falsò supponi Deum esse creatorem, & dominum per relationem rationis; illæ enim sunt potius denominationes reales extrinsecz ex co sumptæ, quòd Deus creaturas realiter produxit, & in eas summum habet imperium. Quòd si fingatur Deum per relationem rationis referri ad creaturas, iam eo ipso talis relatio constituitur per intellectum, cum nequeat esse relatio rationis nisi per opus rationis.

Quæritur 2. vtrum ens rationis sit aliquo modo in rebus, siue per operationem intellectus, siue independenter ab illa. Sententia communis est negatiua, quæ vt clarius intelligatur.

Respondeo & Dico 1. *ens rationis omnino pendere ab operatione intellectus, ita vt neque quoad essentiam, neque quoad existentiam sit independenter ab intellectu.* Ratio est, quia non modo de existentia, sed etiam de essentia entis rationis est vt pendeat ab intellectu: tum quia debet esse proportio inter essentiam quancunque &



existentiam ad quam dicit ordinem; quare cum ens rationis pendeat ab intellectu quoad existentiam, ab eo etiam pendere debet quoad essentiam. Tum quia si ens rationis non penderet ab intellectu quoad suam essentiam, ut aliqui existimant, eatenus non esset ens rationis, sed verum ens reale, sicut est essentia hominis, vel equi nondum existentis; hoc autem communi Philosophorum sensui repugnat, & per se statim absurdum apparet.

Dico 2. *ens rationis non esse in rebus extra intellectum, sed tantum in intellectu.* Probat, nam si est in rebus, non est in illis nisi dependenter ab operatione intellectus, cum non nisi ab intellectu produci possit; at quod eo modo non sit in rebus inde patet, quia propter nostrum intelligere nihil ponitur in re, ut aiunt vulgò Philosophi; & per se ridiculum est existimare, quando concipimus Deum & creatorem, ex vi talis conceptus Deo imprimi relationem rationis ad creaturas. Confirmatur, quia non potest intelligi quod ex vi intellectus nostri aliquid resultet in Deo, alioue subiecto, quin id sit forma aliqua realis, ut pote exigens subiectum reale cui inexistat.

Obijcies, vel ens rationis nullibi est, vel est subiectivè in intellectu, aut in rebus; at primum dici non potest, quia cum ens rationis dicatur formari ab intellectu, alicubi esse debet secundum esse quod habet: non etiam secundum, quia ens rationis dicitur esse in intellectu obiectivè tantum; ergo tertium admitteri debet. Respondeo ens rationis alicubi esse, non quidem subiectivè propriè loquendo, quia quod est in aliquo subiecto, est accidens reale; sed tantum obiectivè, nimirum in intellectu qui concipiendo chimæram quæ non

est, ac si esset, censetur illi tribuere quandam existentiam obiectiuam, quatenus illam sibi vt existentem obiiicit.

Ex quo patet, ens rationis non esse conceptum mentis à quo effingitur, sed obiectum illius. Nec refert quòd nihil sit nisi per conceptum, inde enim non sequitur nihil esse præter conceptum; cum conceptus dicat actionem realem ab intellectu productam, & in eo subiectiuè receptam, ens verò rationis sit obiectum eiusmodi actionis, à qua proinde distinguui debet vt quid fictitium ab ente verò & reali.

Quæritur 3. quid sit ens rationis. Respondeo esse obiectum ab intellectu effictum, seu non ens conceptum ab intellectu per modum entis. Patet ex dictis, ens siquidẽ rationis nullibi habet aut habere potest esse subiectiuè, sed tantum potest representari intellectui ac si verè existeret, adeoque potest tantum habere esse obiectiuum per intellectum. Vnde illud non est propriè ens rationis quod concipitur vt existens, etsi non existat, si verè possit existere: quia vt suprà aduertimus, essentia rerum includuntur intra ambitum entis realis, etiam quandiu sunt in statu possibilitatis, seu antequam actu existant: requiritur ergo ad ens rationis propriè dictum vt aliter non existat, nec existere possit quàm obiectiuè in intellectu. Quò fit vt quando concipio Antichristum futurum, non effingam ens rationis; quia etsi Anti-christus non sit actu in rerum natura, potest tamen realiter & extra intellectum existere, & obiiicitur meo intellectui secundum illud esse possibile à quo denominatur ens reale. Quare per accidens est respectu illius quod ab intellectu concipiatur, cum tamen vice

versa, totum esse entis rationis ab intellectu essentialiter pendeat; quatenus nullum habet esse siue actuale, siue possibile in rerum natura, sed tantum esse obiectiuum per conceptionem intellectus.

## ARTICVLVS II.

*De causa effectiua entis rationis.*

**Q**Varitur 1. à qua potentia fieri possit ens rationis. Quod vt intelligatur

Notandum 1. hic non agi de ente rationis strictè sumpto iuxta notionem vocabuli; cum enim ens rationis dicatur à ratione, & ratio ad solum intellectum spectet, hinc sequitur ens rationis in eo rigore vocabuli non posse fieri nisi ab intellectu. Dubitatur ergo an ens rationis latè sumptum pro ente ficto, & distincto ab ente reali, possit effingi ab omnibus potentiis animæ; præsertim ab appetitu, & à sensibus: quod enim ab intellectu formari possit, in dubium minimè vocatur.

Notandum 2. cum inquirimus causam à qua ens rationis fit, non agi de causa effectiua propriè dicta; quia cum ens rationis non sit verum ens, non potest habere veram causam efficientem, neque propriè fieri. Debet ergo questio intelligi de causa efficiente impropria, quæ scilicet tribuat enti rationis illud esse obiectiuum quod habet; quibus prænotatis,

Respondeo & Dico 1. *appetitum non facere propriè ens rationis.* Ratio est, quia ens rationis fit eò ipso quò quod non est ens effingitur per modum entis; at talis fictio non potest cadere in appetitum, quia rem aliter effingere

quàm sit, non spectat nisi ad potentiam cognoscitiuam; cum ea sola possit rem aliter concipere quàm sit, eique tribuere quoddam esse obiectiuum quod à parte rei non habet.

Confirmatur, nam appetitus ex se est potentia cæca, quæ obiecta in quæ fertur non fingit, sed eo modo illa amplectitur, quo ipsi ab intellectu vel phantasia representantur. Quare etsi voluntas feratur in rem aliquam aliter quàm sit, v. c. in obiectum tanquam bonum quod reuera bonum non est; ille error referri debet in intellectum, qui obiectum aliter representat quàm sit: non autem in voluntatem, quæ cum non sit facultas cognoscitiua, bonum à malo discernere non potest.

Dico 2. *nullum sensum siue externum, siue internum posse efficere ens rationis*. Probatur, quia quamuis possint sensus obiecta percipere aliter quàm sint, non tamen aliter quàm absolute esse possint, ut patet, nam si v. c. visus rem in aqua tanquam fractum percipit, non repugnat absolute quin reuera fractus sit; & si imaginatio montem aureum effingit, nil vetat quin mons aureus à Deo possit creari, id est ingens auri moles instar montis; at non propriè fingitur ens rationis, quando aliquid concipitur aliter quàm sit, si possit esse eo modo quo concipitur: nam aliàs concipiens res possibiles, ut rosam in hieme, efficeret ens rationis, quod dici non potest; sed quando res concipitur aliter quàm sit, aut esse possit.

Quod si dicas chimeram posse effingi ab imaginatione, etsi nec sit realiter, nec esse possit. Respondeo chimeram effingi ab imaginatione quoad figuram tantum externam, quomodo esse potest; nil enim vetat quod Deus

Deus

Deus producat animal aliquod quod exterius tale sit quale ab imaginatione fingitur. Quare chimera eo modo non est propriè ens rationis, sed quatenus effingitur tanquam quoddam animal substantialiter constans ex diuersis essentis, vt fingitur ab intellectu; quomodo neque est, neque esse potest.

Dico 3. *solum intellectum efficere ens rationis, modo prædicto acceptum.* Sequitur ex resolutionibus præcedentibus, cum nulla alia illius causa veluti effectiua assignari possit. Hoc autem ita intellige, vt ens rationis non aliter fiat ab intellectu, quàm per formalem conceptionem qua obiectiuè repræsentatur tanquam ens quod non est ens. In eo enim consistit ens rationis, quòd sit obiectum à mente effectum; non potest autem effingi nisi per actuale cognitionem, ac proinde non alia est admittenda operatio intellectus qua producat ens rationis, quàm illius intellectio. Ad maiorem autem horum intelligentiam,

Nota 1. ens rationis dupliciter posse ab intellectu cognosci, primò per cognitionem directam, vt cum concipio directè chimeram tanquàm animal aliquod possibile vel existens; secundò per cognitionem reflexam, cum scilicet cognosco me concipere chimeram. Cæterum ens rationis non sit propriè per posteriorem cognitionem, quia potius tunc cognoscitur vt iam factum, sed per priorem.

Nota 2. à nonnullis dubitari, an per tres vulgares mentis operationes possint fabricari entia rationis, cui difficultati respondeo affirmatiuè; quia per primam possum simpliciter apprehendere vt ens, quod ens non est; per secundam possum iudicare aliquid esse ens, quod non est ens, aut vice versa; per ter-

*Metaph.*

M

etiam possum ex præmissis concludere aliquid sequi ex alio, quod verè ex eo non sequitur, adeoque his omnibus modis possum effingere entia rationis.

Nota 3. ens rationis duobus modis per illas operationes fieri posse vel affirmatiuè vel negatiuè; affirmatiuè tribuendo rei aliquid quod ei non conuenit, negatiuè illi denegando aliquid quod ei verè & necessario conuenit: prior modo fingitur ens rationis, cum quis iudicat tenebras esse quandam nigredinem aëri affusam, posteriori verò cum quis existimat Deum non esse, vel hominem non esse animal.

Queritur 2. an ens rationis ab intellectu siue diuino, siue Angelico fieri possit.

Respondeo & Dico 1. *non posse fabricari ab intellectu diuino, si propriè loqui velimus.* Ratio est, quia nulla imperfectio cadit in Deum; at magna sane est imperfectio effingere ens rationis, ergo id Deo tribui non debet. Minor ostenditur, quia tunc fit ens rationis cum aliquid concipitur aliter quàm sit; at magna est imperfectio rem ita concipere, ergo modus ille concipiendi in Deum cadere nequit, ideoque nec fabricatio entis rationis.

Confirmatur, nam cum Deus infinita vi intelligendi polleat, non modo omnia cognoscit, sed etiam perfectè comprehendit quidquid ad eorum essentiam, proprietates, & alia adiuncta pertinet; quare non potest res aliter cognoscere quàm sint, & consequenter nullum ens rationis effingere potest.

Obijcies, Deus nouit ens rationis effectum ab intellectu humano, cum sciens & volens concurrat ad quamcunque illius cognitionem, ac proinde ignorare non possit quod ab illo cogitante effingitur; ergo etiam Deus facit ens

rationis : sequela patet , quia ens rationis fit eo ipso quo cognoscitur. Respondent aliqui negando antecedens : sed immeritò , tum propter rationem iam allatam , tum quia et si sit imperfectionis res aliter cognoscere quàm sint , magna tamen est perfectio , intelligere rem aliter cognosci ab alio quàm sit ; quia sic & cognitio falsa cognoscitur vt est , & obiectum per eam repræsentatum cognoscitur etiam vt est ; quod sanè non exiguam perfectionem indicat , ac proinde in Deo admitti debet.

Respondeo igitur 2. cum communi sententia , negando sequelam , & ad probationem illius dico , Deum non efficere ens rationis , et si illud cognoscat quod à nobis fingitur : quia ens rationis fit tantum per eam cognitionem qua fingitur , non autem per eam qua vt fictum agnoscitur , vt patet ex dictis. Hæc enim posterior cognitio cum sit vera , & nullam fictionem contineat , non potest esse entis rationis effectiua ; sed ea tantum qua fingitur per modum entis , quod non est ens , nec esse potest. Et in idem redit quod aliqui dicunt , ideo Deum non efficere ens rationis , quando à nobis effectum cognoscit , quia illud non cognoscit practicè , sed duntaxat speculatiuè. Fateor tamen questionem istam magis ad modum loquendi spectare , quàm ad rem ipsam.

Dico 2. *Angelum non posse fingere entia rationis quoad res naturales , quarum claram & perfectam habet notitiam , posse tamen quoad res supernaturales.* Prior pars probatur , quia cum Angelus clarè & intuitiuè penetret res omnes naturales , non potest falli in earum cognitione ; ideoque non potest excitatem per modum formæ positiuæ , nec tenebras per modum

nigredinis percipere, sed singula cognoscit ut sunt à parte rei.

Posterior ostenditur, nam cum supernaturalia non sint nota Angelis sine peculiari Dei reuelatione, dubium non est quin possint circa illa hallucinari, & aliter de rebus sentire quàm sint; quomodo deceptus est dæmon, iudicando Christum non esse Deum, sed merum hominem.

Idem dicitur communiter de futuris contingentibus, ab hominum natua libertate pendentibus, cum possit Angelus existimare aliquid eiusmodi futurum, quod verè futurum non sit. Verum hæc deceptio non sufficit nisi ad fingendum ens rationis improprie & late sumptum, quia si agatur de ente rationis strictè sumpto, quale ante descriptum fuit, non facile intelligitur illud ab Angelo fabricari posse; quia ut eiusmodi ens rationis ab illo fieret, necesse esset ut tanquam futurum iudicaret, quod neque vnquam euenturum esset, neque euenire posset. At non satis constat Angelum posse eiusmodi assensum elicere, cum vires naturales humanæ libertatis perfecte penetret, adeoque sciat quidquid ab illa prodire potest; & aliunde in rebus non satis sibi perspectis præcipitem sententiam ferre non soleat, ut vulgo tradunt Theologi in tractatu de Angelis.

### ARTICVLVS III.

#### *De diuisionibus entis rationis.*

**E**Ns rationis primò diuidi solet in fundatum & non fundatum; fundatum dicitur



illud quod fit cum aliquo fundamento in re, ut cum cecitatem qua visus destruitur, concipimus per modum alicuius qualitat<sup>is</sup> noxiæ oculo inhxerentis. Licet enim quod ita cecitatem concipiamus, id oriatur ex imbecillitate nostri intellectus, eo tamen defectu posito, est etiam aliquod fundamentum ex parte rei seu subiecti, fingendi aliquam qualitatem in oculo, quæ verè in eo non est.

Non fundatum verò dicitur illud quod fit ex mera intellectus libertate, ut chimera, hircoceruus, &c. nihil enim est in rebus quod tribuat occasionem intellectui coniungendi in vnam, duas aut tres naturas specie distinctas; & qua facilitate mens connectit vnam partem substantiæ cerui cum parte substantiæ hirci, eadem posset ex boue & equo, ex leone & asino monstrum aliquod compingere.

Eodem modo intellectus creditur facere ens rationis non fundatum, cum profert aliquam propositionem identicam, qualis est illa, Deus est Deus; quia nullum est fundamentum distinctionis, quam inter attributum & subiectum talis propositionis constituit. Hinc autem trahi solet vulgaris distinctio rationis ratiocinatæ & rationis ratiocinantis, quarum prior dicitur quæ fit cum aliquo fundamento, posterior verò quæ fundamento destituitur. Verum hæc doctrina attemperanda est iuxta superius à nobis dicta, de distinctione illa rationis ratiocinatæ, & rationis ratiocinantis.

Secundò, potest diuidi ens rationis in ens rationis primæ, & secundæ intentionis; ens rationis primæ intentionis est, id quod per se primò effingitur, ut cum concipio hircoceruum: ens autem rationis secundæ intentionis est, id quod rei iam cognitæ affingitur, siue

res illa sit realis, vt cum dico in illa propositione, Petrus est homo, Petrum habere rationem subiecti; siue fictitia, vt cum dico, in illa propositione, chimera est animal, chimeram esse subiectum. Quod enim Petrus & chimera induant rationem subiecti, id à parte rei nihil est, sed ab intellectu fingitur, ac si esset forma aliqua realis Petro, ac chimera adueniens.

Atque hæc entia rationis secundæ intentionis fundata in præcedenti cognitione reali, frequenter vsurpantur à Logicis, suntque valde vtilia ad directionem trium mentis operationum; cum sine subiecto, prædicato, antecedente, consequente, genere, specie, aliisque notionibus Logicis à mente effictis, quæ in Logica tractantur, commodè intelligi, & ad praxim deduci non possint.

Tertio, ens rationis diuiditur à nonnullis in relationem, priuationem, & negationem; quod vt intelligatur aduerte 1. per relationem intelligi respectum quemdam rationis per mentem alicui rei affictum, respectu termini ad quem à parte rei nullo modo refertur; vt cum concipimus Deum quatenus creatorem, dicere intrinsecè respectum quemdam ad creaturas; & parietem quatenus visum, referri intrinsecè ad oculum videntis.

Aduerte 2. priuationem & negationem duobus modis accipi posse; primò vt sunt mera priuatio & negatio alicuius formæ; secundo vt concipiuntur ab intellectu per modum alicuius formæ positiuæ: hoc autem posteriori sensu dici entia rationis, non autem priori, cum sic rebus citra omnem mentis fictionem conueniant; vt cæcitas oculo, & negatio lapidis homini.

Aduerte 3. denominationes extrinsecas à nonnullis inter entia rationis constitui, & reduci ad relationem rationis; sed malè, quia etsi possimus fingere aliquem respectum rationis in pariete viso, ad oculum videntem, & in Deo ad creaturas; secluso tamen hoc respectu, & nemine cogitante, paries denominatur realiter visus, & Deus dicitur realiter creator. Quia etsi visio non sit nisi in oculo, sicque illum solum realiter denominet videntem; cum tamen realiter tendat ad parietem tanquam ad suum obiectum, hinc illum etiam realiter denominat visum, non quidem intrinsecè, cum ei non inhaereat, sed extrinsecè. Et similiter licet creatio non sit in Deo sed in creatura, sicque illam tantum denominet intrinsecè creatam; quia tamen realiter à Deo procedit, hinc fit vt illum denominet realiter, extrinsecè tamen creatorem; neque ad has denominationes opus est vlla fictione intellectus.





# LIBER III.

## DE SPECIEBUS

primariis entis.

*Hoc tertio libro agendum est de præcipuis & immediatis veluti speciebus entis, nimirum de substantia, & accidente: & consequenter de qualitate, relatione, alijsque accidentibus prædicamentalibus, excepta quantitate cuius consideratio commodius in Physicam reijcienda videtur.*

### CAPVT PRIMVM.

De substantia secundum se.

#### ARTICVLVS PRIMVS.

*De quidditate substantia.*



Arij sunt dicendi modi de quidditate & essentia substantiæ, quod indicio est naturam substantiæ parum Philosophis esse perspectam, & quæ de ea subiiciemus parum esse certa. Neque id mirum videri debet,

quia cùm tota cognitio nostra pendeat à sensibus, & sensus non nisi accidentia percipiant, difficile est perspicuè cognoscere quidnam sit illud ens insensibile, quod accidentibus substantiare concipimus. Eò vel maximè quia in vestiganda etiam natura ipsarum rerum sensibilibum plerumque cæcutimus, vt manifestum fiet ex toto decursu physicæ.

Communis sententia est, quidditatem substantiæ in eo consistere quòd sit *ens per se existens*, id est independenter à subiecto inhesionis; quomodo substantiæ definitio aptari potest omni substantiæ, & distinguit substantiam ab accidente; cùm nulla sit substantia quæ subiecto inhæreat ad modum accidentis.

Hic autem quaeritur, an esse seu existere per se sit aliquid entitati substantiæ superadditum. Responsio communis est negatiua, quia cùm in eo constitui soleat essentialis ratio substantiæ, vt per se existat, hoc quod est existere per se non debet esse aliquid superadditum entitati substantiæ; sicut esse rationale non potest esse aliquid additum quidditati hominis.

Confirmatur, nam si esset aliquid superadditum, posset diuinitus separari à substantia, & ita substantia non existeret per se; & consequenter nihil impediret quin posset inhære alteri tanquam subiecto inhesionis, ad modum accidentis, quod sanè dici non potest.

Obiicies 1. esse in alio est modus superadditus accidenti, ergo & esse per se est modus superadditus substantiæ. Respondeo non sequi, & ratio discriminis à posteriori ex eo deprehendi potest, quia cùm ex fide constet accidens posse actu separari à subiecto, hinc manifestum est esse in alio esse modum quemdam

distinctum ab entitate accidentis: at verò cùm neque ex fide, neque aliunde sufficienter nobis constet, substantiam posse esse in alio vt in subiecto inhaesionis, hinc merito concluditur modum essendi per se non distingui à substantia:

Obijcies 2. existere per se nihil aliud esse quàm subsistere, substantiam verò non subsistere per suam entitatem, sed per modum quemdam illi superadditum, vt patet in humanitate Christi quæ fuit priuata propria subsistentia. Respondeo existentiam per se distingui à subsistentia, vt ex eo colligitur, quòd humanitas Christi non erat in verbo vt in subiecto inhaesionis, sed tantum vt in termino à quo perficiebatur in ratione suppositi: quare etsi per propriam entitatem non subsisteret, sed per subsistentiam verbi supplementem defectum subsistentiæ illius naturalis, vi tamen propria existeret per se.

Obijcies 3. si substantia existit per seipsam sine vlllo modo superaddito, sequitur eam existere per suam essentiam; at hoc repugnat, quia solus Deus est ens existens per suam essentiam. Respondeo substantiam quamcunque existere per suam essentiam, ita vt non sit distinctio realis inter essentiam & existentiam substantiæ; Vnde Deus non tantum eo sensu est existens per suam essentiam, sed alio longè diuerso qui nulli creaturæ competit, quatenus nempe non modo existentia Dei est idem cum essentia illius, sed etiam est de conceptu essentiæ Dei quod actu existat; adeo vt nequeat concipi Deus, quin intelligatur actu existens. At verò etsi creaturæ existentia & essentia realiter non distinguantur, non tamen est de-

earum essentia quod existant ; sed possunt adæquatè quoad totam essentiam concipi , abstrahendo ab actuali existentia , vt alibi obseruatum est.

Obijcies 4. idem est existere per se , ac non esse in alio ; at non esse in alio est negatio , quam Deus potest amouere à subiecto , adeoque efficere vt substantia non existat per se. Respondeo maiorem falsant esse , esse enim per se dicit modum positium existendi independentem à subiecto inhesionis. Cum enim substantia adæquatè sit ens reale & positium , non potest ratio illius essentialis constitui per negationem , sed tantum per aliquid positium ; esto interdum à nobis alio modo declaratur , quia non percipimus res vt sunt , & de ijs loquimur prout eas percipimus. Et quamuis daretur esse per se dicere negationem , inde non posset efficaciter colligi eam negationem posse à substantia tolli ; quia etsi negationes quæ sequuntur aliquod accidens commune rei , possint ab illa auferri , non tamen quæ illius essentiam sequuntur ; vt patet in negatione equi , lapidis , aliarumque rerum quæ ab essentia hominis tolli non potest : quia de ratione intrinseca hominis est vt non sit equus , nec lapis &c.

---

## ARTICVLVS II.

### *De subsistentia qua competit substantia.*

**D**Vo hic quæri possunt , primò an substantia non modo per se existat , sed etiam subsistat. Secundo an subsistentia addat aliquid

positivum supra entitatem substantiæ.

Respondeo & Dico 1. *Negari non posse quin natura substantialis exigat ex se propriam subsistentiam, per quam dicatur ens subsistens.* Probatum tum ex communi usu loquendi, omnes enim aliquo sensu agnoscunt subsistentiam in rebus, cum plerumque nominibus substantiæ, subsistentis, suppositi, hypostasis, personalitatis utantur; neque putent ea omnia esse vanas voces nihil significantes, ut nimis perspicuum est.

Tum quia in Deo ponuntur tres substantiæ, per quas tres personæ divinæ constituentur, ut fides docet, ergo cum etiam in creatis sint personæ, ab iis ratio subsistentiæ excludi non potest. Et idem dicendum de aliis substantiis, quibus ratio personæ non competit; quia cum personalitas nihil sit aliud quam id quo natura intellectualis subsistit, cum etiam aliæ naturæ non intellectuales subsistant, negari non potest quin ratio subsistentiæ etiam iis competat.

Tum maxime quia ex fide constat, naturam humanam in Christo subsistere per subsistentiam verbi; hinc autem Theologi colligunt humanitatem ex se esse capacem propriæ subsistentiæ, eamque naturaliter exigere, sed propter unionem ad verbum fuisse in Christo divinitus impeditam. Ergo negari absolute non potest dari quandam subsistentiam in natura, per quam res subsistant. Quod si nonnullis substantiis id conceditur, nulla est ratio cur aliis denegetur, cum omnes ex se æqualiter postulent modum completum subsistendi, & habere rationem suppositi infra declarandam.

Dico 2. *Subsistentiam esse modum quemdam*



*positum natura superadditum*; & ab ea *distinctum*. Probatur nam vel subsistentia nihil addit supra naturam, vel aliquid addit; prius repugnat fidei, quia si subsistentia nihil adderet supra naturam, aperte sequeretur verbum assumendo humanitatem in incarnatione, assumpsisse etiam subsistentiam humanam, cum totam & integram humanitatem assumpserit; at de fide est verbum non assumpsisse subsistentiam naturæ humanæ, quia cum subsistentia naturæ intellectualis idem sit ac personalitas, sequeretur verbum assumpsisse personam humanam, sicque duas esse personas in Christo, quod Nestorianum & planè hæreticum est, ut diximus in Idea Theol. Speculat. lib. 2. cap. 11. Fateri ergo debemus necessario subsistentiam aliquid addere supra naturam, quidquid illud sit.

Rursus, si subsistentia dicat aliquid supra naturam, vel illud distinguitur tantum per rationem à natura, vel negativè dumtaxat, vel modaliter. Non tantum per rationem, quia si natura & subsistentia sunt idem realiter, fieri nequit, esto per rationem distinguantur, quòd vnio terminetur ad vnā & non terminetur ad aliam; cum vnio non se habeat ad modum intellectus nostri qui potest per, conceptus inadæquatos vnum præscindere ab alio, cum quo perfectè identificatur, sed physice attingat & coniungat rem, ut est in se ipsa. Quare hinc sequeretur unionem verbi terminatam ad humanitatem Christi, fuisse quoque terminatam re ipsa ad illius subsistentiam, sicque personam humanam fuisse à verbo assumptam simul cum humani-

rate ; quod à fide Catholica alienum est.

Non etiam negatiuè duntaxat , tum quia si subsistentia nihil aliud esset formaliter quàm negatio vnionis cum altero supposito, vt aliqui existimant , frustra à Conciliis tantquam dogma fidei determinatum esset , humanitatem à verbo assumptam catere propriam subsistentiam ; cum intellectis terminis, vel ipsolimine naturæ perspicuum sit , naturam verbo vnitam non habere negationem vnionis ad verbum.

Tum quia subsistentia est complementum , terminus , & vltima perfectio naturæ ; at ista non haberet si esset mera negatio existendi in alio supposito, vt per se notum videtur Ergo dici non debet rationem formalem subsistentiæ in negatione consistere. Confirmatur, nam vel est in natura aliquod fundamentum talis negationis, vel nullum ; at hoc posterius dici non potest, quia aliàs non magis substantiæ tribui deberet subsistentia , quàm accidenti : posterius ergo verum est , adeoque in subsistentia est aliquid positium ratione cuius illi competit negatio vnionis cum alio ; & hæc vocari debet subsistentia ; siquidem non alio titulo res exigit non esse in alio supposito, nisi quia subsistit per se , seu per propriam subsistentiam.

Tum quia suppositum concipitur ab omnibus vt ens vnum per se & vnius naturæ ; at natura constituitur in ratione suppositi per suam subsistentiam ; quæ si esset negatio , perfectio non constitueret cum natura vnum ens per se , sed vnum tantum per accidens, vt perspicuum est : Ergo absolutè negandum est subsistentiam formaliter in negatione consistere.

Vnde concludo subsistentiam esse modum quemdam naturæ creatæ superadditum, & realiter ab ea distinctum, ita vt etsi non possit subsistentia existere sine natura, cum sit terminus illius intrinsecus, possit tamen natura diuinitus existere sine propria subsistentia; vt patet in humanitate Christi quæ per vñionem ad verbum propria subsistentia priuata fuit. Neque maior distinctio ponenda est inter naturam & subsistentiam, cum natura sine subsistentia sit integra in ratione naturæ, tantumque illi desit aliquod complementum connaturale, quod per entitatem quamdam modalem sufficienter habere potest; eò quod subsistentia nihil aliud est quàm modus quidam quo substantia existit in se independententer ab alio supposito; sicut inhærentia accidentis non distinguitur nisi modaliter ab accidente, eò quod dicit tantum modum quo accidens existit in alio.

Obijcies .i. non sunt multiplicandæ entitates sine necessitate; at nulla est necessitas ponendi in natura modum distinctum per quem subsistat, cum subsistere nihil sit aliud quàm existere per se, & natura per seipsam existat per se, vt antè ostensum est. Respondeo negando minorem & illius probationem, quatenus existentiam per se cum subsistentia confundit. Natura enim potest existere per se seu independententer à subiecto inhærentionis; etsi non subsistat per propriam subsistentiam; vt patet in humanitate Christi quæ per se existit eo modo, etsi careat propria subsistentia. Vnde sequitur subsistentiam esse modum non tantum naturæ, sed etiam existentia per se superaddi-

tum, cum ab ea possit separari; quemadmodum inhaerentia est modus ab accidente distinctus, cum ab eo diuinitus separari possit.

Obijcies 2. Si subsistentia esset modus à natura distinctus, sequeretur verbum non assumpsisse humanitatem integram & perfectam, itemque illius humanitatem perpetuò priuatam manere complemento suo connaturali, ac proinde esse in perpetuo statu violentiæ; quæ & similia admitti non debent. Respondeo ista non esse adeo absurda quin aliquo sensu admitti possint; nam humanitas quidem non erat integra in ratione suppositi & personæ, quod necessariò admitendum est, quia alias dux essent personæ in Christo, vt dictum est; erat tamen integra in ratione naturæ, cum constaret perfecto corpore, & perfecta anima. Christi etiam humanitas aliquam videtur pati violentiam naturalem, quatenus impeditur ne propriam subsistentiam effundat; sicut anima rationalis violentiam pateretur, si diuinitus impediretur ne proprium intellectum ex se effunderet, & aqua si impediretur vt frigus ex se emitteret. Absolutè tamen dici potest humanitatem Christi non esse in statu violento cum defectus propriæ subsistentiæ per verbi subsistentiam infinitè nobiliorem suppleatur.

Obijcies 3. Verbum diuinum supplet in Christo defectum subsistentiæ creatæ; at non potest supplere defectum modi, cum hoc dicat imperfectionem, ergo subsistentia non est modus, sed potius realitas distincta à natura. Respondeo subsistentiam creatam dupliciter se habere erga naturam

quam afficit, eam enim modificat, & vltimò terminat reddendo incommunicabilem alteri supposito: inter hæc autem munera illud est discrimen, quòd primum cùm intrinsecè dicat imperfectionem, à verbo non potest suppleri, non enim fieri potest vt verbum sit modus alicuius naturæ creatæ: Secundum verò quia nullam imperfectionem inuoluit, à verbo suppleri potest, sicque non opus est vt substantia creata magis quàm modaliter distinguatur à natura. Eò vel maximè quia etsi substantia esset entitas realiter distincta à natura, cùm tamen non possit non esse entitas creata, & infinitè distans à persona diuina, semper arguentibus explicandum superesset, quomodo illius defectus à verbo suppleri possit. Cæterùm hæc omnia possunt lucem accipere ex dictis lib. 2. Theologiæ specul. vbi de Verbo incarnato.

---

### ARTICVLVS III.

#### *De substantia compositi naturalis.*

CVM hic propriè sit locus agendi de substantia in genere, quæ quidam est modus substantiæ, vt dictum est, non erit abs re in hoc etiam capite inquirere speciatim de substantia rerum materialium, de qua nonnulla difficultas excitari potest. Dubitatur ergo an sicut materia & forma habent, ex communi sententia, proprias existencias, ex quibus coalescit totalis & integra existencia compositi; ita in illis admittendæ sint partiales substantiæ, ex quibus integra compositi substantia resultet; vel potius vna simplex substantia

totius per quam partes illius subsistant.

Respondeo & dico 1. *Materiam habere propriam subsistentiam partialem.* Probatur, tum quia materia accipit esse per creationem, at creatio est subsistentium: tum quia materia est primum subiectum generationis, & formæ materiales ex illius gremio educuntur; ergo ad illam maxime spectat subsistere. Tum quia si materia separaretur à forma, posset separata existere, idque cum continuatione eiusdem influxus, ut suppono ex dicendis in Physica: at tunc subsisteret per propriam subsistentiam, ergo & per eandem subsistit in composito.

Dico 2. *Probabilius videri etiam formam habere propriam subsistentiam partialem.* Probatur, tum quia proprium est substantiæ ut distinguitur ab accidente, subsistere; at forma de qua agimus est substantia, ergo subsistit, adeoque habet partialem subsistentiam non secus ac materia. Aliàs certè in modo essendi non differret ab accidente, quod nobis durum videtur.

Tum quia compositum cum sit substantia completa, debet subsistere per subsistentiam completam & adequatam; at non ita subsisteret per solam subsistentiam materiæ, cum ea sit partialis & incompleta, ac proinde toti composito non satis proportionata; necesse est ergo ut subsistat per subsistentias partiales materiæ & formæ simul unitas, ex quibus una integra & totalis subsistentia coalescat.

Tum quia anima rationalis habet propriam subsistentiam, cum à verbo sustentari possit etiam à corpore separata, ut in triduo mortis Christi contigit: ergo idem dicendum est de alijs formis substantialibus. Sequela patet, quia etsi illæ fiant dependenter à materia, cum

et tamen constituent compositum substantiale, non minus completè subsistens, quàm homo subsistat per corpus & animam rationalem. Quare debent habere proprias subsistentias. Confirmatur, nam si forma careret propria existentia, compositum non posset existere completè per solam existentiam materiæ. Ergo similiter si careret propria subsistentia, compositum non posset subsistere completè per subsistentiam solius materiæ.

Obijcies, forma materialis existit dependenter à materia, ergo non habet propriam subsistentiam: sequela patet, quia quod habet propriam subsistentiam per se subsistit, at quod per se subsistit, existit independentè ab alio. Respondeo negando consequentiam, & ad illius probationem dico, formale munus subsistentiæ non esse efficere vt res existat independentè à materia; quia si hoc esset, sequeretur eò ipso quò aliquid caret propria subsistentia, illud debere existere dependenter à materia, quod tamen falsum est: quia etsi materia, & anima rationalis priuarentur propria subsistentia, non propterea existerent dependenter à materia. Quare quod forma pendeat à materia, id præcisè non impedit quin propriam habeat subsistentiam.

Dico 3. Non esse ponendam in toto subsistentiam aliquam simplicem, distinctam à subsistentijs partialibus materiæ & formæ. Probatur, tum quia eiusmodi subsistentia esset superflua, cum totum non minus possit subsistere completè per subsistentias materiæ & formæ simul vnitas, quàm per earum existentias completè existat.

Tum quia cum compositum intrinsecè coalescat ex duabus partibus realiter distinctis

imò nihil aliud sit quàm partes illæ vt vnitz, vix concipi potest quomodo per vnā substantiam simplicem completè subsistere possit. Siquidem illa substantia simplex vel esset spiritualis, quod absurdum est, cum agamus de ente corporeo & materiali; vel non posset afficere duas partes realiter distinctas, sicque compositum non secundum se totum per illam subsisteret.

Obijcies, subsistere est suppositi, non partium; ergo admittenda est vnica substantia in composito. Respondeo subsistere completè esse suppositi, non partium; vnde non sequitur in composito esse vnā simplicem substantiam, sed vnā ex substantijs partialibus resultantem.

#### ARTICVLVS IV.

##### *De causis substantia, & de formali illius effectu.*

**O**Væritur 1. quænam sit causa efficiens substantiæ. Nonnulli existimant eandem causam externam quæ producit substantiam, producere etiam substantiam. Alij vero docent substantiam emanare immediatè ab ipsa substantia & natura cum qua suppositum constituit. Et hoc videtur probabilius.

Tum quia nulla est ratio cur credamus, animam Christi fuisse creatam distincta specie creatione à creatione aliarum animarum; at esset specie distincta creatio, iuxta sententiam oppositam, quia in alijs animabus terminaretur intrinsecè ad substantiam, quod



in Christi anima contingere non potuit, cum careat propria subsistentia.

Tum quia cum omnium consensu, naturæ habeant vim effectiuam qua suas passiones producant, anima rationalis intellectum & voluntatem, aqua frigiditatem, & ita de alijs, non videtur deneganda naturæ similis virtus respectu propriæ subsistentiæ. Imò si natura potest ex se effundere entitatem omnino realiter à se distinctam, à fortiori dicendum est non superare vires naturæ quòd modum quemdam suum, quo ultimò completur & terminatur, ex se producere possit.

Nec dicas cætera hic non esse paria, quia natura quæ suas proprietates producit, est subsistens; at verò antequam suam subsistentiam effundat non subsistit, adeoque etsi in priori casu possit agere, non tamen in posteriori, quia actiones sunt suppositorum seu subsistentium. Ista enim diuersitas nihil sententiæ nostræ officit, quia natura per se existit prius ratione quàm subsistat, cum subsistentia sit modus ab ea etiam vt existente realiter distinctus, vt suprà ostendimus: hoc autem sufficit vt possit agere, cum vis agendi sit naturæ, non suppositi, nisi denominatiuè vt infrà dicemus.

Quare illud axioma, *actiones sunt suppositorum* debet intelligi de omnibus actionibus quæ supponunt naturam constitutam in ratione suppositi; illæ enim omnes tribuuntur supposito tanquam toti, ad quod natura & subsistentia spectant in ratione partium. Excipienda tamen est actio illa qua natura constituitur in ratione suppositi, per effluxum ipsius subsistentiæ ab illa; cum talis actio suppositum præcedat, adeoque illi tribui non pos-

fit. Quemadmodum etsi actiones omnes intellectiuz animæ rationali tribui soleant, ea tamen excipi debet qua ipse intellectus effluit ab anima; cum perspicuum sit eam ab anima quatenus est rationalis, vel intellectiua oriri non posse. Et quamvis aqua ad alios effectus supponatur frigida, non tamen ad ipsam productionem frigiditatis ita supponi debet.

Obijcies 1. Quod tribuit esse, tribuit etiam modum essendi, atqui agens tribuit esse naturæ, ergo & tribuit illi modum essendi. Respondeo distinguendo maiorem, si per modum essendi intelligatur ipsa existentia per se, concedo, si verò intelligatur subsistentia, nego. Nam existentia per se non est quid distinctum à natura, adeoque quæ causa producit unum, producit aliud; at subsistentia est modus naturæ, & existentiz superadditus, & ab ea realiter distinctus; qui proinde à natura immediatè fluere potest, etsi hæc à causa externa producat.

Obijcies 2. Agens quod producit accidens, producit etiam inhærentiam illius in subiecto; ergo etiam agens quod producit naturam, debet illius subsistentiam producere; cum ita se habeat inhærentia ad accidens, sicut subsistentia ad naturam. Respondeo concessio antecedente, negando consequentiam, & probationem illius; quia illud est discrimen inter accidens & substantiam, quod accidens non existit nisi inhæreat, adeoque repugnat quod producat propriam inhærentiam in subiecto; substantia verò existit prius natura quàm subsistat, sicque in eo priori potest subsistentiam suam producere.

Ex dictis collige duas actiones requiri in no-

Natura sententia, ad productionem suppositi, quarum aliâ producatur natura ab agente, aliâ subsistentia à natura. Cum enim distincta sint agentia, & distincti termini, distinctas quoque esse actiones necesse est. Iuxta sententiam verò oppositam aliqui dicunt, naturam & subsistentiam posse fieri ab agente vnica actione; quia productio tendit ad rem subsistentem, ac proinde ad naturam simul cum subsistentia. Verum cum termini isti sint realiter distincti, & actio non distinguatur realiter à termino qui per illam fit, hinc sequitur reuera esse duas actiones distinctas; præsertim cum possit esse productio naturæ sine productione propriæ subsistentiæ, vt patet in Christi humanitate. Quia tamen ex natura & subsistentia fit vnicus terminus totalis & completus, hinc dici potest ex duabus illis actionibus veluti partialibus vnâ totalem coalescere.

Queritur 2. Quænam sit causa materialis subsistentiæ. Respondeo non aliam esse quàm naturam quam afficit, & cuius est modus; siue enim subsistentia immediatè procedat à natura, siue ab agente; cum intrinsecè modifical naturam, non nisi in illa recipi potest; adeoque natura est causa materialis seu substratum illius.

Quod si dicas fieri non posse quod subsistentia dependeat à natura, cum sit forma qua natura redditur independens, Respondeo id non sequi, nam causa formalis non producit effectum formalem in seipsa, sed in alio, vt albedo non se formaliter albam constituit, sed niuem aliaque corpora candore affecta; quare etsi subsistentia sit dependens, id non impedit quin per illam possit natura

independens constitui. Maximè quia id contingit in diuerso genere, substantia enim dependet à natura, -vt à subiecto; natura verò affecta substantia redditur independens à quocunque alio supposito.

Si quis verò inquirat quam res habeant propriam substantiam. Respondeo 1. Omnes substantias non modo completas, quales sunt lapis, planta, brutum, homo, Angelus, Deus, sed etiam incompletas, siue essentielles, nimirum materiam & formam, de quibus suprà actum est, siue integrantes vt caput, manus, &c. habere propriam & sibi proportionatam substantiam. Proprium enim est substantiæ non modo existere per se, sed etiam subsistere independenter à quocunque alio supposito. Quare nulla est substantia siue creata, siue increata, siue corporea siue spiritualis, siue totalis, siue partialis cui non competat propria quædam substantia.

Respondeo 2. Nullum accidens habere propriè substantiam. Ratio est quia substantia est modus substantialis, quo scilicet substantia vltimò completur & constituitur in ratione suppositi. Quare cum accidens non sit substantia, non potest habere substantiam propriè dictam.

Nec dicas accidens saltem separatum habere modum quemdam existendi per se, adeoque subsistere. Antecedens enim in nostra sententia non est verum de modo existendi positiuo, sed tantum de negatiuo. Et quamuis talis modus admitteretur, ille non esset substantialis, ac proinde non esset substantia propriè dicta. Vide Ideam Theologiæ Sacramentalis lib. 2. cap. 6. resol. 2.

Quæritur 3. quinam sit effectus formalis substantiæ.

Respon-

RESPONDEO & dico 1. *Effectum formalem substantia non esse facere naturam per se existentem*. Quia ut supra ostendimus, substantia distinguitur realiter ab existentia, eamque supponit. Confirmatur, quia humanitas Christi posset diuinitus à verbo separata, omnique alia substantia priuata conseruari; at tunc sanè existeret per se.

Dico 2. *Effectum formalem substantia non esse reddere naturam potentem operari*. Ratio est, quia substantia vel complet naturam per modum principij operatiui, vel per modum conditionis sine qua non; at neutrum dici potest: non primum, quia substantia non est intellectus, nec voluntas, nec calor, nec frigus, &c. Ergo non est principium intellectionis, volitionis, calefactionis, frige-  
factionis, &c.

Non etiam secundum, tum quia non apparet quomodo ad actiones omnes naturæ substantia sit conditio sine qua nulla operatio fieret; cum neque sit applicatio agentis ad patiens, neque dispositio necessaria ad effectum, neque aliter explicari possit quomodo ratio conditionis necessariæ illi competat. Tum quia etsi gratis daretur substantiam esse conditionem ad agendum requisitam, hinc non benè nota fieret ratio substantiæ, cum multæ sint aliæ conditiones prærequisitæ ad agendum, quæ non sunt substantiæ.

Dico 3. *Substantia effectum formalem, primum & positium esse constituere naturam vltimè completam, ut sit omnino perfectæ & terminata quoad suum esse substantiale. Et inde sequi alium effectum formalem negatiuum, nempe reddere naturam incommunicabilem alteri supposito.*

Metaph.

N

Hoc non potest aliter probari quàm ex adorando Incarnationis mysterio, cum ratio substantiæ aliter nobis non innotuerit, & Philosophi antiqui non satis eam perspectam habuerint, vel certè, ut nonnulli existimant, eam prorsus ignorauerint. Cum enim ostensum sit substantiam esse modum quemdam substantialem naturæ superadditum, & ab illius existentia distinctum, nullaque sit ratio cur credamus alium quemdam modum superesse quo natura substantialis compleatur; hinc rectè colligimus substantiam esse ultimum complementum naturæ substantialis, quo est in se modo sibi congruentissimo & perfectissimo.

Deinde cum modus ille in Christi humanitate impeditus fuerit per illius vnionem ad verbum, inde non obscurè colligitur, substantiam facere ut natura quam modificat & terminat, non possit vniri alteri supposito. Quia si humanitas affecta propria substantia posset communicari alteri supposito, sanè verbum assumendo humanitatem non impediuiisset ne propria & connaturalis substantia ex ea prodiret. Cum ergo illius effluxum impederit, ut fides docet, hinc euidenter colligitur proprium esse substantiæ, saltem in creatis, reddere naturam quam afficit alteri supposito incommunicabilem.

## ARTICVLVS V.

*Quomodo se habeat substantia ad existentiam, hypostasim, personalitatem, & suppositum.*

**Q**UÆRITUR I. an substantia distinguatur ab existentia. Respondeo distingui ab illa modaliter, tum quia existentia rei non distinguitur à natura illius, ut suprà visum est; quare cum substantia distinguatur modaliter à natura, ut iam probatum fuit, sequitur ut eodem modo distinguatur etiam ab existentia. Confirmatur; nam substantia est modus quidam existendi, ergo distinguitur modaliter ab existentia.

Tum quia humanitas Christi habebat propriam existentiam, per quam erat ens actu in rerum natura, ut probatum est in Idea Theologiæ speculat. lib. 2. cap. 11. resolut. 2. & tamen carebat propria substantia, ergo substantia distinguitur modaliter ab existentia. Confirmatur, quia verbum non potuit assumere nisi naturam existentem, & propria substantia carentem.

Neque refert quod existentia per se & substantia in vulgari sermone pro eodem usurpentur, non enim propterea confundi debent; nam exactè loquendo, existere per se est existere independentè à subiecto inhesionis, quomodo competit omni substantiæ existere per se; subsistere verò est existere independentè ab alieno supposito, quomodo humanitas Christi non subsistit, etsi existat per se.

QUÆRITUR 2. Cum substantia aliquo modo

distinguat<sup>r</sup> ab existentia, quinam ordo inter illas ponendus sit. Respondeo cum ordinem constituendum esse inter existentiam & subsistentiam, ut existentia prius competat naturæ, quàm subsistentia sit vltima perfectio naturæ adueniens. Probatur ex dictis, tum quia cum existentia non distinguat<sup>r</sup> à natura, subsistentia verò ab ea distinguat<sup>r</sup> realiter, minori saltem realitate, seu tanquam modus à re, hinc perspicuè sequitur subsistentiam supponere existentiam, & esse illa posteriorem: cum prius illud sit quòd identificatur cum natura, quàm id quod ab ea realiter distinguit<sup>r</sup>.

Tum quia per existentiam res est, & per subsistentiam redditur incommunicabilis alteri supposito; at prius est quòd res sit, quàm quòd sit incommunicabilis alteri supposito, cum non possit esse incommunicabilis nisi sit. Tum quia non potest aliquid subsistere quin existat, potest tamen aliquid existere, etsi non subsistat per propriam subsistentiam, ut constat in humanitate Christi: ergo subsistentia supponit existentiam tanquam priorem.

Obijcies 1. Existere & operari sunt suppositorum: dicimus enim hominem existere, loqui, ambulare, &c. Ergo natura prius constituitur in ratione suppositi, quàm existentis, vel potentis operari. Respondeo non sequi, nam homo non existit, nisi præexistat natura & subsistentia ex quibus componitur; sicut non existit homo, nisi illius corpus & anima præexistent: Existentia tamen tribuitur supposito, quia natura & subsistentia sunt partes ex quibus suppositum tanquam totum, & quid perfectius coalescit; & quod partibus competit, toti ad cuius compositionem



destinantur, tribui solet. Et idem de operatione postea dicitur.

Obijcies 2. Dum concipio Petrum secundum sua essentialia duntaxat, in eo conceptu includitur Petri subsistentia, non autem illius existentia: Ergo subsistentia intimius est coniuncta essentiae quam existentia. Respondeo distinguendo antecedens, nam non concipis Petrum secundum sua essentialia, nisi concipias illum ut potentem existere in ratione hominis: quare sicut Petrus nequit actu habere rationem hominis nisi existat, ita neque potest concipi sub tali ratione ut possibili, nisi præconcipiatur ut possibiliter existens; cum aperte repugnet id posse esse hominem, quod esse non potest.

Quæritur 3. Quodnam sit discrimen inter subsistentiam, hypostasim, personalitatem, & suppositum. Respondeo ista parum inter se differre, nam in primis etsi nomen hypostasis olim idem esset ac substantia, adeoque Patres antiqui non ponerent eo sensu in Deo nisi unam hypostasim seu substantiam, postea tamen apud Græcos & Latinos vox illa sumpta est pro subsistentia & persona, ita ut in Deo tres hypostases, id est tres subsistentiae, seu personæ constitutæ sint.

Deinde personalitas idem est reipsa ac subsistentia, connotando tamen naturam intellectualem quam modificat; ita ut cum modus ultimus quo substantiæ non intellectuales perficiuntur in ratione suppositi & subsistentis, retineat nomen subsistentiæ; in rebus tamen intellectualibus modus subsistendi non modo dicatur subsistentia, sed etiam personalitas.

Rursus suppositum est nomen concretum, significans naturam cum subsistentia, seu

compositum ex utraque, definiturque communiter *substantia singularis, completa, & incommunicabilis*. Quod si illud suppositum sit in natura rationali, dicitur persona. Vnde dicimus suppositum non personam lapidis, plantæ, equi, bouis, &c. dicimus tamen suppositum & personam naturæ intellectualis, nempe hominis, Angeli, & Dei.

Hic autem inquiri potest, quo sensu dicatur vulgo actiones esse suppositorum. Respondeo i. id non debere sic intelligi ut actiones ab ipso supposito, seu à subsistentia qua natura constituitur suppositum, effectiue procedant: modus enim substantialis quo res existit, non est vis intelligendi, volendi, loquendi, aliasque operationes naturales eliciendis; at subsistentia est talis quidam modus, ergo illa non est vis agendi, adeoque non potest totum ex ea & natura compositum, habere vim agendi ratione illius.

Confirmatur, nam etsi subsistentia creata non esset in Christi humanitate, ea tamen omnes operationes humanas, quæ ab alijs hominibus eliciuntur, patrare poterat; at non poterat illas elicere nisi haberet intra se principium earum elicitiuum. Quare actiones non ita debent tribui supposito, ut per se effectiue ad illas concurrant.

Obijcies, si subsistentia non influit in actiones, ergo operationes humanitatis Christi non pendebant à verbo, adeoque non habebant dignitatem infinitam, ut Patres, & Theologi communiter docent. Respondeo cum distinctione, non pendebant à verbo Physicè, concedo; moraliter, nego. Verbum enim unitum humanitati illius opera infinite dignificabat, etsi ea non eliceret: sicut gratia quæ est in ani-

ma, dignitatem aliquam confert operibus virtutum moralium, etſi ab ea effectiue non proficiſcantur.

Reſpondeo 2. Actiones dici ſuppoſitorum denominatiue, quia cum ſuppoſitum ſit totum ex natura & ſubſiſtentia compoſitum, & actiones quæ eliciuntur ab aliqua parte tribuantur toti, hinc ſit vt actiones dicantur eſſe ſuppoſitorum denominatiue, non verò effectiue ſeu elicitivè. Confirmatur ex communi uſu loquendi, nam homo dicitur diſcurrere, videre &c. etſi non diſcurrat niſi per animam, nec videat niſi per oculos.

## C A P V T II.

### De Accidente ſecundum ſe.

#### ARTICVLVS PRIMVS.

##### *In quo conſiſtat ratio accidentis.*

**P**ramoneo 1. Accidens ſumi poſſe Logicè, & Metaphyſicè, & priori modo complecti quidquid eſt extraneum alicui, etiam ſi in ſe ſit ſubſtantia; quomodo veſtis accidentariò competit homini, etſi in ſe ſit ſubſtantia: Poſteriori verò dici tantum de accidentibus, quatenus ſunt entia quædam realia, à ſubſtantia conſiſtentiſta; quo ſenſu hic agimus de accidente ſecundum ſe ſpectato.

Pramoneo 2. Non eſſe hic inquirendum, an detur aliquod accidens à ſubſtantia diſtinctum, cum perſpicuum ſit aliquod eiuf-

modi accidens existere, ut patet ex rerum alterationibus, cum v. c. eadem aqua ex calida sit frigida; sensu enim experimur in ea vicissitudinem illam caloris & frigoris, etsi eadem aqua substantialiter remaneat. Quare dubitari non potest, quin calor & frigus sint accidentia realiter ab aqua distincta. Et confirmatur efficaciter ex speciebus Eucharisticis, quæ aliud nihil sunt quam accidentia realia à substantia panis & vini, quæ per consecrationem destructa est, separata, adeoque ab illa realiter distincta.

Quæritur ergo in primis in quo consistat formalis & quidditativa ratio accidentis, seu quid sit accidens. Respondeo accidens communiter definiri *ens in alio*, seu *ens in-harens alteri*. Et quidem quod sit ens, probatur ex communi divisione entis in substantiam, & accidens; ibi enim ens sumitur pro vero ente reali, adeoque membra illius diuidentia non nisi de vera entitate reali intelligi possunt.

Nec refert quòd accidens interdum dicatur non tam ens, quàm entis ens, non enim id dicitur quod verè & realiter non sit ens; cum aqua v. c. realiter sit frigida, & per calefactionem amissa frigiditate realiter fiat calida, adeoque & calor & frigus sint entitates reales à conceptu nostro independentes, & à substantia realiter distinctæ. Id ergo tantum indicat ens dici analogicè de substantia & accidente, & rationem entis competere accidenti dependenter à substantia: quemadmodum ipsa substantia est ens dependenter à Deo, & eatenus entis ens vocari potest, etsi à parte rei veram entis rationem participet.

Quòd verò accidens sit ens in alio, seu alteri inhærens probatur; quia cum distinguatur à substantia, quæ est ens existens per se, seu independenter à subiecto inhæſionis, debet consequenter esse ens existens in alio, seu alteri inhærens; cum quidquid non existit in se, debeat in alio existere, neque aliquid medium inter hæc duo obtingere possit.

Obijcies, ea non est ratio essentialis accidentis, quæ competit formæ substantiali materiali; at esse in alio tanquam in subiecto, competit formæ substantiali materiali: ergo ea non est propria & essentialis ratio accidentis. Respondeo essentialem rationem accidentis non esse præcisè quod sit in alio, cum substantia partialis sit in alio vt in toto, & totalis vt in supposito; nec quòd sit in alio vt in subiecto, quia formæ prædictæ, & modi substantiales sunt quodammodo in subiecto, sed quòd sit in eo, vt in subiecto inhæſionis, quomodo nulli substantiæ competit esse in alio, sed tantum accidenti.

Instabis, formam materiale[m] dependere à subiecto in fieri & in conseruari, non minùs quàm accidens; adeoque illi inesse tanquam in subiecto inhæſionis. Respondeo non sequi, nam subiectum inhæſionis illud dicitur cum quo forma ei in existens non constituit vnū per se; at forma substantialis, etsi dependeat in esse & conseruari à materia, constituit cum illa vnum per se; ac proinde non est in illa vt in subiecto inhæſionis, sed vt in subiecto quod vocant informationis.

Quòd si vrgeas, gratis dici per formam constitui vnum per se, cum æquè a accidens pendeat quoad esse & conseruari à subiecto: Respondeo id sine fundamento vrgeri, quia cum

materia & forma substantialis sint eiusdem ordinis, maior ratio est cur ex iis fiat vnum per se, quàm ex subiecto & accidente. Quemadmodum ex genere & differentia fit vnum per se, non autem ex genere & passionibus accidentario ei adiunctis; esto ipsa differentia eodem modo concipiatur aduenire generi, quo passionibus accidentariis illi adueniunt.

Quæritur 2. quomodo inhzrere alteri sit formalis ratio accidentis. Quod vt intelligas, aduerte duobus modis concipi posse accidentis essentiam consistere in inhzrentia, seu vnione cum subiecto, primo. aptitudinaliter ita vt. posse inhzrere subiecto, & habere inclinationem naturalem ad illi inexistendum, sit de essentia accidentis; secundo actualiter, ita vt. non possit accidens existere nisi actu subiecto inhzreat. Dubitatur ergo quoniam ex his modis inhzrere subiecto sit de essentia accidentis..

Respondeo & Dico 1. *non esse de essentia accidentis quòd actu inhzreat subiecto.* Ita omnes Catholici contra Philosophos paganos, qui solutionis lumine ducti, existimabant accidentis essentiam consistere in actuali illius inhzrentia ad subiectum, ita vt. nullo modo extra illud conseruari possit. Verùm hic error aperte refellitur ex fide Catholica, quæ docet accidentia panis & vini conseruari in Eucharistia post consecrationem, sine vilo subiecto substantiali; hinc enim euidenter colligitur actua-lem inhzrentiam non esse de essentia accidentis, cum repugnet rem aliquam per vllam potentiam existere, sine eo quod ad illius essentiam pertinet.

Nec refert quòd qualitates panis & vini inhzreant quantitati, nam saltem fatendum est quantitatem iis suppositam in nullo esse subie-

sto, cum illa prius immediate inhaereret substantia, quæ per consecrationem destructa est: quare non est de essentia quantitatis, quod actu subiecto inhaereat. Imò idem concludendum est de omnibus aliis accidentibus realiter à quantitate distinctis: quia sicut quantitas ideo potest diuinitus separari à substantia, quia ab illa realiter distinguitur; ita qualitates, & alia accidentia si quæ sunt, quæ realiter à quantitate distinguantur, ab ea diuinitus separari possunt. Cum nulla sit ratio discriminis ob quam id à Deo fieri non possit.

Loquor de accidentibus realiter distinctis, nam accidentia quæ sunt modi, qualia sunt actio, passio, figura & similia, cum non sint entitates à subiecto distinctæ, vt res à re, non possunt per vllam potentiam existere sine illo. Vt enim patet ex dictis libro præcedenti, illud discrimen ex communi sententia, constituitur inter duas res, & inter modum & rem; quod duæ res dicunt entitates realiter distinctas, & mutuò separabiles saltem per virtutem diuinam; quomodo quantitas ex dictis potest separari à substantia, & hæc à quantitate: at vero modus etsi plusquam per mentem, adeoque realiter distinguatur à subiecto quod modificat, non tamen est entitas ab illo realiter separabilis ex parte ipsius modi, licet sit separabilis ex parte subiecti; ita quidem vt subiectum possit existere sine modo, vt accidens sine inhaerentia, non tamen modus sine subiecto, vt inhaerentia sine accidente.

Dico 2. *inherentiam aptitudinalem esse de essentia accidentis.* Probat, nam cum ex consensu omnium Philosophorum, diuisio entis in ens per se, & ens in alio, sit diuisio entis in substantiam & accidens; oportet quod sicut ratio

vt alibi diximus, & patebit ex art. sequenti. 2. ea gratis admissa, inde non sequi quod infer-  
tur; quia etsi accidens separatum haberet mo-  
dum positum per se existendi, id non impe-  
diret quin accidens eo affectum secundum se  
diceret aptitudinem ad inherendum subiecto;  
sicut aqua dicit intrinsecè ordinem ad frigidi-  
tatem, etiam cum actu calida est; & anima ra-  
tionalis dicit ordinem ad corpus, etiam cum  
extra illud existit.

Obijcies; non potest aliquid intelligi sine  
eo quod est de essentia illius; at potest acci-  
dens intelligi sine ordine ad subiectum, ergo  
ordo ad subiectum non est de essentia acciden-  
tis. Maior perspicua est, probatur minor, quia  
quantitas consideratur à Mathematico sine vl-  
lo ordine ad subiectum. Respondeo maiorem  
veram esse de eo quod intelligitur conceptu  
adaquato & explicito, non autem de illo quod  
concepitur inadéquatè & implicitè; quomodo  
quantitas concipitur à Mathematicis vt est  
quædam extensio, abstrahendo à quacunque  
materia. Quare id non obest quin à parte rei  
ordo ad subiectum sit essentialis quantitati, etsi  
id à Mathematicis non consideretur, quia nihil  
facit ad eorum institutum. Si enim definitio  
accidentis repetatur à Metaphysico, ille dicit  
ex Arist. accidens esse entis ens, vel ens in alio,  
vel aliquid simile includens necessario ordi-  
nem ad subiectum; & consequenter hanc defi-  
nitionem quantitati, qualitati, aliisque om-  
nibus accidentis speciebus adéquatè, & ex-  
plicitè spectatis competere affirmabit.



## ARTICVLVS II.

*De accidente vt actu inherente, &  
separato.*

**Q**UÆRITUR I. quid sit accidens actu inherere subiecto, seu quid sit illa actualis inherencia. Respondeo negari non posse quin actualis inherencia addat aliquid reale supra entitatem accidentis, vt ex eo manifestum est, quòd accidens à subiecto separatum habet totam suam entitatem, sine actuali inherencia: quemadmodum substantiam addere aliquid reale supra naturam ex eo conuincitur, quod humanitas Christi retinet totam suam entitatem, quatenus natura est; etsi careat propria substantia. Et quoad hoc non est difficultas.

Dubitatur autem in quo genere constituenta sit actualis inherencia. Quia in re certum est inherentiam non distingui maiori realitate, seu tanquam rem à re ab accidente; quia si hoc esset, actualis inherencia indigeret alia inherencia actuali ad inexistentium subiecto, & hæc alia, sicque progressus fieret infinitus, quod repugnat. Quare dicendum est inherentiam distingui tantum minori realitate, seu modaliter ab accidente, & nihil esse aliud quàm modum vnionis quo accidens inexistit subiecto; sicut substantia est modus quo natura vltimò completur in se & terminatur.

Sunt tamen inter illa obseruanda quadam discrimina, primum quòd substantia supponit naturam existentem, at inherencia non supponit accidens existens; quia cum accidens

ſubſiſtentiæ ens, non priùs exiſtit quàm alteri in-  
hæreat : & quamvis eſſe in genere priùs ſit  
quàm in eſſe, non tamen in ſpecie, vt eſt tale  
eſſe ſeu accidentale; hoc enim intrinſecè eſt  
eſſe in alio.

Secundum, quòd ſubſiſtentiæ eſt vltimus na-  
turæ terminus quo eſt in ſe, inhærentia verò  
non eſt terminus accidentis, ſed eſt nexus quo  
realiter coniungitur ſubſtantiæ tanquam ſub-  
iecto, & termino ad quem dicit ordinem &  
reſpectum tranſcendentalem.

Neque dicas vnionem ſupponere partes  
vniendas, adeoque inhærentiam ſupponere ac-  
cidents, & ſubiectum cui vnitur, contrà iam  
dicta. Tunc enim vnio ſupponit partes vnien-  
das, quando per illam non ſunt partes vnien-  
dæ; at per actualem inhærentiam ſit accidens  
in ſubiecto, quare etſi illa ſupponere debeat  
ſubiectum, non tamen accidens.

Tertium, quòd ſubſiſtentiæ immediatè ſuit  
à natura, inhærentia verò non ſuit ab acci-  
dente; quia cùm accidens non ſit niſi inhæreat,  
inhærentia videtur quodammodo prior acci-  
dente, adeoque non poteſt ab illo emanare..  
Eò vel maximè quia cum eſſe accidentis ſit in-  
eſſe ſeu inhærere, ſi inhærentia fuere ab acci-  
dente, ſequeretur accidens ſibi eſſe cauſam exi-  
ſtendi, quod dici non poteſt. At neque dicen-  
dum eſt inhærentiam effectiuè pendere à ſub-  
iecto accidentis receptiuo; quia recipere for-  
mam aliquam eſt eam pati, ſeu exercere cau-  
ſalitatem paſſiuam erga illam : quare dicen-  
dum eſt modum inhærendi eſſe effectiuè à cau-  
ſa efficiente, à qua accidens producit in ſub-  
iecto, & materialiter à ſubiecto in quo produ-  
citur.

Quartum, quòd ſubſiſtentiæ recipitur in na-

tura subsistente, inhærentia verò non recipitur in accidente inhærente, sed in subiecto cui inhæret: quia si accidens modum illum in se reciperet, accidens prius esset quàm inesset, & per inhærentiam esset in se, non in alio; quod repugnat. Quare cum per inhærentiam accidens formaliter constituatur in subiecto, necesse est vt inhærentia in ipso accidentis subiecto, simul cum accidente recipiatur.

Confirmatur, quia cum per inhærentiam accidens accipiat esse in subiecto, & ab illo tanquam à causa materiali dependeat; oportet vt modus ille veluti mediet inter subiectum & accidens, tanquam causalitas illius materialis, adeoque sit natura prior accidente: quò fit vt in illo recipi nequeat, sed in subiecto è quo educitur.

Quæritur 2. quomodo accidens existat separatum à subiecto, vt in Eucharistia. Nonnulli existimant accidenti separato tribui modum quemdam existendi positium; alij verò sentiunt accidens posse conseruari extra subiectum sine tali modo, quod nobis videtur probabilius, tum ob rationes in Idea Theologiæ sacram. lib. 2. cap. 6. allatas, tum quia accidens separatum non indiget modo positiuo per se essendi, nisi vt constituatur existens independentè à subiecto; at illo non indiget ob eum finem, cum per specialem Dei influxum possit conseruari independentè à subiecto. Tum quia accidens separatum existit independentè à quocunque modo, ergo à nullo potest accipere independentiam à subiecto. Antecedens probatur, quia accidens prius existit; quàm modum aliquem nouum accipiat: sequela patet, quia accipere independentiam à subiecto nihil est aliud, quàm accipere exi-

stentiam sine vilo ordine ad subiectum.

Obijcies, accidens sine modo superaddito existens, esset tantum negatiuè à subiecto independens; quare vt positiuè à subiecto esset independens, deberet illi superaddi modus quidam positivus. Verùm hoc refellitur, nam modus positivus, cum non sit formalis negatio dependentiæ, non aliter facit vt accidens sit independens à subiecto, quàm quia ex eo sequitur talis independentia: at similiter influxus quo accidens conseruatur diuinitus extra subiectum, est entitas quædam positiva ex qua sequitur independentia accidentis à subiecto. Ergo præter hunc influxum alius modus est superfluus.

Obijcies 2. Sicut datur modus positivus essendi in alio, ita dari potest modus positivus illi oppositus, qui competat accidenti. Ergo cum magis congruat statui accidentis separati, illi denegandus non est. Respondeo dari quidem modum oppositum modo essendi in alio, nempe modum positivum existendi in se, non quidem qui competat accidenti, sed substantiæ. Neque verum est modum illum magis congruere accidenti separato, cum dicatur oppositus modo illius existendi connaturali. Quare sicut melius est aquæ, etiam carenti connaturali frigiditate, non esse calidam, quàm calore perfusam esse; ita congruentius est accidenti, etiam priuato actuali inhzrentia, non existere per modum existendi positivum, quàm sic existere.

## ARTICVLVS III.

*De diuisione accidentis.*

**Q**Varitur 1. Vtrum accidens in communi immediatè diuidatur in quantitatem, qualitatem, aliaque accidentia categorica.

Respondeo 1. Diuisionem illam non esse ita immediatam, quin potuerint alix tradi magis immediatæ in membra pauciora, quæ vltèrius in nouem accidentia prædicamentalia subdividerentur. Hoc patet, quia potest accidens diuidi in corporeum & spirituale, certum enim est dari quædam accidentia corporea, vt colores, sapores, &c. alia spiritualia, vt operationes, & habitus animæ: eaque diuisio est adæquata, cum nullum sit accidens quod non sit corporeum, aut spirituale.

Potest etiam accidens diuidi in illud quod est propriè forma realis inhærens substantiæ, & illud quod est tantum quidam modus illius: non enim dubium est quin hoc genus accidentis detur; quantitas enim & qualitas sunt formæ reales substantiæ inhærentes, & ab ea realiter distinctæ, actio verò & passio sunt quidam modi eam afficientes. Et rursus, quod hæc diuisio sit adæquata inde constat, quia nullum assignari potest accidens quod non se habeat altero ex his modis respectu subiecti, nempe vel vt forma realis ei inhærens, vel vt modus quidam illud afficiens. Mitto alias plerasque diuisiones immediatas quæ à nonnullis afferuntur.

Respondeo 2. diuisionem vulgarem in no-

uem accidentium categorias esse prædictis commodiorem, & doctrinæ gratia retinendam. Probatur 1. quia priores diuisiones non sunt propriæ accidentis, sed enti in genere competunt, & etiam substantiæ. Siquidem omne ens vel est corporeum, vel spirituale; vel entitas, seu res, vel modus; & idem de omni substantia affirmari potest: at vulgaris diuisio accidentis in nouem categorias soli accidenti competit.

Probatur 2. Quia illa est magis probanda diuisio accidentis, quæ utilior est ad ordinandam & distinguendam summa genera accidentium; at diuisiones prius allatæ ad hoc non conducunt, cum v. c. sub eodem genere qualitatis includantur accidentia corporea & spiritualia, res & modi. Diuisio verò vulgaris fit per genera accidentium primò diuersa; quare simpliciter reliquis est præferenda, cum longè utilior sit ad assequendam cognitionem omnium accidentium.

Nota tamen diuisionem vulgarem accidentis in nouem prædicamenta, non esse diuisionem accidentis, strictè sumpti, quod scilicet cum substantia adæquatè diuidit ens. Cum enim ens diuiditur in substantiam & accidens, ens sumitur pro vera entitate reali, quæ proinde non potest diuidi nisi in membra realia, seu in substantiam realem, & accidens reale: at accidens reale non diuiditur in nouem prædicamenta accidentis, cum inter accidentia categorica nonnulla reperiantur quæ propriè non sunt entia realia, sed tantum quædam denominationes extrinsecæ, vt esse vestitum, esse in tempore.

Quæritur 2. Vtrum diuisio accidentis in nouem genera prædicamentalia sit vniuoca.

Respondeo & Dico 1. *Accidens in tota illa amplitudine non esse uniuocum.* Ratio est, quia accidens propriè sumptum dicit aptitudinem ad inhærendum subiecto: at quamuis aliqua accidentia prædicamentalia inhæreant subiecto, puta quantitas, & qualitas, non tamen omnia; cum nonnulla consistant in quadam denominatione extrinseca, ut dictum est. Quare ratio accidentis non potest illis omnibus uniuocè conuenire, sed ad summum analogicè, propter quandam similitudinem quam habent denominationes extrinsecæ cum veris accidentibus; eo quòd videntur subiecto inhærere, etsi non inhæreant.

Verùm hic difficultas occurrit, an accidens dicatur uniuocè saltem respectu accidentium prædicamentaliũ, quæ sunt res & formæ à subiecto realiter distinctæ, v. c. respectu quantitatis, & qualitatis quæ etiam inter se realiter distinguuntur, ut ex sententia probabiliori hic supponimus.

Dico 2. *Accidens dici posse uniuocum respectu quantitatis, & qualitatis.* Ratio est, quia ex vna parte quantitas & qualitas sunt entitates reales à substantia, & inter se realiter distinctæ; & ex alia possumus ab illis abstrahere communem rationem accidentis realis & physici, quæ illis ex æquo conueniat.

Nec refert 1. Quòd qualitas inhæreat quantitati, eamque supponat: talis enim suppositio se habet veluti per accidens & materialiter, cum non competat quantitati vniuersim respectu omnium qualitatum; siquidem dantur innumeræ qualitates spirituales à quantitate omnino independentes: & præterea quantitas præcedit in ratione potentie passiuæ, qualitas verò ei aduenit in ratione actus; quò fit

vt ratio accidentis non possit dici nobiliori modo de quantitate, quàm de qualitate.

Nec refert 2. Quòd qualitas sit nobilior quantitate, ob rationem iam tactam; non enim id sufficit vt accidens dicatur de illis analogicè; quia responderi potest maiorem illam perfectionem non competere qualitati, quatenus accidens est, sed quatenus tale accidens, seu ratione propriæ differentię, quod vnuocationem non impedit.

---

#### ARTICVLVS IV.

##### *De productione accidentium.*

**D**imissa ad Physicam productione formarum substantialium, inquirendum est hoc loco qua ratione formę accidentales producantur, an per veram creationem, an verò per educationem è subiecto.

Respondeo formas omnes accidentales educi è subiecto in quo recipiuntur. Ratio est, quia illud educitur è subiecto aliquo quod sit dependenter ab illo; at formę omnes accidentales fiunt dependenter à subiecto in quo recipiuntur, ergo educuntur ex illo. Maior probatur ex discrimine quod reperitur inter creationem & educationem: creatio enim fit independenter à subiecto, educatio verò dependenter ab illo, ac si quodammodo res ab illo extrahatur, cum creatio fiat ex nihilo. Minor ostenditur, quia omnes formę accidentales inhaerent subiecto, nec extra illud naturaliter conseruari possunt; quod manifestum indicio est eas fieri dependenter à subiecto, ac proinde ex illo educi.



Atque hæc assertio procedit non modo de productione caloris, frigoris, aliarumque qualitatum siue primarum, siue secundarum quæ physicæ & reales appellantur, sed etiam de productione specierum intentionalium; quia licet non habeant contrarium, & ab obiecto conservari debeant, id non impedit quin fiant dependenter à subiecto in quo recipiuntur, v. c. Ab aëre, vel ab oculo, quod ad veram educationem sufficit.

Procedit etiam de formis artefactorum, ut de forma cathedræ, vel statui; illæ enim non fiunt ex nihilo, sed ex præsupposito subiecto, ad earum productionem passivè concurrente. Nec refert quod subiectum non concurrat ad illas formas per potentiam naturalem, sed per obedientialem; nam quovis modo hæc potentia vocetur, certum est formas artificiales ab illius concursu passivo pendere quoad fieri & conservari; quod sufficit ad veram educationem.

Procedit quoque de qualitatibus spiritualibus tam naturalibus, cuiusmodi sunt habitus scientiarum & virtutum acquisitarum, quam supernaturalibus, quales sunt gratia sanctificans, & virtutes infusæ. Illæ enim omnes cum vera sint accidentia, fiunt dependenter ab anima, & extra illam naturaliter conservari nequeunt. Quare verè ex illius potentia passiva educuntur, aut naturali, si sint qualitates naturales, aut obedientiali, si sint supernaturales; esto hæc communiter dicantur infundi, vocenturque qualitates infusæ, ut distinguantur à qualitatibus ordinis naturalis.

## CAPVT III.

## De qualitate.

## ARTICVLVS PRIMVS.

*De essentia qualitatis.*

**Q**ualitas ab Aristotele describitur, ut patet ex Logica, *Id à quo denominamur quales*, quæ descriptio ut melius intelligatur,

Obseruandum 1. Nomen qualitatis valde improprie tribui accidentibus aliorum prædicamentorum, cum si quæras, qualis sit homo, non bene respondeatur cum esse quantitate præditum, aut aliò referri, aut agere, aut pati, aut stare, vel sedere, aut esse in loco, aut in tempore, aut esse vestitum; sed esse album, aut nigrum, calidum aut frigidum, &c. Quò fit ut proprie non denominemur quales ab vilo accidente præterquam à qualitate, quæ ideo rectè describitur accidens à quo denominamur quales. Verùm quia hæc descriptio non satis explicat naturam qualitatis,

Obseruandum 2. Varias à variis excogitatas fuisse qualitatis definitiones, quibus illius essentia distinctius exprimeretur. Quidam illam sic definiunt, *Qualitas est accidens absolutum per se primo institutum ad intrinsecè ornandam & perficiendam substantiam, tum in existendo, tum in agendo.* Verùm hæc definitio rejicitur, cum æquè bene aut melius competat quantitati, quàm colori aut figuræ.

Alij sic, *Qualitas est accidens absolutum à quantitate distinctum*. Sed contra, nam similiter dici posset, quantitas est accidens absolutum à qualitate distinctum. Et præterea, ex communi sententia, nonnulla ex ultimis prædicamentis sunt accidentia absoluta à quantitate distincta.

Alij sic, *Qualitas est accidens entitativum absolutum, subiectum ad modum substantialis formæ determinans*. At neque satis intelligitur quæ ratione hæc definitio omnibus qualitatibus conveniat, aut non æquè multis alijs accidentibus aptari possit.

Alij sic, *Qualitas est accidens proveniens à forma in esse quiescente*, ubi per formam intelligitur pars altera compositi physici. Sed quomodo potest hæc definitio competere formæ & figuræ, quæ sequuntur quantitatem, adeoque & ipsam materiam, non formam; Itemque qualitatibus naturalibus Angelorum & animæ rationalis, vel ijs quæ ipsis diuinitus infunduntur?

Alij alias definitiones qualitatis excogitarunt, sed quia prædictis non videntur accuratiores, ijs superfedemus. Vnde colligitur essentiam qualitatis secundum se adeo esse reconditam, ut nondum satis perspicuè ab ullo philosopho tradita fuerit.

## ARTICVLVS II.

*De prima specie qualitatis, quæ est habitus & dispositio.*

**C**VM Aristoteles doceat ut vidimus in Logica, illud esse discrimen inter habitum &

& dispositionem, quod habitus est difficile mobilis à subiecto, dispositio verò ab eo facile amoueri potest; dubitari solet an hoc discrimen sit essentialè, ita vt habitus & dispositio præcisè vt talia sunt, duas species qualitatis essentialiter distinctas constituent. Vt autem status huius quæstionis intelligatur,

Obseruandum est duobus modis concipi posse qualitatem aliquam esse difficile aut facile mobilem à subiecto, primò ex natura sua, secundò ex conditione subiecti in quo reperitur: priori modo scientia est difficile mobilis, eo quod generatur per demonstrationem qua conuincitur intellectus; opinio verò est facile mobilis, quia generatur per rationem probabilem, quæ facile alia probabiliori tolli potest. Posteriori modo scientia ex morbo, aliaue causa accidentaria interdum facile amittitur; contrà verò opinio in animo proterui firmas radices ponit, vt constat experientia.

Quo posito

Respondeo & Dico 1. *Habitus ex natura sua difficile mobilem à subiecto specie distinguere à dispositione, quæ ex natura sua à subiecto facile amoueri potest.* Probatum manifestè, nam ea specie distinguuntur quæ ex natura sua postulant conditiones essentialiter distinctas: at habitus & dispositio quæ se habent modo iam dicto, postulant ex natura sua conditiones essentialiter distinctas, nempe esse difficile, & facile mobilem à subiecto; ergo specie distinguuntur. Confirmatur, nam esse qualitatem difficile & facile mobilem à subiecto non minùs sunt opposita, quàm esse animal rationale & irrationale: quare sicut hæc differentiam essentialem & specificam inferunt, ita & illa.

Obijcies 1. Ex Arist. cap. 8. libri Categor. *Metaph.*

O

habitum & affectionem esse vnā speciem qualitatis. Respondeo habitum & affectionem posse dici vnā speciem qualitatis scilicet subalternam, quia in ea conueniunt; eo modo quo Porphyrius ait cap. 2. suæ Introduc. plures homines speciei participatione esse vnum hominem.

Obiicies 2. Ex eodem Arist. ibid. affectionem quæ longinquitate temporis quasi naturalis euasit, aut difficilè amoueri potest, vt pote iam habitum effectam, meritò habitum appellari. Respondeo affectionem diuturnitate temporis radicatam & firmatam fieri habitum non essentia, sed statu; quia tunc se habet ad modum veri habitus: sicut vice versa habitus quando facilè ob conditionem subiecti amoueri potest, habet statum seu modum affectionis; quamuis tamen essentialiter sit habitus, vt non obicurè indicat Aristoteles cum loco citato expressè numerat inter habitus diuturniores & permanentiores, scilicet ex natura sua, scientiam licèt mediocrem.

Dico 2. *Habitum ex sola conditione subiecti difficilè mobilem, non differre specie à dispositione quæ ex natura sua à subiecto facilè auelli potest.* Ratio est quia dispositio ex se facilè mobilis potest diuturnitate temporis, vel per actuum multiplicationem adeo radicari in subiecto, vt ab eo ægrè amoueri possit; ista autem maior radicatio est extra essentiam qualitatis, ac proinde non potest constituere discrimen essentialiale inter dispositionem & habitum ex ea procreatum, sed tantum accidentale.

Ex quo intelligitur calorem febrilem, qui initio languidus est, & facilè amoueri potest, si successu temporis adeo inualescat, vt difficilè expelli possit, non mutari in aliam spe-

ciem, sed accidentariò tantùm perfici intra eandem speciem; cùm non habeat statum illum permanentem ex natura sua, sed ex variis circumstantiis quibus subiectum afficitur.

## ARTICVLVS III.

*De secunda specie qualitatis, quæ est naturalis potentia, & impotentia.*

**C**IRCA hanc speciem qualitatis duo inquiri solent : 1. qua ratione distinguatur ab habitu & dispositione. 2. An potentia specie distinguatur ab impotentia sibi opposita, quatenus hæc significat vini positivam qua aliquid difficile agit aut resistit, non autem meram negationem aut priuationem potentia.

Respondeo & Dico 1. *Potentiam naturalem & impotentiam specie distingui ab habitu & dispositione.* Probatur, quia potentia naturalis est data ad operandum simpliciter, ita vt sine illa operatio fieri nullo modo possit; habitus verò naturalis ordinatur ad facile operandum, ita vt sine illo fieri possit operatio, etsi non ita perfectè ac cum illo. Deinde potentia naturalis est data à natura, habitus verò naturales propriis actibus comparantur; quæ discrimina distinctionem specificam inter potentiam & habitum euidenter ostendunt.

Quo loco aduerte hæc intelligi de habitibus naturalibus, nam quod spectat ad supernaturales & per se infusos, Aristoteli ignotos, quos Catholici omnes admittunt, ij dant simpliciter potentiam agendi supernaturaliter, ita vt nullo modo sine illis operatio supernaturalis fieri possit, nisi eorum defectus per auxilia actualia

suppleatur. Illi etiam nequeunt propriis actibus physice produci, sed à Deo solo immediate producuntur, nobisque infunduntur.

Dico 2. *Impotentiam sumptam pro forma positivâ potentie opposita, qua aliquid agere operari, aut resistere potest, specie à potentia distingui.* Ratio est, quia quemadmodum habitus ex natura sua difficile mobilis à subiecto, specie distinguitur à dispositione facile mobili, ut supra ostensum est; ita potentia facile agendi, aut resistendi specie distinguitur ab impotentia opposita, qua quid difficile operari aut resistere potest. Isti enim actus oppositi & specie diversi euidenter indicant potentias oppositas & specie distinctas; qua ratione durities ferri per quam diuisioni fortiter resistit, specie distinguitur à molitudine cere, qua debilitate diuisioni resistit.

Obiicies 1. Facile aut difficile operari ad eandem specie potentiam spectat, ut patet in potentia videndi quæ in iuvene facile, & in senē difficile operatur, etsi nemo dubitet quin sit eiusdem speciei. Ergo cum potentia & impotentia non aliter distinguantur quam penes facultatem facile aut difficile operandi, vel resistendi, hinc sequitur inter eas non esse distinctionem essentialē seu specificam. Respondeo antecedens verum esse quando impotentia sumitur pro potentia debili & remissa, ut in exemplo allato; falsum autem, quando sumitur pro forma positiva potentie opposita, qua res ex natura sua difficile operari vel resistere potest, ut hic sumitur: sic enim facile aut difficile operari arguunt distinctionem specificam, ut probatum est. Et sanē per se ridiculum est existimare, non maius esse discrimen in ra-

tionem potentiz & impotentiz resistendi, inter duritiem ferri, & molitiem ceræ, quàm inter visum senis, & visum iuuenis in ratione videndi. Quare etsi hæc non distinguantur nisi accidentariò, hinc minimè sequitur illa non distingui inter se specie.

Obiicies 2. Potentiz non distinguuntur specie nisi per actus & objecta, sed potentia & impotentia vt hic de ijs agimus, ordinantur ad eundem actum, ergo sunt eiusdem speciei. Confirmatur, quia non differunt nisi vt sunt principium perfectum & imperfectum, quod non nisi differentiam accidentalem arguit. Respondeo minorem falsam esse, nam ex natura sua fortiter agere aut resistere, & ex natura sua debiliter agere aut resistere, sunt actus diuersæ speciei, adeoque principia essentialiter distincta arguunt. Vnde ad confirmationem dicimus principium perfectum & imperfectum non nisi differentiam accidentalem arguere, quando eadem potentia quæ ex se est principium perfectè agendi, ita debilitatur vel impeditur vt non nisi imperfectè agere possit: Inferre verò discrimen essenziale, quando impotentia dicit formam aliquam positivam potentiz oppositam, qua res ex se non nisi cum difficultate operari aut resistere potest.

---

#### ARTICVLVS IV.

##### *De potentia obedientiali.*

**P**ramoneo 1. Duplicem assignari posse potentiam, aliam actiuam, aliam passiuam:  
O ij



actiua ea dicitur quæ tendit ad aliquid efficiendum, qualis est potentia calefactiua in igne ad calorem producendum; passiuæ verò quæ ad aliquid recipiendum ordinatur, quomodo in pariete est potentia passiuæ ad recipiendam albedinem.

Præmoneo 2. Potentiam actiuam duplicem esse, aliam naturalem, aliam supernaturalem seu obedientialem. Naturalis dicitur quæ agit consentaneè ad suam naturam, & effectum sibi proportionatum producit; ut est prædicta vis calefactiua in igne ad calorem producendum. Supernaturalis verò ea est quæ respicit effectum vires illius natiuas excedentem, quemque cum concursu Dei, ex communi lege sibi debito, producere non potest. Vnde iam vulgò dicitur potentia obedientialis actiua, quia elicit actum aliquem superioris ordinis, non ex propria & connaturali virtute, sed quatenus perfectè subdita est imperio Dei, eique obedit ad nutum, ut per eam faciat quidquid libuerit. Quæ ratione intellectus & voluntas hominis censentur agere per potentiam obedientialem, quatenus actus virtutum per se infusarum & supernaturalium eliciunt.

Præmoneo 3. potentiam etiam passiuam duplicem esse, aliam naturalem, aliam supernaturalem seu obedientialem. Naturalis est quæ forma aliqua connaturalis recipitur, ut cum paries recipit in se albedinem; supernaturalis verò seu obedientialis ea dicitur, quæ res in se recipit formam aliquam ordinis supernaturalis; ut cum anima rationalis, quæ est ordinis naturalis, recipit in se gratiam iustificantem, quæ est ordinis supernaturalis. Est autem difficultas, quæ ratione po-

tentia actiua obedientialis in rebus admit-  
tenda sit, an tantum ad certos effectus li-  
mitata, an verò generatim ad quoscunque  
effectus: ita vt Deus possit per quancunque  
entitatem quemlibet effectum producere.  
Dubitari etiam potest quidnam sit illa po-  
tentia, & vtrum ad prædicamentum qualita-  
tis pertineat.

Respondeo & Dico I. *Probabilius videri  
non esse ponendam in rebus potentiam obedientialem  
actiuam in tota illa latitudine, sed tantum cum  
quadam restrictione & limitatione.* Probat. I.

Quia cum omnis causa efficiens siue princi-  
palis, siue instrumentalis debeat effectum  
quem producit attingere, seu verè & physicè  
ad illius productionem concurrere, in ea debet  
necessariò reperiri virtus aliqua saltem inchoa-  
ta, & remota ad talem effectum: quia aliàs  
eum verè non causaret, illiusque productio in  
solum diuinum influxum referenda esset. At  
non potest solidè dici in qualibet re etiam mi-  
nima & imperfectissima, esse virtutem inchoa-  
tam & remotam ad productionem cuiuslibet  
effectus; quænam enim est eiusmodi potentia  
v. c. in palea ad producendum Angelum, vel  
lumen gloriæ?

Confirmatur, nam quæ eleuari solent ad ef-  
fectus aliquos supernaturales producendos, ha-  
bent vim aliquam inchoatam ad illos: vt patet  
in intellectu & voluntate quæ cum sint poten-  
tiæ vitales, eleuantur diuinitus ad eliciendos  
actus visionis, & amoris diuini, qui non nisi à  
potentiis vitalibus profluere possunt; quia sunt  
actus intrinsecè vitales. Ergo cum similis po-  
tentia in rebus omnibus non obseruetur, in  
ordine ad omnes effectus, frustra sanè & sine  
fundamento in ijs admittitur.

Probatur 2. Quia si in rebus omnibus est potentia obedientialis inchoata & innata, ut volunt Aduersarii, ad omnes effectus producendos; inde sequitur in igne esse potentiam innatam ad producendam aquam, in aqua ad producendum ignem, in calore ad frigus producendum, in frigore ad producendum calorem, & ita de aliis; at hoc absurdum videtur, tum quia sic in re qualibet esset virtus actiua inchoata & innata tendens per se ad sui destructionem; quod probabiliter affirmari nequit, cum res quilibet per se tendat naturaliter ad sui conseruationem. Tum quia virtus illa innata esset naturalis, cum tendat ad effectum naturalem & commensuratum, adeoque immerito diceretur supernaturalis, aut obedientialis.

Confirmatur, nam ideo ponitur in intellectu & voluntate potentia obedientialis actiua respectu actuum virtutum infusarum, quia actus illi sunt intrinsecè ordinis supernaturalis. Ergo cum ignis, aqua, calor, frigus, & similia sint entia merè naturalia, si ex per quandam potentiam innatam, qualis est ex communi sententia, obedientialis, se mutuo producere possunt, dicendum est illam potentiam esse simpliciter naturalem.

Probatur 3. Quia ratio præcipua cur potentia obedientialis actiua in tanta latitudine inuecta est, sumitur ex Sacramentis nouæ legis, quæ cum ex se sint res quædam materiales & infimi ordinis, non aliter videntur producere gratiam sanctificantem quam per illam potentiam obedientialem: Verum hæc ratio, etsi magnam vim habeat contra illos qui ponunt in Sacramentis causalitatem Physicam ref-

pectu gratiæ, in nostra tamen sententia nullius est momenti; cum existimemus sacramenta non producere gratiam Physicè, sed tantum moraliter, ut breuiter ostendimus in Idea Theologiæ Sacrament lib. 1. cap. 6. resolut. 2. & fusè in alio tractatu de Sacramentis 1. p. disput. 8. sect. 4. & 5.

Obijcies 1. S. Thomam ponere in rebus creatis potentiam obedientialem actiuam. Respondeo admittere quidem, non generalem & illimitatam ad omnes effectus quantumuis extraordinarios & supernaturales, sed determinatam ad nonnullos effectus qui vires naturales & communem concursum excedunt. Id patet manifestè ex prima parte quæst. 45. articulo 5. Vbi S. Thomas docet nullam creaturam assumi posse tanquam instrumentum ad creationem. Si enim existimaret Deum per quamlibet creaturam posse quemlibet effectum producere, consequenter fateretur creaturam posse à Deo assumi tanquam instrumentum ad creationem, quod tamen negat.

Obijcies 2. Accidens eleuatur ad productionem substantiæ, ad quam nullam habet proportionem; ergo similiter omnia possunt eleuari ad omnes effectus. Respondeo 1. hoc posse retorqueri, quia cum accidens naturaliter concurrat ad productionem substantiæ, sequeretur omnia ab omnibus naturaliter fieri posse.

Respondeo 2. Negando sequelam, & ratio discriminis est, quia cum accidens sit naturale instrumentum substantiæ, non mirum est quod virtute illius similem substantiam producere possit: at nihil tale reperitur in rebus omniibus ad produendos

quoscunque effectus supernaturales, ut perspicuum est.

Obijcies 3. In rebus omnibus est potentia passiva obedientialis ad omnes effectus, ergo & actiua. Respondeo 1. Antecedens negari posse, quia satis incredibile videtur quod Angelus possit in se recipere albedinem, cum certum sit eum dealbari non posse; aut quod gratia sanctificans possit inhzere lapidi, cum nequeat illum Deo formaliter gratum efficere. Quo enim fundamento dices formam aliquam recipi posse in subiecto, cui effectum suum formalem primum communicare nequit? Respondeo 2. Etiam dato gratis antecedente, consequentiam negari posse; quia ad agendum potest maior quædam proportio requiri quàm ad recipiendum; cum nobilius sit per se loquendo, agere quàm recipere.

Dico 2. *Potentiam obedientialem actiuam non spectare ad Categoriã qualitatis.* Ratio est, quia ex communi sententia, eiusmodi potentia non distinguitur re ipsa ab entitate rei quæ eleuatur per concursum Dei extraordinarium, ad effectum aliquem ordinis supernaturalis producendum: at non tantum qualitas, sed etiam res quædam aliæ possunt eleuari ad aliquid producendum ordinis supernaturalis. Ergo potentia obedientialis actiua non spectat, saltem secundum totam suam latitudinem, ad prædicamentum qualitatis. Confirmatur, nam ita aliquo modo se habet potentia obedientialis actiua ad prædicamentum qualitatis, quo se habet relatio transcendentalis ad prædicamentum relationis; at relatio transcendentalis non ponitur in prædicamento relationis, sed per alia prædi-

camenta vagatur : ergo similiter.

Vnde refelluntur qui dicunt , potentiam obedientialem actiuam dicere qualitatem aliquam supernaturalem rei superadditam : hoc enim non potest intelligi vt putant , de qualitate Physica , cum hæc sit vnius prædicamenti , sed de Logica , quatenus omnis virtus agendi qualitas interdum nominatur. Eò vel maximè quia si ad eliciendum aliquem actum supernaturalem , aut ad recipiendam aliquam formam supernaturalem , necessaria esset qualitas aliqua ordinis supernaturalis ; eodem modo requireretur prior aliqua qualitas supernaturalis ad illam recipiendam , & ita daretur progressus infinitus à nemine admissus.

Refelluntur etiam qui constituunt potentiam obedientialem actiuam , in mera non repugnantia efficiendi aliquid supernaturale. Cum enim non repugnantia sit negatio , & negatio nullam vim agendi habeat , impossibile est quòd potentia obedientialis actiua consistat in non repugnantia ; sed entitatem aliquam positiuam necessario inuolueret debet , eamque indistinctam à re quæ dicitur eleuari ad producendum effectum aliquem supernaturalem.

## ARTICVLVS V.

*De tertia specie qualitatis, qua est patibilis qualitas, & passio.*

**Q**Uæritur 1. an passio sit vera qualitas, & ratio dubitandi est, tum quia Aristoteles categor. cap. 8. negat esse qualitatem; tum quia illud non est vera qualitas, à quo res non denominantur quales; atque ex Arist. ibid. à passione non denominamur quales, ergo passio non est vera qualitas.

Verum quod passio sit vera qualitas, satis ostendit Aristoteles eodem cap. his verbis, Tercium genus qualitatis sunt patibiles qualitates & passionēs, ut dulcedo, amaror, acerbitas, & quæcunque sunt in eodem genere. Item calor, frigus, albor, nigror; hæc igitur esse qualitates perspicuum est. Ita ille. Ut autem intelligas quo sensu Aristoteles negauit passionem esse qualitatem,

Nota qualitatem duplicem hic communiter assignari, alteram quæ est qualitas secundum rem, & simul secundum modum; alteram quæ est qualitas secundum rem duntaxat, non autem secundum modum: & quidem qualitatem prioris generis esse illam quæ & in se est qualitas, & à qua res denominantur quales; posterioris verò illam à qua, etsi in se verè sit qualitas, res non denominantur quales absolutè & simpliciter.

Atque hac distinctione soluitur obiectio ex Aristot. proposita: quando enim negat subiectum denominari quale à passione, eam esse qualitatem, non est sensus eam non esse qua-

litate secundum rem, vel subiectum ab ea nullo modo quale denominari; satis enim constat ruborem ex erubescencia ortum esse reipsa qualitatem, & eo affectum dici quodammodo rubeum. Est ergo sensus eam non esse qualitatem secundum modum, quia ab illa subiectum non denominatur absolute & simpliciter quale.

Quæritur 2. Quo sensu Aristoteles dicat, colores non dici qualitates patibiles, quod in sensibus passionem efficiant, sed quia à passionibus producti sunt; cum color afficere videatur visum; eodem modo quo mel afficit gustum, & calor tactum. Respondeo qualitates duobus modis posse agere in sensum, primo realiter in eo producendo qualitates similes, ut cum manus realiter calefit, aut refrigeratur; secundo intentionaliter per emissionem specierum intentionalium, qua ratione colores agunt in visum: & ob hoc discriminem Aristotelem dixisse colores non efficere passionem in sensibus, scilicet ad modum aliarum qualitatum; quia cum species intentionalis sit qualitas subtilissima, per eam secundum se spectatam oculus leuissime planèque insensibiliter afficitur.

Quæritur 3. An patibilis qualitas & passio distinguantur inter se specie: Responsio communis est non distinguuntur, quia per accidens est v. c. ad ruborem ex se, quod citò transcat, aut diu perseueret in subiecto: neutrum enim ex natura sua exigit, sed tantum ex accidentaria quadam subiecti cui inhæret conditione; per se verò tantum postulat vel ut passionem causet, vel ut ex ea causetur.



## ARTICVLVS VI.

*De quarta specie qualitatis, forma nempe & figura.*

**Q**Varitur 1. Quid per formam & figuram hoc loco intelligatur.

Respondeo 1. Hoc valde incertum esse; nam quamuis satis constet hic non agi de forma substantiali, nec de accidentali in tota sua latitudine, dubium tamen manet qua ratione forma & figura quartam speciem qualitatis constituent, & inter se distinguantur. Quidam enim existimant formam & figuram pro eodem sumi, alij putant formam significare pulchritudinem, figuram verò sumi pro terminatione quantitatis; Alij dicunt formam spectare ad res animatas, figuram verò ad inanimatas. Alij docent figuram esse nudam terminationem quantitatis, formam verò esse artefactorum. Alij tandē arbitrantur figuram esse rerum Mathematicarum, formam verò aliarum omnium rerum siue sint animatæ, siue inanimatæ; siue naturales, siue artefactæ. In tanta autem opinionum varietate

Respondeo 2. Eos magis accedere ad mentem Aristotelis, qui docent 1. formam & figuram non pro eodem sumi. 2. figuram habere locum tantum in Mathematicis, formam verò in reliquis. Vtrumque enim non obscure colligitur ex ipso textu Aristotelis quatenus refert in primis varias figuras Mathematicas à quibus ait res denominari quales, tum verò addit hæc verba, *sed & secundum formam*

*unumquodque dicitur quale*, nam additio ista euidenter ostendit formam esse quid distinctum à figura; & exempla sumpta ex solis Mathematicis ad probandum, à figura res denominari quales, perspicue innuunt figuram ex mente Philosophi, non nisi in Mathematicis locum habere; ac proinde formam ad alia omnia esse extendendam.

Quæritur 3. An forma & figura inter se specie distinguantur. Respondeo negativè, quia de ratione istius qualitatis est quòd extrinsecè terminet subiectum; est autem illi omnino accidentarium, quod subiectum ab ea terminatum sit Mathematicum, aut naturale, aut artificiale: adeoque ex ea diuersitate non potest oriri discrimen specificum inter figuram, quæ res Mathematicas terminat, & formam quæ res alias.

## ARTICVLVS VII.

*Dua dubitationes expenduntur.*

Prior dubitatio est, an rarum & densum, itemque asperum & læue ad qualitatis categoriam spectent. Aristoteles apertè id negat in categorijs cap. de qualitate, aitque ea potius ad partium positionem spectare. Rationem affert sumptam ex prædictorum definitione, densum enim dicitur, *Cuius partes sibi inuicem propinquæ sunt*, rarum autem cuius partes à se inuicem distant: Et læuè illud est, *cuius partes in rectum quodammodo posite sunt*, asperum verò, *cuius pars alia eminet, alia superatur*.

Verùm hæc sententia non caret difficultate,

tum quia ex Arist. 7. Physic. cap. 2. perspicue colligitur rarum & densum esse qualitates, & pertinere ad tertiam speciem qualitatis, quia sensu percipiuntur: tum quia probabile non est rarum & densum, asperum & læue, cum sint modi rei affixi, siue loco moueatur, siue non, spectare ad Categoriā situs, quæ dicit certam positionem partium ad locum, tum quia cum Aristoteles curuitatem & rectitudinem ponat in quarta specie qualitatis, similiter videtur asperum & læue ad eandem reducenda esse; cum in re aspera curuitas, & in læui rectitudo conspiciatur.

Et iuxta hanc opinionem, quæ est communior, dici potest primò, cum Aristoteles priori loco prædicta refert ad positionem partium, verisimile esse eum per talem positionem intelligere positionem partium quantitatiuam, de qua egit cap. de quantitate; cum quanta diuisit in ea quæ situm & positionem partium inter se habent, alia quæ non habent, vt velex eo probatur, quòd definitiones rari & densi, &c. quas attert, nihil aliud quàm positionem seu certum ordinem partium significare videntur. Secundo, illo loquendi modo eum tantum velle innuere; prædicta vt ab eo sunt definita, pertinere ad quantitatem tanquam quosdam modos illius. Hæc tamen, vt verum fatear, difficultate non carent, quæ melius percipietur ex alibi dicendis de raritate & densitate.

Posterior dubitatio est, an pondus sit species qualitatis. Nonnulli putant esse speciem quantitatis; sed communis sententia illud ad qualitatem reducit: primo quia pondus nihil est aliud quàm grauitas corpus

deorsum impellens ; corpus autem impellere non est munus quantitatis , sed qualitatis. Siquidem grauitas & leuitas sunt in eodem genere ; at perspicuum est leuitatem non esse quantitatem , sed qualitatem qua corpus sursum pellitur : ergo similiter grauitas est qualitas qua corpus deorsum truditur.

Secundo ; quia si grauitas esset quantitas , quò maior esset quantitas , eò semper maior esset grauitas , quod tamen falsum est ; cum non raro quæ minoris sunt molis , sint grauiora , vt patet in metallis & lapidibus cum lana & gossipio collatis.

Obijcies , æquale & inæquale esse proprietates ponderis , & etiam quantitatis ; vnde sequitur pondus esse quantitatem. Respondeo vt in ponderibus non est propriè quantitas molis , sed virtutis : ita in illis non esse æqualitatem & inæqualitatem molis , sed virtutis , quæ in eo consistit vt in vno sit maior vis impulsua , quàm in alio : quo fit vt pondera potius debeant dici similia aut dissimilia , quàm æqualia vel inæqualia ; adeoque spectent ad qualitatem , non ad quantitatem propriè dictam.



## CAPVT IV.

## De variis oppositionibus rerum.

## ARTICVLVS PRIMVS.

*Observationes circa opposita.*

**C**VM res inter se opponantur maximè ratione qualitatum, non immeritò hic nonnulla de oppositis in Logica prætermissa, subiicienda duximus, quibus quæ de qualitate in genere dicta sunt, & quæ infrà de habitibus addentur, clariora euadent. Itaque cum ibi dictum sit, quatuor modis res inter se opponi, nempe relatiuè, contrariè, priuatiuè, & contradictoriè, iam

Aduertendum 1. quæcunque relatiuè opponuntur idipsum quod sunt oppositorum dici, vt patet ex dictis vbi de relatione: at contraria non dicuntur ad se inuicem, neque enim bonum dicitur mali bonum, sed contrarium; nec album nigri album, sed contrarium.

Aduertendum 2. contraria dici, quorum alterum necesse est in iis inesse, in quibus natura comparatum est vt insint; atque inter hæc contraria non datur medium, v. c. quia morbus & sanitas naturaliter insunt animali, necesse est vt alterum ei insit, nec datur status medius. Item quia par & impar tribuuntur numero, necesse est quemcunque numerum vel esse parem, vel imparem.

Sunt tamen aliqua contraria quorum non est necesse alterum inesse, & in iis datur medium, vt patet in albedine, & nigredine: nam etsi naturaliter insint corpori, non tamen necesse est vt omne corpus sit album, aut nigrum, cum aliquod possit esse rubrum, aut flauum. Et similiter inter probum & improbum datur medium, si hæc spectentur secundum habitum, nempe homo qui habitu virtutis & vitii caret: ille enim neque probus, neque improbus eo sensu dici debet.

Ex quo intelligis quædam media nomine proprio explicari, quia consistunt in quibusdam formis positiuis quæ participant de vtroque extremo; alia vero non nisi per negationem vtriusque extremi explicari, quia in eiusmodi negatione consistunt.

Aduertendum 3. priuationem & habitum circa idem aliquid esse, vt visus & cæcitas circa oculum; vnde distinguitur hæc oppositio ab iis, quia non est necesse vt alia sint in eodem specie & numero subiecto: at priuatio & habitus versantur circa idem aliquid, id est circa idem specie & numero subiectum, vt visus & cæcitas circa eundem oculum.

Vt autem aliquid dicatur priuatum habitu, duo requiruntur: 1. vt subiectum sit capax habitus; quare lapis non potest dici cæcus, cum aptus non sit ad videndum. 2. vt non habeat habitum quando à natura habere debet, quod fit vt non vocemus edentulum quod non habet dentes, & cæcum quod non habet visum, sed quod non habet quando à natura habere debet. Nam nec infantes ab ortu dentes habent, nec catuli visum, non tamen illi edentuli, aut isti cæci dicuntur.

Aduertendum 4. priuantia distingui à rela-

tis, quia relata id quod sunt alterius esse dicuntur; at hoc non conuenit priuantibus, nam visus non dicitur cæcitat<sup>is</sup> visus, nec cæcitas visus cæcitas, sed tantum visus priuatio.

Aduertendum 5. priuantia distingui etiam à contrariis siue immediatis, siue mediatis; ab illis quidem, quia ita se habent ex supradictis, vt semper necesse sit alterum inesse subiecto ad recipiendum apto; at potest dari subiectum ex se capax priuationis & habitus, vtroque tamen carens, vt catulus ante nonum diem, qui nec videns, nec cæcus est: ab istis etiam, quia nunquam necesse est vt alterum eorum sit in subiecto, nisi insit à natura; paries enim qui ex se habet aptitudinem vt sit albus aut niger, potest esse semper rubeus aut ceruleus; at priuantium alterum debet semper esse in subiecto post tempus à natura præstitutum, vt visus aut cæcitas in catulo post nonum diem.

Aliud est discrimen inter priuantia & contraria, quod pleraque contraria se mutuo expellunt è subiecto: nam quod est album potest nigrum fieri, & quod est frigidum calefieri, & vice versa: at in priuantibus aliter res se habet, nam etsi ab habitu ad priuationem mutatio fiat, non tamen à priuatione ad habitum fieri potest. Neque enim qui cæcus factus est rursus aspexit, nec caluus comam recepit. Atque hinc sumitur vulgatum illud axioma, *à priuatione ad habitum non datur regressus*, de cuius intelligentia articulo 3. agetur.

Aduertendum tandem contradictoriè opposita illud maximè proprium habere, quod alterum eorum de quacunque re siue existente siue non existente verè dicitur: nam quidquid est aut non est, videt aut non videt, legit aut non legit, calidum est aut non calidum, &c.

at idem non habet locum in alijs oppositis, quia non quidquid est, est pater aut filius, album aut nigrum, videns aut cæcum.

## ARTICVLVS II.

*Nonnulla dubitationes proponuntur circa oppositiones prædictas.*

**Q**Uæritur 1. an oppositum sit genus respectu prædictorum quatuor oppositorum, seu an prædicetur de illis vniuocè, an verò tantum æquiuocè, aut analogicè.

Respondeo & Dico 1. *non dici de illis æqui-uocè*. Siquidem ea non sunt æquiuoca, quæ in nomine & ratione per nomen significata conueniunt; atqui prædicta quatuor opposita conueniunt in nomine & ratione oppositorum; ergo non sunt æquiuoca. Maior perspicua est ex dictis de æqui-uocis in Logica, minor verò suadetur; nam & nomen oppositorum conuenit relatis, contrariis, priuantibus, & contradicentibus, omnia enim communiter vocantur opposita; definitio etiam oppositorum illis compètit, nam opposita definiuntur *quæ simul esse non possunt*; non posse autem simul esse prædictis omnibus oppositorum speciebus conuenit, ut perspicuum est.

Dico 2. *non etiam dici vniuocè, sed tantum analogicè secundum magis & minus*. Probat, quia eo maior est oppositio inter aliqua, quo minor est naturæ conuenientia inter illa; atqui minor est naturæ conuenientia inter ens & non ens, quàm inter ens & priuationem entis; & minor inter ens & priuationem entis, quàm inter duo



entia absoluta : & minor inter duo entia absoluta , quàm inter duo relatiua , vt faciliè consideranti patebit : ergo maior est oppositio inter contradicentia , quàm inter priuatiua ; inter priuatiua , maior quàm inter contraria ; & inter contraria maior quàm inter relatiua.

Quæritur 2. an diuisio prædicta oppositorum sit adæquata. Respondeo affirmatiuè , quod probatur , quia omnis oppositio vel est inter duo entia positiua , vel inter ens & non ens ; si est inter duo entia positiua , vel ea sunt absoluta , quomodo constituitur oppositio contraria , vel respectiua , quomodo constituitur oppositio relatiua. Quod si oppositio reperitur inter ens & non ens , vel ea est inter ens & negationem entis , quomodo constituitur oppositio contradictoria ; vel inter ens & priuationem entis , qua ratione constituitur oppositio priuatiua.

Obijcies , disparata cùm essentiis & definitionibus differant , nec eidem possint competere , inter opposita reponenda esse , vt homo & lapis ; sicque prædictam diuisionem non esse adæquatam. Respondeo oppositionem interdum latè sumi pro quacunque repugnantia in vnum conueniendi ; quomodo complectitur disparata substantiarum completarum quas repugnat eidem competere : propriè verò sumi oppositionem pro repugnantia cum certo termino , vt patet in quatuor membris propositis : nam in non positiuis vna forma repugnat vni tantum negationi ; aut priuationi , vt lapis non lapidi , & tenebræ luci : in positiuis verò vnum opponitur tantum alteri , vt calor frigori , & pater filio ; qua ratione disparata non sunt opposita , quia non habent determinatam oppositionem cum certo termino , sed

generalem cum rebus infinitis à quibus essentialiter differunt; vt lapis cum homine, equo, aliisque omnibus entibus quæ non sunt lapides.

---

## ARTICVLVS III.

*De regressu à priuatione ad habitum.*

**Q**UÆRITUR I. quo sensu dicat Arist. à priuatione ad habitum non dari regressum, scilicet illum qui forma aliqua priuatus est, non posse iterum illam recipere. Respondeo hoc communiter explicari adhibita distinctione; nam interdum quis priuatur actu duntaxat, vt qui dormit, priuatur actuali visione; interdum verò potentia agendi, vt cæcus priuatur videndi facultate. Quando priuatio contingit tantum priori modo, tunc aiunt certum esse à priuatione ad habitum dari naturaliter regressum; siquidem ille qui cum dormiret, actu non videbat, expergefactus iterum videt. Quando autem priuatio posteriori modo aduenit, tunc fatentur ad illam viribus naturæ non dari regressum: neque enim cæcus naturaliter visum recuperare potest, neque mortuus vitam. Dico naturaliter, nam quod hæc supernaturaliter restitui possint, satis constat ex Euangelio, & ex historia Ecclesiastica quibus docemur Christum, Apostolos, aliosque sanctos cæcis visum, & vitam mortuis plerisque restituisse.

Hæc tamen cum aliqua limitatione intelligenda sunt: nam in primis nunquam idem numero actus qui per priuationem fuerat ablatu, restituitur; qui enim post somnum videt,

non eandem numero visionem quam antea, elicit, sed eandem specie.

Deinde quod interdum possit fieri naturaliter regressus ad eundem specie habitum, patet exemplo aquæ quæ ex frigida fit calida, & ex calida iterum frigida, & vice versa. Et, iuxta communem sententiam alibi expendendam, in mutua conuersione aëris in aquam, & aquæ in aërem. Potest etiam fieri vt quis scientiam per morbum amissam, eandem quoad speciem iterum proprio labore comparet. Et nemo ignorat aërem qui ex lucido fit tenebrosus, iterum redeunte sole illustrari.

Ex quibus exemplis constat, non modo in contrariis, sed etiam in priuatiuis propriè sumptis dari regressum ad formam amissam. Quod non satis videtur cohærere cum mente Aristotelis, qui cap. de oppositis illud ponit discrimen inter contraria & priuatiua, quod in contrariis fieri potest regressus ad formam, non autem in priuatiuis; cum cæcus visum nunquam recuperauerit, nec caluus comam, nec vllus edentulus dentes emiseric: quod intelligendum videtur de priuatiuis, quibus potentia aliqua naturalis destruitur. Verum clarioris doctrinæ causa,

Quæritur 2. an quod semel corruptum est, possit idem numero in integrum restitui, siue spectatis viribus naturæ, siue per ordinem ad Dei omnipotentiam; idque siue res corrupta sit permanens, siue successiua.

Respondeo & Dico 1. *rem semel corruptam non posse eandem numero viribus naturæ restitui.* Probatur 1. ex Arist. loco citato cum ait à priuatione ad habitum non dari regressum; cum enim id intelligat de regressu ad eundem specie habitum, vt ex dictis manifestè colligitur, inde

inde à fortiori deduci potest, non posse idem numero quod semel corruptum est, viribus naturæ in integrum restitui.

Probatur 2. Experientia, quia non videmus res easdem numero quæ perierunt ad vitam reuocari, v. c. eundem hominē, eundem equum; quod similiter de alijs omnibus affirmandum est, etsi discrimen inter illa non adeo clarè obseruari possit. Confirmatur, nam si idem homo posset iterum viribus naturæ reproduci, fides miraculosæ resurrectionis non parum inde labefactaretur.

Probatur 3. Quia non minùs difficile est quòd res existens prima hora, & non secunda, iterum existat tertia, quàm quòd res occupans primum locum adæquatum, occupet postea tertium similem, etsi non fuerit in medio. At hoc posterius ab omnibus iudicatur impossibile, spectatis naturæ viribus. Ergo & illud prius naturaliter impossibile iudicari debet. Atque hæ rationes satis probabiliter propositū ostendunt; quænam autem vera & intrinseca sit causa huius impossibilitatis adhuc ignotum est.

Obijcies, experientia constat muscam in aqua suffocatam & verè mortuam ad vitam redire, si soli feruido exponatur, aut intra cineres tepidos recondatur. Respond. 1. non satis constare an musca illa verè sit mortua, etsi nobis mortua appareat. 2. experientiam illam non ostendere esse eandem numero muscam, sed ad summum esse idem numero corpus, adhuc sufficienter dispositum vt ex eo virtute caloris, distincta anima excitata fuerit.

Dico 2. *Rem corruptam permanentem posse eandem numero restitui per potentiam Dei absolutam.* Probatur 1. Quia ex fide constat, omnes homines post mortem diuina virtute resurrectu-

*Metaph.*

P

ros ad vitam immortalem; ergo ex hoc saltem capite de veritate nostræ propositionis à Catholicis dubitari nequit. Quod si idem homo diuinitus redire potest, cur non & alia omnia creata? Nam et si illius anima non destruat, corpus tamen in vermes & in terram abit; imo ex illius substantia plantæ, aues, pisces, & interdum homines nutriuntur. Quare post tot transformationes non minus operosum est illud in pristinum statum restituere, quàm formam lapidis, vel equi corruptam denuo producere.

Probatur 2. Nam si Deus non potest rem corruptam producere, repugnantia se tenet vel ex parte Dei, vel ex parte rei corruptæ; non ex parte Dei, cum omnes fateantur eum esse omnipotentem; non etiam ex parte rei corruptæ; cum non sit de essentia illius quòd non nisi semel existere possit. Confirmatur, nam si res potest diuinitus existere simul in duobus locis, ut omnes fatentur, cur non etiam poterit eadem virtute existere in duobus temporibus: ita ut sicut non est in medio loco sed in extremis, ita sit in temporibus extremis, non in medio? Maximè cum res eodem modo se habeat respectu Dei, dum corrupta est, ac antequam primò producta esset. Quare sicut à Deo produci potest antequàm sit, ita & cum esse desijt.

Obijciat aliquis repugnantiam oriri ex parte actionis, quia non potest idem reproduci nisi per eandem actionem, qua primò productum est: at non potest etiam diuinitus restitui actio quæ præterijt, cum pendeat à tempore præterito quod restaurari non potest. Respond. maiorem negandam esse, agendo de virtute diuina: cum enim Deus efficere possit ut idem effectus à diuersis causis totalibus, adeoque per

distinctas actiones & dependētiās producat, ex suprà dictis; à fortiori poterit ipsemet rem primo per vnam actionem productam, iterum per aliam producere. Posset etiam maiori concessa negari minor; quia etsi detur actionem creaturæ pendere à tempore, non apparet cur non possit Deus extraordinariè talem dependentiam supplere. Et quamuis id non posset, inde non sequeretur non posse Deum quod se solo produxit, iterum postquam interiit eadem actione reproducere.

Dico 3. *et si probabilis sit communis sententia quæ statuit, res successiuas quæ desierunt non posse eodem numero diuinitus restaurari, id tamen non carere difficultate.* Probatur ex dictis, nam cum repugnantia non se teneat ex parte Dei, debet se tenere ex parte rei successiuæ: at hoc non potest solidè probari, cum non sit de essentia rei successiuæ vt postquam esse desiit, non amplius per vllam virtutem esse possit; nec appareat cur res quæ non est, non contineatur eodem modo in potentia Dei productiua siue extiterit, siue non.

Obiicies 1. ad præteritum non datur potentia, ergo motus aut tempus præteritum non potest reproduci. Respondeo negando consequentiam: illius enim cessari sensus non est, idem numero tempus quod præteritum est, non posse iterum restitui, sed fieri non posse quin præteritum sit, quod verissimum est; quia etsi restituatur, semper verum erit illud aliàs præteritis, sicut verum erit post resurrectionem, omnes homines etsi tunc viuentes, aliàs mortuos fuisse.

Obiicies 2. vnitas numerica motus pendet ab vnitate temporis imaginarij; at hoc semel elapsum restitui non potest, ergo nec ille.

Respondeo maiorem negari posse, motus enim constat intrinsecè ex suis partibus successivis, nec dicit essentialiter ordinem ad talem partem temporis imaginarij; quare ex se est indifferens vt primò sit in hoc vel illo tempore imaginario, adeoque postquam defuit æque potest in alio reponi, saltem virtute divina.

Neque refert quòd ex Arist. ad vnitatem numericam actionis seu motus requiratur unitas numerica subiecti, termini, & temporis, hinc enim nihil aliud infertur quàm, vt motus sit vnus seu continuus requiri vnitatem seu continuationem temporis; quod verificari potest in quouis tempore, modo partes illius non interrumpantur.

#### ARTICVLVS IV.

*Nonnulla obseruanda circa proprietates contrariorum ab Arist. assignatas.*

**Q**vinque assignantur ab Arist. proprietates contrariorum, vt diximus in *logic.* Prima est, *quidquid bono contrariatur esse malum*, circa quàm obseruandum i. ex eo quòd Aristoteles ait bonum & malum esse contraria, vt iustitiam & iniustitiam, manifestè colligi malum & iniustitiã esse quid positium, non autem priuationem, vt multi existimant; cùm opposita contrariè sint entia positua, & à priuatiue oppositis distinguantur, vt constat ex supradictis, & omnes fatentur. Hinc autem confirmatur eorum doctrina qui existimant, peccatum actuale commissionis esse quid positium; quod

nobis probabilius videtur, vt diximus olim in Idea Thelog. Moralis, & infrà iterum dicitur in Ethica.

Obferuandum 2. quod ait Aristoteles, malo & bonum repugnare & malum, intelligi de bono quod est veluti medium inter duo mala extrema; qua ratione auaritiæ repugnant prodigalitas, & liberalitas, fed cum difcrimine: nam duo illa vitia funt extremè oppofita: virtus vero media opponitur eorum vni, quatenus de alio participare videtur; vt liberalitas opponitur auaritiæ, quatenus ad prodigalitatem aliquo modo accedit, & prodigalitati quatenus ad auaritiã vergit. Vnde quod dicitur 10. Metaph. tex. 15. vnum vni contrarium effe, debet intelligi de iis quæ funt directè & extremè oppofita.

Obferuandum 3. bonum non opponi bono, fed malo, malum autem non tantum opponi bono, fed etiam malo; non quòd mala vt mala fibi inuicem repugnent, fed quia vnum excedit, & aliud deficit. Itaque per exceffum & defectum mala fibi inuicem opponuntur, quia modis oppofitis à bono deficere poteft; cum autem vnica fit & fimplex ad bonum capeffendũ via, hinc fit vt non funt oppofitæ rationes boni, fed vnica; adeoque bonũ bono non repugnet.

Secunda eft, *fi vnum contrariorum eft in rerum natura, non effe neceffe exiftere alterum*; circa quã obferuandum eft, Aristot. non fatis fibi videri conftare, cum oppofitum tradat 2. de cælo cap. 3. vbi ex eo quod terra eft, probat ignem effe; quia dato vno contrariorum aliud dari debet, & ex eo quod terra & ignis funt, probat elementa media debere quoque exiftere: quia quodlibet elementum aliquam habet cum alio contrarietatem.



Dicendum tamen duo illa loca posse optimè inter se conciliari. Nam in priori nihil aliud vult Arist. quàm non spectare absolute ad rationem contrariorum, quatenus contraria sunt, vt vno posito aliud existat; sicut est de ratione relatorum vt vno existente, aliud quodque existat. In posteriori verò ex eo quòd vnum contrariorum existit in rerum natura, colligit aliud debere existere; non quia sunt contraria, sed ob perfectionem vniuersi, quæ ex positione contrariorum magis elucet.

Tertia est, *Contraria non posse simul esse in eodem subiecto*, circa quam obseruandum est eam veram esse, si spectentur contraria in gradibus intensi, non autem si in gradibus remissis. Ipse enim Arist. 4. Metaph. cap. 6. docet fieri non posse vt contraria simul insint, nisi aut vtrumque aliqua ex parte, aut alterum aliqua ex parte, alterum simpliciter. Et satis constat aquam dum ab igne incipit calefieri, non statim totam frigiditatem amittere, adeoque calorem & frigus in ea simul reperiri in gradibus remissis.

Quarta est, *Contraria versari circa idem genere aut specie subiectum*; circa quam obseruandum est, non omnia contraria versari circa idem specie subiectum. ignis enim qui calidus est, non potest esse frigidus, & aqua quæ humida est, non potest esse sicca, sed circa idem specie aut genere subiectum. Nam licet ignis non possit esse frigidus, nec aqua sicca; aqua tamen, aer, & terra frigiditatem admittunt, itemque ignis & terra siccitatem.

Quinta est, *Contraria vel esse in eodem genere, vel in diuersis generibus*, circa quam obseruandum est graue dubium esse, quo sensu dicat.

Arist. bonum & malum esse genera, nec tamen esse in genere, inde enim videtur colligi duodecim esse summa genera, nimirum decem vulgaria, & præterea bonum & malum. Verum diuinis varijs interpretationibus, quæ cum textu Arist. parum coherent, ea magis videtur probanda quæ docet, Philosophum id dixisse ex mente Pythagoræorum, qui duo tantum rerum summa genera constituebant, nempe bonum & malum.

## CAPVT V.

## De habitibus in genere.

## ARTICVLVS PRIMVS.

*De existentia, & essentia habitus.*

**Q**ueritur 1. an quidam habitus admitendi sint. Respondeo affirmatiuè, ut patet tum ex communi omnium consensu, tum ipsa experientia, nam cum aliquem actum sæpe repetimus, experimur nos longè facilius eum postea exercere quàm ante; quod manifesto indicio est nos per illam actuum repetitionem, comparasse quandam agendi facilitatem ad similes actus inclinantem, quæ habitus appellatur.

Confirmatur, nam quando potentia naturales experiuntur difficultatem in operando, & postea per varios actus fiunt aptæ ad operationes suas facilius exercendas, perspicuum est mutationem quandam in ipsis potentiis acci-

disse ; quia *idem manens idem apertum tantum est facere idem* : at ea mutatio non in eo cōsistit, quod vis naturalis potentiz sit intrinsecè aucta, quia eiusmodi augmētum per actuum repetitionem fieri non potest. Neque in eo præcisè quod aliquod impedimentum sit amotū tum quia non potest dici quodnam sit eiusmodi impedimentum, quoties potentia aliqua facilitatē agendi consequitur. Tum quia aliud est carere aliquo impedimento agendi, aliud assequi positivam facilitatem ad agendum, hoc enim ex illo non sequitur, at experimur nos post actuum repetitionem positivè inclinari ad facilius operandū: quare fatendum est aliquam qualitatem advenire potentijs naturalibus, per quam positivè fiant habiliores ad suas operationes exercendas, & eam qualitatem vocamus habitum.

Obiicies 1. Potentia est principium completum actus qui ab ea procedit, ergo superfluous est habitus qui simul cum ea ad eundem actum concurrat. Respondeo ad antecedens, potentiam esse principium completum actus quoad substantiam seu entitatem spectati, non autem quoad modum seu facilitatem agendi; adeoque hoc posteriori titulo requiritur habitus qui tribuat non simpliciter vim agendi, sed facilitatem.

Obiicies 2. Si darentur habitus minuentes difficultatem agendi, sequeretur agentem ex habitu bono minùs mereri quàm agentem sine habitu, quia ille minorem in agendo difficultatem experiretur. Hoc autem absurdum est, & communi sensui repugnans. Respondeo negando id sequi, quia meritum non pendet per se ex difficultate operantis, sed maxime ex dignitate & difficultate operis quod elicitur; at quamvis habitus tollat difficultatem

ex parte operantis, non tamen minuit dignitatem & difficultatem operis, adeoque non minuit meritum. Vnde non laudamus eos qui cum difficultate operantur, sed eos qui difficilia aggrediuntur.

Quæritur 2. Quid sit habitus. Respondeo esse qualitatem de se permanentem & stabilem, quæ potentia tribuit facilitatem agendi. Hoc patet ex dictis, nam ipsa potentia habet per se sufficientem vim agendi sine habitu, ut vel ex eo manifestum est, quia cum habitus producat per actuum multiplicationem, aliquis actus debet necessariò præcedere habitum, ac proinde potentia sine habitu absolute agere potest. Quare habitus non potest requiri ut simpliciter necessarius ad agendum, sed tantum ut adiuuans potentiam ad actum cum maiori facilitate eliciendum.

Itaque habitus est in primis in genere qualitatis, quia id quod inest potentia, eique tribuit agendi facilitatem, est principium actionis; esse autem principium actionis non competit quantitati, nec relationi nec actioni aliisque prædicamentis accidentium, sed tantum qualitati.

Nec refert quòd habitus dicat intrinsecè ordinem ad operationem, hoc enim non impedit quin sit qualitas, quia ordo ille non est relatio prædicamentalis, sed transcendentalis. Aliàs dicendum esset potentias omnes operatiuas non spectare ad qualitatem, sed ad relationem; quia intrinsecè dicunt ordinem ad proprias operationes,

Deinde habitus est qualitas de se permanens & stabilis, se habet enim ut principium agendi, non ut actio, adeoque non transiit cum actione, sed post illam perseverat, ut ex eo

pater; quia post cessationem ab operatione potentia eandem experitur facilitatem, quando rursus se ad opus accingit.

Tandem habitus supponit potentiam agendi, non modo radicalem & remotam, sed etiam formalem & proximam; adeoque eam non confert, sed potentiam præexistentem inuat ut facilius operetur. Quod intellige de habitibus naturalibus qui per proprios actus acquiruntur: nam supernaturales qui à Deo infunduntur, censentur simpliciter tribuere potentiam agendi supernaturaliter; non quòd soli eliciant actus supernaturales sine consortio potentie naturalis, recipiuntur enim in aliqua animæ potentia & cum ea actum eliciunt; sed quia potentiam eleuant ad simpliciter agendum, ita ut potentia habitu infuso uel constituta, nequidem actum imperfectissimum supernaturalem elicere possit, nisi aliunde illius defectus suppleatur;

Obijcies prædictam definitionem non competere sanitati, pulchritudini, aliisque huiusmodi qualitatibus quæ ab Arist. inter habitus numerantur; quia illæ disponunt subiectum in ordine ad se, non autem in ordine ad operationem. Respondèo vel sanitatem & pulchritudinem formaliter consistere in quadam con-  
temperatione qualitaturn, adeoque potius ad relationem spectare quàm ad habitum; vel si inter habitus reponenda sunt, dicendum eos esse mediatè operarios: quia cum substantia sit propter operationem, omnis habitus bene efficiens substantiam censetur mediatè illam ordinare ad operationem, sicque definitionem allatam ijs posse non incongruè aptari.

## ARTICVLVS II.

*De subiecto habituum.*

**Q**Varitur I. an habitus sint in intellectu & voluntate. Respondeo affirmatiuè, ex cõmuni sententia quæ docet sapientiam, scientiã, fidem, opinionem, &c. esse habitus intellectiuos, seu in intellectu constitutos; item iustitiam, fortitudinem, & temperantiam esse habitus morales in voluntate residentes.

Idque comprobatur experientia, nam quando incipimus scientias addiscere, aut virtutes morales sectari, multas experimur difficultates ex parte intellectus & voluntatis, quas tandem per multiplicationem actuum superamus; ita vt faciliè assentiamur propositionibus quas initio falsas existimabamus, & vtrò, imò cū magna delectatione actus virtutis, antea non parum ingratos eliciamus: ista autem facilitas repetitione actuum inducta, est qualitas quædam habitualis in intellectu & voluntate producta, qua in similes actus inclinantur.

Obijcies I. habitus requiritur ad determinandam potentiam, at intellectus est ex se determinatus ad suos actus, voluntas vero cū sit libera & indifferens non potest ab extrinseco determinari ad agendum, ac proinde nullus habitus poni debet siue in intellectu, siue in voluntate. Respondeo habitum exigi ad iuvandam potentiam, & eatenus determinandã quoad modum facilius agendi, quæ ratione potest poni habitus in intellectu; quia etsi sit determinatus ad assentiendum vero clarè ipsi proposito, non tamen ad assentiendum illi tanta facilitate, vt maiori non possit per additio-

nem alicuius qualitatis. Potest etiam poni habitus in voluntate non obstante illius libertate, quia etsi per habitum inclinetur ad actum, non tamen ad illum determinatur, sed ipsa se & habitum ad exercitium actus determinat.

Obiicies 2. non opus esse ponere habitum aliquem in voluntate, eò quod facilitas aut difficultas quàm experitur in operationibus suis, sufficienter in iudicium intellectus clarè aut obscurè obiectum ipsi proponentis, refundi potest. Respondeo hoc gratis dici, quia cum iudicium intellectus inducat tantum facilitatem aut difficultatem ex parte obiecti, requiritur præterea habitus qui ex parte subiecti amoveat difficultatem, quam habet voluntas ad eliciendum aliquem actum. Eò vel maximè, quia non rarò videmus meliora probamusque & deteriora sequimur, scilicet ob difficultatem quam voluntas experitur in exercitio alicuius operationis, etsi ab intellectu ipsi ut bona & honesta proponatur.

Instabis, difficultatem quam voluntas ea in re experitur, oriri ex passionibus ad malum eam trahentibus, adeoque sufficere ut habitus aliqui in appetitu sensitivo, qui passionum est fides, constituentur. Respondeo vndecunque illa difficultas oriatur, id parum interesse; quia cum ipsa voluntas difficultatem sentiat in operando, ipsi necessarius est habitus ad difficultatē illam superandam. Imò seclusa illa difficultate positiva, probabile est voluntatem adhuc esse capacem habitus, quia cum maiori & maiori facilitate agere posset.

Quæritur 2. an habitus sint in potentiis sensitivis & vegetativis.

Respondeo & Dico 1. *Appetitum sensitivum esse capacem habitus, saltem in homine*, Ita omnes com-

munitur : nam multi existimant virtutes quoddam morales nempe fortitudinem , & temperantiam esse in appetitu sensitivo; qui verò eas virtutes in voluntate constituunt , existimant quosdam habitus ijs proportionatos in appetitu sensitivo reponendos esse ; qua de re agitur in Idea Ethicæ.

Idque ea ratione ostenditur, quia potentia illa est capax habitus, quæ initio experitur grauem difficultatem in suis operationibus, postea verò per multiplicem actuum repetitionem magnam in agendo facilitatem experitur; ista enim facilitas de nouo inducta , est habitus per actus repetitos acquisitus. At tale quid contingit in appetitu sensitivo hominum , cum in materia temperantiæ, aut fortitudinis aliquando rationi obstinatè resistat, & post varios actus iteratos illi planè subijciatur quoad eandem materiam; ita vt facile, imò interdum cum magna voluptate id amplectatur, quod ante refugiebat.

Neque dicas, causam huius rei posse referri in variam corporis constitutionem , qua fiat vt appetitus modo in vnum obiectum feratur, modo in oppositum : etsi enim temperamentum ad hoc non parum conducatur, non tamen est totalis causa illius, vt ex eo perspicuum est, quòd etiam temperamento corporis non mutato, prædicta variatio cernitur in appetitu sensitivo.

Dico 2. *Habitus communiter poni in sensibus hominis internis, non tamen in externis, neque in facultatibus animæ vegetatiuæ.* Prima pars probatur, quia experientia constat per assuetudinem fieri vt magna facilitas acquiratur in actibus memoriæ & phantasie eliciendis; ita vt non pauci sint qui cum nulla fere vi recordandi aut imaginandi pollerent, vsu & exercitio ma-



gnam facilitatem in actibus memoriæ & phantasiæ eliciendis deinceps experiantur.

Secunda pars ostenditur, quia illæ potentiæ non sunt capaces habitus, quæ semper quantum est ex se eodem modo operantur, neque actuum exercitio maiorem agendi facilitatem acquirere possunt: atqui sensus externi eodem modo semper, quantum est ex se, operantur, neque per actuum repetitionem facilitatē agendi comparare possunt; ut patet in visu qui iisdem conditionibus positus, tam ex parte mediæ & obiecti, quam ex parte organi, semper æquē facile obiectum percipit. Vnde si interdum magis aut minus operose illud intuetur, ea varietas in diuersitatem aliquarum ex dictis conditionibus sufficienter reduci potest.

Neque refert quod sensus externi interdum facilitatem aliquam agendi videantur acquirere, ut cum gustus assuescit quibusdam saporibus quos ante repudiabat: hoc enim potest contingere sine acquisitione noui habitus, nempe vel per mutationem apprehensionis, vel etiam per immutationem quandam factam in temperamento linguae.

Tertia pars suadetur, quia facultates vegetatiuæ sunt ex natura sua determinatæ ut eodem modo operentur, neque per repetitionem actuum maiorem acquirunt agendi facilitatem; ut virtus nutritiua in stomacho residens, non in dies accrescit quoad facilitatem cibum digerendi, nisi quatenus cibus delicatior sumitur, aut calor internus augetur, vel aliter homo melius disponitur intrinsecè quoad proprium temperamentum. Vnde si quæ maior facilitas successu temporis in cibo digerendo accedit, ea in aliquam ex his causis, non autem in nouum habitum referenda est.

Quæritur 3. an habitus possit produci in membris corporeis, v. c. in manu, aut pede. Respondeo negari non posse quin manus & pedes longo usu acquirant magnam facilitatem se mouendi localiter, vt patet in cytharedis, & saltatoribus quorum illi magna facilitate digitos, isti pedes mouent. Hoc autem non potest intelligi nisi per aliquam mutationem factam in manibus & pedibus; quia si sola apprehensio sufficeret, sequeretur eos omnes qui artem aliquam callent, posse illius operationes perfecte exercere, quod aperte falsum esse experientia ostendit; cum multi v. c. artem canendi probè sciant speculatiuè seu mentaliter, non autem practicè seu vocaliter, vt ita loquar.

Negari etiam vix potest, quin mutatio facta in manibus & pedibus dicat aliquam entitatem positiuam in iis receptam, cum nequeat intelligi quod, per solam rali cuius impedimenti ablationem, agilitas illa collata sit. Quare si entitas positua, quæ facultati naturali confert facilitatem agendi dicitur habitus, non video cur agilitas illa manuum & pedum exercitio comparata, non possit habitus nuncupari; cum sit qualitas superaddita potentie motrici, eamque bene afficiat in ordine ad operationem faciliùs eliciendam.

Vnde refelluntur qui dicunt; facilitatem non esse in membris externis, sed in intellectu in quo est ars: Nam ars sola in intellectu residens, non sufficit ad exerenda opera artis quæ manu aut pede peraguntur, nisi membra illa ad id sint aptè disposita. Item refelluntur qui putant non requiri aliam dispositionem in membris, quàm remotionem impedimentorum; non enim amoueri possunt impedimenta, nisi per aliquam dispositionem contrariam, quam ha-

bitum appellamus. Item qui existimant dispositionem superadditam esse qualitatem quandam passivam, qua membra fiant apta ad sequendum voluntatis imperium; constat enim habilitatem in membris productam ea inclinare ad agendum.

Obiicies, ideo requiruntur habitus in appetitu sensitivo, quia non obedit despotice voluntati; at membra externa illi obediunt eo modo, ergo non indigent habitu. Resp. membra externa obedire despotice voluntati quoad motum naturalem, non autem quoad motum artificiosum: quia si callens artem cytharizandi quoad speculationem, antequam illam exercuerit, imperet manus ut exacte cytharam pulset, sane manus tale imperium non exequetur, defectu illius agilitatis habitualis quæ non nisi exercitio comparatur.

Quæritur 4. an habitus possint produci in brutis Respondeo affirmatiue, quia cum bruta phantasia, memoria, & appetitu polleant, corpusque flectant ad multa facienda cum facilitate, quæ antea ægrè aut nullo modo præstare poterant, ut patet in psittacis, canibus, equis aliisque animalibus disciplinæ capacibus, nulla ratio est cur ipsis habitus quidam per assuetudinem comparatus denegetur.

Nec dicas sufficere imaginationem, nam licet brutum per imaginationem cognoscat, post tale signum v. c. talem motum edendum esse, hoc tamen non sufficit ad motum insolitum facile edendum, nisi accadat aliquis habitus facilitatem talem motum exercendi tribuens, ut patet à fortiori ex antedictis de homine: nisi quis fortè existimet phantasiam esse longe nobiliorem in bruto, quam in homine, quod dici non potest.

Quæritur 5. an in rebus inanimatis & purè corporeis sint habitus, v. c. in lapide, aut igne. Respondeo negativè, nam tota ratio cur ponuntur habitus in nonnullis rebus, est, quia per assuefactionem acquirunt facilitatem eliciendi aliquos actus, quos antea non nisi agrè efficiebant; at res inanimatæ eiusmodi facilitatem acquirere non possunt, ut patet, nam etsi lapis millies projiciatur sursum, aut proprio nutu deorsum feratur, numquam ex se siue sursum, siue deorsum moveri poterit maiori facilitate quàm ante moueretur. Et idem dicendum de aliis rebus inanimatis, quia omnes ita determinatæ sunt per proprias formas ad certum agendi modum, ut nullam maiorem operandi facilitatem acquirere possint.

## ARTICVLVS III.

*De causis habituum.*

**E**X dictis colligi potest quænam sint causæ habituum: nam si agatur de causa eorum finali, dicendum est eos produci in potentijs ad conferendam illis agendi facilitatem: si de formali, cum ipsi sint qualitates & formæ, non alia quærenda est eorum causa formalis, quàm illorum quidditas & essentia; si de materiali circa quam, ea est obiectum in quod tendunt; si de materiali in qua, statuendum est nullam esse præter potentiam in qua recipiuntur, ut eam ad agendum iuuent. Denique cum dictum sit habitus per actuum repetitionem causari, hinc intelligitur actus ad eorum productionem efficienter cum poten-

tijjs concurrere. Verùm cùm reliqua satis perspicua sint, hoc vltimum paulò latiùs expendendum est. Itaque

Quæritur Primo, an actus concurrat aliquo modo ad productionem habitus, & qua ratione.

RESPONDEO & dico 1. *Actus nostros concurrere aliquo modo ad productionem eorum habituum qui à nobis acquiruntur.* Probatur, quia cùm tales habitus nobis à Deo non infundantur, neque ab vlla causa extrinseca in nobis fiant, necesse est vt à nobis producantur, at non possunt à nobis produci nisi mediante aliquo actu, ergo debet aliquis actus concurrere ad eorum productionem: probatur minor, quia potentia naturalis non producit aliquid nisi mediante productione, at productio est actus.

Confirmatur, tum quia voluntas nunquam acquireret habitum iustitiæ, vel temperantiæ, nisi exerceat actus eiusmodi virtutum; tum quia cùm voluntas possit ex se habere varios habitus, & disparatos, vel oppositos, cur vnum potiùs acquirat quàm alium, id non potest reduci præcisè in ipsam voluntatem secundum se, sed in illam quatenus exercet actus huic habitui consentaneos, non illi. Vnde Aristoteles 2. Ethic. cap. 1. ait sicut ædificando ædificatores, citharizando citharedi efficiuntur, ita iusta agendo iusti, temperata temperantes, fortia fortes euademus. Atque hæc omnia ex iam dicendis vltèrius confirmari poterunt.

Dico 2. *Actus concurrere effectiue, seu in genere cause efficientis ad productionem habitus.* Probatur 1. nam vel habitus producit à potentia immediatè & sine actu, vel mediante actu.

at primum à nemine admittitur, cùm omnes fateantur potentiam non efficere immediate habitum, sed actum, & eo mediante habitum: ergo secundum verum est, adeoque actus concurrit in genere causæ efficientis ad productionem habitus. Confirmatur, quia cùm actus se teneat ex parte causæ vř agentis, dicendum est eum concurrere in genere causæ efficientis, non autem in genere causæ passiue, seu materialis & dispositiue, vt Durandus arbitratur. Vnde

Probatur 2. Nam vel actus concurrit tantum passiuè ad productionem habitus, vel effectiuè; at prius dici nequit, quia quod non requiritur per modum passiue dispositionis ad conseruationem habitus, non requiritur etiam eo titulo ad productionem illius, cùm videamus saltem vt plurimum, easdem dispositiones quæ requiruntur ad productionem alicuius formæ, requiri ad conseruationem illius: atqui actus non est dispositio requisita ad conseruationem habitus, vt ex eo manifestum est, quod habitus conseruantur etiam in ijs qui non agunt, vt in dormientibus: ergo nec concurrit vt mera dispositio ad productionem habitus. Vnde posterius dicendum est, nempe actus concurrere effectiuè ad productionem habitus.

Obijcies 1. Si habitus produceretur per actum, ad habitum daretur per se motus seu actio; at hoc repugnat Aristot. 7. 1. physic. tex. 17. Ergo habitus non producit per actum. Respondeo minorem falsam esse, quia cùm Aristoteles ait, ad habitum non dari per se motum, loquitur de motu alteratiuo propriè dicto, qui terminatur tantum ad qualitates tertie speciei, quique est successiuus & sensi-

bilis ; sed non intendit negare ad habitum terminari per se aliquam actionem , cum ipse clarè doceat per assuetudinem & actuum repetitionem acquiri. Aliàs dicendum esset ex illius mente , nullas qualitates præter patibiles , imò nullum aliud accidens verè produci ; quod planè ridiculum est , tantoque Philosopho non parum iniuriosum.

Obijcies 2. Si habitus producuntur per actus , debent produci per actus immanentes ; at hoc dici non potest , quia ex Arist. 1. Ethic. cap. 1. & aliàs actio immanens nihil post se relinquit. Respondeo actum immanentem nihil post se relinquere in subiecto extraneo , aliquid tamen posse post se , relinquere in eadem potentia à qua fuit ; vt cum per actus scientiæ generatur scientia habitualis in intellectu.

Obijcies. 2. Actus est causalitas seu effectio , at causalitas seu effectio non concurret per modum causæ efficientis , ergo habitus non pendet ab actu vt à causa efficiente. Respondeo in actu seu actione duo esse considerata , nempe ipsam actionem vt est actio , & terminum intrinsecum talis actionis , qui est qualitas aliqua : actio priori modo spectata non est causa efficiens , sed causalitas causæ efficientis ; at verò sub posteriori ratione potest esse principium agendi per modum causæ efficientis , sicque habitum producere.

Quæritur 2. An ad productionem habitus plures actus concurrere debeant.

RESPONDEO & dico 1. *Per quemlibet actum habitus produciuntur , aliquid habitus produci.* Probatur , quia si primus actus nihil produceret , nec secundus , nec tertius , nec alij consequenter in infinitum aliquid ex habi-

tu producerent , adeoque habitus nunquam produceretur : quia cum omnes sint eiusdem speciei vt supponitur , & æqualem vim agendi habeant , si vnus seorsum spectatus nihil efficeret , nulla ratio esset cur alij sigillatim & successiuè producti habitum generarent : at experientia constat habitum tandem post nonnullorum actuum repetitionem generari , ergo fatendum est in singulis actibus esse vim producendi aliquid habitus.

Nec dicas actum secundum , aut tertium posse inchoare habitum , quia inuenit potentiam melius dispositam per vnum aut alterum actum. Nam si primus actus nihil efficit in potentia , sequitur potentiam reperiri eodem modo indispositam sub secundo actu , quo erat sub primo , sicque non esse rationem cur habitus viillius inchoetur , cum virtute actus primi inchoatus non fuerit. Et idem a pari dicendum de tertio actu respectu secundi , sicque in infinitum. Neque idem est de guttis lapidem excuantibus , nam etsi tantum centesima gutta verbi causâ excauet lapidem , præcedentes tamen cum paulatim emolliunt , eumque ita disponunt vt possit excauatio à centesima gutta inchoari ; at in casu proposito nulla inducitur dispositio ab actu primo , quia si aliqua induceretur , hæc aliud nihil esset quàm inchoatio habitus , quod intendimus.

Obijcies 1. Non potest induci habitus nisi superentur difficultates quæ illius introductioni obstant ; at difficultates illæ cum frequenter multæ sint & magnæ , non possunt vnico actu superari , ergo per vnicum actum non potest produci aliquid habitus. Respondeo 1. non semper magnas illas difficultates occurrunt.



rere, vt patet cū per demonstrationem euidentem, qua conuincitur intellectus, generatur habitus scientiæ: quare saltem tunc non repugnat habitum, etiam in statu satisperfecto, vnico actū generari.

Respondeo 2. Etsi difficultates occurrentes non possint totaliter vnico actū superari, posse tamen vtrumque debilitari, & secundum aliquam sui partem tolli; ad hoc autem requiritur vt aliqua pars habitus oppositi inducatur. Quare etsi in eo casu non producat̃ statim habitus perfectus, producit̃ tamen aliqua illius inchoatio.

Obijcies 2. Si per primum actū producat̃ aliqua pars habitus, cum ea sit eiusdem speciei ac aliæ quæ per similes actus producantur, dici potest absolutè cum qui elicit vnicū actū temperantiæ, acquirere habitum temperantiæ, etsi ante esset intemperantissimus: at hoc & experienciæ repugnat, & communi sensui Philosophorum qui post Aristotelem docent, habitus acquiri per assuetudinem, seu per repetitionem multorum actuum. Respondeo consequentiam esse veram de habitu temperantiæ quoad essentiam spectato: sicut enim aqua etsi intensè frigida, absolutè calorem acquirit, cū primum ab igne calefit; ita dici potest intemperantem acquirere habitum temperantiæ, statim atque actū aliquem huius virtutis exercer. Hoc autem non repugnat Philosophis, quia cū dicunt habitum acquiri per actuum repetitionem, considerant habitum secundum statum habitus, qui in eo consistit, vt sit in gradu intenso, & tribuat potentiæ magnam agendi facilitatem; quomodo non acquiratur vt plurimum nisi per plures actus. Vnde

aliqui, quod producitur per primos actus vocant dispositionem, non quod putent distinguere essentialiter à gradibus qui per actus sequentes producantur, sed quia eisi sit eiusdem rationis, non tamen habet statum habitus, cum sit facile mobile à subiecto, nec nisi valde exiguam tribuat facilitatem ad agendum.

Dico 2. *Interdum posse produci habitum perfectum per unicum actum, ut plurimum tamen multos actus requiri ad productionem perfecti habitus.* Vtrumque potest colligi ex antedictis, nam in primis per unicam demonstrationem cuiusvis clarè perspicitur, generatur habitus scientiæ in intellectu; hoc enim medium est maximè proportionatum ad generandum eiusmodi habitum, & nullum est impedimentum siue ex parte intellectus, siue aliunde quod obstat quo minus necessario operetur. Quare sicut lux quia non habet contrarium, producit in instanti, etiam in gradu valde intenso, iuxta vires agentis; ita per unicam demonstrationem generatur habitus scientiæ, etiam in gradu intenso & perfecto; cum causa sit satis efficax ad illum in eo statu producendum, & nihil illius productionem impediat. Idque potest confirmari experientia, nam intellectus noster scientiæ per demonstrationem evidentem acquisitæ, adeo firmiter adhæret, ut ab illius assensu dimoveri nunquam possit.

Deinde, non in omnium habituum productione eadem facilitas reperitur: nam in primis quamvis per medium probabile generetur in intellectu quædam opinio, non tamen quæ habeat statum habitus firmum & permanentem; cum possit adhuc intellectus,

facile in aliam partem flecti vi alterius medij, æquè aut magis probabilis, Et licet per vnum actum virtutis acquiratur aliqua inchoatio virtutis habitualis, non tamen obtinetur illius status perfectus, donec superatæ sint multæ difficultates ex prauis inclinationibus ortæ, quæ completam illius acquisitionem remorantur, vt satis experientia comprobatur. Quare in ijs & similibus casibus multa opus est actuum repetitione, vt habitus in statu perfecto produci possit. Et hoc sensu vna hirundo non facit ver, nec vna dies facit hominem beatum, vt sapienter monet Arist. 1. Ethic. cap. 7.

#### ARTICVLVS IV.

##### *De incremento, & diminutione habituum.*

**Q**UÆRITUR 1. per quos actus intendantur habitus, supponimus enim ex communi sententia, eos per actuum multiplicationem verè intendi, vt vel ipsa experientia ostendit, cum eo magis agendi ex habitu facilitas crescat, quo plures & efficaciores actus illius productiui eliciuntur. Supponimus etiam illud augmentum habituum fieri additione gradus ad gradum, vt constabit ex infrà dicendis vbi de alteratione. Itaque dubitatur per quos actus fiat augmentum habituum, an per intensiores, an per æquales, an etiam per remissiores.

Respondeo & dico 1. *Dubitari non posse quin habitus augeatur per actus intensiores.* Ratio est, quia vel nullus actus habet vim augendi habitum,

tum, vel ea vis tribuenda est maximè actui intensiori, vt per se notum est; at non potest dici vim augendi habitum nulli actui competere, cum experientia constet habitus acquisitos actuum multiplicatione augeri, & in dies roborari: ergo dicendum est habitus augeri maximè per actus intensiores.

Confirmatur, nam si calidum vt sex applicetur subiecto cui insint tantum duo aut tres gradus caloris, in eo vnum aut alterum gradum caloris producet. Ergo similiter si quis habens v. c. habitum temperantiæ vt duo, eliciat actum temperantiæ intensum vt quatuor aut quinque, eo actu aliquem gradum priori habitui superaddet.

Dico 2. *Probabile esse habitum posse augeri per actus æquè aut minùs intensos.* Probatur 1. experientia: nam qui v. c. habitum temperantiæ in gradu intenso acquisiuit, eundem habitum eliciendo sæpè actus æquè intensos, aut paulo remissiores auget & perficit; ita vt faciliùs temperantiæ operibus vacet quàm cum primò habitum acquisiuit. Dico eliciendo sæpè actus æquè intensos, &c. nam qui post acquisitum habitum rarò aut valdè remissè illius actus eliciunt, fiunt in dies minus prompti ad operandum, sicque habitus paulatim in ijs debilitatur, tantum abest vt per eiusmodi actus in ijs perficiatur & intendatur, vt ipsa etiam experientia ostendit.

Probatur 2. Quia ex communi sententia, actus est agens æquiucum, adeoque nobilius respectu habitus producti; at illud est discrimen inter agens vniucum & æquiucum, quòd agens vniucum non potest agere supra suam intentionem, vt ex eo patet, quòd duo corpora æquè calida non se mu-

*Metaph.*

Q

tuò calefaciunt; agens verò æquiuocum producit effectum se intensiorem, vt constat ex luce mediocri & remissa, quæ si in speculo concauo recipiatur, producit calorem valde intensum. Quare actus habitum se intensiorem producere potest.

Quæritur 2. Quomodo fiat augmentum extensiuum habituum. Quod vt intelligas

Nota habitum dupliciter augeri posse, intensiue, & extensiue; augetur intensiue, quando in se perficitur additione alicuius noui gradus, vt cum tribus gradibus temperantiæ acquisitæ additur quartus gradus: augetur vero extensiue, quando incipit extendi ad nouum aliquod obiectum; vt cum habitus scientiæ qui fertur in vnâ conclusionem, extenditur ad aliam, & cum habitus temperantiæ qui versatur circa cibum, extenditur etiam ad potum. Inquiritur ergo quomodo fiat augmentum istud extensiuum habitus, an per additionem nouorum habituum partialium à precedentibus specie distinctorum; an verò sine vlla tali additione, per solam eiusdem gradus primò producti ad alia, & alia obiecta extensionem.

Respondeo & dico 1. *Extensionem habitus scientiæ ad nouas conclusiones, fieri per additionem aliorum & aliorum habituum partialium, qui simul cum precedenti faciunt vnũ habitum scientiæ per aggregationem, & unitate ordinis.* Probat 1. quia habitus inclinans intellectum ad assentiendum vni conclusioni, non inclinat illum ad assentiendum alteri omnino disparatæ; ergo sicut ad priorem requiritur vnus scientiæ habitus, ita ad posteriorem requiritur alius habitus proportionatus. Antecedens manifestum est, quia habitus inclinans v. c. intellectum ad

assentiendum huic conclusioni, homo est risibilis, non inclinat illum ad assentiendum isti, cœlum constat ex materia & forma, cum vna nullam habeat connexionem cum alia: vnde requiritur nouus habitus à priori specie distinctus. Confirmatur, quia cum habitus acquirantur, ad superandas difficultates operandi, vbi sunt diuersæ & omnino disparatæ difficultates, ibi habitus diuersi constituendi sunt.

Probatur 2. Quia vel generatur nouus habitus, vel præcedens sine vlla additione ad alias & alias conclusiones extenditur: at hoc posterius dici non potest, cum intelligi nequeat quomodo habitus circa vnam conclusionem acquisitus, qui nullam dat facilitatem ad alias conclusiones disparatas intelligendas, vt manifesta experientia ostendit, se extendat ad illas; Ergo prius affirmari debet. Et sanè multo rationabilius est fateri per actus sequentes, quibus positus experimur nos habere facilitatem circa alias conclusiones, generari nouam istam facilitatem, seu nouum habitum quo fit vt nullo negotio eas deinceps concipiamus. Confirmatur, nam si prioribus actibus habitum scientiæ comparamus circa aliquod obiectum, quidni posterioribus similem habitum acquiramus circa aliud obiectum?

Obijcies 1. Non ponitur nisi vna potentia visiva ad percipienda omnia obiecta visibilia, quæ sunt multiplicis speciei: Ergo vnus scientiæ habitus sufficit ad omnia scibilia intelligenda. Respondeo negando consequentiam, & ratio discriminis est, quia cum potentia visiva emanet naturaliter ab anima, non potest multiplicari iuxta diuersitatem obiecto-

rum; cum autem habitus producat per actus, necesse est ut iuxta distinctionem actuum, & obiectorum distincti producantur habitus. Aliàs non esset ponendus in intellectu nisi vnicus habitus ad omnia intelligibilia percipienda, quod ne ab arguentibus quidem concedendum puto.

Obijcies 2. Vnus fidei habitus sufficit ad credenda omnia reuelata, ergo & vna scientia ad omnia scibilia cognoscenda. Respondeo non sequi, & ratio discriminis est, quia fides vni tantum motiuo innititur nempe testimonio diuino: quare qui ex fide aliquid credit ob hoc motiuum, paratus est ob illud alijs omnibus à Deo reuelatis firmiter assentiri; cum Dei testimonium æqualiter verum & certum sit in omnibus: at non omnibus conclusionibus scientiæ assensum damus ex eodem motiuo, sed ex diuersis, ut perspicuum est; quare etsi acquiramus facilitatem ad assentiendum alicui conclusioni, non sequitur quod eandem propensionem experiamur ad assentiendum alijs, maxime si nullam habeant cum illa connexionem.

Dico 2. *Extensionem habituum moralium non fieri per additionem habituum partialium specie à prioribus distinctorum.* Probatur, quia cum quis acquisiuit habitum temperantiæ in materia cibi, & postea incipit exercere temperantiam in materia potus, ad illam extensionem non requiritur nouus habitus à præcedenti specie distinctus, sed idem intensior factus ad id sufficere potest; eò quod vtraque abstinencia, tam in cibo quam in potu à motiuo eiusdem honestatis procedit.

Confirmatur, nam ratio cur ad diuersas conclusiones requiruntur diuersi habitus, ea est

quia pendent à diuersis motiuis ; Ergo quando idem est motiuum , vt contingit in temperantia, alijsque virtutibus moralibus, non est constituendus habitus specie à præcedenti distinctus.

Obijcies , multiplicantur habitus ob nouas & distinctas difficultates ; at hic est noua difficultas , qui enim facile abſtinentiam ſeruat in cibo , non raro eam difficile ſeruat in potu, & vice verſa. Ergo ad vtramque abſtinentiam requiruntur distincti habitus. Respondeo non ſequi , quia difficultas illa cum non oriatur ex diuerſo motiuo, ſed ex alijs cauſis, v. c. ex corporis temperamento, ſe habet per accidens & materialiter ad productionem habitus ; adeoque diuerſum ſpecie habitum inducere non debet, ſed ad ſummum intenſionem aliquam habitus præcedentis.

Quæritur 3. Quomodo habitus acquiſiti minuantur , & corrumpantur.

Reſpondeo 1. Non dubium eſſe quin omnes habitus corrumpantur , quando deſtruitur ſubiectum cui proximè inhaerent , cum habitus ſit accidens , & non poſſit accidens, naturaliter exiſtere ſine ſubiecto inhaſionis, vel ad aliud tranſire. Verùm quia habitus qui ſunt in ſubiecto ſpiritali & incorruptibili, eodem modo deſtrui non poſſunt ,

Reſpondeo 2. Habitus deſtrui per actus , & per habitus contrarios, v. c. habitum temperantiz per actus & per habitum intemperantiz. Quia ea eſt natura contrariorum, vt ſe mutuò expellant ab eodem ſubiecto. Eſt tamen diſcrimen inter illa , quòd habitus deſtruitur formaliter per habitum contrarium, ſicut frigus per calorem; quia cum ſe habeant tanquam formæ incompatibiles in eodem ſubiecto , ne-



cesse est vt ad præsentiam vnius alia expellatur : destruitur verò effectiue per actum contrarium , quatenus actus ille est causa effectiua habitus contrarij à quo alter expellitur ; non enim causa effectiua tendit per se immediate ad destructionem alicuius rei , sed tantum ad productionem alicuius formæ , quæ si cum alia sit impossibilis , agens dicitur illius destructionem mediatè , & per accidens intendere.

Respondeo 3. Habitum non destrui per solam actuum cessationem. Probatur quia si hoc esset , sequeretur statim atque cessatur ab actu , habitum minui , & ita breui tempore omnino euanescere , nisi actus illius conseruatiui renouentur ; ad eum modum quo sonus deficiente causa conseruante , statim languescit , & post breuem moram omnino deficit. At hoc repugnat experientiæ , cum non raro post satis longam actuum cessationem , habitus antea comparatos in nobis adhuc vigere sentiamus . Quare dici non potest eiusmodi habitus per solam actuum cessationem destrui.

Vnde quando oppositum contingere videtur , dicendum est habitus præcedentis destructionem in aliam causam referendam esse ; nempe vel in diminutionem potentie , & consequenter habitus ei inexistentis. Constat enim partes animalis paulatim effluere per actionem caloris naturalis , sicque habitus ijs inexistentes paulatim deficere posse ; qua ratione habitus & species quæ sunt in cerebro , successu temporis destrui possunt. Vel in acquisitionem habitus contrarij , sæpe enim cessantibus actibus certæ rationis oppositi sensim eliciuntur , quibus producuntur

novi habitus antiquis contrarii; vel in actus & habitus disparatos qui in eadem potentia multiplicantur: potentia enim naturales cum sint limitatae, non sunt capaces plurimorum habituum quibus ad multiplicia obiecta vehementer inelinentur, ut vel ipsa patet experientia. Quare cum acquirantur habitus quibus ad nova obiecta vrgentur, paulatim minuitur inclinatio quam ad alia obiecta, etiam disparata habebant.

---

## ARTICVLVS V.

*De causalitate habituum.*

**D**Vbium hic occurrit, quomodo habitus mouet potentiam ad actum quem cum illo elicit. Qua in re quatuor sunt dicendi modi, primus eorum qui existimant cum communiori sententia, habitum concurrere effectiue cum potentia ad substantiam & modum actus. Secundus eorum qui putant habitum concurrere effectiue ad modum seu facilitatem actionis, non autem ad substantiam seu entitatem illius. Tertius eorum qui arbitrantur habitum non concurrere efficienter siue ad entitatem, siue ad modum actus, sed tantum dispositiue seu passiue preparando potentiam ad actum recipiendum. Quartus eorum qui docent habitum nullo ex dictis modis concurrere ad actum, sed se habere tanquam rationem agendi, non quidem simpliciter necessariam ad agendum, sed quae potentiam inclinet ad facilius operandum, ita ut non tam sit ratio agendi quam ratio promptius agendi. Quo referri posse videtur

corum sententia qui aiunt, habitum facilitare ad actum in genere tantum causæ formalis, nimirum informando tantum potentiam, & nihil aliud præstando.

Respondeo & dico 1. *Habitus non se habere tantum dispositivè seu passivè per modum subiecti, ad actum recipiendum.* Probatur 1. ex vulgari illo proloquio, habitibus utimur cum volumus; quod planè indicat habitus dari ad operandum, non autem ad recipiendum; ut iustitia acquiritur ad actus iustitiæ facilius exercendos, temperantia ad actus temperantiæ, & ita de alijs.

Probatur 2. Quia per habitum tribuitur facilitas opposita difficultati quam potentia habitu destituta experitur: atqui potentia non experitur difficultatem quoad receptionem actuum, sed quoad eorum productionem, voluntas v. c. cum sit potentia spiritalis, omni-moda facilitate recipit in se actum spirituales iustitiæ, vel temperantiæ ab ipsa productum; non tamen ita faciliè eiusmodi actus producit, eò quòd ad actus oppositos inclinatur & veluti trahitur. Quare per habitum tribuitur facilitas ad operandum, adeoque proprium illius munus non est subiectum dispo-nere ad receptionem actus.

Probatur 3. Quia habitus producit per actus, & potentiam inclinat ad actus similes ijs à quibus productus est, ut tradit Aristot. 2. Ethic. cap. 1. & idem vel ipsa experientia manifestè ostendit; cum omnes qui habitum aliquem compararunt, per illum inclinentur ad actus similes; imò longè maiori facilitate & delectatione eos efficiunt, quàm ante acquisitionem habitus. Quare fatendum est habitus non se habere merè passivè respectu

actuum adeos recipiendos, sed aliquo modo potentiam disponere ad eorum productionem.

Probatur 4. Quia non potest saluari diuisio habituum communiter recepta, in habitus practicos & speculatiuos, si dicamus habitum dari tantum vt disponat subiectum ad actus recipiendos, tum quia actus tam practici, quam speculatiui in potentia recipiuntur; tum quia illi dicuntur habitus practici, qui tendunt ad praxim; speculatiui verò, qui in sola speculatione conquiescunt; at praxis & speculatio sunt operationes, adeoque habitus ad illa tendens non datur ad solam actus receptionem.

Dico 2. *Negari non posse quin habitus aliquo modo concurrat ad agendum.* Patet ex dictis, nam rationes allatæ non modo ostendunt habitus non concurrere tantum materialiter & dispositiue ad receptionem actuum, sed etiam iuuare potentiam ad actum maiori cum facilitate eliciendum, sicque aliquo modo concurrere ad agendum.

Et confirmatur, nam duplicem possumus concipere inclinationem in potentia aliqua, aliam ad agendum, aliam ad recipiendum: atqui habitus non tribuit inclinationem ad recipiendum, vt ostensum est, ergo dat inclinationem ad agendum. Quod maximè verum esse ostenditur in habitibus potentiarum transeunter agentium; cum enim actus non recipiatur in illis, sed in subiecto distincto, hinc manifestum est habitum non disponere potentiam ad receptionem actus.

Est autem difficultas in primis an habitus concurrat effectiue cum potentia ad actum, an tantum per modum cuiusdam rationis seu

conditionis præiūz, ad eum modum quo cognitio concurret ad actus voluntatis. Respondet ex communi sententia, concurrere effectiue, vt etiam colligitur ex dictis; tum quia vti habitibus ad arbitrium, nihil est aliud quam eos ad operandum applicare cum libet. Tum quia qualitas se tenens ex parte potentia, non ad patiendum, sed ad agendum, debet conferre vim aliquam agendi, vt patet in siccitate quæ calori superaddita, eum iuuat ad calefaciendum: Tum quia non potest intelligi quod agens vt agens, melius nunc se habeat quam prius se haberet, quin addita illi sit vis aliqua agendi; at per habitum agens vt agens, se habet melius quam prius se haberet, cum actus qui antea ab illo non fiebat nisi ægrè, fiat iam cum magna facilitate & voluptate: ergo per habitum illi est adiuncta virtus quædam actiua quæ iuuatur in operatione.

Vnde non sufficit explicare concursum habitus per rationem agendi sine efficientia, eo modo quo explicatur concursus cognitionis ad volitionem: nam cum per cognitionem obiectum proponatur voluntati, ea cognitio potest mouere voluntatem moraliter ad actus suos; at habitus minimè cognoscitiuus non est agens morale, sed Physicum pondere suo inclinans ad actum sibi similem; quare non potest concurrere nisi Physicè ad actum potentia in qua existit, eo modo quo grauitas non potest nisi Physicè concurrere ad motum lapidis, quo illum deorsum premit.

Nec etiam sufficit totum habitus officium ad causalitatem formalem redigere, quia præter quam quod potentiam informat, eam insuper iuuat ad actum eliciendum, effectiue

ad illud concurrendo. Eam etiam inclinat ad actum eliciendum, ut patet per experientia, quod non præstat in genere causæ formalis, cum neque hanc formam, neque illius effectum formalem in nobis per experientiam deprehendere possimus; sed in genere causæ efficientis, concurrendo nempe cum potentia ad actum quendam imperfectum complacentiæ, quo ad opus perfectum inclinatur; ut cum temperans sentit se interius moveri & allici ad actum temperantiæ.

Dubitatur præterea, quidnam id sit ad quod habitus concurrat effectivè, an tantum modus aliquis actus, vel illius intensio, an verò ipsa entitas actus à potentia producti. Nonnulli putant per habitum conferri aliquos gradus intensiōis supra substantiam actus à potentia productam.

Sed malè, nam etsi habitus remotione impedimentorum sit interdum causa, ut potentia iam expeditior maiori conatu & intensius operetur, non tamen possunt illi tribui nonnulli gradus intensiōis qui à potentia non efficiantur; tum quia repugnat v. c. aliquos gradus cognitionis actualis, vel amoris non elici ab intellectu vel à voluntate. Tum quia potentia etiam habitu destituta, potest actus valide intensos elicere, & vice versa potentia habitu etiam intenso instructa, potest remissè operari. Tum quia habitus acquisiti non tribuunt facultatem simpliciter aliquid agendi, sed tantum cum maiori promptitudine & facilitate illud operandi, quod sine illis fieri posset, vnde

Dico 3. *habitum acquisitum non modo tribuere facilitatem & promptitudinem potentia ad agendum, sed etiam effectivè & realiter concurrere ad ipsam*

*substantiam seu entitatem actus.* Probatur ex ante dictis, nam omnia fere quæ allata sunt, siue ad probandum habitum non se habere per modum dispositionis, præparantis potentiam ad receptionem actus; siue ad ostendendum habitum non se habere tantum per modum rationis, aut conditionis, aut formæ informantis, sed habere vim aliquam effectiuam in ordine ad actum, satis perspicuè concludunt in habitu admittendam esse vim aliquam actiuam, quæ effectiuè influit cum potentia in ipsum actum entitatiuè spectatum, vt intuenti perspicuum fiet.

Confirmatur, quia cùm facilitas quam tribuit habitus, se teneat ex parte potentiz, non debet considerari ex parte actus: modus aliquis qui ab habitu produci possit, sed tantum substantia & entitas illius, quæ à potentia simulque ab habitu ei inexistente effectiuè & realiter pendeat. Eò vel maximè quia potentia habitu instructa id ipsum facilius exequitur, quod non nisi ægrè se sola præstaret: at hoc est actus ipse secundum substantiam & entitatem spectatus. Ergo etiam habitus concurrat effectiuè ad productionem actus, quoad entitatem spectati.

Quod adhuc suadetur, quia cùm actus concurrat effectiuè ad entitatem habitus, non debet denegari habitui similis virtus ad productionem actus, non quidem eiusdem, sed alterius similis; ad eum modum quo planta producit semen ei simile, à quo ipsa producta est.

Obijcies 1. actus intellectus & voluntatis sunt vitales, ergo habitus non potest effectiuè ad illos concurrere; sequela patet, quia habitus est causa non vitalis; at repugnat causam non vitalem ad effectum vitalem concurrere etie-

**ætiue** : Respondeo consequentiam negandam esse, & illius probationem, nam ex ea sequeretur species intelligibiles & sensibiles cum non sint causæ vitales, non posse effectiue concurrere ad operationes vitales, contra communem omnium sententiam: sequeretur etiam habitus fidei, spei, & charitatis non concurrere effectiue ad actus nostros supernaturales; sicque hos actus totaliter oriri à potentiis naturalibus animæ, quod repugnat fidei.

Sicut ergo species intentionalis, etsi non vitalis, potest concurrere cum oculo ad eliciendam visionem; ita habitus etsi in se non sit vitalis, potest cum potentia vitali quam informat, concurrere effectiue ad actum vitalem. Et ratio est, quia quando duæ causæ simul iunguntur, ut per modum vnius principij totalis aliquem effectum producant, non est necesse ut quidquid est perfectionis in effectu, cuiuslibet ex illis causis seorsim spectatis respondeat; ita ut quælibet possit, etiam separata ab alia, eiusmodi effectum ex parte producere, etsi interdum oppositum contingat. Id patet in exemplis allatis, non enim potest oculus elicere visionem sine specie obiecti, nec species sine visu: Non etiam potest intellectus elicere actum supernaturalem sine habitu, vel auxilio eiusdem ordinis, nec habitus sine intellectu. Et idem dicendum de alijs causis quæ sunt inter se essentialiter subordinatæ in operationibus suis. Quamvis secus dicendum de ijs quæ talem subordinationem non habent, ut patet in duobus hominibus, trahentibus simul aliquod pondus, cuius partem possent singuli seorsim trahere.

Obijcies 2. si habitus acquisitus concurreret non modo ad facilitatem, sed etiam ad enti-



ratem actus, sequeretur per illum dari facultatem simpliciter operandi, non autem tantum facilius operandi; sicque eum non distinguere ab habitibus infusis, qui ex communi Theologorum sententia, tribuunt simpliciter facultatem operandi. Respondeo non sequi, nam etsi habitus acquisitus sit causa ut entitas actus facilius fiat, adeoque ad entitatem illam concurrat effectiue, non tamen tribuit potentie vim simpliciter operandi; quia potentia posset etiam sine habitu acquisito, quamuis non sine difficultate, eundem actum substantialiter spectarum producere. At habitus infusus tribuit simpliciter facultatem eliciendi actum supernaturalem, quia potentia naturalis eo habitu destituta nullo modo potest eiusmodi actum producere, nisi defectus habitus per auxilia actualia eiusdem ordinis suppleatur, ut non semel dictum est.

## A R T I C V L V S VI.

### *De diuisione habituum.*

**H**abitus variis modis diuidi solent, primo in infusos & acquisitos, secundo in speculatiuos & practicos: tertio in virtutes, & non virtutes; quarto in intellectuales, & morales. Verum de hac postrema tantum diuisione cum sit precipua, sola que expansione indigeat, aliquid hic nobis inquirendum est.

Quæritur 1. quot sint habitus intellectuales. Respondeo quinque vulgo assignari ex Arist. 6. Ethic. cap. 3. nempe intellectum, scientiam, sapientiam, prudentiam, & artem. Quæ diuisio non est adæquata, si intelligatur de omnibus

habitus intellectualibus; cum in ea non includantur fides, & opinio quæ sunt habitus ad intellectum spectantes; sicut nec habitus illi qui facultates dicuntur, quales sunt Rhetorica, & Grammatica. Quare accipienda est diuisio de habitibus intellectualibus, quibus homo vtens semper attingit verum; tales enim habitus sunt propriè virtutes intellectuales, cum ex 7. Physic. tex. 17. virtus sit *dispositio perfectæ ad optimum*, & nihil sit melius in intellectu quàm versari infallibiliter circa verum. Vnde eo sensu fides (scilicet humana) & opinio non ponuntur inter habitus intellectuales, cum à vero deficere possint; nec prædictæ facultates, quia cum agant de rebus omnibus in vtriusque partem, à vero deficere possunt.

Cæterum quod prædicta diuisio sit adæquata, si agatur de habitibus quibus per se intellectus perficitur, hoc discursu ostendi potest. Cum bonum intellectus sit verum infallibiliter cognoscere, tunc intellectus est optimè dispositus, quando verum infallibiliter cognoscit, vt sumitur ex sancto Thoma 1. 2. q. 57. art. 1. & 2. at intellectus vel cognoscit vniuersale, vel singulare, si vniuersale, vel illud est per se & immediate cognoscibile; seu ex sola notitia terminorum, & sic habitus intellectus in illud fertur: vel est tantum cognoscibile per medium seu per discursum, quod dupliciter contingere potest, vel ita vt cognoscatur per causas inferiores, quomodo attingitur ab habitu scientiæ, vel per causas superiores, qua ratione habitus sapientiæ ad illud terminatur. Si vero intellectus cognoscit singulare, ad illius cognitionem iuuatur per habitum prudentiæ, si sit aliquid agibile iuxta rectæ rationis præscriptum; aut per habi-

tione acquirat maiorem facilitatem ijs assentiendi. Quare cum per assuetudinē non augeatur potentia ipsa intellectiua, fatendum est in illa produci quemdam habitum, quo magis inclinatur ad assentiendum primis principiis: ad eum modum quo plerumque virtutes habituales ponuntur in voluntate, etsi illa naturaliter in bonum honestum propendeat,

Nota hunc habitum ab alijs intellectualibus supponi, ipsum verò sine ullo alio posse subsistere. Nam cum per illū cognoscamus veritatē primorum principiorum, à quibus omnium scientiarum veritas dependet, cum ipsa ab ijs non pendeat; hinc fit posse reperiri perfectum habitum intellectus sine scientia, sapientia, aliisque habitibus intellectualibus; non tamen aliquem ex illis habitibus sine intellectu, ad cuius saltem veritatem reduci possint.

Dico 2. *Nomine scientia proprie intelligi habitum per veram demonstrationem generatum.* De quo in Logica actum est, ubi ostendimus duplicem esse demonstrationem, & per utramque veram scientiam generari, licet non æquē perfectam.

Hic solum aduerte, scientiam distingui ab habitu intellectus, quòd cum prima principia sint per se euidētia, intellectum conuincunt, adeoque non indigent probari per aliquod medium notius: at scientia versatur circa conclusiones, quæ non sunt per se notæ, nec intellectum conuincunt: quare assumit principia tanquam medium notius, quo ducatur in earum cognitionem.

Dico 3. *Nomine sapientia varia posse significari.* Primò congeriem plurimarum vel omnium scientiarum in eodem homine existentem. Secundo excellentiam cuiuslibet scientiæ vel ar-

tis, quomodo Apelles sapientissimus pictor vocari solet, & Polycletus sapientissimus statuarius. Tertiò magis propriè scientiam omnium excellentissimam; quo sensu Aristoteles Metaphysicam vocat sapientiam, quia superiore Theologiam non agnuit, cui potiori iure titulus sapientiæ debetur.

Vbi aduerte 1. varias tradi conditiones sapientiæ, quæ omnes ad istas quatuor reduci possunt; prima est vt sapientia versetur circa res vniuersalissimas & altissimas; secunda, vt vniuersalissima rerum principia tradat; quia particularia cuiuslibet obiecti principia in scientiis particularibus tradi debent. Tertia, vt iudicium ferat de principijs & conclusionibus aliarum scientiarum, ijsque lucem aliquam & robur conferat. Quarta, vt sit sui gratia, seu vt sit speculatiua: quæ omnes conditiones Metaphysicæ apprimè conueniunt, vt ex suprædictis satis intelligitur.

Aduerte 2. Illud esse discrimen inter sapientiam & scientiam, quòd scientia strictè sumpta versatur tantum circa conclusiones, sapientia vero ex communi sententia, dicitur versari circa principia & conclusiones, adeoque habet simul rationem intellectus & scientiæ: vnde colligi potest sapientiam non esse quintum habitum ab aliis omnino distinctum, eo modo quo intellectus, scientia, prudentia, & ars inter se distinguuntur, sed duos ex illis quatuor habitibus inter se coniunctos.

Dico 4. *Nomine prudentia intelligi habitum cum vera ratione actiuum, circa ea quæ homini bona vel mala sunt.* Id est quo dirigitur homo vt rectè iudicet in iis quæ sibi agenda, vel non agenda sunt, per ordinem ad rectam rationem. Ex quo patet habitum prudentiæ esse in intellectu

practico, eum deliberare & iudicare de rebus agendi ad eiusmodi intellectum spectet.

Quo loco aduerte prudentiam non videri vnum simplicem habitum, iuxta mentem sancti Thomæ 1. 2. q. 57. art. 6. vbi docet post Aristotelem, quatuor virtutes ad prudentiam pertinere, nempe Cabaliam, quæ diligenter inquirit quid & quomodo in quolibet negotio rectè gerendo obseruandum sit; Synesim, quæ iudicat quid agendum sit iuxta legem communem; Gnomem quæ rectum fert iudicium de agendis, quando lex communis defieit, & virtutem quam vocant Præceptiuam, quæ propriè Prudentia vocatur, cuius officium est imperare quod agendum est.

Hoc tamen non caret difficultate, tum quia consultare de mediis, & iudicare de illis siue per legem communem naturalem, aut positivam, siue ex æquo & bono, quando leges illæ defierunt, videntur tantum diuersæ functiones eiusdem habitus. Tum quia non apparet cur necessaria sit in prudentiæ virtus aliqua præceptiua distincta à iudicio.

Dico 5. *Artem esse habitum cum recta ratione effectiuum, seu factiuum.* Ex quo patet artem versari circa effectiorem seu factiorem, quo nomine à nānullis intelligitur operatio transiens in exteriorem materiam, qualis est ars ædificandi: Vnde iuxta illorum sententiam, ars distinguitur à prudentia, quod ars versatur circa materiam transeuntem, prudentia verò circa actiones tantum immanentes.

Verum quia virtutes alia morales, & consequenter ipsa prudentia earum directrix, versantur etiam circa res extornas, vt patet in temperantia, liberalitate, &c. dicendum potius videtur ex mente Philosophi, per effe-

tionem intelligi opus quodcunque externum, ut sit præcisè iuxta regulas artis; sicque effectum ab actione distingui, quod hæc coniuncta est cum electione & rectitudine morali. Quare etsi ars & prudentia in eo conueniant, quòd vtraque versatur circa aliquid particulare & contingens, seu quod potest esse vel non esse; in eo tamen discrepant, quòd ars inspicit tantum rectitudinem operis, non autem rectitudinem operantis, quæ in morali honestate consistit: contrà verò prudentia attendit in suis actionibus rectitudinem moralem, seu bonum ipsius operantis; ita ut nihil præscribat nisi quod rectæ rationi & honestati est conforme. Atque hoc discrimen non leuiter insinuat in allatis definitionibus artis & prudentiæ: ars enim dicitur simpliciter habitus cum recta ratione effectiuus, prudentia verò dicitur habitus cum vera ratione actiuus, circa ea quæ homini bona vel mala sunt; siquidem nihil homini bonum aut malum est, nisi quod morali honestati consentaneum vel incongruum est.

Vnde S. Thomas 1.2. q. 57. art. 4. docet ad prudentiam requiri quòd homo sit bene dispositus circa finem, quod sit per appetitum rectum; & ideo ad prudentiam requiri virtutem moralem per quam sit appetitus rectus; bonum autem artificialium non esse bonum appetitus humani, sed bonum ipsorum operum artificialium, & ideo artem non supponere appetitum rectum. Hincque colligit magis laudari artificem qui volens peccat, quàm qui peccat nolens; magis autem contra prudentiam esse quòd aliquis peccet volens, quàm nolens; quia rectitudo voluntatis est de ratione prudentiæ, non de ratione artis.

Quæritur 3. Quid dicendum sit de habitibus moralibus. Respondeo duobus modis habitum aliquem dici posse moralem, primò quia est elicitivus actus moralis & liberi, quomodo iustitia, temperantia, fortitudo, & vno verbo omnes habitus siue boni siue mali qui resident in voluntate, eamque iuvant ad liberè operandum, dicuntur habitus morales. Secundò quia actus moralis fit ex illius præscripto seu directione, quo sensu prudentia inter habitus & virtutes morales numeratur, etsi subiectivè sit in intellectu, eoque titulo sit habitus intellectualis, ut dictum est. Verùm de virtutibus moralibus ex professo in Idea Ethicæ, Deo fauente, agendum erit.

## CAPVT VI.

## De Relatione.

## ARTICVLVS PRIMVS.

*Quomodo relatio distinguatur à fundamento.*

**T**Ria hic, ex communi sententia, supponenda sunt, 1. accidentia esse duplicis generis: quædam enim ita inhxrent subiecto, ut non dicant ordinem ad aliud subiectum, simili vel diuerso accidente informatum; alia verò ita subiectum afficiunt, ut simul dicant ordinem ad aliud subiectum simili vel diuerso accidente instructum: & quidem accidentia prioris generis dicuntur absoluta, quo in genere sunt candor niuis, nigre-

do corui, & similia: non enim nix est candida, aut coruus niger per respectum ad aliud, sed per se & in se absolute, accidentia verò posterioris generis dicuntur relativa, in quibus numerari solent paternitas, filiatio, similitudo, & fundia.

Supponendum 2. Commune esse omnibus accidentibus dicere *in*, id est inhærere subiecto, relationem verò non modo dicere, *in*, sed etiam dicere *ad*; quatenus ita inhæret subiecto ut illud referat ad aliud, quod non ita intelligi debet, ut relatio quatenus accidens dicat *in*, & quatenus tale accidens, seu ut relatio, non dicat *in*, sed *ad*; siquidem relatio ut relatio, est accidens, adeoque etiam ut relatio debet inhærere subiecto, eo vel maximè quia aliàs non posset per illam subiectum denominari relatum. Quare dicendum relationem & ut accidens, & ut tale accidens inhærere subiecto, sicque utroque modo dicere *in*; id tamen non impedire quin relatio ut relatio, essentialiter dicat *ad*, quia ita afficit subiectum ut illud denominet non in ordine ad se, sed per ordinem ad aliud; ut patet in similitudine quæ secundum totam suam entitatem siue communem accidentis, siue propriam talis accidentis, inest parieti albo; illum tamen sic afficit, ut eum denominet similem, per ordinem ad alium parietem album.

Supponendum 3. multa in relatis solere distinguui, in iis enim reperitur relatio, relationum, correlativum, subiectum, extremum, fundamentum, ratio fundandi, & terminus. Relatio est forma illa qua unum refertur ad aliud, v. c. paternitas, æqualitas, similitudo, &c. relatum seu relatum est illud quod ex relatione, & illius subiecto coalescit, ut pater



qui dicit hominem & paternitatem : correlatiuum est ipsum relatiuum non præcisè , sed vt comparatur cum altero relatiuo , eique respondet , vt pater quatenus respicitur à filio: subiectum est id cui aduenit relatio , eique subternitur , vt homo cui aduenit paternitas: extremum interdum sumitur pro subiecto, non raro tamen per extrema relationis intelliguntur ipsa correlatiua , quatenus habent relationem veluti mediam : fundamentum est id quod est causa seu ratio quare forma illa , quæ dicitur relatio , conuenit subiecto ; vt fundamentum paternitatis est potentia generatiua, quantitas æqualitatis , qualitas similitudinis : ratio fundandi, quæ à nonnullis vocatur fundamentum proximum , est conditiō sine qua relatio non resultat, vt generatio est ratio fundandi relationem paternitatis , & vnitas specifica inter duo alba est ratio fundandi similitudinem inter illa. Tandem vocamus terminum relationis id ad quod relatiuum directè & primò refertur , vt filius est terminus relationis patris. Est autem grauis difficultas, an verum sit quod supponitur in sententia communi iam relata, nimirum relationem esse accidens aliquod realiter distinctum à suo fundamento , v. c. similitudinem ab albedine, æqualitatem à quantitate , & sic de alijs.

Respondeo probabilius mihi semper visum esse, non debere admitti distinctionem realem inter relationem & fundamentum. Probatur 1. argumento illo vulgari, sed non parum efficaci: Nam si relatio diceret entitatem realiter distinctam ab entitate fundamenti, sequeretur ex eo quod vnus paries Lutetix dealbatur, omnia corpora alba & nigra quotquot in toto orbe reperiuntur , nouam realitatem

accipere, & aliam deperdere. Imò quoties musca vel tantillum mouetur, res omnes creatas siue in terra, siue in cœlo existentes, in se recipere realitatem aliquam per quam dicant ordinem propinquitatis, vel distantie ad illam, & amittere aliam realitatem per quam antea eam aliter respiciebant. Quis autem sibi persuadeat, vel ad motum vnus muscæ totum orbem realiter immutari, idque dupliciter; acquirendo nempe vnā entitatem realem, & aliam deperdendo? Hoc sanè fidem nostram superat, cum talis mutationis nulla causa assignari possit, neque vllum indicium.

Probatur 2. Nam si relatio est entitas realis à fundamento distincta, & ab illo producta, vt volunt aduersarij; ergo datur inter fundamentum & relationem relatio causæ & effectus. Hæc autem relatio media inter fundamentum & relationem, vel dicit entitatem realiter distinctam ab entitate fundamenti, vel non; si dicit entitatem distinctam, hæc etiam cum sit effectus, dicet relationem realem ad fundamentum, sicque dabitur progressus in infinitum à nemine admissus: si verò non dicit entitatem distinctam, idem affirmari debet de prima relatione quæ est inter fundamentum & terminum, vt contendimus.

Probatur 3. Nam præcisa quacunque entitate intermedia, duo alba eo ipso quod sunt alba, sunt inter se similia; ergo similitudo non dicit entitatem aliquam ab vtraque albedine distinctam. Antecedens probatur, nam quid est vnum parietem album esse alteri simile? certè aliud nihil quàm hunc esse album, sicut ille est albus; quod verè dici potest modo vterque in eodem gradu albus sit, esto ab ijs tollatur quæcunque alia realitas ab albedine distincta.

distincta. Consequentia iam facile ostenditur, quia frustrà ad similitudinem ponitur entitas ab utroque pariete albo distincta, cum sine illa sint inter se similes.

Nec dicas, duo alba in ea hypothesis fore tantum fundamentaliter similia, non autem formaliter: quæ enim formaliter in aliquo conueniunt, non tantum fundamentaliter, sed etiam formaliter sunt similia, cum nulla perfectior similitudo quàm inter illa reperiri possit: at duo alba formaliter conueniunt in albedine, ergo sunt formaliter similia. Confirmatur, nam ut dux quantitates sint formaliter æquales, nihil aliud requiritur quàm ut quælibet tantum habeat quantitatis, nec plus, nec minus quàm alia; ac proinde relatio æqualitatis nihil est realiter distinctum ab ipsis quantitatibus.

Probatur 4. Nam sicut est relatio similitudinis inter duas albedines, ita & inter duas albedinum similitudines, inter duas paternitates, inter duas æqualitates, &c. Sed similitudo quæ reperitur inter duas similitudines aliasue relationes, non dicit entitatem aliquam ab ipsis relationibus distinctam; quia alioqui res abiret in infinitum; ergo neque relatio similitudinis inter duas albedines, dicit entitatem aliquam realem ab ipsis albedinibus distinctam.

Obiicies 1. ea distinguuntur realiter, quorum vnum potest esse sine alio; sed fundamentum potest existere sine relatione, ut album sine similitudine; ergo relatio distinguitur realiter à fundamento. Respondeo hoc argumento non concludi, relationem esse formam quandam accidentalem aduenientem fundamento, & ab eo realiter distinctam, ut contendunt aduersarij; sed tantum relationem

*Metaph.*

R.

non ita adequatè identificari cum solo fundamento, quin ad illius existentiam requiratur etiam terminus; quod nos vtrò concedimus. Album enim per suammet albedinem, sine alia realitate ipsi inherente, est simile alteri albo; vt tamen dicatur alteri simile, necesse est vt illud existat. Quemadmodum Deus sine vlla entitate sibi adueniente dicitur realiter creator, & conseruator Petri; non tamen sine Petro creato, & conseruato eiusmodi denominationes habere potest. Itaque ad minorem dicimus, fundamentum quidem solum posse existere sine relatione, non tamen fundamentum simul cum termino: vnde ad summum colligitur, relationem adequatè spectatam dicere quid distinctum realiter à fundamento præcisè spectata, non tamen à fundamento simul & termino, de quo est difficultas.

Obiicies 2. Non potest eadem res simul intendi & remitti, sed fieri potest vt intendatur fundamentum & remittatur relatio, vt si sint duo alba vt quatuor, & vnum fiat magis album, tunc enim minor erit inter illa similitudo; Contrà verò fieri potest vt remittatur fundamentum, & relatio intendatur; vt si sint duo alba, vnum vt sex, aliud vt quatuor, & duo gradus albedinis ex illo tollantur, tunc enim maior erit inter illa similitudo. Respondeo maiorem falsam esse, de eadem entitate diuersimode spectata, vt hic concipitur: Nam eò ipso quòd ex duobus æqualiter albis vnum recipit plures gradus albedinis, iam illud est magis album quàm aliud, adeoque est minus illi simile quàm antea, etsi inter vtrumque nulla alia mutatio realis aduenerit. Contrà verò si ex magis albo tollantur quidam gradus albedinis, eò ipso sine alia mutatione reali,

maior erit inter vtrumque similitudo. Confirmatur hæc responsio retorquendo argumentum contra similitudinem, quæ in ratione paternitatis inter duos homines reperitur; fieri enim potest vt paternitas augeatur, & minuatursimilitudo, & è contra illa minuatursimilitudo, & hæc augeatur, vt intuenti perspicuum fiet: & tamen non audent Aduersarii distinctionem realem constituere inter paternitatem, & similitudinem quam fundat cum alia paternitate.

Obiicies 3. Si relatio non distinguitur realiter à fundamento, sequitur relationes omnes quotquot in re aliqua reperiuntur, non modo cum illa identificari, sed etiam inter se; quod tamen videtur absurdum: quia aliàs sequeretur similitudinem & dissimilitudinem entitatiue non distingui. Respondeo hoc totum à nobis concedi, neque esse absurdum si bene intelligatur: siquidem paries albus per eandem albedinem qua est similis parieti albo, est dissimilis nigro, adeoque similitudo & dissimilitudo non distinguuntur realiter ab albedine, quantum est ex parte ipsius, esto dicant aliquam distinctionem ratione termini. Eò vel maximè quia dummodo maneant duo parietes albi, & vnus niger, quacunque alia entitate seposita, semper verum erit parietem album esse similem albo, & dissimilem nigro.

Obiicies 4. Quando producitursecundus paries albus, vel prior recipit de nouo aliquam realitatem vel non; hoc secundum dici non potest, quia sequeretur relationem nihil esse; quod si primum dicatur, ergo relatio distinguitur realiter à pariete cui de nouo aduenit. Respondeo priorem parietem in eo casu nullam nouam realitatem in se reci-

pere, non tamen inde sequi relationem absolutè nihil esse, sed tantum nihil esse distinctum realiter à fundamento & termino. Nec dicas parietem album accipere de nouo esse respectuum, cum antea haberet tantum esse absolutum: Nam illud idem esse absolutum manens in se realiter immutatum, incipit esse etiam respectuum, eò ipso quod alius paries dealbatur. Hoc enim præcise sufficit vt primus paries dicatur secundo similis, quia iam est albus sicut ille, cum antea tantum esset albus.

Obijcies tandem hac ratione prædicamentum relationis omnino euertere; quia si relatio est idem cum fundamento, hinc sequitur relationem identitatis non distingui à substantia, nec relationem æqualitatis à quantitate, nec relationem similitudinis à qualitate, & ita frustra dari prædicamentum relationis ab alijs distinctum. Respondeo non magnum esse incommodum si id totum concedamus, cum numerus prædicamentorum sit valde arbitrarie, vt alibi dictum est. Potest tamen negari consequentia, quia etsi relatio identificetur cum entitatibus aliorum prædicamentorum, id non impedit quin entitates illæ, vt per se dicunt ordinem aliquem & respectum ad alias, prædicamentum ab ijs distinctum constituent; sicut actio & passio, etsi Physicè sint vna & eadem entitas, constituunt duo prædicamenta distincta, iuxta diuersum modum quo considerantur.

## ARTICVLVS II.

*De subiecto relationis.*

**Q**UÆRITUR 1. An relatio identitatis fundetur immediatè in substantia. Respondeo affirmatiuè, quod probatur 1. quia sicut vna quantitas per se ipsam fundat æqualitatem cum alia quantitate, & vna qualitas similitudinem cum alia qualitate; ita à pari vna substantia potest per se ipsam fundare relationem identitatis cum alia substantia.

Probatur 2. Duplici exemplo, alterum est rerum omnium creatarum, quæ immediatè per suam substantiam dicunt relationem dependentiæ ad Deum; alterum est filiationis creatæ; quæ immediatè fundatur in ipsa substantia personæ genitæ; quamuis enim in patre creato sit potentia generatiua, in qua relatio paternitatis aliquo modo dici potest fundari; dici tamen nequit in filio esse quandam potentiam passiuam per quam aptus sit generari; cum substantia illius secundum se sit producta, dicatque ordinem intrinsecum dependentiæ ad principium generans.

QUÆRITUR 2. An relatio possit esse subiectum relationis. Respondeo affirmatiue quod probatur 1. Nam sicut vnum album habet relationem similitudinis ad aliud album, ita vna paternitas habet relationem similitudinis ad aliam paternitatem: ambæ enim sunt similes, sicut duo alba sunt similia. Quare sicut prior relatio similitudinis funda-

tur in albedine, quæ est accidens absolutum; ita posterior fundatur in paternitate, quæ est accidens respectuum; sicque vna relatio est subiectum alterius.

Probatnr 2. Nam cum ex Arist. 3. Metaph. cap. 15. primum genus relationis fundetur in vnitatem, vt relatio identitatis inter duos homines, & relatio similitudinis inter duas quantitates; sanè sicut Petrus refertur ad Paulum, quia continet cum illo essentialiter in ratione hominis; ita vna paternitas refertur ad aliam paternitatem, & vna similitudo ad aliam similitudinem, propter conuenientiam specificam quam habet cum illa.

Obiicies, si vna relatio fundat aliam, hæc tertiam fundare poterit, sicque res in infinitum abibit. Respondeo hoc argumento valde premi eos qui putant relationem esse entitatem realiter distinctam à fundamento, coguntur enim multiplicare entitates reales in infinitum: in nostra verò sententia progressus ille non habet locum; sicut enim dicimus duo alba esse similia per seipsa, ita & duas paternitates seipsis similes esse profiteamur.

Quæritur 3. An sint in Deo relationes reales respectu creaturarum, v. c. relationes creatoris, conseruatoris, & domini. Respondeo 1. in communi sententia quæ relationem distinguit realiter à fundamento, negandum esse nomina creatoris, conseruatoris, & similia dicere relationem realem in Deo respectu creaturarum existentium. Ratio est manifesta, quia, iuxta illam sententiam, sequeretur Deum recipere in tempore entitatem aliquam realem, adeoque realiter componi & mutari; quod planè repugnat diuinæ simplicitati, & immutabilitati.



Nequedicas cum Gilberto Porretano, relationem prædictam etsi realem, & realiter distinctam à Deo, non ponere compositionem aut mutationem in illo, quia non inhæret illi, sed ei assistit: hoc enim gratis confictum est, quia si relatio illa est accidens, ea debet conaturaliter inhære alicui subiecto; & cum Deum realiter denominet, non alteri quam Deo inhære potest, sicut paternitas non potest alteri inhære quam ei quem denominat patrem. Quare eò ipso quod Deus est realiter creator, sequitur eum esse realiter compositum, & mutatum.

Respondeo 2. Iuxta sententiam quam ut probabiliorē sequuti sumus, de indistinctione relationis à fundamento & termino, posse poni in Deo relationem realem in tempore respectu creaturarum. Et sanè ex una parte non minus verè & realiter Deus est creator omnium rerum quas produxit, quam homo est pater filij quem genuit: quare cum pater in creatis dicat veram relationem ad filium, negari non potest quin Deus dicat veram relationem ad creaturas, si id aliunde non repugnat. Ex alia verò parte nullum sequitur incommodum in nostra sententia, si ponantur relationes reales in Deo respectu creaturarum; quia cum relatio creatoris nihil aliud dicat realiter quam Deum per potentiam suam creantem, connotando res ad extra productas: hinc manifestum est relationem illam posse in tempore advenire Deo, sine vlla intrinseca illius compositione, aut mutatione. Quia tamen Theologi communiter docent, relationem prædicamentalem non poni in Deo respectu creaturarum, cum sit ordinis infinite superioris, & ab ijs omnino independentis, fa-

tendum est ad maiorem Dei perfectionem spectare, ut talis relatio ab eo excludatur, si verum est, ut vulgo supponitur; ea non referri inter se prædicamentaliter, quæ non sunt eiusdem ordinis. An autem hæc suppositio admitenda sit, adeo ut vel sola ordinis diuersitas sufficiat ad excludendam relationem prædicamentalem, aliorum sit iudicium.

### ARTICVLVS III.

#### *De termino relationis.*

**Q**UÆRITUR 1. An ad relationem necessario requiratur terminus realiter existens.

Respondeo & Dico 1. *Certum esse relationem transcendentem non exigere necessario terminum realiter existentem.* Probatur, quia constat haberi veram scientiam de rosa in hieme, imò & veram scientiam non haberi ex communi sententia, nisi de vniuersalibus, quæ ut sic realiter non existunt. Constat etiam phantasiam, memoriam, imaginem & similia dicere ordinem ad res non existentes quas repræsentant.

Negari tamen non potest quin aliqua relata transcendentalia necessario exigant terminum actu existentem, qualia sunt vnio extremorum, actio productiua, aliaque eiusmodi; non enim dari potest vnio quin extrema vnita existant, nec actio productiua quin effectus productus existat.

Dico 2. *Relationem prædicamentalem ex natura sua requirere terminum actu existentem.* Probatur primo: Nam ex Aristotele relata prædicamentalia sunt simul natura, ita ut se mutuo ponant & tollant; seu posito vno ponatur alterum, ablato vno tollatur alterum, ut patet.

exemplo patris & filij. Nam si est pater, est filius; si non est pater, non est filius, & vice versa. Cum ergo vnum relatum inferat existentiam alterius, hinc perspicuum est relationem non posse subsistere quin illius terminus existat.

Probatur 2. Nam illud poni solet discrimen inter relationem transcendentalem, & prædicamentalem, quod transcendentalis per se intendi & produci potest, vt pater in scientia, alijsque rebus absolutis quæ transcendentaliter ad aliud referuntur; prædicamentalis vero non est per se intenta à natura, non enim per se producitur, sed per accidens ad productionem alterius, iuxta illud vulgatum ex 5. *Physic. ad relationem non datur per se motus*: Vnde alterius, nempe termini coexistentiam necessario expectat, vt patet in albo quod denominatur quidem album, quamdiu habet albedinem; at propriè non dicitur alteri albo simile, nisi album illud existat.

Obijcies, terminus relationis prædicamentalis est merus terminus, vt dictum est in Logica; at potest aliquid esse merus terminus, etsi actu non existat: quia terminare dicit tantum respici ab alio, quod merè extrinsecum est respectu termini, & nihil ponit in illo. Respondeo etsi terminus relationis prædicamentalis præcisè vt terminus, non debeat necessario existere; aliunde tamen requiritur existentia illius, cum relatio ex eius positione veluti resultet, vt dictum est.

Quæritur 2. An necessaria sit distinctio realis inter fundamentum, & terminum relationis. Respondeo affirmatiuè, nam non est

relatio realis nisi inter duo correlatiua quæ se mutuo respiciunt, & sibi inuicem realiter opponuntur; quare quàm certum est idem non opponi realiter sibi ipsi, tam certum est inter fundamentum & terminum, quorum illud se tenet ex parte vnius correlatiui, & hic ex parte alterius, esse distinctionem realem.

Confirmatur, quia relatio est habitudo vnius ad aliud, ergo ad illam requiritur vnum & aliud, nec sufficit vnum & idem, adeoque versatur inter duo extrema realiter distincta.

Obijcies 1. Illa est relatio realis quæ competit alicui, nemine cogitante; sed nemine cogitante quælibet res habet relationem identitatis ad seipsam, sicut similitudinis, aut diuersitatis ad aliam: ergo talis relatio est realis, esto fundamentum & terminus idem sint. Respondeo minorom falsam esse, nam etsi quælibet res sit idem cum seipsa non tamen habet verum & realem respectum ad seipsam: quia respectus realis est ordo vnius ad aliud, & inter vtrumque debet esse realis oppositio; quòd de eodem dici nequit, vt perspicuum est.

Obijcies 2. Si Deus poneret eandem albedinem in duobus parietibus, illi essent inter se realiter similes, & tamen tunc fundamentum non distingueretur realiter à termino; ergo falsum est quòd relatio realis exigit distinctionem realem inter fundamentum & terminum. Respondeo in eo casu duos parietes non fore realiter similes, vt falso supponitur. Nam sicut ex communi sententia Theologorum, personæ diuinæ non dicuntur realiter similes ob identitatem naturæ; ita si duo parietes diuinitus essent infor-

mati eadem albedine, talis identitas non sufficeret ut dicerentur realiter similes quia potius ut sic, essent quid vnum & idem. Accedit quod hic negamus esse relationem realem, eiusdem ad seipsum: ac quamvis inter illos parietes esset relatio realis, non inde sequeretur esse relationem realem eiusdem ad seipsum; siquidem illi parietes essent inter se realiter distincti, non obstante identitate albedinis.

• **Quæritur 3.** Num subiectum per vnam & eandem relationem referatur ad plures terminos:

**RESPONDEO & dico 1.** *Diuerſas esse relationes quando termini diuersimodè respiciuntur.* Probat, nam in sententia communi, homo habet aliam relationem ad parentem suum à quo genitus est, aliam specie distinctam ad filium quem genuit; cum per illam constituitur filius, & per hanc pater. Verum maior est difficultas, an in eodem subiecto sint plures relationes numero distinctæ, respectu diuersorum terminorum qui eodem modo respiciuntur, v. c. tot paternitates distinctæ in patre, quot sunt filij ab eo geniti. Itaque

**Dico 2.** *Multiplicandas esse relationes iuxta varietatem terminorum, si illi non sint inter se connexi aut subordinati.* Cum enim relatio nihil aliud sit à parte rei quàm denominatio quædam respectiua, orta in subiecto ex coexistentia extremi, hiæ fit ut in subiecto tot ponendæ sint relationes, quot extrema distincta & minime connexa illi coexistere incipiunt: quia totidem denominationes relationum inter illa exoriantur. Vnde pater habet aliam relationem ad filium quem primò genuit, aliam ad secundò genitum, &c.

Obijciat ex S. Thoma 3. parte, quæst. 35. art. 5. filium respicere eadem relatione patrem & matrem. Respondeo id non pugnare contra assertionem nostram, quia excepimus terminos inter se connexos, quales sunt pater & mater in ordine ad filium. Cum enim eos respiciat tanquam vnicum principium adæquatum suæ generationis, sitque idem filius respectu vtriusque, consequenter videtur eos respicere vnica totali relatione filiationis; ita vt non sit nisi partialis & inadæquata relatio respectu vnius parentis, quando alter interijt.

Neque hoc mirum videri debet, quia cum non distinguamus relationem ab extremis; sicut concipimus oriri denominationem relationis inter vnum extremum & aliud; ita intelligi potest eam oriri inter vnum extremum & duo alia inter se connexa: adeo vt relatio sit adæquata respectu vtriusque simul sumpti, inadæquata verò respectu alterutrius.

#### ARTICVLVS IV.

*An relatio tendat ad terminum vt absolutum, vel vt respectuum.*

**P**RAEMONEO. 1. Cum in pariete albo v. c. duo considerari possint, primò quod sit albus, seu quod habeat albedinem, quæ est accidens absolutum, & fundamentum similitudinis. Secundo quod sit similis alteri parieti albo, quomodo est quid respectuum; quæstionem esse quam ex his rationibus terminet se-

lationem alterius parietis albi, qui ad ipsam tanquam consimilis refertur; an ratione fundamenti, seu quatenus est albus, an verò ratione relationis, seu quatenus est similis.

Præmoneo 2. Perspicuum esse in relatis non mutuis relationem terminari ad absolutum, non ad respectuum. Quia cum terminus ad quem tendit relatio, non habeat propriam relationem, adeoque sit merè absolutus, relatio non videtur posse terminari ad illum ratione alicuius relatiui, sed tantum ratione absoluti, quidquid nonnulli comminiscantur. Dubium est ergo quid sentiendum sit quoad hanc difficultatem, in relatis mutuis.

Respondco in relatis mutuis relationem terminari ad absolutum, non ad respectuum. Probatur 1. ex iam dictis, nam cum in relatis non mutuis relatio terminetur ad terminum absolutum, hinc euidenter colligitur etiam in mutuis terminari ad absolutum: Siquidem omnino per accidens est ad rationem terminandi, quòd terminus sit correlatiuus, seu quòd fundet relationem ad relatiuum à quo respicitur; sicut per accidens est quòd ego videam eum qui videt me.

Probatur 2. Quia illud terminat relationem ad quod relatiuum per se & directè refertur; atqui relatiuum per se & directè refertur ad absolutum, non ad respectuum, ergo &c. Maior & consequentia perspicue sunt: probatur minor, nam paries albus A refertur directè & per se ad parietem B, vt albus est, quia sic est illi similis; ergo relatio primi parietis terminatur ad alium, secundum entitatem illius absolutam.

Probatur 3. Nam si relatio formaliter terminaretur ad relatiuum, essentia illius in-

telligi non posset, sine correlatiuo, vt correlatiuum est; at hoc dici nequit, ergo non terminatur ad relatiuum, sed ad absolutum. Maior perspicua est, cum essentia relationis sumatur per ordinem ad terminum formalem. Minor vero ostenditur, quia vt essentiam paternitatis intelligas, sufficit quod eam concipias in ordine ad hominem qui genitus est; nec vlllo modo requiritur vt intelligas in homine genito esse relationem filiationis, quia vicissim respicit eum à quo genitus est; cum præcisè de ratione patris, vt pater est, sit tantum vt aliquis ab eo sit genitus, quocumque modo ille se habeat ad suum progenitorem.

Obijcies 1. ex Aristotele cap. de relatis, relata referri ad ea quæ recipiuntur, vnde sequitur relationem terminari formaliter ad respectiuum, non ad absolutum. Verum neganda est hæc consequentia, Aristoteles enim intendit tantum docere, vt relata dicantur ad conuertentiam, illud obseruandum esse vt explicentur per terminos correlatiuos, quia si loco domini ponatur homo, non fiet reciprocatio, non enim dicimus hominem esse serui hominem, vel seruam esse hominis seruum. Hinc autem male colligitur relationem domini terminari formaliter ad seruum, vt seruus est, seu vt refertur ad dominum: quia etsi repugnet terminum dici ad conuertentiam, nisi vt correlatiuum; nihil tamen impedit quin possit præcisè terminare relationem oppositam, secundum rationem absolutam, vt probatum est.

Obijcies 2. Relata vt relata sunt simul natura: at non essent simul natura, si relatio



terminaretur ad absolutum, non ad relatiuum; ergo terminatur ad relatiuum. Maior est Aristotelis loco citato: minor verò probatur: nam si pater refertur ad filium, non vt filium, sed vt est homo genitus ab illo, hinc sequitur patrem vt patrem, esse simul natura cum homine vt genito, & consequenter esse priorem natura filio vt filio; siquidem prius est natura hominem esse genitum ab alio, quàm in eo resultare relationem filiationis ad illum. Respondeo negando minorem, & ad probationem illius dicendum est patrem, non vt patrem, sed vt hominem generantem referri ad filium, vt est homo genitus, tum verò ex horum positione veluti resultare relationem paternitatis in homine generante, simulque relationem filiationis in homine genito; sicque patrem vt patrem, & filium vt filium, esse simul natura.

Obijcies 3. Relationes diuinæ terminantur ad relatiuum, non ad absolutum; ergo idem dicendum est de relationibus creatis. Antecedens certum est, quia cum inter personas diuinas nulla sit distinctio nisi penes relationes, hinc manifestè sequitur eas se mutuo respicere sub ratione relatiua, & per ipsas relationes mutuos respectus terminare. Consequentia verò probatur, quia eadem est ratio de relationibus diuinis & creatis, quoad rationem referendi, & terminandi. Respondeo concessio antecedente negandam esse consequentiam, & ratio discriminis est, quia relationes diuinæ sunt substantiales, & per se subsistentes, ac proinde nullum habent fundamentum, præter se ipsas, quo possint terminare relationem op.

positam: at vero relationes creatæ cū sint accidentia quædam, ex fundamento & termino quodammodo resultantia, possunt per illud fundamentum relationes oppositas terminare.

## CAPVT VII.

### De actione & passione.

#### ARTICVLVS PRIMVS.

##### *De Natura actionis, & passionis.*

**P**RÆMONEO agendum esse hoc loco de actione & passione, licet de ijs in Physica tractari soleat. Cū enim ad Categorias spectent, quæ sunt considerationis Metaphysicæ, earum tractatio hic prætermitti non debuit: præsertim cū supra de causis actum sit. Itaque

Quæritur 1. Quid sit actio. Respondeo actionem iuxta ea quæ tradit Aristot. 3. Physic. cap. 3. vulgò definiri, *actum agentis, ut agent est*; vbi particula *actus*, habet locum generis, & distinguit actionem à re qualibet quæ non est actus. Dicitur verò *actus agentis*, vt distinguatur à passione quæ est actus patientis. Additur *ut agent est*, quia actio non est primum principium seu virtus agendi, sed exercitium talis virtutis, seu id quo formaliter in actu secundo constituitur; quòd agendo de causis, causalitatem agentis esse diximus.

Quæritur 2. quid sit passio. Respondeo passionem definiri *actum patientis, ut patiens est*, quibus verbis passio distinguitur formaliter ab actione, quia ut ait Arist. cap. citato tex. 22. *huius in hoc, & huius ab hoc actum esse ratione diversa sunt*: vocat enim actionem *actum huius in hoc*, id est agentis in patientem, & passionem *actum huius ab hoc*, id est patientis ab agente; & eos actus dicit inter se ratione, seu formaliter distingui.

Vbi nota 1. actionem & passionem non esse duas entitates realiter inter se distinctas, sed unicam sub diuersis formalitatibus iam dictis conceptam. Calefactio enim ut est aquæ passio, non minus potest per se immediatè pendere ab igne, adeoque sine vllâ actione realiter distincta, quàm calefactio ut actio, ab eo immediatè pendere dicatur. Confirmatur, nam si actio esset entitas realiter distincta à passione, esset propriè principium & causa illius, & consequenter per aliquam causalitatem distinctam, adeoque & per nouam actionem eam deberet producere, quod nimis absurdum est.

Nota 2. actionem & passionem non distingui realiter à motu, sed tantum ratione. Ita Aristoteles loco citato, & probatur, siquidem eadem entitas dicitur actio, ut fluit ab agente, passio, ut recipitur in patiente, & motus, ut est tendentia ad terminum: v. c. calefactio ut oritur ab igne calefaciente, dicitur actio, ut recipitur in ligno calefacto, dicitur passio, ut autem est via ad calorem sensim productum, est motus.

Nota 3. actionem esse quid distinctum ab agente secundum se spectato, & ab effectu qui per illam producitur; ab illo quidem, quia

Obijcies 4. perfectiones sunt subiectivæ in rebus quas perficiunt; at actio est perfectio agentis, ergo est in illo. Respondeo maiorem esse veram de perfectionibus intrinsicis, non autem de extrinsecis, cuiusmodi est actio transiens; ignis enim dum aquam calefacit, non seipsum perficit, sed aquam quæ, ut est subiectum caloris ex eaeducti, ita & ipsius educationis.

Obijcies 5. si actio transiens non est in agente, nonne congruentius diceretur eam esse in termino seu effectu producta, quàm in subiecto? Respondeo negativè, quia ut hoc fieret, effectus deberet esse prior actione, aliter enim non posset eam recipere; at tantum abest ut sit prior, quin potius est posterior, cum ea mediante producat.

## ARTICULVS II.

### *De coniunctione agentis ad patientem.*

**Q**UÆRITUR 1. an agens debeat esse proximè coniunctum subiecto in quod agit, idque vel immediate tam suppositi quàm virtutis; quomodo ignis coniunctus est ligno in quod agit, tam per suam substantiam, quàm per calorem ipsi naturaliter insitum; vel saltem immediate virtutis, quomodo sol coniunctus est rebus hisce inferioribus, in quas per lucem aliasque qualitates operatur; et si celo tantum realiter sit præsens.

Respondeo alteram ex his præsentis in causis ordinis naturalis, spectata vi naturæ, imò & absolutè necessariam esse. Prior pars patet experientia, cum videamus agentia creata

coniuncta esse vel quoad suppositum & virtutem, vel saltem quoad virtutem à se diffusam, subiectis in quæ agunt. Vnde cum habeant virtutem agendi limitatam, efficacius agunt per se loquendo, in corpora proxima, quàm in remota; eorumque virtus quo latius diffunditur, eo magis languescit, & tandem omnino extinguitur, nullumque effectum extra certam & determinatam spheram producant.

Obijcies magnetem agere in ferrum distans, Remoram sistere magnum nauigium, fascinantibus visu ludere puerulos, & agnos quos attentius inspiciunt; aliaque similia quæ ostendunt non requiri coniunctionem agentis cum patiente ad operandum. Respondeo has & similes experientias nullius esse momenti, cum certum sit dum res agunt in distans, ab iis fluere qualitates aliquas occultas per quas effectus suos producant; vt ex eo manifestum est, quod eiusmodi effectus per interpositionem alicuius corporis facile impediri possunt, cuius tamen oppositum contingeret, si actio fieret immediate in distans.

Posterior pars ostenditur, quia si causa naturalis nec per se, nec per suam virtutem attingat patiens, nec etiam effectum in eo productum attingere poterit, adeoque illius causa Physica non erit, sed ad summum moralis, quatenus Deus solus ad præsentiam illius effectum producat. Confirmatur, nam intelligi non potest quod causa aliqua operetur in distans, nisi aliquid in illud immittat, sicque sit illi saltem virtualiter præsens: si enim nihil immittit, eodem modo se habet respectu illius ac antea, adeoque non magis potest aliquid in eo causare quam prius.

Quæritur 2. an agens naturale possit agere

relatio realis nisi inter duo correlatiua quæ se mutuo respiciunt, & sibi inuicem realiter opponuntur; quare quàm certum est idem non opponi realiter sibi ipsi, tam certum est inter fundamentum & terminum, quorum illud se tenet ex parte vnius correlatiui, & hic ex parte alterius, esse distinctionem realem.

Confirmatur, quia relatio est habitudo vnius ad aliud, ergo ad illam requiritur vnum & aliud, nec sufficit vnum & idem, adeoque versatur inter duo extrema realiter distincta.

Obijcies 1. Illa est relatio realis quæ competit alicui, nemine cogitante; sed nemine cogitante qualibet res habet relationem identitatis ad seipsam, sicut similitudinis, aut diuersitatis ad aliam: ergo talis relatio est realis, esto fundamentum & terminus idem sint. Respondeo minorom falsam esse, nam etsi qualibet res sit idem cum seipsa non tamen habet verum & realem respectum ad seipsam: quia respectus realis est ordo vnius ad aliud, & inter vtrumque debet esse realis oppositio; quòd de eodem dici nequit, ut perspicuum est.

Obijcies 2. Si Deus poneret eandem albedinem in duobus parietibus, illi essent inter se realiter similes, & tamen tunc fundamentum non distingueretur realiter à termino; ergo falsum est quòd relatio realis exigit distinctionem realem inter fundamentum & terminum. Respondeo in eo casu duos parietes non fore realiter similes, ut falso supponitur. Nam sicut ex communi sententia Theologorum, personæ diuinæ non dicuntur realiter similes ob identitatem naturæ; ita si duo parietes diuinitus essent infor-

mati eadem albedine, talis identitas non sufficeret ut dicerentur realiter similes quia potius ut sic, essent quid vnum & idem. Accedit quòd hic negamus esse relationem realem, eiusdem ad seipsum: at quamvis inter illos parietes esset relatio realis, non inde sequeretur esse relationem realem eiusdem ad seipsum; siquidem illi parietes essent inter se realiter distincti, non obstante identitate albedinis.

Quæritur 3. Num subiectum per vnam & eandem relationem referatur ad plures terminos:

RESPONDEO & dico 1. *Diversas esse relationes quando termini diuersimodè respiciuntur*: Probat, nam in sententia communi, homo habet aliam relationem ad parentem suum à quo genitus est, aliam specie distinctam ad filium quem genuit; cum per illam constitutur filius, & per hanc pater. Verùm maior est difficultas, an in eodem subiecto sint plures relationes numero distinctæ, respectu diuersorum terminorum qui eodem modo respiciuntur, v. c. tot paternitates distinctæ in patre, quot sunt filij ab eo geniti. Itaque

Dico 2. *Multiplicandas esse relationes iuxta varietatem terminorum, si illi non sint inter se connexi aut subordinati*. Cum enim relatio nihil aliud sit à parte rei quàm denominatio quædam respectiua, orta in subiecto ex coexistentia extremi, hinc fit ut in subiecto tot ponendæ sint relationes, quot extrema distincta & minimè connexa illi coexistere incipiunt: quia totidem denominationes relatiuæ inter illa exoriuntur. Vnde pater habet aliam relationem ad filium quem primò genuit, aliam ad secundo genitum, &c.

Obijciēs ex S. Thoma 3. parte, quæst. 35. art. 5. filium respicere eadem relatione patrem & matrem. Respondeo id non pugnare contra assertionem nostram, quia excepimus terminos inter se connexos, quales sunt pater & mater in ordine ad filium. Cum enim eos respiciat tanquam vnicum principium adæquatum suæ generationis, sitque idem filius respectu vtriusque, consequenter videtur eos respicere vnica totali relatione filiationis; ita vt non sit nisi partialis & inadæquata relatio respectu vnius parentis, quando alter interiit.

Neque hoc mirum videri debet, quia cum non distinguamus relationem ab extremis; sicut concipimus oriri denominationem relatiuam inter vnum extremum & aliud; ita intelligi potest eam oriri inter vnum extremum & duo alia inter se connexa: adeo vt relatio sit adæquata respectu vtriusque simul sumpti, inadæquata verò respectu alterutrius.

#### ARTICVLVS IV.

*An relatio tendat ad terminum vt absolutum, vel vt respectuum.*

**P**RAMONEO. I. Cum in pariete albo v. c. duo considerari possint, primò quod sit albus, seu quod habeat albedinem, quæ est accidens absolutum, & fundamentum similitudinis. Secundo quòd sit similis alteri parieti albo, quomodo est quid respectuum; quæstionem esse quam ex his rationibus terminet re-



lationem alterius parietis albi, qui ad ipsum tanquam consimilis refertur; an ratione fundamenti, seu quatenus est albus, an verò ratione relationis, seu quatenus est similis.

Præmonco 2. Perspicuum esse in relatis non mutuis relationem terminari ad absolutum, non ad respectuum. Quia cum terminus ad quem tendit relatio, non habeat propriam relationem, adeoque sit merè absolutus, relatio non videtur posse terminari ad illum ratione alicuius relatiui, sed tantum ratione absoluti, quidquid nonnulli comminiscantur. Dubium est ergo quid sentiendum sit quoad hanc difficultatem, in relatis mutuis.

Respondeo in relatis mutuis relationem terminari ad absolutum, non ad respectuum. Probatur 1. ex iam dictis, nam cum in relatis non mutuis relatio terminetur ad terminum absolutum, hinc euidenter colligitur etiam in mutuis terminari ad absolutum: Siquidem omnino per accidens est ad rationem terminandi, quòd terminus sit correlatiuus, seu quòd fundet relationem ad relatum à quo respicitur; sicut per accidens est quòd ego videam eum qui videt me.

Probatur 2. Quia illud terminat relationem ad quod relatum per se & directè refertur; atqui relatum per se & directè refertur ad absolutum, non ad respectuum, ergo &c. Maior & consequentia perspicue sunt: probatur minor, nam paries albus A refertur directè & per se ad parietem B, vt albus est, quia sic est illi similis; ergo relatio primi parietis terminatur ad alium, secundum entitatem illius absolutam.

Probatur 3. Nam si relatio formaliter terminaretur ad relatum, essentia illius in-

telligi non posset sine correlatiuo, vt correlatiuum est; at hoc dici nequit, ergo non terminatur ad relatiuum, sed ad absolutum. Maior perspicua est, cum essentia relationis sumatur per ordinem ad terminum formalem. Minor vero ostenditur, quia vt essentiam paternitatis intelligas, sufficit quod eam concipias in ordine ad hominem qui genitus est; nec vilo modo requiritur vt intelligas in homine genito esse relationem filiationis, quia vicissim respicit eum à quo genitus est; cum præcisè de ratione patris, vt pater est, sit tantum vt aliquis ab eo sit genitus, quocumque modo ille se habeat ad suum progenitorem.

Obijcies 1. ex Aristotele cap. de relatis, relata referri ad ea quæ reciprocantur, vnde sequitur relationem terminari formaliter ad respectiuum, non ad absolutum. Verum neganda est hæc consequentia, Aristoteles enim intendit tantum docere, vt relata dicantur ad conuertentiam, illud observandum esse vt explicentur per terminos correlatiuos, quia si loco domini ponatur homo, non fiet reciprocatio, non enim dicimus hominem esse serui hominem, vel seruam esse hominis seruum. Hinc autem male colligitur relationem domini terminari formaliter ad seruum, vt seruus est, seu vt referatur ad dominum: quia etsi repugnet terminum dici ad conuertentiam, nisi vt correlatiuum; nihil tamen impedit quin possit præcisè terminare relationem oppositam, secundum rationem absolutam, vt probatum est.

Obijcies 2. Relata vt relata sunt simul natura: at non essent simul natura, si relatio

terminaretur ad absolutum, non ad relatiuum; ergo terminatur ad relatiuum. Maior est Aristotelis loco citato: minor verò probatur: nam si pater refertur ad filium, non vt filium, sed vt est homo genitus ab illo, hinc sequitur patrem vt patrem, esse simul natura cum homine vt genito, & consequenter esse priorem natura filio vt filio; siquidem prius est natura hominem esse genitum ab alio, quàm in eo resultare relationem filiationis ad illum. Respondeo negando minorem, & ad probationem illius dicendum est patrem, non vt patrem, sed vt hominem generantem referri ad filium, vt est homo genitus, tum verò ex horum positio, ne veluti resultare relationem paternitatis in homine generante, simulque relationem filiationis in homine genito; sicque patrem vt patrem, & filium vt filium, esse simul natura.

Obijcies 3. Relationes diuinæ terminantur ad relatiuum, non ad absolutum; ergo idem dicendum est de relationibus creatis. Antecedens certum est, quia cum inter personas diuinas nulla sit distinctio nisi pene relationes, hinc manifestè sequitur eas se mutuo respicere sub ratione relatiua, & per ipsas relationes mutuos respectus terminare. Consequentia verò probatur, quia eadem est ratio de relationibus diuinis & creatis, quoad rationem referendi, & terminandi. Respondeo concessio antecedente negandam esse consequentiam, & ratio discriminis est, quia relationes diuinæ sunt substantiales, & per se subsistentes, ac proinde nullum habent fundamentum præter se ipsas, quo possint terminare relationem op.

positam: at verò relationes creatæ cùm sint accidentia quædam, ex fundamento & termino quodammodo resultantia, possunt per illud fundamentum relationes oppositas terminare.

## CAPVT VII.

### De actione & passione:

#### ARTICVLVS PRIMVS.

#### *De Natura actionis, & passionis.*

**P**RÆMONEO agendum esse hoc loco de actione & passione, licet de ijs in Physica tractari soleat. Cùm enim ad Categorias spectent, quæ sunt considerationis Metaphysicæ, earum tractatio hic prætermitti non debuit: præsertim cùm suprà de causis actum sit. Itaque

Quæritur 1. Quid sit actio. Respondeo actionem iuxta ea quæ tradit Aristot. 3. Physic. cap. 3. vulgò definiri, *actum agentis, ut agens est*; vbi particula *actus*, habet locum generis, & distinguit actionem à re qualibet quæ non est actus. Dicitur verò *actus agentis*, vt distinguatur à passione quæ est actus patientis. Additur *ut agens est*, quia actio non est primum principium seu virtus agendi, sed exercitium talis virtutis, seu id quo formaliter in actu secundo constituitur; quòd agendo de causis, causalitatem agentis esse diximus.

Queritur 2. quid sit passio. Respondeo passionem definiri *actum patientis, ut patiens est*, quibus verbis passio distinguitur formaliter ab actione, quia ut ait Arist. cap. citato tex. 22. *huius in hoc, & huius ab hoc actum esse ratione diversa sunt*: vocat enim actionem *actum huius in hoc*, id est agentis in patientem, & passionem *actum huius ab hoc*, id est patientis ab agente; & eos actus dicitur inter se ratione, seu formaliter distingui.

Vbi nota 1. actionem & passionem non esse duas entitates realiter inter se distinctas, sed unicam sub diuersis formalitatibus iam dictis conceptam. Calefactio enim ut est aquæ passio, non minus potest per se immediatè pendere ab igne, adeoque sine vllâ actione realiter distincta, quàm calefactio ut actio, ab eo immediatè pendere dicatur. Confirmatur, nam si actio esset entitas realiter distincta à passionem, esset propriè principium & causa illius, & consequenter per aliquam causalitatem distinctam, adeoque & per nouam actionem eam deberet producere, quod nimis absurdum est.

Nota 2. actionem & passionem non distingui realiter à motu, sed tantum ratione. Ita Aristoteles loco citato, & probatur, siquidem eadem entitas dicitur actio, ut fluit ab agente, passio, ut recipitur in patiente, & motus, ut est tendentia ad terminum: v. c. calefactio ut oritur ab igne calefaciente, dicitur actio, ut recipitur in ligno calefacto, dicitur passio, ut autem est via ad calorem sensim productum, est motus.

Nota 3. actionem esse quid distinctum ab agente secundum se spectato, & ab effectu qui per illam producitur; ab illo quidem, quia

aliud est posse agere, aliud actu operari; ab isto etiam, quia effectus existit plerumque independentem ab actione qua productus est. Quia tamen actio esse nequit sine agente, & sine termino producto, hinc actio se habet tantum ad illa ut quidam modus ab iis distinctus, non autem ut entitas ab iis omnino distincta & separabilis.

Quæritur 3. quodnam sit subiectum actionis transeuntis. Respondeo actionem transeuntem non esse subiectivè in agente, sed in Patientem. Probatur 1. ex Arist. ante citato, cum enim ait, actionem esse *actum huius in hoc*, non obscure innuit actionem fluere ab agente, & recipi in subiecto. Idemque confirmatur ex eo quod actionem & passionem identificat cum motu, huncque esse in mobili existimat.

Probatur 2. nam quando Deus operatur ad extra, actio illius non recipitur in ipso, sed in subiecto externo, v. g. in anima quando gratiam illi confert: ergo similiter calefactio non recipitur in igne calefaciente, sed in aqua calefacta. Sequela patet, quia cum Deus per actionem extrinsecam verè & realiter denominetur agens, æquè poterit ignis denominari verè & realiter calefaciens, per calefactionem in aqua receptam.

Probatur 3. nam cum actio non distinguatur realiter à passione, ut ostensum est, & passio sit subiectivè in patiente, sanè in eodem & ipsa actio esse debet. Quod ex eo ulterius suadet, quia actio est effectio termini è subiecto, effectio autem rei non potest separari realiter à re quæ fit, neque esse in subiecto distincto: quare cum terminus actionis sit in patiente, non in agente, idem de ipsa actione dici debet.

Obiicies 1. relatio agentis ad patientem est in-

agente, ergo & in illo est actio, cum hæc sit fundamentum relationis ab ea minimè distinctum. Respondeo negando consequentiam, & ad probationem illius dicendum est actionem non esse fundamentum relationis causæ ad effectum, sed tantum rationem fundandi, seu conditionem sine qua non, à vero fundamento realiter distinctam.

Obiicies 2. absurdum est ponere formam aliquam alibi quàm in subiecto quod per illam denominatur: at agens denominatur ab actione, non autem patiens, ut perspicuum est; ergo actio est in agente, non in patiente. Respondeo maiorem veram esse de subiecto quod denominatur per formam, ut illam recipiens; non autem si tantum denominetur per illam, quatenus eam ex se effundit; quomodo agens denominatur ab actione. Aliàs productio gratiæ in ipso Deo ponenda esset, cum illum producentem denominet.

Instabis, si actio est in patiente, quare illud non denominat agens? Respondeo causam esse, quia agere non est recipere actionem, sed eam elicere; at patiens non elicit actionem, sed tantum recipit.

Obiicies 3. actiones intellectus & voluntatis, sensuum interiorum & exteriorum, & similes sunt in agente; ergo & omnes aliæ actiones sunt in agentibus à quibus procedunt. Respondeo non sequi, imò potius oppositum inde colligi debet; siquidem ideo actiones potentialium animæ recipiuntur in ipsis potentiis, quia quod per eiusmodi actiones producitur manet in eodem principio à quo oritur: at effectus actionum transeuntium non recipiuntur in agentibus, sed in patientibus; ergo in istis, non in illis, actiones eiusmodi recipi debent.

Obijcies 4. perfectiones sunt subiectivæ in rebus quas perficiunt; at actio est perfectio agentis, ergo est in illo. Respondeo maiorem esse veram de perfectionibus intrinsicis, non autem de extrinsecis, cuiusmodi est actio transiens; ignis enim dum aquam calefacit, non seipsum perficit, sed aquam quæ, ut est subiectum caloris ex eaeducti, ita & ipsius educationis.

Obijcies 5. si actio transiens non est in agente, nonne congruentius diceretur eam esse in termino seu effectu producto, quàm in subiecto? Respondeo negativè, quia ut hoc fieret, effectus deberet esse prior actione, aliter enim non posset eam recipere; at tantum abest ut sit prior, quin potius est posterior, cum ea mediante producat.

## ARTICULVS II.

### *De coniunctione agentis ad patientem.*

**Q**UÆRITUR 1. an agens debeat esse proximè coniunctum subiecto in quod agit, idque vel immediate tam suppositi quàm virtutis; quomodo ignis coniunctus est ligno in quod agit, tam per suam substantiam, quàm per calorem ipsi naturaliter insitum; vel saltem immediate virtutis, quomodo sol coniunctus est rebus hisce inferioribus, in quas per lucem aliasque qualitates operatur; et si exlo tantum realiter sit præsens.

Respondeo alteram ex his præsentis in causis ordinis naturalis, spectata vi naturæ, imò & absolutè necessariam esse. Prior pars patet experientia, cum videamus agentia creata



coniuncta esse vel quoad suppositum & virtutem, vel saltem quoad virtutem à se diffusam, subiectis in quæ agunt. Vnde cum habeant virtutem agendi limitatam, efficacius agunt per se loquendo, in corpora proxima, quàm in remota; eorumque virtus quo latius diffunditur, eo magis languescit, & tandem omnino extinguitur, nullumque effectum extra certam & determinatam spheram producant.

Obijcies magnetem agere in ferrum distans, Remoram sistere magnum nauigium, fascinantres visu ludere puerulos, & agnos quos attentius inspiciunt; aliaque similia quæ ostendunt non requiri coniunctionem agentis cum patiente ad operandum. Respondeo has & similes experientias nullius esse momenti, cum certum sit dum res agunt in distans, ab iis fluere qualitates aliquas occultas per quas effectus suos producant; vt ex eo manifestum est, quod eiusmodi effectus per interpositionem alicuius corporis facile impediri possunt, cuius tamen oppositum contingeret, si actio fieret immediate in distans.

Posterior pars ostenditur, quia si causa naturalis nec per se, nec per suam virtutem attingat patiens, nec etiam effectum in eo productum attingere poterit, adeoque illius causa Physica non erit, sed ad summum moralis, quatenus Deus solus ad præsentiam illius effectum producat. Confirmatur, nam intelligi non potest quod causa aliqua operetur in distans, nisi aliquid in illud immittat, sicque sit illi saltem virtualiter præsens: si enim nihil immittit, eodem modo se habet respectu illius ac antea, adeoque non magis potest aliquid in eo causare quam prius.

Quæritur 2. an agens naturale possit agere

in distans, non agendo per medium. Respon-  
deo non posse naturaliter, posse tamen ex  
probabiliiori sententia, supernaturaliter. Prior  
pars probatur experientia, nam agentia natu-  
ralia non agunt in distans, etiam intra ambi-  
tum Sphæræ suæ actiuitatis, si aliquid in medio  
obstet ne virtus eorum vique ad terminum il-  
lum diffundatur: vt cum ingressus lucis impe-  
ditur obiectu fenestræ, & diffusio caloris ab  
igne prodeuntis interpositione parietis, vel  
alterius corporis opaci. Hoc autem aliunde  
oriri non potest, nisi ex eo quod agentia prius  
agere debent in partes spatij proximiores,  
quàm in remotiores, seu in distans per me-  
dium. Aliàs sanè eorum actio nullius corpo-  
ris interpositione impediri posset, imò quam-  
uis medium esset vacuum, posset nihilominus  
actio fieri in distans, quod tamen à nemine  
cum aliquo fundamento admitti potest; cum  
omnes fateantur ideo naturam tantopere ab-  
horrere à vacuo, quia si vacuum daretur, in-  
fluxus cælestium corporum ad inferiora per il-  
lud traijci non posset.

Nec dicas magnetem agere in ferrum di-  
stans sine medio, cum illud attrahat, non alias  
res proximiores; & torpedinem stupore affi-  
cere manum piscatoris, nihil agendo in media  
arūdine: Hæc enim aliaque id genus non osten-  
dunt agentia naturalia agere in distans, non  
agendo in medium, seu non traijciendo vim  
aliquam per medium; Sed non producere sem-  
per eandem mutationem in corpore medio,  
quàm in distanti, eò quod medium non est ca-  
pax illius. Ad eum modum quo sol traijcit lu-  
cem per cælos inferiores, & per aërem, nec  
tamen in cælis calorem producit, sed in aëre;  
quia etsi cæli sint lucis capaces, non tamen ca-

loris ex ea orti, aer verò ex natura sua non modo illustrari, sed & calefieri potest.

Posterior pars ostenditur, quia etiã agentia naturalia exigant medium aptum ad trajiciendam viam aliquam in distans, id tamen non videtur absolute adeo necessarium, quin possint diuinitus eam diffundere in distans, etsi per spatium intermedium non trajiciatur: quid enim impedit quominus Deus efficere possit vt hoc cubiculum à sole illustretur, etsi claudantur fenestrx, exque in partibus interioribus non illustrentur. In hoc sanè non apparet repugnantia, cum effectus ille sit quoad substantiam naturalis, supernaturalis verò dumtaxat quoad modum quo fit, quia deficit aliqua conditio, quæ etsi naturalem habeat connexionem cum eiusmodi effectû, non tamen essentialem, ita vt diuinitus suppleri non possit.

---

### ARTICVLVS III.

#### *De distinctione inter agens, & patiens.*

**P**rimoneo aliquid posse duobus modis intelligi agere in seipsum, nempe vel actione vniuoca, vel æquiuoca. Dicitur actio vniuoca, quando quod produciatur est simile quoad speciem principio producenti, vt cum ignis per calorem aquam calefaciendo, in ea similem calorem producit. Dicitur verò actio æquiuoca, quando effectus est dissimilis quoad speciem principio producenti, vt cum sol qui formaliter calidus non est, in aqua calorem producit. Queritur ergo an idem possit agere in seipsum altera ex his actionibus vel vtraque.

RESPONDEO & dico 1. *Idem non posse agere in seipsum actione uniuoca.* Ratio est, quia si v. c. calidum ut quatuor, posset agere in seipsum actione uniuoca, posset in se augere calorem quem habet, hoc autem repugnat, cum nihil supra suas vires agere possit. Confirmatur, nam si calor ut quatuor, posset se intendere ad duos gradus, sequeretur hos sex gradus caloris posse producere alios, sicque eadem qualitas seipsam intenderet in infinitum; quod dici non potest.

Obijcies 1. *Experientia constat qualitates augeri per antiperistasim seu per circumobistentiam contrarij fortioris, ut patet cum ex calce viua quæ aqua iniecta incenditur, ex aquis putealibus quæ æstate sunt frigida, & hieme calida; ex stomacho animalium qui citius coquit cibos hieme quàm æstate, &c.* At eiusmodi intensio non potest per se fieri à qualitate contraria, ut perspicuum est; siquidem calor intensus v. c. non augeat frigus remissius, sed potius illud destruit; ergo procedere debet ab ipsa qualitate quæ intenditur, ita ut ob viciniam contrarij seipsam veluti colligat, viresque intendat. Respondeo negando consequentiam, possunt enim & debent assignari alie causæ à quibus talis intensio per se oritur. Ac primò innumeræ ignis particule in calce delitescentes infusione aquæ excitantur, seseque colligunt ut aduentanti hosti resistent; quò fit ut calx de nouo incalescat, donec paulatim superato igne omnino frigeat.

Deinde aquæ puteales sunt calidiores hieme, quia tunc beneficio exhalationum siccarum & calidarum, quæ à sole æstiuo in intinisteris partibus excitatæ fuerunt, quæque ob frigus

gus hiemis circumstans ibi detinentur, incallescunt; è contra verò æstate sunt frigidiores, quia cum magna copia exhalationum calidarum per poros terræ, ardore solis laxatos, sursum euolet, aqua sibi ipsi relicta, & ab hoste obsidente libera, sese in pristinam frigiditatem reducit.

Tandem ideo calor stomachi hieme est intensior quàm æstate; quia cum pori ob frigus circumstans constricti sint, spiritus vitales foras erumpere nequeunt, adeoque intus collecti intensiorem calorem producant, cuius vi digestio citius peragitur.

Instabis, exemplum aquæ sese reducentis ad pristinam frigiditatem nobis obesse. Sed hoc frustrà obijcitur, nam cum aqua calidissima, amoto impedimento, primum gradum frigoris per propriam formam substantialem recuperet, idem dicendum de secundo, aliisque sequentibus, ita ut intensio frigoris non dicatur fieri à frigore remisso, sed ab ipsa forma aquæ.

Obijcies 2. Lux, calor, & aliz eiusmodi qualitates per reflexionem intenduntur, ut certissima experientia ostendit; at illa intensio non potest oriri à corpore impediante ne qualitas ulterius diffundatur, paries enim v. c. qui obstat ne lux solis & calor ab ea productus longius propagetur, nullam ex se vim habet producendi aliquem gradum lucis, aut caloris ut perspicuum est; nec alia causa potest assignari à qua oriatur, quàm ipsamet qualitas quæ intenditur. Respondeo hoc posterius gratis affirmari, ille enim effectus potest & debet referri in causam ipsam agentem, quæ qualitas directa producitur: Sicut enim non modo motus pilæ directus, sed etiam reflexus

est efficienter à proijciente; ita & reflexio qualitatis est ab eodem agente à quo qualitas directa procedit. Quia cum posset qualitatem productam ulterius extendere, occurrente impedimento, circa eandem medij partem fortius operatur, defectumque vterioris extensionis maiori intentione supplet.

Sed contra hoc arguet aliquis ex supradictis, non potest agens creatum naturaliter agere in distans, nisi agat per medium; at hic oppositum contingit, nam reflexio fit in loco distanti ab agente, non in medio: ergo talis effectus in agens reduci non debet. Respondeo hoc non esse agere in distans, non agendo simpliciter in medio, sed tantum agere fortius in distans, quam in medio; Hoc autem non magis repugnat, quam producere effectum aliquem in distanti, qui non producit in medio, quod ex allatis suprâ exemplis fieri posse perspicuum est. Sicut enim hoc posterius euenit ob variam dispositionem medij, ita & illud ob impedimentum ante dictum contingit.

Dico 2. *Idem posse agere in seipsum actione equivoca.* Probat 1. ex Arist. cum ait, ut in Physica referemus, naturam esse principium motus eius in quo est, hoc enim planè conuincit iuxta illius mentem, res naturales mouere seipsas, adeoque posse idem agere in seipsum.

Probat 2. Nam cum v. c. ignis sursum mouetur, vel cum terra deorsum tendit, dici non potest motus illos aliunde oriri quam ab ipso igne, ob innatam leuitatem in locum superum, & à terra ob naturalem grauitatem ad locum deorsum tendente. Siquidem leuitas & grauitas sunt sufficientia principia proxima eiusmodi motuum, formæ verò sub-

stantiales ignis & terræ remota. Et idem de alijs omnibus corporibus se ad proprium centrum mouentibus, proportionem seruata dici debet.

Probatur 3. Ex eo quod aqua calefacta statim se amoto igne, ad pristinum statum reducit: illa enim reductio non potest referri ad generans, cum fortè nullibi sit, aut valde distet, nec maioris sit virtutis quàm aqua ipsa quæ antiquam frigiditatem recuperat. Nec dici potest aquam frigesceri ab aëre circumstante, cum constet frigus aquæ restitutum frigore aëris intensius esse.

Probatur 4. Ex motu locali animalium, quem planè spontaneum esse, adeoque ab intrinseco principio oriri perspicuum est; ex operationibus sensuum externorum & internorum, intellectus & voluntatis, quas constat esse immanentes, & consequenter oriri ab eo principio in quo recipiuntur. Aliàs si à principio externo fluere, essent transeuntes, sicque explodenda esset vulgaris illa, & à Philosophis omnibus recepta actionum diuisio in immanentes & transeuntes; quæ præsertim ob actiones vitales, quas omnino necesse est esse internas, & immanentes, admitteri debet.

Obijcies 1. Quidquid mouetur, ab alio mouetur, ex constanti Aristotelis sententia, qui inde probat grauiā & leuiā non moueri à se ipsis, sed à suis progenitoribus. Respondeo axioma illud à mente Arist. esse alienum, & in rigore falsum, si de quouis motu intelligatur, vt ostensum est; quare debet intelligi vel de motu qui fit per actionem vniuocam, vel de motu corruptiuo, vel de concursu primæ causæ ad omnes rerum operationes re-

quisito, vel alio quouis modo qui secundæ nostræ assertioni non repugnet. Quo autem sensu graua & leuia dicantur moueri à suis progenitoribus, dicetur in Physica vbi de elementis.

Obijcies 2. Quod mouet est in actu, & quod mouetur est in potentia, at repugnat idem simul esse in actu, & in potentia: ergo idem non potest seipsum mouere. Respondeo distinguendo maiorem, quod mouet vniuocè est in actu formali, & quod mouetur est in potentia formali, concedo maiorem; Quod mouet æquiuocè est in actu virtuali, & quod mouetur est in potentia formali, concedo etiam. Ad minorem, at repugnat idem simul esse in actu, & in potentia; distinguo; in actu formali; & in potentia formali concedo; in actu virtuali, & in potentia formali nego: sic enim aqua cum sit tantum virtualiter frigida, seipsam formaliter frigidam constituit.

Obijcies 3. Non potest aliquid agere in sibi formaliter simile, ergo nec in seipsum; antecedens postea probabitur, sequela verò suadetur, quia maior est distinctio inter duo similia, quam inter agens & seipsum: quare si simile nequit agere in simile, multò minùs idem in seipsum agere poterit. Respondeo concesso antecedente, negandam esse consequentiam, & ad eius probationem dicendum, licet maior sit distinctio entitativa & realis inter duo similia; v. g. inter duos ignes, quam inter agens & seipsum, non tamen in ratione agendi, & patiendi. Siquidem aqua calida, vt se reducens ad pristinum statum, non est formaliter frigida, sed tantum virtualiter: vt autem frigiditatem in se recipit, fit formaliter frigida, sicque est sufficiens distinctio inter ipsam agentem, & patientem.



## ARTICVLVS IV.

*An simile agat in sibi perfectè simile.*

**P** Ræmoneo ea dici similia, quæ conueniunt in vna qualitate eiusdem speciei, vt in calore aut frigore; ea verò dici perfectè similia, quæ æquè intensè qualitatem illam participant, vt si ambo habeant quatuor gradus caloris aut frigoris. Quæritur ergo an simile agere possit in subiectum sibi omnino simile; nam si agens habeat qualitatem magis intensam, dubium non est quin possit agere iuxta excessum illius intensiōis, si verò minus intensam, sic pati potest ab alio, non autem in illud agere.

Respondeo & dico 1. *Simile non posse per se loquendo, & caterū paribus, agere in sibi perfectè simile.* Ita Arist. 1. de generat. cap. 7. tex. 50. vbi aperte docet, etsi agens & patiens genere eadem sint & similia, specie tamen esse dissimilia, & contrarietatem habere. Ratio est, quia agens non agit in aliud, nisi vt illud sibi omnino simile efficiat; ergo si supponatur illi omnino simile, non aget in illud. Confirmatur, quia vt ait Arist. loco citato tex. 48. quādo duo sunt prorsus similia, nulla maior est ratio cur vnum potius quàm alterum patiatur.

Obijcies 1. Duo specula omnino similia in se mutuo species obiectorum transmittunt; ergo vnum simile agit in aliud. Respondeo specula non agere inter se vt sunt similia, sed potius vt dissimilia; quatenus scilicet vnum habens speciem qua alterum caret, eam illi immitit.

Obijeies 2. Dux phialæ vitreæ inter se collisæ se mutuò effringunt; ergo simile agit in simile. Respondet non sequi de simili formaliter ut simili, de quo agimus: nam quælibet phiala agit quatenus vi impellitur, patitur verò & frangitur, quatenus non potest impulsui resistere; unde neutra agit in sibi simile, ut sic.

Nota prædictam assertionem procedere, cæteris paribus, superesse autem difficultatem an sic cætera non sint paria, possit simile agere in simile; ut si v. c. illud sit in materia densiori, vel magis extensa, pro quo.

Dico 2. *Neque cum ea inæqualitate simile agere posse in simile.* Probatur 1. ex dictis, nam agens in aliud agit ut illud sibi simile efficiat; at si calidum ut quatuor, ob maiorem densitatem ageret in aliud similiter calidum, sed non æquè densum, contrarium contingeret: quod enim magis ageret in illud; eò magis calorem illius intenderet, & consequenter rarius efficeret, sicque tam quoad calorem, quàm quoad densitatem sibi magis ac magis dissimile redderet.

Probatur 2. Nam quamvis calidum ut quatuor, sit densius, vel extensius, id non sufficit ut in se formaliter, aut virtualiter contineat quinque gradus caloris; quare neque illos producere poterit. Sequela manifesta est, quia causa nequit effectum producere, quem in se neutro ex ijs modis continet. Antecedens verò ostenditur, quia densitas vel extensio subiecti non augeat intrinsecè calorem; aliàs pro maiori densitate, vel extensione calor usque ad octauum gradum augeri posset, quod ridiculum est. Super sunt ergo tantum formaliter quatuor gradus caloris in agente, qui proinde quintum gradum non continent for-

maliter; at nec etiam eminenter, cum sint eiusdem rationis ac speciei.

Probatnr 3. Nam si corpus densius posset operari supra intensiōem suā qualitatis, v. c. cum quatuor gradibus caloris producere quinque in subiecto min⁹ denso; iam subiectum illud vtpotē calidius posset reagere, & vnum gradum caloris agenti communicare; tum verò agens maiori calore præditum posset patientis calorem augere, hocque vicissim illi nouum gradum rependere, sicque vsque ad octauum caloris gradum se mutuo perficere; quod sanè ridiculum est, satisque vel ipsa experientia refelli potest.

Obijcies 1. Corpus quod densius est, eò maiorem habet vim agendi, vt perspicuum est; ergo eò intensiorem effectum potest producere, adeoque agere in passum sibi omnino simile. Respondeo antecedens ita debere intelligi vt v. c. calidum ad sex gradus quod densius est, possit producere eundem effectum breuiori tempore, vel ad maiorem distantiam, quàm calidum vt sex non adeo densum; non autem quod ob maiorem densitatem quacunque sit, possit agere supra suam intensiōem, seu producere plus quàm sex gradus caloris. Licet enim virtus agendi in actu primo per densitatem non augeatur, densitas tamen est conditio qua agens disponitur ad melius & fortius agendum, intra gradus suæ intensiōis; quo sensu dici solet virtutem vnitam esse fortiorem se dispersa.

Obijcies 2. Ferrum candens; etsi non sit ignis, adeoque non sit calidum vt octo, producit ignem in stappa, & consequenter calorem vt octo, sicque agit supra suam intensiōem. Respondeo ferrum quidem candens

non esse ignem, intra poros tamen illius contineri innumeras ignis particulas, quarum vi fit stuppæ combustio. Vnde non sequitur ferrum illud agere supra intensiorem caloris quem in se continet.

Addunt aliqui, quamuis daretur in ferro non esse particulas ignis, neque illud esse calidum ut octo, inde non sequi stuppam, cum valdè sit sicca, rara, & levis, adeoque optimè disposita ad formam ignis, non posse à ferro candenti inflammarî; esto ferrum ipsum ob contrarias dispositiones in ignem substantialiter non mutetur.

Obijcies 3. Duo luminosa æquè intensa magis illuminant eandem partem aëris, quàm alterum illorum, & tria magis quàm duo, ut experientia constat: hoc autem non fit nisi quia lux primi à secundo intenditur, & lux utriusque à tertio; adeoque agens magis extensum, aut multiplicatum agit supra suam intensiorem. Respondeo id non sequi, quia etsi effectus tunc augeatur etiam quoad intensiorem, non tamen supra intensiorem maximam agentis, sed tantum intra illam; adeo ut intentio lucis in aëre productæ, non excedat intensiorem lucis quæ est in singulis luminaribus sigillatim. Vnde si concedatur tot faces multiplicari posse, ut tandem lux producta sit earum luci æqualis; negandum erit consequenter eiusmodi lucem intensiorem reddi, ex hypothesi quòd novæ faces accendantur, cum impossibile sit effectum esse sua causa nobiliorem.

Dico, si concedatur lucem æqualem in medio producendam, non enim talem suppositionem omnes admittunt: quia cum agentia creata agant uniformiter difformiter, intra

sphæram suæ actiuitatis, seu ita vt fortius in partibus proximioribus, & debilius in remotioribus, cum vniformi quadam inæqualitate operentur; hinc colligunt si luminoso vt quatuor, illustret certam aëris partem ad duos gradus, & hæc lux à secundo luminoso æquali intendatur vno gradu, satis esse quod à tertio intendatur medietate quarti gradus, & à quarto medietate talis medietatis; adeò vt totum augmentum fiat per partes proportionales, sicque nunquam perueniatur ad quartum gradum.

## ARTICVLVS V.

*De resistentia, & reactione patientis.*

**Q**UÆRITUR 1. an actiuitas agentis necessario excedere debeat resistentiam passi, vel vt communioribus verbis vtamur, an actio fieri debeat à proportionem maioris inæqualitatis; an verò ad actionem sufficiat quod resistentia patientis excedat actiuitatem agentis, seu quod actio fiat à proportionem minoris inæqualitatis.

Respondeo actionem semper fieri à proportionem maioris inæqualitatis, adeo vt virtus agentis excedat resistentiam passi. Ratio est, quia agens in aliud, illud aliquo modo superat & vincit, quatenus illud per actionem realiter immutat, & à statu suo connaturali aliquatenus dimouet, non obstante resistentia illius: hoc autem fieri non posset nisi virtus agentis esset maior quàm resistentia passi; si enim hæc esset æqualis, aut maior, actionem omnino impediret.

Confirmatur, nam non alia causa assignari potest, cur homo solus nequeat quantumvis conetur, ingens saxum loco mouere; nisi quia illius actiuitas non excedit resistentiam saxi: aliàs nihil impediret quin ipsum facili negotio voluere posset, & in quamcumque partem in modum pilæ impellere.

Obijcies 1. Maior est resistentia sex graduum caloris, quàm actiuitas duorum graduum frigoris; & tamen in aqua calida ad sex gradus, & frigida ad duos, isti duo gradus frigoris superant sex illos gradus caloris. Quare verum non est actionem semper fieri à proportionis maioris inæqualitatis ex parte agentis. Respondeo minorem falsam esse, quòd enim sex gradus caloris expellantur, id tribuendum non est duobus gradibus frigoris, sed formæ substantiali aquæ, quæ vim habet se reducendi ad pristinum statum, ablato impedimento.

Obijcies 2. Dubium non est quin resistentia lapidis sit maior actiuitate guttularum aquæ, à quibus tamen successu temporis excavatur. Respondeo repugnare in terminis quòd quædam particule lapidis vi guttularum aquæ extrahantur, & quòd earum resistentia superet aquæ actiuitatem. Neque id mirum videri debet, nam pars exigua in quam continuo guttulæ aquæ decidunt, tota humectatur, adeo vt tandem mollescat, & à reliquis, quia duritiem conseruat, diuellatur.

Obijcies 3. Quod patitur, superatur ab agente, estque illo inferius; & tamen in illud interdum reagit, vt postea dicemus: ergo actio non semper est à proportionis maioris inæqualitatis. Respondeo quod patitur, simpliciter superari ab agente, quatenus agens

agit, & patiens resistit: ac patiens vt reagit in ipsum agens, secundum quid vincere agens, vt reagenti resistit; sicque reactionem istam esse à proportionem maioris inæqualitatis. Exempli gratia, ferrum candens absolute vincitur ab aqua frigida, cum ab ea extinguitur; eam tamen vincit secundum quid, & quodammodo superat resistantiam illius; quatenus calore suo ab ea aliquem frigoris gradum expellit.

Quæritur 2. An agens agendo repatiatur, & patiens patiando reagat.

2. Respondeo & dico 1. *Hoc non in omni agente, & patiente locum habere.* Probatur, nam si spiritus agat in corpus, non potest ab illo repati; item oculum non potest aliquid repati ab his inferioribus, tum ob nimiam distantiam, tum quia non communicat cum illis in materia, vt suppono ex Physica. Non etiam possunt agentia repati, si agant in patiens quod qualitate contraria præditum non sit; vt lux non repatiatur ab aëre quem illustrat, quia luci nihil est contrarium.

Dico 2. *Extra iam dictos, aliosque similes casus, dari mutuam reactionem, & repassionem inter agens & patiens.* Ita Aristoteles plerisque locis ac speciatim lib. 4. de generat. animalium c. 3. ubi ait omne agens pati etiam à patiente, vt quod secatur hebetari ab eo quod secatur, quod calefacit refrigerari à calefcente.

Ratio autem huius assertionis est, quia cum ea quæ habent vim agendi naturalem, necessario agant, nisi impendantur; nulla est ratio cur calidum & frigidum in debitis circumstantiis non possint inter se mutuo agere & pati. Sicut enim calidum non impeditur à frigidityte, quin agat in frigidum; ita frigidum non debet impediri à calore, quin agat in calidum,

ut vel ipsa experientia ostendit, cum ferrum candens in aquam, frigidam immissum, ab ea refrigeretur, & vicissim illam calefaciat.

Obijcies 1. Hinc sequi agens esse magis & minus validum patiente, quod repugnat. Respondeo id verum esse respectu diuersorum, in quo nulla est repugnantia. Est magis validum, quatenus illius actiuitas superat resistentiam patientis; minus verò, quatenus illius resistentia ab actiuitate patientis superatur.

Obijcies 2. Si agens & patiens mutuò agunt & patiuntur, ergo medium per quod agunt mouetur simul motibus contrarijs, v. c. calefit & refrigeratur quod naturaliter repugnat. Respondeo in hoc nullam esse repugnantiam, si agatur de qualitatibus remissis: cum enim constet aquam posse esse tepidam, seu partim frigidam, & partim calidam; quidni idem poterit simul frigefieri; & calefieri, cum hæ mutationes non inter se opponantur, nisi ratione frigoris & caloris?

Nec dicas tepiditatem esse quandam qualitatem mediam distinctam à frigore & calore; hoc enim gratis fingitur, tum quia manus frigida calefit in aqua tepida, & calida in ea frigefit, ut experientia constat. Tum quia dicendum esset, cum aqua incipit calefieri, totum illius frigus simul deperdi; & contra calorem in ea non produci, nisi in fine calefactionis; quæ nimis absurda sunt.



## CAPVT VIII.

## De Alteratione.

## ARTICVLVS PRIMVS.

*De natura alterationis.*

**N**Omen alterationis tribus modis sumi potest, primò generatim pro quacunque mutatione accidentali: sicut enim mutatio quæ tendit ad formam substantialem, facit aliud; ita quæ tendit ad formam accidentalem, facit alterum, indeque alteratio appellatur. Secundò minùs latè pro mutatione ad qualitatem; hæc enim magis propriè censetur facere alterum, quàm quantitas, aliaue accidentia. Vnde quia alix qualitates sunt spirituales, alix corporeæ, & inter corporeas alix intentionales, vt species rerum quæ videntur; alix Physicæ, exque aut primæ, vt calor & frigus; aut secundæ, exque vel extremæ, vt albedo & nigredo; vel mediæ, vt color viridis & cœruleus, alteratio complectitur mutationem ad illas omnes qualitates. Quò fit vt sicut de actione in genere, ita & de tali specie actionis, nempe de alteratione, non incongruè in his quæstionibus Metaphysicis disputari possit. Tertiò tamen alteratio strictius & magis Philosophicè sumitur pro motu à qualitate Physica ad qualitatem ei oppositam, siue extremam siue mediam; quo sensu ait Arist. 1. de Generat. cap. 4. tex. 23. alterationem esse quando sensibile subiectum perma-

nens in suis mutatur affectibus, qui aut contrarii, aut inter contrarios medij sunt. Quæ ratione alteratio definiti potest, *motus physicus qui inter qualitates contrarias versatur.*

Hic autem duo breviter quæri possunt: 1. quomodo alteratio à generatione distinguitur. Respondeo ab illa distingui, tum ratione termini à quo, quia alteratio est motus à qualitate, & generatio à priuatione, ut patebit ex dicendis in Physicis ubi de principiis rerum naturalium. Tum ratione termini ad quem, nam alteratio tendit ad qualitatem, generatio vero ad compositum substantiale. Tum ratione subiecti: nam subiectum alterationis est compositum, hoc enim ex calido fit frigidum, & ex candido nigrum; subiectum autem generationis est materia, quia hæc transit ad formam substantialem à priuatione illius. Tum ratione modi quo fit; nam alteratio fit successiue seu per partes, generatio vero in instanti, seu tota simul.

Quæritur 2. an sublata generatione deficeret alteratio. Respondeo affirmatiue, si quæstio sit de alteratione corruptiua, seu tendente ad corruptionem, quales sunt calefactio, refrigeratio, & similes. Nihil enim corrumpitur nisi eo fine ut ex eo aliquid generetur: quare ablata omni generatione, deficeret omnis corruptio, & consequenter omnis alteratio corruptiua; siquidem ablato fine, tolluntur media ad eum destinata.

Aliud vero dicendum est; si agatur de alteratione perfecta, cuiusmodi sunt illuminatio, sensatio, &c. Cum enim eiusmodi motus non tendant ad corruptionem, adeoque nec ad generationem, nulla ratio est cur ablata generatione, defuturi essent: unde in cælis

fiunt quædam alterationes perfectiæ, vbi tamen non habet propriè locum corruptio, aut generatio substantialis vti in Phylia dicemus. Et post diem iudicij variæ erunt alterationes perfectiæ, etsi nulla amplius futura sit generatio, vel corruptio.

## ARTICVLVS II.

*An alteratio successiua fiat continuè & sine interruptione.*

**P**ER azmoneo duobus modis intelligi posse alterationem fieri continuè, vel quoad intensiorem gradualèr, adeo vt post vnum gradum qualitaris alius sine mora in eadem parte subiecti producat; vel quoad extensionem, ita vt alia & alia pars subiecti continuè, seu sine interruptione alteretur. Hoc posito.

Quæritur 1. An alteratio sit continua quoad intensiorem qualitaris per eam productæ. Nonnulli negant existimantes in instanti produci certam partem minimam qualitaris, ita vt minor produci non possit; deinde post aliquam interruptionem produci aliam partem minimam eiusdem qualitaris, & sic deinceps vsque ad finem alterationis.

Nos autem cum communi sententiâ affirmamus, alterationem fieri continuè quoad productionem qualitaris, quod probatur 1. ex Arist. 3. Phylia cap. 4. tex. 39. cum ait, quoniam autem continuus est motus, omnis siquidem potest diuidi, eum etiam qui simpliciter vnus est, necesse est continuum esse, & si continuus, vnum. Hoc enim cum generatim de omni motu procedat,

de alteratione quoque, quæ propriè motus quidam est; intelligi debet. Vnde postea ad vnitatem numericam motus requirit tres conditiones, nempe vnitatem mobilis, formæ, & temporis: adeo ut si per moram aliquam interrumpatur, sit alius numero, etsi reliqua maneant.

Probatur 2. Nam experientia constat quòd magis sol ad nos accedit, eò maiorem & intensiorem lucem in nostro Hemispherio produci: at valde ridiculum est existimare illuminationem illam non augeri continuè, sed per certa intervalla temporis; cum sol continuè accedat, & dici non possit quòd potius nunc debeat interrumpi augmentum lucis, quàm ante vel post.

Nec refert quòd illuminatio non sit vera alteratio, cum non fiat inter qualitates contrarias; nam hinc potius intentum concluditur: si enim augmentum lucis sit continuè, etsi nullum superandum sit contrarium, à fortiori calefactio, frigefactio, alizque propriæ alterationes continuè fieri debent; cum resistantia contrariæ qualitatis in ijs paulatim debellanda sit.

Probatur 3. Nam si per alterationem producitur aliquid qualitatis in instanti, vel immediate post aliquid producitur, vel nihil; hoc posterius dici nequit, nam cum non minus tunc agens sit applicatum passo, quàm in instanti præcedente, & ex se sit determinatum ad agendum, quamdiu est illi debitè applicatum, nulla est ratio cur post instans illud nihil operetur; ergo operatur in tempore, adeoque cum operatio illius sit alteratio, sequitur alterationem fieri in tempore, & esse continuam.

Nec placet quod dicunt nonnulli, in tempore sequenti non produci aliquem gradum eiusdem qualitatis iam inchoatæ, sed dispositionem ad alium illius gradum: talis enim dispositio gratis conficta est, cum nequeat dici quid sit, aut cur necessaria, illiusque productio non possit non esse vera alteratio. Vnde cum dicatur produci in tempore, semper verum manebit alterationem fieri in tempore, & esse motum continuum; quod intendimus.

Obiicies 1. Qualitas quæ per alterationem producitur, est ens permanens; ergo debet produci in instanti, seu per primum sui esse, ita vt si nequeat secundum totam suam intentionem produci in vnico instanti, producatur saltem vna illius pars in vno instanti, & alia in alio post moram aliquam. Respondeo ex communi sententia; negando sequelam, nam vt res permanens tota simul producatur, necesse est vt non sit diuisibilis in partes, & careat contrario, quomodo substantia producitur simul tota, quia non suscipit magis & minus, neque habet contrarium quod paulatim debellandum sit: at qualitas alteratione producta constat ex partibus in infinitum diuisibilibus, & non potest introduci nisi qualitas opposita destruat, quod per successionem continuam fieri debet.

Aliter respondeo, etsi detur certam aliquam partem qualitatis in vnico instanti produci, inde non sequi inter productionem illius partis & sequentis debere moram aliquam intercedere, cum nobis valde probabile sit post vnum instans temporis immediatè aliud sequi, in quo proinde pars qualitatis altera produci potest.

Obiicies 2. Si qualitas per alterationem

continuum & in tempore producitur, cum in quolibet tempore sint partes infinitæ, sequeretur per quamlibet alterationem produci qualitatem infinite intensam, quod repugnat. Verum hæc obiectio in primis in suos autores retorqueri potest, nam si non verentur ponere in tempore partes infinitas, cur timent qualitati in tempore productæ totidem partes tribuere? Quod si dicant non esse in tempore nisi partes minores, & minores infinitas, patiantur nos idem affirmare de partibus qualitatis per alterationem productæ.

Deinde idem incommodum vrgeri potest, etsi dicatur alterationem non fieri nisi per instantia, ita ut quolibet instanti pars aliqua qualitatis producat, cum nulla pars adeo exigua in ea possit assignari, quæ non sit diuisibilis in alias minores, & minores in infinitum.

Quæritur 2. An alteratio fiat continuè quoad extensionem subiecti. Prædicti auctores negant, existimantes in instanti produci minimum qualitatis in minima parte subiecti, ita ut nulla pars minor alterari possit, sicque deinceps per varia instantia qualitatem ad varias partes minimas subiecti extendi, adeoque cum interruptione.

Verum hoc refellitur primò ex communi sententia, tum quia nulla adeo exigua pars subiecti potest assignari, quin detur alia minor, ut patet ex compositione continui, de qua alibi agitur: quò fit ut per alterationem qualitas sit citius producenda in medietate vnius partis subiecti, quàm in tota parte, cum prius ab illa debeat expellere qualitatem contrariam quàm ab ista. Aliàs quid impediret quò minus alteratio tota in vnicò instanti perfici posset?

Tum quia agentia naturalia, cum sint virtutis limitatæ, validius agunt in propinquum quàm in remotum, ut patet experientia; quare cum ignis v. c. producit vnum gradum caloris in aliqua parte ligni, non nisi calorem remissiorem in parte remotiori producere potest. Confirmatur, nam modus agendi vni. formiter difformiter, qui ex communi Philosophorum consensu, competit rebus naturalibus, in eo consistit, ut quò partes subiecti ab agente sunt remotiores, eò minùs ab illò immutentur, donec perueniatur tandem ad partem aliquam in qua vis agentis omnino deficiat.

Refellitur secundo, quia etsi detur alterationem fieri, ut supponitur, per varia instantia, inde non sequitur qualitatem, non nisi variis morulis interiacentibus, ad alias & alias partes minimas subiecti diffundi, cum probabilius videatur, tempus non nisi ex meris instantibus componi, ac proinde vnum fluere immediatè post aliud, ut infra ostendemus; nec vlla ratio asseratur, cur possit agens in vnico instanti producere minimum qualitatis in minima parte subiecti, nec possit similiter immediatè post operari in alia minima parte, adeoque sine vlla interruptione.

Adde quod, quouis modo fiat illa diffusio qualitatis, siue per instantia, siue per partes diuisibiles temporis, incredibile videtur eam non fieri nisi per moras: cum videamus stuppam, paleas, ac maximè puluorem tormentarium velocissimè corripì ab igne admoto; aliasque & alias eorum partes continuo, & sine vlla interruptione inardescere.

## ARTICVLVS III.

*Quid tenendum sit de intensiōe qualitatis.*

**P**RAMONEO 1. Aliud esse qualitatem in subiecto extendi, aliud in eo intendi; dicitur enim extendi quando ab vna parte subiecti ad aliam transit, vt cū calor primò manum, deinde brachium afficit; dicitur verò intendi, quando in eadem parte subiecti magis perficitur; vt cū manus affecta gradu aliquo caloris, magis adhinc calefit.

PRAMONEO 2. Qualitatis intensiōem duobus modis considerari posse, primò ex parte alterationis qua qualitas perficitur, vt cū dicimus manum magis & magis calefieri; secundo ex parte ipsius qualitatis per alterationem productæ, qua ratione dicimus calorem in manu productum esse in se perfectiorem & intensiorem. Itaque

Quæritur 1. An qualitatem intendi idem sit ac nouam qualitatem aduenire perfectiorem præcedenti, hancque per illius aduentum destrui. Respondeo cum omnibus Peripateticis, contra Durandum, intensiōem qualitatis sic explicandam non esse. Probat, tum quia frustra & sine fundamento in alteratione ponitur continua destructio, & productio innumerarum qualitatum; cū sine incommodo intelligi possit eandem qualitatem in se magis ac magis perfici, vsque ad finem alterationis. Imò periculosum sit affirmare, quoties charitas iniusto augetur, præcedentem charitatem aboleri, & nouam ex integro produci; quod tamen, posita illa Durandi sententia, affirmandum esset.



Tum quia cū totus calor ignis sit vnus rationis & speciei, imò sit vnica numero qualitas, absurdum est existimare per illum produci in aqua calefacta innumeros gradus caloris; non modo numero, sed etiam specie inter se distinctos; at tales producerentur, si quilibet esset indiuisibilis in sua entitate, haberetque ex natura sua impossibilitatem cū quolibet alio.

Tum quia si in alteratione intensio qualitatis fieret per destructionem præcedentium graduum, & nouorum productionem; dicendum quoque esset remissionem qualitatis eodem modo fieri; sicque cū aqua ablato igne, ad pristinum frigus se reducit, totus calor in ea productus deberet destrui, & alius remissior produci, & hoc destructo alius imperfectior generari, donec totum aquæ frigus restitutum esset; at à qua causa producerentur noui isti calores alij aliis remissiores? Non ab igne, tum quia non ampliùs agit in aquam, vt supponimus; tum quia si ageret, potiùs in ea calorem augeret, quàm minueret. Non etiam ab aqua, vt per se manifestum est, à quo igitur?

Obiicies 1. Alteratio est motus à qualitate remissa ad qualitatem intensam, vt à termino à quo ad terminum ad quem; sed in motu terminus à quo abiicitur, & terminus ad quem acquiritur: ergo qualitas remissa in alteratione deperditur, & intensa acquiritur. Respondeo, in motu alterationis qualitatem remissam, quæ est terminus à quo, deperdi non secundum suam entitatem, sed sub ratione qualitatis remissæ; addito enim nouo gradu, non ampliùs est remissa; vt antè, sed intensa; sicut in motu accretionis minor quantitas non

deperditur secundum se, sed tantum quatenus habet rationem minoris quantitatis; quia addita noua quantitate, iam denominatur maior.

Obiicies 2. Cum primus & secundus gradus sint eiusdem speciei, si secundus primum non expelleret, & tertius secundum, sicque consequenter, plura accidentia absoluta solo numero distincta essent in eodem subiecto, quod repugnat. Respondeo negando consequentiam, nam ex omnibus gradibus intentionis constatur vnum numero accedens adæquatum & totale, cuius proinde omnes partes in eodem subiecto esse possunt. Imò plura accidentia adæquata solo numero distincta: posse reperiri in eodem subiecto, ex eo patet, quod vel possum simul elicere duas cognitiones solo numero distinctas, alteram huius, alteram illius hominis; vel saltem si de hoc dubitetur, non potest negari quin species illorum intelligibiles, quæ tantum numero distinguuntur, simul esse queant in meo intellectu: Sicut & in eadem æris parte plures species intentionales obiectorum similium, numero tantum distinctæ reperiuntur.

Quæritur 2. vtrum intensio qualitatis consistat in mera ablatione contrariæ qualitatis, vel in maiori illius quæ dicitur intendi, radicatione in subiecto.

Respondeo & Dico 1. *Intensionem qualitatis non consistere in mera remotione contrariæ.* Probat 1. quia qualitates contrarium non habentes vel lux, sonus, & similes intendi possunt: ær enim magis illustratur ex maiori solis vel lucernæ accessu, vt experientia constat; nec tamen lux reperit in ære aliquam qualitatem contrariam, cuius expulsionem illius intensio tribui possit,

Probatur 2. quia tantum abest vt qualitates contrarium habentes intendantur ob expulsionem contrarij, quin potius quia illæ intenduntur in subiecto, hinc fit vt qualitates oppositæ ab eodem expellantur, v. c. ideo frigus paulatim ab aqua expellitur, quia calor ab igne in ea producitur, & per continuam calefactionem intenditur; non autem quia frigus ab aqua expellitur, ideo calor in ea intenditur.

Probatur 3. quia si expulsio frigoris præcisè esset causa intentionis caloris in aqua, sequeretur ex hypothesi quod aqua haberet vnum tantum caloris gradum eam quocunque calefaciente amoto, totam possibilem caloris intentionem consecuturam, modo Deus eam frigore nativo spoliaret. Hoc autem planè absurdum est, & fundamento caret.

Dico 2. *Intensionem qualitatis non consistere in maiori radicatione illius in subiecto, vt Thomistæ existimant.* Probatur 1. quia illa maior radicatio ita explicari solet, vt eadem entitas qualitatis in se inuariata manens, dicatur nunc esse remissa, quia leuiter inhxret subiecto, nunc intensa, quia intimius illud peruadit, magisque veluti in eo infigitur & radicatur, ita vt non facilè ab eo auelli possit. At certè eiusmodi radicatio non sufficit ad explicandam qualitatis intensionem; cum vel ad sensum satis pateat aërem v. c. longè esse intrinsecè lucidiorem in meridie, quàm mane; & aliunde non magis lux sit tunc radicata in aëre, quàm cum exilior est, vt ex eo patet, quod in quolibet statu æqualiter à solis præsentia dependet; ita vt eo recedente, siue magna, siue parua sit, pari facilitate euanescat.

Probatur 2. Nam si intensio qualitatis consi-

steret præcisè in maiori radicatione subiecti, sequeretur qualitates eò esse intensiores, quò magis sunt radicatz in subiecto, & vice versa eò remissiores, quò minorem in eo radicationem habent; at hoc absurdum esse inde ostenditur, quia luna est longè lucidior aliis omnibus planetis, sole excepto; & tamen perspicuum est lucem non adeo firmas in ea radices agere, ac in reliquis astris. Constat etiam calorem ferri candentis esse longè intensiorem calore nativo animalis; & tamen illum statim evanescere, hunc verò per totam animalis vitam constanter perseverare, sicque longè firmius illi adhærere, notissimum est.

Probaturs 3. Nam si qualitatis intensio nihil aliud esset quàm maior illius radicatio in subiecto, sequeretur primam gratiam & charitatem in iusto per bona opera non augeri realiter & intrinsecè, sed tantum eandem magis in illo radicari; & consequenter non maiorem seu intensiorem fore intrinsecè gloriam beati, qui toto vitæ tempore innumeros actus meritorios, alios aliis præstantiores edidit, quàm si vnicum tantum horum actuum, eumque imperfectissimum elicuisset; quod sine errore affirmari nequit. Sequela patet, nam cum gratia & charitas sint qualitates, dici non potest quod aliter intendantur, quàm qualitates sensibiles & naturales.

Probaturs tandem, nam vel illa maior radicatio aliquid reale addit, supra entitatem qualitatis remissæ, vel nihil; hoc posterius dici non potest, quia sic qualitas non deberet dici intensior quàm ante, ergo prius verum est. Rursus, vel quod addit est vera entitas realis, vel novus quidam modus unionis; non modus unionis, tum quia cum qualitas remissa

missa iam ante inhereret subiecto, secundum totam suam realitatem, dici nequit quod nouo modo illi vniatur, nisi illi addatur quædam entitas eidem subiecto vnienda. Tum quia superueniente nouo modo vnionis, præcedens esset inutilis, adeoque posterioris aduentu destruendus esset; at non potest intelligi quænam sit causa talis destructionis, & quomodo destructo vnionis modo, non simul destruaturs res quæ per illum subiecto erat vnita. Tum denique quia actio ignis calefacientis aquam, non tendit ad producendum modum vnionis, sed ad producendum calorem realem; vt vel ex eo manifestum est, quod aqua ebulliens longè magis calefacit quàm tepida, ex quo sequitur aliquid aquæ additum esse præter modum vnionis; quia præcisè ob solum eiusmodi modum, aqua non haberet vim producendi calorem adeo intensum.

Quæritur 3. an intensio qualitatis fiat per additionem gradus ad gradum. Respondeo affirmatiuè, vt ex dictis à sufficienti enumeratione colligi potest, cum nihil aliud supersit in quo intensio illa constitui queat; & præterea tolerandum non sit in Ecclesia affirmare, gratiam sanctificantem, ex quo primum peccatori infusa est, eaque factus est iustus, nullum vnquam augmentum intrinsecum recipere; nec possit augmentum intrinsecum in gratia intelligi, sine additione aliorum & aliorum graduum, ad eum qui totus simul initio iustificationis infusus est.

Confirmatur, nam certum est ex fide, gloriam beatorum fore inæqualem, & ex vi talis inæqualitatis alios aliis fore beatiore, clariorque Deum visuros: illa autem inæqualitas supponit inæqualitatem in ipsa gratia & cha-

*Metaph.*

T

ritate huius vitæ, cum gloria detur iuxta proportionem gratiæ; & hæc inæqualitas gratiæ & charitatis non potest concipi, nisi plus sit entitatis gratiæ & charitatis in vno, quàm in alio; adeoque augmentum illius fiat per additionem entitatis ad entitatem, seu gradus ad gradum, ut vulgo loquuntur.

Declaratur ulterius, nam Petrus v. c. est magis intrinsecè iustus quàm Paulus, magisque Deo gratus; at non potest verè appellari magis iustus, nisi maiorem habeat gratiam, siquidem *sicut se habet simpliciter ad simpliciter, ita magis ad magis*; dicitur autem simpliciter iustus, quia habet gratiam: ergo & magis iustus, quia habet maiorem gratiam. Et sanè absurdissimum est & falsissimum existimare, duorum hominum habentium gratiam omnino æqualem quoad entitatem, cuique à primo momento iustificationis nulla intrinseca entitatis additio facta sit, alterum verè esse altero centies & millies iustiores, Deoque gratiores; etsi fingatur illius gratiam longè firmitus & tenacius ei herere, quàm alteri suam.

Dico etsi fingatur; nam quòd id mera sit fictio, inde patet, quia eadem facilitate amittitur gratia per peccatum mortale, siue magna sit, siue parva; sæpeque contingit, cum qui minùs habet gratiæ sanctificantis, diutius eam conservare, quàm illum qui maiori gratia præditus est.

Obiicies. 1. illud Aristotelis 4. Physic. tex. 24. *Ex calido fit magis calidum, nullo facto in materia calida, quod non esset calidum, quando erat minùs calidum*; quibus verbis docere videtur, ex minùs calido non fieri aliquid magis calidum, per additionem noui caloris. Sed hoc gratis dicitur, cum Aristoteles tantum velit magis cali-

# LIBER TERTIVS.

435

dam non fieri, ex eo quòd noua materia inci-  
piat calefcere, in hoc enim confiftit extenfio  
caloris, non autem intensio illius; fed quia  
precedens quæ antea erat minùs calida, fit  
magis calida: vnde fententia noftra aperte  
ftabilitur, & oppofita destruitur.

Obiicies 2. qualitas quoad fe totam eft for-  
ma accidentalis fubiekti, adeoque purus actus;  
at non effer purus actus, fi ex variis gradibus  
conftaret, quia iam ex actu & potentia coa-  
lefceret. Refpondeo qualitatem effer purum  
actum refpectu fubiekti, quia fecundum fe to-  
tam illud actuat & accidentariò perficit; in fe  
tamen admittere compositionem aliquam non  
propriè ex actu & potentia, fed ex partibus  
integrantibus; nimirum ex variis gradibus  
qui eandem qualitatem integrant. Ad eum  
modum quo quantitas, etfi vt forma accidenta-  
lis fit merus actus refpectu materiæ; in fe ta-  
men ex variis, quantitibus partialibus, vt ex  
partibus integrantibus coalefcit.

Obiicies 3. Effentiæ rerum funt indiuiduabiles,  
ergo qualitas non poteft augeri additione gra-  
dus ad gradum. Refpondeo non fequi, nam  
qualitas non augetur fecundum effentiam gra-  
dum additione; manet enim effentialiter  
idem calor fpecie poft quamcunque additio-  
nem: fed tantum quoad entitatem, quomodo  
non repugnat qualitatem augeri; ficur non  
repugnat hominem augeri additione nouarum  
partium fubftantiæ & quantitatis, etfi ratio  
hominis Metaphyficè fpectata confiftat in in-  
diuiduabili.

## ARTICVLVS IV.

*Quomodo gradus intensiōis se habeant  
inter se.*

**Q**Uæritur 1. An gradus omnes intensiōis sint inter se similes, & homogenei quoad speciem. Respondeo affirmatiuè, quod probatur, quia non minor est similitudo inter hunc & illum gradum caloris, quàm inter hanc & illam partem quantitatis, inter hanc & illam partem substantiæ; atqui partes quantitatis, & partes substantiæ conueniunt inter se quoad speciem: ergo & gradus qui componunt intensiōem qualitatis, similitudinem specificam inter se habere debent.

Confirmatur, nam sicut quantitas est vnum specie accidens, & substantia vna specie substantia, ita & calor v. c. est vna specie qualitas; ergo debet constitui ex gradibus eiusdem speciei: aliàs esset ens multiplicis speciei, & aggregatum per accidens, quod nimis absurdum est. Præsertim cum ab eodem agente producat, in eodem sit subiecto, & eundem effectum formalem communicet.

Quæritur 2. an gradus intensiōis sint inter se similes, & æqualis perfectionis quoad indiuiduum; adeo vt nullus sit ordo essentialis inter illos, sed qui posteriori loco producit, æquè possit quantum est ex se priori produci. Respondeo affirmatiuè, probaturque 1. quia nulla est necessitas ponendi distinctionem & subordinationem illam inter gradus qualitatis, vt patebit ex solutione obiectionum; quare illa distinctio & subordinatio, vt pote superflua admittenda non est. Confirmatur, nam sicut nul-



Iam admittimus inæqualitatem inter partes quantitatis, vel inter partes substantiæ, ita neque necesse est inter partes eiusdem qualitatis eam admittere.

Probatur 2. quia etsi octo tantum gradus communiter assignentur in qualitatis intensione, æquæ tamen in ea numerari poterant quinquaginta, aut centum: Quare tot differentiæ & inæqualitates constituendæ essent in qualitate summè intensa, imò & plures in infinitum, cum qualibet pars qualitatis in infinitum dividi possit secundum intensiorem, sicut & quantitas secundum extensionem. Hoc autem adeo per se absurdum est, ut refutatione non indigeat.

Vnde refelluntur qui dicunt, inæqualitatem illam restringendam esse ad numerum octo graduum qui vulgò assignantur: hoc enim sine fundamento dicitur, ut iam ostendimus, & præterea suadetur; quia cum negari nequeat quin quilibet gradus ex multis partibus intensiōis constet, si illæ sunt inter se æquales ut supponitur, nulla ratio afferri potest cur per alias similes non possint intendi, ita ut duo aut plures gradus in vnam qualitatem omnino homogeneam coalescant.

Probatur 3. gradus intensiōis non esse inter se subordinatos, sed cum qui primus est, posse ex se esse secundum vel tertium: nam candela primò accensa producit primū gradum lucis, quæ verò secundo accenditur, producit intensiōnem prioris illius lucis; oppositum autem evenisset, si hæc prius accensa fuisset quàm illa.

Probatur 4. gradus illos non esse perfectiores quo sunt remotiores à primo: nam in primis si post productionem primi gradus caloris, subiectum quod calefit paululum moveatur, ita ut

ignis partem sequentem calefaciat, calor iste omnino erit similis iam producto in alia parte; ergo etsi subiectum non moueatur, adeoque ignis in eadem parte in qua primum gradum caloris produxerat, secundum producat, dici nequit gradum hunc superuenientem priori esse dissimilem, eoque perfectiorem: Quid enim causæ esse potest, cur igne ex se eodem modo agente, vnus gradus caloris modò sit nobilior, quia producit in parte iam paululum calefacta, modo ignobilior, quia in subiecto non calido recipitur?

Deinde maior illa perfectio in eo consistere dicitur, quòd secundus gradus possit per se primum in alio subiecto producere, tertius duos priores, & sic deinceps vsque ad octauum, cui vis producendi omnes septem gradus, & alium sibi similem tribuitur: at hoc planè absurdum & incredibile est, quia sic sequeretur, secundo gradu adueniente primum esse superfluum, tertio producto, primum & secundum, omnesque septem, posito octauo. Eò vel maxime quia non potest octauus æquivalere aliis septem, quia solus eodem modo subiectum reddat calidum; adeoque nulla est ratio cur eo præfante, alii conseruari debeant.

Tandem vnde sumitur maior illa perfectio graduum sequentium supra præcedentes? Non à maiori intensione, cum æque intensi dicantur; non etiam ex eorum subordinatione & dependentia, hinc enim oppositum potius colligendum est, quia secundus dicitur depēdere à primo, tertius à primo & secundo, & octauus à septem aliis: at hæc dependentia arguit imperfectionem vt perspicuum est, cum gradus octauus nihil habeat in se quo aliis excellat, sed vt summum, quatenus est ordine octauus, quod

habet præcisè ex eo quod septem alij præcedunt, à quibus necessariò dependet.

Obiicies 1. Si omnes gradus intensiōis essent similes, sequeretur calidum ut vnum posse octo gradus caloris in eodem subiecto producere, quod tamen repugnat experientiæ; sequela patet, nam calidum ut vnum potest vnum gradum caloris in octo subiectis distinctis producere, ergo & eos omnes in vno subiecto producere posset. Respondeo negando sequelam maioris, & ad illius probationem dicimus, calidum ut vnum non posse intendere in eodem subiecto calorem vnius gradus, non quod secundus gradus sit entitatiuè nobilior primo; sed quia simile non agit in simile, ut supra ostendimus; potest autem in pluribus subiectis non calidis producere vnum gradum caloris, ob rationem oppositam; ea enim sunt quoad hoc ei dissimilia, & in potentia ad vnum gradum caloris recipiendum.

Obiicies 2. Quando aqua recipit primum gradum caloris, ille expellit octauum gradum frigoris, & manet simul cum aliis septem, quod indicio est octauum gradum esse aliis dissimilem, aliàs cur potius illum quàm alium expelleret? Respondeo id non sequi, nam cum subiectum sit tantum capax octo graduum frigoris aut caloris, necesse est ut quantum calor in eo intenditur, tantum frigus in illo remittatur; quare cum aqua recipit vnum gradum caloris, statim amittit vnum gradum frigoris, non quod ille gradus sit aliis dissimilis, sed quia etsi omnes sint similes, non possunt nisi septem ex illis consistere simul cum vno gradu caloris.

Quare autem cum omnes gradus frigoris

sint similes, vnus potius aduentu caloris destruatur quàm alius, id certo affirmari non potest. Nonnulli dicunt non esse potiorẽ rationem spectata rei natura, cur vnus destruatur quàm alius, sed id referendum esse in determinationem causæ primæ, quæ vt in alijs plerisque casibus, ita & in isto, nam sam ex se indifferentem ad plures effectus, ad hunc potius quàm illum determinari debet.

Alii dicunt, etsi gradus omnes frigoris sint similes, ex varijs circumstantijs & conditionibus oriri quod vnus prius expellatur quàm alius, sicut alibi diximus probabilius videri, ex circumstantijs oriri quod causæ ordinis naturalis, ex se indifferentes ad producendos plures effectus numero distinctos, hunc potius producant quàm aliam.

Quod si neutra ex his responsionibus placet aduersarijs, dicant ipsi quid fieri possit, vt cum ex eorum sententia, primus gradus sit imperfectissimus, & octauus perfectissimus, ad productionem primi gradus frigoris non primus, vel secundus, sed vltimus caloris gradus corumpatur.

Obicies 3. Si omnes gradus intensiõis essent similes, sequeretur plures gradus in diuersis partibus subiecti extensos, intensiõem constituere si in eadem parte reciperentur: hoc autem absurdum esse ex eo patet, quia sequeretur intensiõem qualitatis non esse perfectiorem illius extensiõis. Respondeo admissa sequela maioris, negandam esse minorem, ad cuius probationem aliqui concedunt, intensiõem qualitatis non esse perfectiorem illius extensiõis; quia calor intensus vt quatuor, nullam habet

perfectiorem entitativam, quam non habeant quatuor gradus caloris extenti in diversis partibus subiecti. Alii verò id negant, quia et si eadem sit entitas graduum, dum tamen omnes simul in eadem parte ponuntur, spectant ad integritatem eiusdem qualitatis, ita ut intensio sit compositio illi integralis; extensio verò est quidam modus accidentalis illi ex subiecto adueniens.

## CAPVT IX.

DE RERVM VBICATIONE,  
& duratione.

## ARTICVLVS PRIMVS.

*Per quid res sint formaliter in loco.*

**P**rimoneo res omnes creatas esse alicubi seu in aliquo loco, & quoties localiter mouentur, locum mutare; ita ut mox sint presentes vni loco seu spatio, mox alteri. Dubitatur ergo quidnam id sit à quo res denominatur esse alicubi, cum enim hæc sit noua denominatio rei adueniens, à quadam forma siue externa, siue interna quæcunque sit, oriri debet. Quænam autem illa sit in dubium vertitur.

Non pauci existimant vbi esse modum quemdam realem & intrinsecum rei vbi-eatz, à quo habet formaliter ut sit præsens tali aut tali loco. Alij verò putant

modum illum, & quamcunque aliam realitatem rei superadditam esse ad hoc superfluum, adeoque quamlibet rem esse formaliter loco præsentem per seipsam immediate.

Et hic posterior modus nobis semper visus est probabilior, primò quia sicut ex communi sententia, res intelligitur esse in tempore, ex eo præcisè quod coexistit tempori: ita est in loco, ex eo quòd per suam entitatem immediate coniungitur loco. Confirmatur, nam ex hypothesi quòd res aliqua per se aliquod spatium occupat, præcisa per mentem quacunque entitate modali, aliaue realitate, sufficienter intelligitur eam in tali loco existere; quemadmodum abstracta quacunque alia reali entitate, satis concipimus rem esse hoc die vel anno, ex hypothesi quòd simul existit cum die vel anno currente.

Secundò, modus ille superueniens necessariò supponit rem ex qua resultat existentem, quemadmodum modus subsistentiæ supponit existentem naturam ex qua fluit. At res existens est alicubi; cum fieri nequeat etiam ex mente aduersariorum, ut res aliqua sit, & nullibi sit; sicut repugnat quòd res existat, & in nullo tempore siue vero, siue imaginario existat. Ergo res prius est in loco quam producat modum illum positivum per quem dicitur esse formaliter in loco, ac proinde non est in loco per talem modum. Non etiam dici potest quòd per illum sit in tali loco v. c. in hoc cubiculo; cum enim non producat modum illum alibi quam in hoc cubiculo, necesse est ut prius in illo sit, quam talem modum producat.

Tertiò cum modus ille distinguatur realiter à re locata, vt supponitur, poterit Deus impedire illius resultantiam, sicut potest impedire ne substantia à natura resultet, vt patet ex mysterio Incarnationis. Imò etsi modus ille productus sit, poterit Deus illum destruere tota rei substantia conservata; in hoc enim nulla apparet repugnantia, supposita distinctione allata quam Aduersarij amplectuntur. Eo autem modo sic impedito, vel destructo res nihilominus erit in eodem loco in quo erat antea, cum propterea alio translata non sit. Ex quo euidenter sequitur rem non esse in loco per modum illum, sed per seipsam immediatè. Confirmatur, nam non aliter res vt affecta modo illo est in loco, nisi quia per illum immediatè coniungitur loco: at potest æquè sine illo per seipsam coniungi loco; ergo & esse in loco sine ope illius.

Obiicies 1. Quod Petrus sit in hoc cubiculo, est quædam noua denominatio realis, quæ non nisi à forma aliqua reali profuere potest: at non profuit ab entitate Petri, & cubi-  
culi, quia vtraque entitas esse potest etsi Petrus non sit in cubiculo, ergo ab aliqua oriri debet, quæ alia esse nequit quàm modus prædictus. Respondeo primo hoc argumentum contra plerosque ex Aduersariis retorqueri posse, quatenus nobiscum dicent rem esse in tempore per seipsam, & pariter album esse alteri similem per seipsum: dici enim potest esse in tempore, & esse alteri simile, inferre denominationes reales, quæ proinde à forma aliqua reali oriri debent.

Respondeo 2. quòd Petrus sit in hoc cubi-

culo esse denominationem realem ex eo ortam, quod Petrus per seipsum immediate est intra cubiculum, sicut idem Petrus existit hoc tempore per seipsum, & paries albus per seipsum est similis alteri parieti albo; indeque oritur realis denominatio quæ præter rem existentem, & similem, connotat tantum coexistentiam temporis, & parietis albi.

Obiicies 2. Actio realis terminum realem habere debet: atqui motus localis est actio realis; ergo terminum realem habere debet. Rursus actionis realis terminus est intrinsecus, qualis non est locus respectu motus localis; Ergo ponendum est in ipso mobili aliquid reale & intrinsecum per motum localem productum, quod aliud esse nequit quam modus ille de quo litigamus. Respondeo 1: hoc argumentum contra arguentes posse retorqueri, nam siue Petrus per motum localem acquirat aliquem locum, siue per creationem in eo loco diuinitus constituatur, semper verum erit Petrum quantum est ex se, esse in eodem loco: nec tamen idem esse potest formalis terminus positionis in loco per creationem, & motus localis: quare falsum est quod per motum localem producat modus aliquis positivus, per quem res sit formaliter in loco.

Respondeo 2. actiones esse duplicis generis, alix enim sunt productivæ, qualis est calefactio, alix tantum adductivæ, cuiusmodi est motus localis, qui non eo tendit ut producat aliquid in mobili, sed ut mobile transferat ab uno loco ad alium, illudque immediate & per seipsum cum tali loco con-



iungat. Et hoc vel ex ipso nomine huius motui imposto intelligi potest: non enim dicitur alteratio, quia per illum mobile nihil reale acquirit aut deperdit, sed simpliciter motus localis ut intelligatur eiusmodi motum ex natura sua tendere ad locum, & esse viam ad illum tanquam ad suum terminum. Vnde ad rationem illius sufficit quod novus locus per illum acquiratur.

## ARTICVLVS II.

*De rerum duratione.*

**Q**UÆRITUR 1. Quid propriè sit duratio; & an addat aliquam entitatem realem supra rem quæ durare dicitur.

**R**ESPONDEO & dico 1. *Durationem non esse propriè & formaliter existentiam rei, sed potius illius permanentiam in esse.* Primum patet, quia per existentiam præcisè res dicitur tantum esse seu existere; at per durationem aliquid amplius innuitur, nempe rem aliquanto tempore existere, seu in suo esse permanere. Vnde in sententia ponente in motu, & in tempore indivisibilia, dici nequit propriè ea durare, quia in suo esse non permanent.

Secundum ostenditur, quia positâ rei permanentiâ in esse, statim intelligitur eam durare, ablatâ vero oppositum intelligitur; ergo duratio rectè constituitur in tali permanentia. Confirmatur, nam eò magis aut minus res dicitur durare, quò magis aut minus in suo esse perseverat: Ex quo sequitur durationem posse definiri, *permanentiam rei in suo esse.*

Dico 2. *Durationem non esse entitatem realiter*

*distinctam à re durante.* Hoc in primis certum est in Deo omnium consensu, quia Deus verè durat per totam æternitatem, nec tamen hæc duratio dicit aliquid ab illius substantia realiter distinctum. Vnde colligitur idem secundo posse dici in rebus creatis, proportionem servata. Cuius ratio est, quia sicut concipimus Deum durare ab æterno, eò quòd illius esse semper permanet; ita intelligimus res creatas durare, ex eo præcisè quòd earum esse aliquandiu permanet.

Confirmatur, nam ex vna parte ablata permanentia in esse, res desinit durare, adeoque duratio nihil est aliud realiter quàm esse permanens: ex alia verò esse permanens non dicit aliquid realiter ab esse distinctum, ut patet in Deo, eaque ratione suadetur; quia si adderet aliquid realiter distinctum, non esset præcisè ipsum esse permanens, sed potius aliquod illius augmentum, quod nullo modo necessarium est, ut res durare intelligatur.

Obijeies 1. Duratio non est præcisè rei existentia, ut prima assert. dictum est, ergo addit aliquid supra existentiam. Respondeo addere tantum connotationem temporis cui res durans coexistere dicitur, non autem aliquam realem entitatem ipsi rei duranti de nouo aduententem, & ab illius existentia realiter distinctam. Exempli causa, cum dicimus aliquem durasse per 50. annos, nihil aliud concipimus quàm eum in suo esse perstitisse, quantum tempus illud effluebat. Vnde etsi ille plus durauerit quàm si non nisi 30. annis vixisset, ea maior duratio non dicit aliquam entitatem ab illius existentia realiter distinctam, sed tantum connotationem longioris temporis; sicut vice versa minor duratio non dicit

detractionem alicuius entitatis, sed tantum eiusdem existentia correspondentiam cum breviori tempore.

Obijcies 2. Prius est rem existere quàm durare, ergo duratio se habet vt accidens respectu rei etiam vt existentis, adeoque realiter distinguitur ab illa. Antecedens probatur, quia existentia est magis intrinseca rei quàm duratio; prima verò consequentia patet, quia quidquid aduenit enti in actu perfecto, est accidens illius, secunda ostenditur, quia nihil potest accidere sibi. Respondeo ad priorem consequentiam, durationem esse accidens aliquod respectu existentia, non realiter illam efficiens, sed consistens in connotatione extrinseca temporis ei correspondentis, vt explicatum est. Ad eum modum quo columnæ existenti in aula, aduenit accidentario esse modò dextram, modò sinistram ambulanti per aulam; non quidem per realitatem aliquam ei superadditam, sed per denominationem extrinsecam à motu ipsius ambulantis, qui modo fit illi dexter, modo sinister.

Obijcies 3. Duratio distinguitur in Deo ratione & virtualiter ab existentia, ergo in creatis realiter ab illa distingui debet; sequela patet, quia virtualis distinctio attributorum Dei à reali distinctione creaturarum sumi solet. Respondeo negando consequentiam, & ad illius probationem dicendum, non opus esse vt quæcumque sunt in Deo indistincta realiter, in creaturis realiter distinguantur, vt ex eo patet, quòd ex communi Philosophorum & Theologorum sententia, de qua supra actum est, existentia creaturarum non distinguitur realiter ab eorum essentia. Non pauci

quoque existunt intellectum, & voluntarium non distingui in homine à substantiâ animæ.

Quæritur 2. Quotuplex possit assignari rerum duratio.

Respondeo & dico 1. *Durationem posse generalim diuidi in permanentem, & successiuam.* Ratio est quia cum duratio non distinguatur ab existentia rei durantis, sicut aliquæ res sunt in sua existentia permanentes vt Deus, Angeli, cœli; aliæ successiuæ, vt motus; hinc sequitur aliam durationem esse permanentem, aliam successiuam.

Quo loco aduerte 1. hanc diuisionem non pugnare cum definitione durationis superius allata: quia cum diximus durationem esse permanentiam rei in suo esse, permanentiâ illa sumpta est pro quacunque perseverantia in esse, siue ea sit permanens, siue successiuâ: hic verò quando diuidimus durationem in permanentem & successiuam, agimus de permanentiâ vt dicit partes omnes rei simul existentes, & distinguitur essentialiter à duratione successiuâ, quæ dicit partes post partes.

Aduerte 2. Non modo res incorruptibiles, sed etiam corruptibiles posse habere durationem permanentem pro aliquo tempore, vt patet; nam homo, equus, lapis, & similia permanentes durant, quatenus toto aliquo tempore existunt secundum omnes suas partes. Vnde distinguuntur à rebus successiuis, quod hæc cum sint in continuo fluxu, nunquam alicui tempori coexistunt secundum omnes suas partes, sed huic parti temporis secundum vnâ partem, illi secundum aliam.

Dico 2. *Durationem posse iterum diuidi in æternitatem, æuam, & tempus.* Cuius diuisionis ratio

nonnullis sic redditur: quot sunt modi quibus res in suo esse permanent, tot sunt durationes; at modi illi sunt tres, nam aliquid caret principio & fine, nempe Deus; alia habere principium, sed finem non sunt habitura, ut Angeli, & cæli; alia denique & initium habuerunt, & finem habitura sunt, nempe omnia corruptibilia. Et quidem Deo competit prima duratio, quæ est æternitas: Angelis, & cælis secunda, quæ dicitur ævum, corruptibilibus omnibus tertia, quæ tempus appellatur. Verum hæc ratio diuisionis non satis concinna videtur, quia etsi supponeretur Angelos creatos esse ab æterno, aut aliquando finem habituros, eorum duratio non esset æternitas, aut tempus sed ævum.

Melius ergo cum alijs dici potest, aliquid esse quod habet absolutam necessitatem essendi, ita ut nulla potentia siue naturali siue supernaturali possit deficere; & hic est solus Deus, cuius duratio propria est æternitas. Alia esse quæ supernaturaliter quidem possunt deficere, non tamen naturaliter, ut Angeli, & cæli quorum duratio est ævum. Alia tandem quæ naturaliter deficere possunt, ut omnia corruptibilia quæ tempore mesurantur. Ex quo patet diuisionem prædictam esse adæquatam, & ad illam omnes rerum durationes reducendas esse.

Vbi nota 1. Inter res corruptibiles alias esse quæ continuo deficiunt, ut motus; alias quæ aliquandiu in suo esse perseverant, ut homo, equus, lapis, aliaque composita substantia: & priorum quidem durationem à Philosophis, & Theologis communiter vocari tempus, posteriorum verò ævum. Illi tamen congruentius loqui videntur, qui ævum solis re-

bus incorruptibilibus relinquendum existimant. Omnibus vero corruptibilibus siue aliquandiu permanentibus, siue successiuis temporis assignandum; cum vulgo res corruptibiles & temporales pro eodem sumantur & frequentissime dici soleat talem hominem tanto tempore vixisse: sanctus quoque Thomas, 1. p. qu. 10. art. 4. ad 3. doceat tempus non solum mensurare ea quæ transmutantur actu, sed etiam quæ sunt transmutabilia. Fatendum tamen tempus esse magis propriè mensuram rerum quæ actu transmutantur, seu quæ in fluxu consistunt, qualis est motus, vt patebit ex temporis definitione infra explicanda.

Nota 2. Durationem visionis beatificæ à plerisque vocari æternitatem participatam, durationem verò gratiæ, aliorumque donorum supernaturalium in hac vita, modum æternitatis participatæ, & durationem operationum Angelicarum, quæ aliquandiu durant, modum xpi. Verum quia tot durationum multiplicatio confusionem parit, placet modus loquendi eorum qui visionem beatificam, & dona infusa ex natura sua incorruptibilia ad æuum, operationes verò Angelicas ad tempus reducunt. Cæterum quia de æternitate, & æuo aliquid diximus lib. 1. Theol. specul. cap. 6. reliquum est vti hic de tempore pauca dicamus.

## ARTICVLVS III.

*De Tempore.*

**Q**UÆRITUR 2. Quid sit tempus. Respondetur tempus ab Aristot. sic defini 4. Physic. cap. 11. tex. 101. *Tempus est numerus motus se-*

*enndum prius, & posterius.* Dicitur 1. *numerus, seu mensura motus*, quod videtur intelligendum de numero numerante, & de mensura mensurante, quomodo soli tempori externo sumpto à conuersione cœlorum competit; quia tempus illud assumere solemus ad mensurandas res corruptibiles & successiuas, propter omnimodam illius certitudinem & inuariabilitatem. Poterit tamen ea definitio applicari durationi internæ motus, si numerus seu mensura passiuè accipiatur; quia tempus internum motus est id quo motus numeratur, seu mensuratur secundum partes priores, & posteriores.

Dicitur 2. *Secundum prius & posterius*, vt intelligatur motum non mensurari à tempore, vt habet extensionem ad spatium, vel vt habet extensionem gradualem; sed quatenus habet successionem, seu alias partes priores, alias posteriores. Cæterum definitio prædicta non competit propriè tempori, quatenus dici potest ex suprà dictis, mensura rerum corruptibilium secundum suam substantiam spectatarum; cum in ea non sit propriè successio, seu prius & posterius sub ea ratione.

Obijcies 1. Tempus malè dicitur numerus, cum tempus sit quantitas continua, & numerus discreta. Respondeo numerum hic non sumi pro quantitate discreta, sed pro multitudine partium vnitarum; qua ratione tempus est propriè numerus, eò quòd partes temporis motui applicatæ, illius successionem mensurant, & patefaciunt.

Obijcies 2. Numerus humerans est quid effectum ab intellectu: at tempus est ens reale; ergo non bene definitur numerus, si id intelligatur de numerante. Respondeo tempus

quidem externum, ut identificatur cum motu cœlorum, esse quid reale, & ab intellectu independens; ut autem sumitur præcisè in ratione numeri numerantis, vel mensuræ actiue, dicere ens rationis. Siquidem quod duratio motus cœli in annos, menses, dies, & horas diuidatur ad mensurandos motus rerum sublunarium, id sanè opus est intellectus humani, adeoque merum ens rationis respectu durationis motus cœlestis.

Obijcies 3. Mensura debet esse notior mensurato: at tempus est ignotius motu; ergo non bene dicitur mensura illius. Respondeo tempus in se quidem esse nobis ignotius motu; in ratione tamen mensuræ esse quid notius, quatenus intelligimus quantitatem motus, per tempus quo peractus est.

Obijcies 4. Etiam quietem, ut est motus priuatio, tempore mensurari, adeoque tempus non rectè dici mensuram solius motus. Respondeo quietem mensurari tempore per accidens, motum verò per se, adeoque in definitione temporis solius motus mentionem faciendam esse: tempus enim numerat seu mensurat ratione partium priorum & posteriorum; quæ per se quidem motui, priuationi verò motus, non nisi per ordinem ad motum competunt.

Quæritur 2. Quomodo se habeat tempus ad motum. Quod ut clarius resoluitur,

Aduerte 1. Duplex esse tempus, ut patet ex dictis, aliud externum quod communiter sumitur pro duratione motuum cœlestium, ut per illam res sublunares earumque motus mensurantur; aliud internum quod cuilibet rei per se, ut permanet in suo esse, competere. Illud vnicum est & commune pro rebus omni-



bus mensurandis, hoc verò est multiplex, iuxta rerum quæ durare dicuntur varietatem. Vnde etsi sol sisteretur, sicque ex illius motu non possent mensurari res istæ inferiores, ex tamen non desinerent durare intrinsecè quamdiu existerent, adeoque tempus proprium & internum habere.

Aduerte 2. Tempus externum adhuc distinguere in reale & imaginarium: reale est duratio motus cæli, imaginarium verò est duratio illa quam concipimus ab æterno præcessisse motum cæli, quæque suo modo fluere, etsi cælum non moueretur. Vnde ratione talis temporis dicimus Deum potuisse creare mundum mille annis antequam illum creauerit; & si Deus, immoto cælo, res sublunares conseruaret, diceremus aliquas existere eodem tempore, alias diuersis temporibus.

Aduerte 3. Hic quæstionem moueri de tempore interno cuiusque rei, nam quod tempus cæleste realiter distinguatur à rebus inferioribus, earumque motu, id nimis manifestum est. Dubitatur ergo an duratio interna motus ab illo realiter distinguatur.

RESPONDEO & dico 1. *Non esse ponendam distinctionem realem inter tempus internum & motum.* Probatur tum ex supradictis de indistinctione durationis à re durante, tum quia tempus internum nihil aliud facit quàm vt sit successio inter partes motus, seu vt vna fluat immediatè post aliam; in hoc autem fluxu non est necesse admittere vllam realitatem distinctam ab ipsis partibus fluentibus, cum sine illa satis intelligi possit vnam partem fluere post aliam.

Confirmatur, nam ea est natura motus, vt habeat partes fluentes; ergo ex se & sine vlla

entitate superaddita dicit successionem, & moram; adeoque non distinguitur realiter à tempore interno. Eò vel maximè quia cùm motus sit ens imperfectissimum, & veluti quidam modus, absurdum videtur ei tribuere quendam modum realem à quo successionem partium recipiat.

Obijcies, motus potest esse diuinitus sine successione, ergo successio realiter à motu distinguitur; ergo & tempus internum, cùm à successione non distinguatur. Respondeo admissio antecedente de quo in Physica, negando consequentiam; quia etsi motus fieret simul, non propterea deesset illius partibus quædam realitas, sed tantùm aliqua denominatio prioris & posterioris, quam habent dùm vna alteri succedit.

Dico 2. *Quamuis præcedens assertio in aliquo motu falsa supponeretur, in motu tamen locali vt certam defendendam esse.* Ratio est, quia etsi successio ab aliquo motu tolli possit, non tamen à motu locali, vt loco citato ostendemus. Quare cùm eiusmodi motus non possit non fieri successiuè, hinc fit vt successio non modo realiter cum illo identificetur, sed etiam sit de essentia illius; adeoque vt tempus internum, quod à successione non distinguitur, à motu realiter distingui non possit.

Ex his autem colligè, non immeritò tempus à Categoria quantitatis à nobis in Logica exclusum esse; cum non dicat extensionem aliquam propriam à motus partibus realiter distinctam, adeoque ad motum reduci debeat.

Quæritur 3. Qua ratione tempus existat: quod duobus modis tractari potest, primò absolutè & abstrahendo à communi sententia, quæ instantia indiuisibilia, & partes diuisibi-

les in tempore admittit. Secundò ex hypothesi quòd vera sit sententia illa communis de compositione temporis ex instantibus, & ex partibus diuisibilibus.

Respondeo & dico 1. *Probabilius esse absolute loquendo, tempus constare ex solis instantibus, adeoque per ea sola existeré.* Probari potest 1. quia ex communi Aristotelis, omniumque hominum sensu, ex tempore nihil habemus præter instans, etsi illud totum successiue habeamus. Quare tempus non nisi ex instantibus constat. Nec dicas, commune illud proloquium non debere intelligi de instanti Physicè indiuisibili, sed de indiuisibili moraliter spectato, seu de morula adeo breui ut respectu nostri se habere videatur per modum instantis indiuisibilis: hoc enim sine fundamento dictum videtur, & mox addenda probatione refelli potest.

Probatur 2. Nam quidquid est temporis, nunc est: at quidquid nunc est, est instans indiuisibile; ergo quidquid est temporis est instans indiuisibile: ac proinde in tempore nihil est præter instantia indiuisibilia. Maior certa est, nam in tempore præter id quod nunc est, accipi non potest nisi quod fuit, aut quod futurum est: at quod fuit, non amplius est, & quod futurum est, nondum est: adeoque nihil est temporis, nisi quod nunc est. Minor suadetur, nam quidquid ex tempore nunc est, simul totum est: at quod simul totum est ex tempore, est instans indiuisibile; cum repugnet partem aliquam illius diuisibilem & successiuam esse totam simul. Vnde necessariò sequitur in tempore nihil esse præter instantia indiuisibilia. Confirmatur, nam præteritum aliquando fuit præsens, futurum erit aliquan-

do præsens, & nihil est præsens præter instans indiuisibile; cum in parte diuisibili & fluxa aliquid iam non sit, & aliud nondum sit. Quare id omne ex quo tempus constat reducitur ad instans indiuisibile.

Respondet fortè aliquis, non tantum instans temporis, sed etiam aliquam illius partem incertam, & indeterminatam posse totam simul esse præsentem. Verum id gratis dicitur, quia cum pars illa sit diuisibilis & successiua, repugnat quod tota simul existat. Aliàs pars quælibet temporis determinata ut hora, dies, annus posset tota simul existere; cum simultanea existentia illi non repugnet, quia est pars determinata, sed quia est ens successiuum, & in fluxu positum.

Probatur 3. Quia posita compositione temporis ex meris instantibus, multa faciliè intelliguntur quæ aliàs ægrè explicari possunt. Imprimis intelligitur, quomodo Deus possit in instanti creare Angelum, eumque immediatè post illud instans annihilare. Intelligitur etiam, quomodo in rerum corruptione vna forma alteri immediatè succedat, ut formæ ligni in vno instanti destructæ, forma ignis in sequenti instante geniti; adeo ut materia nunquam sit destituta omni forma. Hocque valdè consentaneum est communi sententiæ quæ docet, res permanentes incipere & desinere in instanti, ut infrà dicemus. Intelligitur præterea, quomodo homo possit immediatè ante instans mortis elicere actum contritionis, qui tunc obligat; quique cum sit supernaturalis & spiritalis, postulat ex se produci in instanti. Rursus quæ suprà diximus de continuitate alterationis carent difficultate posita temporis compositione ex instantibus ut visum est. Ac tandem

tandem pleraque alia passim occurrunt, quæ ex dicta sententia lucem accipere possunt: quare ex eo etiam capite oppositæ præferenda videtur.

Obiicies, quantitas permanens non constat ex indivisibilibus, ergo nec successiva, quale est tempus. Antecedens in Physica probabitur, consequentia verò suadetur à paritate rationis. Respondeo negando sequelam, ob discrimen apertum quod inter illas quantitates reperitur. Nam in quantitate permanente vnum indivisibile additum alteri non facit maius; quia sunt simul: at in quantitate successiva secus res se habet; quia indivisibilia non sunt simul, sed vnum succedit alteri; & ita ambo faciunt quid extensum, & maius.

Dico 2. *in sententia ponente in tempore instantia, & partes diuisibiles, congruentius dici tempus existere per suas partes, quàm per instantia.* Probatur, tum quia cum totum non distinguatur à suis partibus, nec habeat aliam entitatem actualem, quàm entitatem actualem earum, quæ ab existentia non distinguitur; repugnat tempus existere, & non existere per partes ex quibus essentialiter componitur. Tum quia intelligi nequit aliquam temporis partem ex futura fieri præteritam, nisi aliquando sit præsens: sicut non potest concipi quòd corpus aliquod moueatur localiter ab extremo in extremum, nisi transeundo per medium. Tum quia sicut in sententia, quæ in quantitate permanente ponit partes diuisibiles, & indivisibilia eas partes copulantia, absurdè diceretur quantitatem permanentem non existere nisi per sua indivisibilia, ita in sententia quæ in quantitate successiva constituit partes diuisibiles, cum indivisibilibus eas partes copulantibus, immeritò dicitur quantitatem successivam non existere, nisi ratione eiusmodi indivisibilium. Eò vel

Metaphysica.

V.

maximè quia quòd res aliqua sit, & existat potius per aliquid quod non est pars illius, quàm per partes ex quibus componitur, id à recta ratione prorsus alienum videtur. Quare vel nihil relinquendum in tempore præter instantia, vel fatendum tempus existere per suas partes, quouis modo id fiat.

## ARTICVLVS IV.

*De incensione, & desitione rerum.*

**P**RÆMONEO non omnia quæ existunt, & durant incipere aut desinere esse, Deus enim neque initium habuit, neque finem vnquam habiturus est; creaturæ verò omnes initium essendi habuerunt, sed aliæ in æternum sunt duraturæ, vt Angeli, cœli, & elementa, itemque homines post resurrectionem; aliæ verò sicut in tempore incœperunt, ita & in tempore desinent, vt mixta omnia. Est autem difficultas quomodo contingat hæc rerum inceptio, & desitio.

Philosophi communiter statuunt duplicem incipiendi, & desinendi modum, quorum priorem vocant intrinsecum, posteriorem verò extrinsecum. Prior modus incipiendi est per primum sui esse, ita vt dici possit, res est in hoc instanti, & immediatè ante non erat; qua ratione res permanentes incipere dicuntur. Posterior est per vltimum sui non esse, ita vt dici possit, res nunc non est, sed immediatè post erit, & hoc modo successiva incipere dicuntur.

Similiter prior modus desinendi est per vltimum sui esse, ita vt dici possit, res nunc est, & immediatè post non erit, quomodo permanentia desinere dicuntur; posterior verò per primum sui

non e  
sed im  
tribu  
Et q  
primu  
ta rati  
beant  
vt succ  
primu  
lent; &  
ampli  
Quò  
sui non  
ea rati  
totum  
possun  
bile &  
instans  
non fin  
non su  
intrins  
intrins  
debean  
non es  
instan  
& des  
non es  
morus  
Veru  
quibus  
desitio  
explica  
dicant  
aliqua  
& desir  
ampli  
re in a

non esse, adeo ut dici possit, res nunc non est, sed immediate antea fuit, qui modus desinendi tribuitur rebus successivis.

Et quidem quod res permanentes incipiant per primum sui esse, & desinant per ultimum sui esse, ea ratione probari solet: quia cum res illæ habeant totum suum esse simul, & non per partes, ut successivæ; necesse est assignari aliquod instans primum in quo esse incipiant, cum antea non essent; & aliquod instans ultimum, post quod non amplius sint.

Quod verò res successivæ incipiant per ultimum sui non esse, & desinant per primum sui non esse, ea ratione ostenditur; quia cum res illæ habeant totum suum esse successivè, & per partes, non possunt existere in instanti: quia instans est indivisibile & totum, quò fit ut quando existunt, nullum instans à parte priori assignari possit ante quod non sint, neque ullum à parte posteriori post quod non sunt. Ex quo sequitur ut non debeant incipere intrinsecè, seu per primum sui esse, nec desinere intrinsecè, seu per ultimum sui esse; sed è contra debeant incipere extrinsecè, seu per ultimum sui non esse, ita ut verè dici possit, nunc, seu in hoc instanti non est motus, sed immediate post erit; & desinere etiam extrinsecè seu per primum sui non esse, adeo ut verè dici possit, nunc non est motus, sed immediate ante erat.

Verum quia non omnes admittunt instantia, in quibus prædicta fundantur, rerum inceptio, & desinitio paulò aliter, iuxta eorum sententiam, explicari potest. Ita nimirum ut res permanentes dicantur incipere secundum totum suum esse, in aliqua parte temporis ante quam non existebant; & desinere in alia temporis parte, post quam non amplius sint. Res verò successivæ dicantur incipere in aliqua temporis parte, non quidem secun-

quoque existunt intellectum, & voluntatum non distingui in homine à substantiâ animæ.

Queritur 2. Quotuplex possit assignari rerum duratio.

Respondeo & dico 1. *Durationem posse generatim dividi in permanentem, & successivam.* Ratio est quia cum duratio non distinguatur ab existentia rei durantis, sicut aliqua res sunt in sua existentia permanentes ut Deus, Angeli, cœli; alia successivæ, ut motus; hinc sequitur aliam durationem esse permanentem, aliam successivam.

Quo loco adverte 1. hanc divisionem non pugnare cum definitione durationis superius allata: quia cum diximus durationem esse permanentiam rei in suo esse, permanentiæ illa sumpta est pro quacunque perseverantia in esse, siue ea sit permanens, siue successiva: hic verò quando dividimus durationem in permanentem & successivam, agimus de permanentia ut dicit partes omnes rei simul existentes, & distinguitur essentialiter à duratione successiva, quæ dicit partes post partes.

Aduerte 2. Non modo res incorruptibiles, sed etiam corruptibiles posse habere durationem permanentem pro aliquo tempore, ut patet; nam homo, equus, lapis, & similia permanenter durant, quatenus toto aliquo tempore existunt secundum omnes suas partes. Unde distinguuntur à rebus successivis, quod hæc cum sint in continuo fluxu, nunquam aliqui temporis coexistunt secundum omnes suas partes, sed huic parti temporis secundum unam partem, illi secundum aliam.

Dico 2. *Durationem posse iterum dividi in æternitatem, ævum, & tempus.* Cuius divisionis ratio

inobus  
non  
care  
buer  
tut a  
habu  
omn  
petit  
gelis  
rupti  
pella  
conc  
geloe  
fimen  
ætern  
Me  
esse c  
di, ita  
natura  
cuius  
quæ  
non  
quor  
natura  
ptib.  
tet d  
ad il  
das  
Vt  
se qu  
aliqu  
equu  
lia: &  
Coph  
pus,  
grue



nonnullis sic redditur: quot sunt modi quibus res in suo esse permanent, tot sunt durationes; at modi illi sunt tres, nam aliquid caret principio & fine, nempe Deus; alia habere principium, sed finem non sunt habitura, vt Angeli, & cæli; alia denique & initium habuerunt, & finem habitura sunt, nempe omnia corruptibilia. Et quidem Deo competit prima duratio, quæ est æternitas: Angelis, & cælis secunda, quæ dicitur ævum, corruptibilibus omnibus tertia, quæ tempus appellatur. Verum hæc ratio diuisionis non satis concinna videtur, quia etsi supponeretur Angelos creatos esse ab æterno, aut aliquando finem habituros, eorum duratio non esset æternitas, aut tempus sed ævum.

Melius ergo cum alijs dici potest, aliquid esse quod habet absolutam necessitatem essendi, ita vt nulla potentia siue naturali siue supernaturali possit deficere; & hic est solus Deus, cuius duratio propria est æternitas. Alia esse quæ supernaturaliter quidem possunt deficere, non tamen naturaliter, vt Angeli, & cæli quorum duratio est ævum. Alia tandem quæ naturaliter deficere possunt, vt omnia corruptibilia quæ tempore mensurantur. Ex quo patet diuisionem prædictam esse adæquatam, & ad illam omnes rerum durationes reducendas esse.

Vbi nota 1. Inter res corruptibiles alias esse quæ continuò deficiunt, vt motus; alias quæ aliquândiu in suo esse perseverant, vt homo, equus, lapis, aliaque composita substantia: & priorum quidem durationem à Philosophis, & Theologis communiter vocari tempus, posteriorum verò ævum. Illi tamen congruentius loqui videntur, qui ævum solis re-

bus incorruptibilibus relinquendum existimant. Omnibus vero corruptibilibus siue aliquandiu permanentibus, siue successiuis temporis assignandum; cum vulgo res corruptibiles & temporales pro eodem sumantur & frequentissime dici soleat talem hominem tanto tempore vixisse: sanctus quoque Thomas, 1. p. qu. 10. art. 4. ad 3. doceat tempus non solum mensurare ea quæ transmutantur actu, sed etiam quæ sunt transmutabilia. Fatendum tamen tempus esse magis propriè mensuram rerum quæ actu transmutantur, seu quæ in fluxu consistunt, qualis est motus, vt patebit ex temporis definitione infra explicanda.

Nota 2. Durationem visionis beatificæ à plerisque vocari æternitatem participatam, durationem verò gratiæ, aliorumque donorum supernaturalium in hac vita, modum æternitatis participatæ, & durationem operationum Angelicarum, quæ aliquandiu durant, modum xui. Verum quia tot durationum multiplicatio confusionem parit, placet modus loquendi eorum qui visionem beatificam, & dona infusa ex natura sua incorruptibilia ad æuum, operationes verò Angelicas ad tempus reducant. Cæterum quia de æternitate, & æuo aliquid diximus lib. 1. Theol. specul. cap. 6. reliquum est vt hic de tempore pauca dicamus.

## ARTICVLVS III.

### De Tempore.

**Q**Uæritur 2. Quid sit tempus. Respondeo tempus ab Aristot. sic definiri 4. Physic. cap. 11. tex. 101. *Tempus est numerus motus se-*

*enndum prius, & posterius.* Dicitur 1. *numerus, seu mensura motus*, quod videtur intelligendum de numero numerante, & de mensura mensurante, quomodo soli tempori externo sumpto à conuersione cœlorum competit; quia tempus illud assumere solemus ad mensurandas res corruptibiles & successiuas, propter omnimodam illius certitudinem & inuariabilitatem. Poterit tamen ea definitio applicari durationi internæ motus, si numerus seu mensura passiuè accipiat; quia tempus internum motus est id quo motus numeratur, seu mensuratur secundum partes priores, & posteriores.

Dicitur 2. *Secundum prius & posterius*, vt intelligatur motum non mensurari à tempore, vt habet extensionem ad spatium, vel vt habet extensionem gradualem; sed quatenus habet successionem, seu alias partes priores, alias posteriores. Cæterum definitio prædicta non competit propriè tempori, quatenus dici potest ex suprâ dictis, mensura rerum corruptibilium secundum suam substantiam spectatarum, cum in ea non sit propriè successio, seu prius & posterius sub ea ratione.

Obijcies 1. Tempus malè dicitur numerus, cum tempus sit quantitas continua, & numerus discreta. Respondeo numerum hic non sumi pro quantitate discreta, sed pro multitudine partium vnitarum; qua ratione tempus est propriè numerus, eo quod partes temporis motui applicatæ, illius successionem mensurant, & patefaciunt.

Obijcies 2. Numerus humerans est quid effectum ab intellectu; at tempus est ens reale; ergo non bene definitur numerus, si id intelligatur de numerante. Respondeo tempus

quidem externum, ut identificatur eum motu cœlorum, esse quid reale, & ab intellectu independentens; ut autem sumitur præcisè in ratione numeri numerantis, vel mensuræ actiue, dicere ens rationis. Siquidem quòd duratio motus cœli in annos, menses, dies, & horas diuidatur ad mensurandos motus rerum sublunarium, id sanè opus est intellectus humani, adeoque merum ens rationis respectu durationis motus cœlestis.

Obijcies 3. Mensura debet esse notior mensurato: at tempus est ignotius motu; ergo non bene dicitur mensura illius. Respondeo tempus in se quidem esse nobis ignotius motu; in ratione tamen mensuræ esse quid notius, quatenus intelligimus quantitatem motus, per tempus quo peractus est.

Obijcies 4. Etiam quietem, ut est motus priuatio, tempore mensurari, adeoque tempus non rectè dici mensuram solius motus. Respondeo quietem mensurari tempore per accidens, motum verò per se, adeoque in definitione temporis solius motus mentionem faciendam esse: tempus enim numerat seu mensurat ratione partium priorum & posteriorum; quæ per se quidem motui, priuationi verò motus, non nisi per ordinem ad motum competunt.

Quæritur 2. Quomodo se habeat tempus ad motum. Quod ut clarius resoluitur,

Aduerte 1. Duplex esse tempus, ut patet ex dictis, aliud externum quod communiter sumitur pro duratione motuum cœlestium, ut per illam res sublunares earumque motus mensurantur; aliud internum quod cuiuslibet rei per se, ut permanet in suo esse, competit. Illud vnicum est & commune pro rebus omni-

bus mensurandis, hoc verò est multiplex, iux-  
ta rerum quæ durare dicuntur varietatem.  
Vnde etsi sol sisteretur, sicque ex illius motu  
non possent mensurari res istæ inferiores, ex  
tamen non desinerent durare intrinsecè  
quandiu existerent, adeoque tempus pro-  
prium & internum habere.

Aduerte 2. Tempus externum adhuc distin-  
gui in reale & imaginarium: reale est duratio  
motus cæli, imaginarium verò est duratio il-  
la quam concipimus ab æterno præcessisse  
motum cæli, quæque suo modo fluere etiam  
cælum non moueretur. Vnde ratione talis  
temporis dicimus Deum potuisse creare mun-  
dum mille annis antequam illum creauerit;  
& si Deus, iminoto cælo, res sublunares con-  
seruaret, diceremus aliquas existere eodem  
tempore, alias diuersis temporibus.

Aduerte 3. Hic quæstionem moueri de tem-  
pore interno cuiusque rei, nam quod tempus  
cæleste realiter distinguatur à rebus inferio-  
ribus, earumque motu, id nimis manifestum  
est. Dubitatur ergo an duratio interna motus  
ab illo realiter distinguatur.

RESPONDEO & dico 1. *Non esse ponendam distinctionem realem inter tempus internum et motum.* Probatur tum ex supradictis de indi-  
stinctione durationis à re durante, tum quia  
tempus internum nihil aliud facit quàm vt sit  
successio inter partes motus, seu vt vna fluat  
immediatè post aliam; in hoc autem fluxu  
non est necesse admittere vllam realitatem  
distinctam ab ipsis partibus fluentibus, cum  
sine illa satis intelligi possit vnam partem flue-  
re post aliam.

Confirmatur, nam ea est natura motus, vt  
habeat partes fluentes; ergo ex se & sine vlla

entitate superaddita dicit successionem, & moram; adeoque non distinguitur realiter à tempore interno. Eò vel maximè quia cùm motus sit ens imperfectissimum, & veluti quidam modus, absurdum videtur ei tribuere quendam modum realem à quo successionem partium recipiat.

Obijcies, motus potest esse diuinitus sine successione, ergo successio realiter à motu distinguitur; ergo & tempus internum, cùm à successione non distinguatur. Respondeo admissio antecedente de quo in Physica, negando consequentiam; quia etsi motus fieret simul, non propterea deesset illius partibus quædam realitas, sed tantùm aliqua denominatio prioris & posterioris, quam habent dùm vna alteri succedit.

Dico 2. *Quamvis præcedens assertio in aliquo motu falsa supponeretur, in motu tamen locali ut certam defendendam esse.* Ratio est, quia etsi successio ab aliquo motu tolli possit, non tamen à motu locali, ut loco citato ostendemus. Quare cùm eiusmodi motus non possit non fieri successiue, hinc fit ut successio non modo realiter cum illo identificetur, sed etiam sit de essentia illius; adeoque ut tempus internum, quod à successione non distinguitur, à motu realiter distingui non possit.

Ex his autem colligè, non immeritò tempus à Categoria quantitatis à nobis in Logica exclusum esse; cum non dicat extensionem aliquam propriam à motus partibus realiter distinctam, adeoque ad motum reduci debeat.

Quæritur 3. Qua ratione tempus existat: quod duobus modis tractari potest, primò absolutè & abstrahendo à communi sententia, quæ instantia indiuisibilia, & partes diuisibi-

les in tempore admittit. Secundo ex hypothesi quod vera sit sententia illa communis de compositione temporis ex instantibus, & ex partibus diuisibilibus.

Respondeo & dico 1. *Probabilius esse absolute loquendo, tempus constare ex solis instantibus, adeoque per ea sola existere.* Probari potest 1. quia ex communi Aristotelis, omniumque hominum sensu, ex tempore nihil habemus præter instans, etiam illud totum successiue habeamus, Quare tempus non nisi ex instantibus constat. Nec dicas, commune illud proloquium non debere intelligi de instanti Physice indiuisibili, sed de indiuisibili moraliter spectato, seu de morula adeo breui ut respectu nostri se habere videatur per modum instantis indiuisibilis: hoc enim sine fundamento dictum videtur, & mox addenda probatione refelli potest.

Probatur 2. Nam quidquid est temporis, nunc est: at quidquid nunc est, est instans indiuisibile; ergo quidquid est temporis est instans indiuisibile: ac proinde in tempore nihil est præter instantia indiuisibilia. Maior certa est, nam in tempore præter id quod nunc est, accipi non potest nisi quod fuit, aut quod futurum est: at quod fuit, non amplius est, & quod futurum est, nondum est: adeoque nihil est temporis, nisi quod nunc est. Minor suadetur, nam quidquid ex tempore nunc est, si simul totum est: at quod simul totum est ex tempore, est instans indiuisibile; cum repugnet partem aliquam illius diuisibilem & successiuam esse totam simul. Vnde necessario sequitur in tempore nihil esse præter instantia indiuisibilia. Confirmatur, nam præteritum aliquando fuit præsens, futurum erit aliquan-

do præsens, & nihil est præsens præter instans indiuisibile; cum in parte diuisibili & fluxa aliquid iam non sit, & aliud nondum sit. Quare id omne ex quo tempus constat reducitur ad instans indiuisibile.

Respondet forte aliquis, non tantum instans temporis, sed etiam aliquam illius partem incertam, & indeterminatam posse totam simul esse præsentem. Verum id gratis dicitur, quia cum pars illa sit diuisibilis & successiva, repugnat quod tota simul existat. Aliàs pars quælibet temporis determinata ut hora, dies, annus posset tota simul existere; cum simultanea existentia illi non repugnet, quia est pars determinata, sed quia est ens successiuum, & in fluxu positum.

Probat 3. Quia posita compositione temporis ex meris instantibus, multa faciliè intelliguntur quæ aliàs ægrè explicari possunt. Imprimis intelligitur, quomodo Deus possit in instanti creare Angelum, eumque immediatè post illud instans annihilare. Intelligitur etiam, quomodo in rerum corruptione una forma alteri immediatè succedat, ut formæ ligni in vno instanti destructæ, formæ ignis in sequenti instante geniti; adeo ut materia nunquam sit destituta omni forma. Hocque valdè consentaneum est communi sententiæ quæ docet, res permanentes incipere & desinere in instanti, ut infra dicemus. Intelligitur præterea, quomodo homo possit immediatè ante instans mortis elicere actum contritionis, qui tunc obligat; quique cum sit supernaturalis & spiritualis, postulat ex se produci in instanti. Rursus quæ supra diximus de continuitate alterationis carent difficultate posita temporis compositione ex instantibus ut visum est. Ac tandem



tandem pleraque alia passim occurrunt, quæ ex dicta sententia lucem accipere possunt: quare ex eo etiam capite oppositæ præferenda videntur.

Obiicies, quantitas permanens non constat ex indiuisibilibus, ergo nec successiua, quale est tempus. Antecedens in Physica probabitur, consequentia verò suadetur à paritate rationis. Respondeo negando sequelam, ob discrimen apertum quod inrer illas quantitates reperitur. Nam in quantitate permanente vnum indiuisibile additum alteri non facit maius; quia sunt simul: at in quantitate successiua secus res se habet; quia indiuisibilia non sunt simul, sed vnum succedit alteri; & ita ambo faciunt quid extensum, & maius.

Dico 2. *in sententia ponente in tempore instantia, & partes diuisibiles, congruentius dici tempus existere per suas partes, quàm per instantia.* Probatur, tum quia cum totum non distinguatur à suis partibus, nec habeat aliam entitatem actualem, quàm entitatem actualem earum, quæ ab existentia non distinguitur; repugnat tempus existere, & non existere per partes ex quibus essentialiter componitur. Tum quia intelligi nequit aliquam temporis partem ex futura fieri præteritam, nisi aliquando sit præsens: sicut non potest concipi quòd corpus aliquod moueatur localiter ab extremo in extremum, nisi transeundo per medium. Tum quia sicut in sententia, quæ in quantitate permanente ponit partes diuisibiles, & indiuisibilia eas partes copulantia, absurdè diceretur quantitatem permanentem non existere nisi per sua indiuisibilia, ita in sententia quæ in quantitate successiua constituit partes diuisibiles, cum indiuisibilibus eas partes copulantibus, immeritò dicitur quantitatem successiuam non existere, nisi ratione eiusmodi indiuisibilium. Eò vel

Metaphysica.

V

non esse, adeo ut dici possit, res nunc non est, sed immediate antea fuit, qui modus definendi tribuitur rebus successivis.

Et quidem quod res permanentes incipiant per primum sui esse, & definant per ultimum sui esse, ea ratione probari solet: quia cum res illæ habeant totum suum esse simul, & non per partes, ut successivæ; necesse est assignari aliquod instans primum in quo esse incipiant, cum antea non essent; & aliquod instans ultimum, post quod non amplius sint.

Quod verò res successivæ incipiant per ultimum sui non esse, & definant per primum sui non esse, ea ratione ostenditur; quia cum res illæ habeant totum suum esse successivè, & per partes, non possunt existere in instanti: quia instans est indivisibile & totum, quò fit ut quando existunt, nullum instans à parte priori assignari possit ante quod non sint, neque ullum à parte posteriori post quod non sunt. Ex quo sequitur ut non debeant incipere intrinsecè, seu per primum sui esse, nec definire intrinsecè, seu per ultimum sui esse; sed è contra debeant incipere extrinsecè, seu per ultimum sui non esse, ita ut verè dici possit, nunc, seu in hoc instanti non est motus, sed immediate post erit; & definire etiam extrinsecè seu per primum sui non esse, adeo ut verè dici possit, nunc non est motus, sed immediate ante erat.

Verum quia non omnes admittunt instantia; in quibus prædicta fundantur, rerum inceptio, & desinitio paulò aliter, iuxta eorum sententiam, explicari potest. Ita nimirum ut res permanentes dicantur incipere secundum totum suum esse, in aliqua parte temporis ante quam non existebant; & definire in alia temporis parte, post quam non amplius sint. Res verò successivæ dicantur incipere in aliqua temporis parte, non quidem secun-

dum totum suum esse simul, sed secundum aliquam partem cui alix, & alix sine mora vsque ad finem succedant: desinere autem in aliqua temporis parte, ita vt nihil earum postea supersit.

Ex quo patet, totum discrimen in hac sententia, inter modum incipiendi, & desinendi rerum permanentium, & successiuarum in eo consistere, quod permanentium inceptionem præcedit tempus in quo non sunt, & post quod totæ simul existunt; earum verò desitionem sequitur tempus, ante quod secundum totum suum esse existebant. At successiuæ immediatè post tempus præcedens earum inceptionem, incipiunt esse tantum per aliquam sui partem, & immediatè ante tempus quod earum desitionem sequitur, non nisi secundum aliquam sui partem existebant.

Supposita tamen sententia de compositione temporis ex folis instantibus, dicendum videtur primo res permanentes non tantum incipere, & desinere intrinsecè, sed etiam extrinsecè. Ratio est, quia immediatè antequam sint, datur instans temporis in quo verum est dicere, nunc non sunt, & immediatè post erunt. Et similiter immediatè post earum desitionem datur instans in quo verum est dicere, nunc non sunt, & immediatè antea erant.

Dicendum secundò res successiuas è contra non tantum incipere, & desinere extrinsecè, sed etiam intrinsecè. Siquidem verum est in hoc instanti esse motum, saltem inchoatiuè, & per aliquam partem sui intrinsecam, & immediatè ante non fuisse. Verum quoque est in hoc instanti adhuc esse motum, secundum aliquam sui, & immediatè post non fore.

Adde non posse intelligi, quomodo in sententia communi res successiuæ non incipiant, & desinant, etiam intrinsecè. Probatur, quia cum

In ea dicitur, nunc non est motus, sed  
 immediatè post erit, aut falsum dicitur,  
 aut immediatè post illud instans extrinse-  
 cum, dici verè poterit, nunc est motus,  
 & immediatè ante non erat : sicque mo-  
 tus incipit intrinsecè, non secus ac res  
 permanens. Et similiter quando dicitur,  
 nunc non est motus, & immediatè antea  
 fuit, in eo priori immediato verè poterat  
 dici, nunc est motus, & immediatè post  
 non erit : adeoque motus desinit intrin-  
 secè. Sed de his ingeniorum tormentis,  
 adeoque de tota re Metaphysica satis, ad  
 maiorem Dei omnipotentis gloriam, &  
 honorem.

FINIS.



THESES  
PHILOSOPHIÆ  
VNIVERSALIS,  
SEV  
METAPHYSICÆ.  
EX PRÆFATIONE.



PHILOSOPHIA vniuersalis  
varia sortitur nomina, ac  
præcipuè quatuor. Vocatur  
1. Philosophia per Antono-  
masiam. 2. Sapientia. 3. Theo-  
logia naturalis. 4. Metaphysica, quod  
idem est ac ultra, seu post Physicam.

Metaphysica est propriè scientia.

Obiectum Metaphysicæ est ens reale,  
quatenus ens est. Ens autem vt est obiec-  
tum Metaphysicæ, non debet sumi ita præ-  
cisum à suis inferioribus, vt non includat  
saltem confusè suas species, qua ratione  
est nobilissimum.

Metaphysica est scientia speculatiua.

Metaphysica totaliter spectata non est v-  
nus simplex habitus, sed complexio mul-  
torum habituum partialium.

Metaphysica non est propriè subalternans  
respectu aliarum scientiarum.

Quatuor causæ Metaphysicæ, vt & alius

scientiis speculatiuis possunt assignari, nempe, materialis, formalis, effectiua, & finalis.

Metaphysica ex communi sententia, non modo propter seipsam est valde conueniens, quatenus intellectum cognitione rerum præstantissimarum exornat, sed etiam ad alias scientias acquirendas est valde utilis.

EX CAP. I. LIBRI I.

**V**NIVERSALE sumitur generatim pro Art. 1.  
eo quod aliqua ratione dicit ordinem ad multa.

Esse in multis, & prædicari de multis, sunt duæ rationes distinctæ in vniuersali.

Tria requiruntur ad constitutionem vniuersalis, 1. vt res quæ dicitur vniuersalis, sit aliqua natura realis & positiua. 2. vt ea natura sit vna. 3. vt illa natura sit ex se apta inesse multis per veram, & realem sui multiplicationem in illis, ita vt ratio superior prædicetur de inferiori, non tantum secundum aliquam sui partem, sed secundum se totam adæquatè, siue illa multiplicatio fieri possit per potentiam naturalem in rebus creatis existentem, siue tantum virtute supernaturali.

Duæ sunt generales sententiæ, circa existentiam vniuersalium. Art. 2. Prima est vniuersalia esse naturas realiter separatas à singularibus, & extra illa existentes, quales sunt Idææ Platonice, sed hic modus refellitur, nihil enim existit per se in rerum natura, quod non sit singulare.

Idææ non sunt necessariae ad veram scientiam de rebus creatis habendam, nec

ad procreationem rei imperfectæ quæ à simili non generatur.

Si Idea sumatur pro causa exemplari, sufficiunt Idæ quæ sunt in mente diuina.

*Art. 3.* Vniuersalia existere à parte rei intelligi potest, ut natura sit vniuersalis, non quidem extra singularia, sed intra ipsa singularia. Sed & hic modus etiam refellitur, ad vniuersale enim requiritur ut habeat vnitatem multis communem, quam non habet natura quæ est in indiuiduis, sed potius multiplicitatem tali vnitati repugnantem.

*Art. 4.* Non aliter indiuidua humana possunt dici à parte rei eiusdem speciei nisi quia conueniunt in natura humana.

Indiuidua humana habent vnitatem formalem, non omnia eandem, sed singula propriam ab vnitatibus aliorum distinctam.

Relatio identitatis qua indiuidua referuntur ad inuicem, fundatur in vnitatem conformitatis, quæ est inter eorum naturas, non autem in vnitatem reali quæ sit inter illas.

*Art. 5.* Nec placet tertius vniuersalium modus, vnitas scilicet præcisionis cum aptitudine essendi in multis, non realiter extra singularia, nec in natura iam contracta in suis inferioribus, sed secundum se, quatenus naturæ ordine præcedit contractionem sui ad inferiora.

## EX CAP. II.

*Art. 1.* **S**ECUNDA de vniuersalibus sententia statuit naturas non esse vniuersales, nisi per operationem mentis. Et hoc tribus modis, 1. est eorum qui putant fieri vni-

uerſale per abſtractionē intellectus agētis, cuius officium eſſe aiunt denudare phan-  
taſmata à conditionibus indiuiduantibus,  
ita vt ſpecies quæ repræſentabat hunc vel  
illum hominem ſingularem, repræſentet  
tantum hominem præciſè, & ſecundum  
ſe, ſicque illum conſtituat in ratione vni-  
uerſalis. Verum hic modus reiicitur.

Secundus modus eſt eorum qui docent *Art. 2.*  
vniuerſale reſultare in natura per abſtrac-  
tionem præciſiuam intellectus poſſibilis.  
Sed & hic modus eſt longe probabilior &  
communior præcedenti, non ſatis ſolidè  
videtur excogitatus.

Nihil refert ad conſtitutionem vniuer-  
ſalis, quod abſtractioni præciſiux addatur  
cognitio comparatiua ſiue ſimplex, ſiue  
compoſita.

Tertius modus defendendi vniuerſalia *Art. 3.*  
per mentis operam, eorum eſt, qui docent  
ea fieri non per præciſionem obiectiuam,  
ſed per aliam, quam vocant formalem. Sed  
& hic modus refellitur.

Nullum datur vniuerſale, ſiue à parte rei,  
ſiue per mentis operam eo ſenſu quo in  
ſcholis intelligi, & defendi ſolet.

Opinio negans vniuerſalia fuit commu- *Art. 4.*  
nis ante Ariſtotelem. Negantibus nobis  
dari per mentis operam fauent Scotiſtæ:  
negantibus dari à parte rei ſubſcribunt  
Thomiſtæ.

Etſi non ſit ſcientia de ſingularibus,  
quatenus ſunt corruptibilia, cum tamen  
non corrumpantur niſi quoad existen-  
tiam, nihil vetat quin de eorum prædi-  
catis eſſentialibus vera ſcientia dari poſ-  
ſit.



Destructo vniuersali non sequitur propositiones omnes fore identicas: ad propositionem enim identicam non sufficit, quod attributum sit idem realiter cum subiecto, sed requiritur vt idem sit prædicatum, & subiectum, etiam quoad voces.

Quæ tractanda supersunt de vniuersalibus consentaneè ad communio-rem opinionem de vniuersalibus per mentis operam accipienda sunt.

- Art. 5.* Variæ proprietates vniuersalis à Philosophis afferri solent. 1. est, esse quoddam totum quod vocant potestarium. 2. vt sit prædicabile. 3. vt sit intelligibile. 4. vt dicatur posterius esse singularibus. 5. vt sit semper & vbique, non positiuè tamen, sed negatiuè. 6. vt dicatur esse æternum, & incorruptibile: quod etiam intelligi debet negatiuè.

### EX CAP. III.

- Art. 1.* **I**N definitione generis, quâ dicitur id quod pluribus, & differentibus specie attribuitur in quæstione quid est, non definitur natura secundum se, nec genereitas per se spectata, sed concretum ex natura & genereitate.

Natura substantans genereitati est definitum materiale, & vt quod, genereitas vero definitum formale & vt quod.

- Art. 2.* In definitione generis vniuersale non habet locum generis, sicut nec subiectum, sed prædicabile, cum nihil aliud assignari possit exclusis vniuersali, & subiecto.

- Art. 3.* Genus non requirit necessario plures species actu existentes; sed ad verum ge-

nus sufficiant plures species possibiles, siue per potentiam Physicam, siue per potentiam Logicam.

Species est proximum, & immediatum *Art. 4.*  
generis correlatiuum.

Totale & adæquatum generis correlatiuum non sunt solæ species, sed species simul cum indiuiduis.

Genus refertur ad species & indiuidua, eadem relatione, non obstante diuersitate terminorum, quia vnus respicitur immediate, & alter mediatè.

EX CAP. IV.

**S**PECIEI definitiones, quibus definitur *Art. 1.*  
Id quod subiicitur generi, & de quo genus prædicatur in quid, sunt admittenda.

Nec obstat quod genus à Porphyrio fuerit definitum per speciem, quia proprium est relatiuorum, vt vnum definiatur per aliud: genus autem, & species sunt relatiua.

Nec etiam obstat quod definitiones istæ competant indiuiduo, quia intelliguntur de subiicitibilitate, & prædicabilitate præstantiori, quæ est immediata & proxima, qualis non competit indiuiduo, sed tantum speciei, cum prædicatio generis de indiuiduis, etsi sit immediata quoad voces, in re tamen sit mediata: nullum enim datur à parte rei indiuiduum genericum, seu quod non constituatur in aliqua specie, cum repugnet genus immediate contrahi per differentiam indiuidualem.

Species infima rectè definitur, quæ de multis numero differentibus prædicatur in quid. *Art. 2.*

Nec obstat quod sol, luna, & mundus sint veræ species, quæ tamen non prædicentur nisi de vnico indiuiduo, nihil enim repugnat creari alium solem, aliam lunam, alium mundum, qui cum sint possibiles, sufficit vt habeant rationem speciei.

Valde absurdum est ponere aliquam speciem vniuersalem cuius indiuidua sint impossibilia: Ex communi autem scholasticorum sententia, non repugnat multiplicatio numerica in eadem specie Angelica, imò de facto dantur plures Angeli solo numero distincti.

Quamuis definitio prædicta generi dicatur competere, cum de multis numero differentibus prædicetur, nihil ad rem, cum genus prædicetur de indiuiduis tantum mediata & incompletè, species verò immediate & completè.

*Art. 3.* Duplex est species. Alia subalterna, alia infima.

Species subalterna duplicem habet habitudinem, alteram ad genus, alteram ad inferiora, & priori respectu dicitur species, posteriori vero genus, quia sic multa respicit specie distincta.

Species infima, seu specialissima habet duas habitudines distinctas: alteram ad genus, cui subiicitur, alteram ad indiuidua, de quibus prædicatur.

Etsi relationes prædictæ sint duæ, ambæ tamen eandem denominationem speciei infimæ tribuunt.

*Art. 4.* Non facile intelligitur, quomodo abstrahatur conceptus communis indiuidui, ab omnibus indiuiduis, iuxta senten-

tiam communiozem, quæ præcisiones obiectiuas admittit, si autem agatur de præcisionibus tantum formalibus, dicendum videtur non repugnare, quod detur ratio communis indiuidui, ab hoc vel illo indiuiduo abstracta.

Et si daretur conceptû illum communem, indiuidui abstrahi posse ab omnibus indiuiduis, non tamen concedendum esset conceptum illum esse vniucum, sed tantum analogum.

EX CAP. V.

**A**DMITTENDÆ sunt de facto differentiz simplices, quibus species infimæ constituentur. *Art. 1.*

Differentia inferior formaliter spectata, secundum gradum & perfectionem quam dicit, non includit in conceptu suo differentiam superiorem. *Art. 2.*

Nec obstat quod differentia superior prædicatur de inferiori in abstracto: de ea enim prædicatur tantum in sensu identico, seu materiali, non autem in formali.

Genus est extra conceptum differentiarum, & differentia extra conceptum generis, adeoque vnum ab alio perfectè præscinditur. *Art. 3.*

Nec dicas corporeitatem, & spiritualitatem esse differentias substantiales, adeoque includere rationem substantiæ, non enim sequitur, quia sicut modi substantiales, qualis est substantia, sunt substantiales, non tamen substantiæ, ita differentiæ prædictæ sunt substantiales, quia determinant & perficiunt substantiam, non tamen includunt propriè

rationem substantiæ completæ & prædicamentalis, qualis est illa quæ constituit summum genus.

**Art. 4.** Genus non potest vniuersim desumi præcisè à materia, nec differentia præcisè à forma.

Neque in substantiis materialibus genus semper potest desumi præcisè à materia, & differentia à forma.

Genus & differentia desumuntur à tota natura, aliter & aliter spectata.

#### EX CAP. VI.

**Art. 1.** **P**ROPRIVM à Porphyrio definiri solet, id quod omni, semper, & soli speciei conuenit, & cum ea reciprocatur. Potest etiam definiri, vt est quantum vniuersale, quod inest multis, seu prædicatur de multis accidentariò, necessariò & per se.

Contra primam definitionem ne arguas in ea non debere fieri mentionem speciei, cum Porphyrius quando eam insinuat, speciei non meminerit. Id enim ex mente illius debet subintelligi, quia in aliis proprii acceptionibus species exprimitur.

Nec 2. arguas, malè in dicta definitione nomine speciei speciem infimam intelligi, cum & subalternæ, & ipsa quoque summa genera sua habeant propria, hæc enim definitione Porphyrius voluit tantum definire proprium strictè, & maximè propriè sumptum, quale non est nisi proprium specificum.

Contra posteriorem ne dicas, multa accidentia communia esse naturaliter inseparabilia à subiectis suis, vnde sequitur proprium non bene distingui ab accidente communi, quatenus dicitur multis com-

petere necessario & per se, consequentia enim ista nullius est roboris, quia illud dicitur tantum alicui competere necessario, & per se, quod fuit ab illius essentia, at accidens proprium fuit à subiecti sui essentia, commune verò ex alia causa oritur.

Accidens rectè à Porphyrio definitur, Art. 2, quod adest, & abest sine subiecti intuitu.

Subiectum accidentium, & proprietatum duobus modis potest spectari. 1. quoad existentiam. 2. quoad essentiam. Illud autem est discrimen inter accidens & proprium, quod accidens possit subiectum immutare & corrumpere, quoad existentiam, non quoad essentiam, proprium vero sine corruptione essentia abesse non possit.

Iterum definitur accidens à Porphyrio, quod neque est genus, neque differentia, nec species, nec proprium, semper autem in subiecto inhæret. Nonnulli eam definitionem improbant eo quod sit negatiua, sed cum per negationem describatur Deus, & materia prima, non incongruè accidens cum sit vltimum inter prædicabilia, per negationem definitur, maximè cum de quibus negatur, sint iam explicata, quâ ratione facile omnes partes definitionis intelliguntur. Accedit quòd non est totaliter negatiua, cum addantur ista verba, semper autem in subiecto inhæret.

EX CAP. I. LIB. II.

**E**NS sumitur participialiter & nominaliter. Priori modo significat rem actu existentem. Posteriori essentiam Art. 1.

rei vel actu, vel potentia existentis, & hoc modo sumitur, cum dicitur esse obiectum Metaphysicæ.

Ens non potest propriè definiri, eius tamen ratio potest utcumque explicari per aliquam descriptionem, qualis est, quod, si sit participialiter sumptum, ratio illius formalis consistit in eo ut sit aliquid actu existens; si vero nominaliter, in eo, quod sit habens essentiam potentem realiter existere, siue actu existat, siue non.

**Art. 2.** Ens sumptum participialiter, seu ut dicit actualem existentiam, non prædicatur essentialiter de vlla creatura.

Ens sumptum nominaliter, seu ut dicit essentiam realem, prædicatur essentialiter de suis inferioribus.

Ens dicitur essentialiter de omnibus modis realibus, & ab intellectu minimè conficitis.

Nec refert quòd modus vocari soleat entis modus, non enim est sensus modum non esse verum ens, sed tantum modificare ens, nequit autem quod nihil est aliquid modificare.

Ens prædicatur essentialiter de omnibus essentiis rerum.

**Art. 3.** Duplex est conceptus. Obiectivus & formalis. Uterque potest esse dupliciter unus, nempe re, aut ratione: & dupliciter præcisus, nempe re etiam & ratione.

Formalis conceptus entis est realiter & ratione unus, & præcisus à conceptibus formalibus inferiorum entis.

Datur vnica ratio obiectiua entis respondens conceptui illius formali.

Conceptus entis obiectivus est ratione,

præcisus à conceptibus obiectiuis rerum inferiorum.

Ens non est æquiucum respectu Dei, & creaturarum. *Art. 4.*

Absolutè probabilius videtur ens non esse vniucum respectu Dei & creaturarum, & quamuis ea de re grauis sit inter Philosophos controuersia, aliis cum Scotto idem nobiscum sentientibus, aliis cum Diuo Thoma id negantibus, quæstio magis ad voces quam ad rem ipsam videtur spectare, si enim constet quid per terminum vniucum debeat intelligi, statim quid de proposita difficultate tenendum sit, concludetur.

Ens est analogum respectu Dei & creaturarum. Hæc autem analogia potest dici inæqualitatis, vel etiam attributionis, quæ à præcedenti re ipsa non differt in hac quæstione. A nonnullis dicitur analogia proportionalitatis, sed nō propriè sumpta.

Ens sub respectu substantiæ, & accidentis non est æquiucum, nec vniucum, sed analogum.

Ens se habet æquiucè respectu entis realis, & entis rationis.

EX CAP. II.

ENS deriuatur ab esse prout significat, *Art. 1.*  
 E nudam rationem essendi in abstracto: vulgò tamen apud Philosophos significat rationem primam, quæ res in tali specie, vel gradu entis constituitur, & ab aliis distinguitur, quæque est radix reliquorum.

Periculosum est, & sine fundamento, affirmare essentiam habere proprium quoddam esse actuale seclusa existentia, quod supponit æternitatem essentiarum



independentem à Deo: & quamvis ut hoc incommodum caueatur, nonnulli dicant esse illud essentiam, à Deo pendere ut à causa exemplari, gratis hoc dicitur, quia res non dependent, ab intellectu diuino, nisi adiuncta voluntate, & omnipotentia, per quam ad extra operatur, quia alias rerum essentia essent actu dependentes à Deo, sine dependentia ab illius voluntate, iamque Deus ex necessitate naturæ tribueret esse quidditatum rerum essentiis quod est absurdum.

- Art. 2.** Existencia creaturarum non distinguitur realiter ab earum essentia, si enim essentia ab existencia realiter distingueretur, possent illæ diuinitus separatim existere & conseruari, adeoque essentia hominis conseruari sine existencia illius, & vice versa, quod est absurdum & impossibile.

Existencia in creatis aliquo modo distinguitur per rationem, ab essentia. Distinctio autem illa rationis se habet ex parte conceptus formalis, non vero ex parte conceptus obiectiui.

- Art. 3.** Gradus essentialis naturæ alicuius inter se non distinguuntur realiter, si enim ita distinguerentur, possent à se inuicem saltem diuinitus separari, & separatim existere, quod fieri nequit, quia repugnat quod homo non sit animal, quod animal non sit viuens, viuens non sit corpus &c.

Admittenda est quædam distinctio rationis inter gradus Metaphysicos, hæcque sufficit ad saluanda quæcumque de eorum distinctione afferri solent.

- Art. 4.** Differentia individualis non addit naturæ communi solam negationem, sed præ-

terea aliquid positivum, per quod res constituitur singularis.

Differentia individualis non est collectio accidentium, quæ in alio non sint.

Differentia individualis non est rependa à causa productiva individui, nec consistit præcisè in existentia rei singularis.

Differentia substantiæ non est substantia, neque accidentium inhærentia.

Substantia materialis non individuatur formaliter per quantitatem, nec per materiam signatam, seu stantem sub certis dimensionibus quantitatis.

Nec materia, nec compositum individuatur per formam.

Accidens non individuatur per subiectum cui inhæret.

Principium formale, & proximum individuationis in re qualibet singulari, est differentia positiva illi intrinseca, per quam species contrahitur ad tale individuum, vocaturque generatim hæcceitas, & speciatim petreitas, pauleitas. &c.

EX CAP. III.

**S**VNT admittendæ quædam proprietates, seu passionēs entis, quæ non sunt entitates reales ab ipso ente distinctæ, sed formaliter consistunt in negatione aliqua, aut relatione rationis, quod etsi non sufficiat ad rationem proprietatis, sufficit tamen ad rationem passionis latiori modo sumptæ. Art. 1.

Ens non potest quidem exactè definiri, potest tamen aliquo modo describi, & per illius descriptionem possunt illius proprietates demonstrari.

Proprietates entis non dicunt aliquas

formalitates positivas, & reales ex natura rei ab ente distinctas, eique superadditas.

Nec obstat quod vnum, verum, bonum proprietates entis, dicunt aliquam entitatem realem: possunt enim hæ passionēs tripliciter considerari. 1. fundamentaliter, 2. in concreto. 3. formaliter, vt passionēs enti superadditæ, quâ ratione nihil positium includunt.

Proprietates entis non dicunt intrinsecè ipsum ens, & aliquid ei superadditum, sed formaliter spectatæ, nihil aliud dicunt, quàm ipsam negationem, aut relationem rationis enti superadditam.

**Art. 2.** Vnitas non dicit aliquid positium, sed tantum negationem diuisionis.

Vnitas aliquo sensu dicit priuationem, simpliciter tamen in negatione constituenda est.

Diuisio & multitudo, sunt forma negata per unitatem.

Prius est quod res sit constituta in se vna, & indiuisa, quàm quòd comparetur cum alijs.

**Art. 3.** Veritas Entis consistit in conformitate illius cum intellectu.

Enti per se competit veritas fundamentalis, non tamen illa; quæ ab omnibus vt quædam passio entis constituitur.

Veritas entis dicit respectum ad intellectum in communi, siue sit creatus, siue increatus.

Ex hypothese quod nullus esset intellectus, res quæ existeret, vera esset materialiter, non formaliter.

Triplex est veritas. Transcendentalis, signi, & cognitionis.

Falsitas non potest cadere in apprehensionem incomplexam, quâ concipitur aliquis terminus simplex.

Vt res dicatur falsa, ea debet esse causa vel occasio falsitatis intellectus.

Falsitas non est passio entis transcendentalis.

Triplex potest assignari bonitas, nempe, *Art. 4.*  
Moralis, Physica, & Metaphysica, seu transcendentalis.

Bonitas Metaphysica seu transcendens, rebus omnibus conuenit.

Bonitas transcendentalis entis, vt est passio illius, est intelligenda per ordinem ad aliud.

Passio entis debet esse aliquid superadditum enti, adeoque non debet esse aliquid reale. Nec inde colligi potest ens non esse bonum, nisi per operationem intellectus, sed tantum bonitatem quæ est passio superaddita enti, non illi competere nisi per operationem intellectus.

Nulvetat quin conuenientia cum voluntate, seu appetibilitas, sit passio entis æquæ primò, ac conuenientia cum rebus aliis.

Tot modis potest dici malum, vt oppositum bonitati transcendentali, quot modis dicitur bonum ei oppositum.

Malitia non potest in rebus reperiri, quatenus dicit defectum perfectionis essentialis, potest tamen, quatenus alios defectus includit. EX CAP. IV.

**P**ER distinctionem realem intelligitur, *Art. 1.*  
distinctio quæ reperitur inter duas res, vel entitates, quarum vna à parte rei, & nemine cogitante, non est alia.

Distinctio realis etsi propriè sit tantum

inter res positivas, à nonnullis tamen extenditur ad omnem distinctionem, quæ non oritur ex operatione intellectus.

Res vna positiva distinguitur ab alia realiter per propriam entitatem.

Certum distinctionis realis inter res aliquas signum, est, 1. quando duæ res possunt à se inuicem separari, & separata in diuersis locis existere.

2. Ex res distinguuntur inter se, quæ ita se habent inuicem, vt vna sit produciens respectu alterius, vnica scilicet productione naturali, & alia producta.

3. perspicuum est ea realiter inter se distinguui, quorum alterum altero corrupto existere potest.

Distinctio rei à modo dici potest realis.

**Art. 2.** Distinctio rationis illa est quæ fit per mentem nostram, cum ea distinguit quæ à parte rei sunt vnum. Duplex est. Rationis ratiocinantis, & rationis ratiocinatæ.

Nonnulli docent per distinctionem rationis ratiocinantis eam posse intelligi, quæ consistit in vario modo rem eandem concipiendi, quoad explicitum & implicitum, quatenus eadem res concipitur duplici conceptu, quorum alter altero est clarior. Communiter tamen per hanc distinctionem ea intelligitur, quæ fingitur à nostro intellectu sine vlllo fundamento ex parte rei.

Verum acceptio ista etsi sit communis, omnino voluntaria, & inutilis apparet.

Per distinctionem rationis ratiocinatæ ea intelligitur, quæ fit ab intellectu cum fundamento in re, ita scilicet vt eadem res conceptibus inadaquatatis concipiatur, quibus veluti in varias partes dissectetur.

Probabilius est non tantum conceptus formales, sed etiam obiectiuos distingui.

Distinctio aliqua potest dici formalis variis modis. 1. quatenus formale idem est ac essenziale. 2. quatenus fundatur in formis realiter distinctis. 3. Ita ut illa distinctio reperiatur inter quasdam formalitates, actu quidem & à parte rei, seu ante omnem intellectus cogitationem, non tamen propriè realiter distinctas. *Art. 3.*

Præter distinctionem realem propriam, quæ est inter rem & rem, vel inter rem & modum, admittitur à Scotistis distinctio aliqua veluti inter illas media, quæ nec sit per rationem, nec tantum virtualis, sed actualis & à parte rei, nec tamen sit propriè realis, sed tantum formalis, ut potest consistens in duabus formalitatibus actu distinctis, quæ sunt vnum ens & vna res. Opposita tamen sententia, quæ ista media non admittit, ut est longè communior, ita & videtur probabilior.

EX CAP. V.

**C**AUSA vulgò definitur à quo aliud *Art. 1.*  
per se accipit esse.

Causa constituitur causa in actu primo, per potentiam communicandi esse effectui.

Causa constituitur causa in actu secundo, per actualem influxum in effectum, quo illi esse communicat.

Quatuor assignantur causarum genera, *Art. 2.*  
nempe materialis, formalis, efficiens, & finalis quæ sunt admittendæ, & quarum dux priores sunt intrinsecè composito Physico, dux verò posteriores extrinsecè.

Est distinctio formalis, seu essentialis in- *Art. 3.*

ter omnes causas in ratione cauſandi.

Non tamen repugnat quod eadem res poſſit plures ex iis cauſalitatibus exercere.

Quoad ordinem cauſandi , prima eſt cauſa finalis , ſecunda efficiens , tertia materialis , & vltima formalis.

Quoad ordinem dignitatis , prima eſt cauſa efficiens , ſecunda materialis , tertia formalis , quarta finalis.

Cauſæ prædictæ ſub aliis reſpectibus poſſunt conſiderari , ſicque inter earum cauſalitates alius ordo dignitatis à nonnullis conſtituitur , quod ſatis congruum videtur.

Cauſas ſibi eſſe mutuò cauſas affirmat Ariſtoteles.

**Art. 4.** Inter cauſam , & effectum poteſt poni ſimultas naturæ , prioritas naturæ , & prioritas temporis , iuxta varios modos quibus ſpectari , & inter ſe conferri poſſunt.

Omnis cauſa , formaliter vt cauſa , eſt nobilior ſuo effectū vt effectus eſt.

Finis interdum eſt nobilior effectū ſuo , interdum ignobilior.

Cauſa efficiens principalis interdum eſt nobilior effectū , interdum æquè nobilis.

Materia collata cum forma materiali , quæ eſt effectus illius , eſt vno reſpectu ea nobilior , & alio ignobilior.

Eadem cauſa poteſt diuerſos effectus habere , nec non & oppoſitos.

**Art. 5.** Non poteſt naturaliter idem idem effectus , ſimul produci à pluribus cauſis totalibus : ſupernaturaliter verò poteſt.

Idem effectus à pluribus cauſis diuiſim , & ſecundū ſe non poteſt produci naturaliter.

Nihil

Nihil repugnat quin effectus ab vna causa productus, ab alia supernaturaliter produci potuerit.

EX CAP. VI.

**C**AUSA efficiens definitur ab Aristotele, id vnde mutationis, aut quietis primum est principium, quælis causa est is qui consulit, & Pater filij, & vno verbo id quod efficit, eius quod fit, & quod immutat, eius quod immutatur. *Art. 1.*

Verum clarius definiri potest, id à quo, tanquam à primo principio, est motus, aut quies.

Causa efficiens diuiditur præcipuè 1. in causam primam & secundam. 2. in causam per se & per accidens. 3. in Physicam & Moralem. 4. in vniuocam & æquiuocam. 5. in vniuersalem & particularem. 6. in principalem & instrumentalem.

Causalitas causæ efficientis in actu primo, est potentia agendi; in actu verò secundo est actio, quæ talis effectus producit.

Causæ creatæ aliquid verè operantur; & oppositum sine manifesto errore sustineri non potest. *Art. 2.*

Agentia creata non operantur per accidentia, tanquam per causas principales, quando produciunt aliquam substantiam, nec immediatè operantur per proprias formas substantiales, quando substantiam aliquam produciunt, sed tantum per accidentia ipsis ad agendum concessa. Interdum tamen per proprias formas substantiales, insuunt immediate ad productionem accidentium, interdum verò mediatè.



*Art. 3.* Deus concurrit immediatè, concursu simultaneo ad singulas operationes rerum creatarum.

Deus non præmouet causas naturales ad agendum, influxu quodam reali, & Physico, in iis recepto.

*Art. 4.* Non est recurrendum ad causam primam, vt reddatur ratio, quare causæ secundæ habeant potius effectum vnius speciei quam alterius. Neque etiam quoad hoc ad Deum recurrendum.

Quod talis actus in indiuiduo fiat potius, quam alius, id ex variis circumstantiis repetendum est.

#### EX CAP. VII.

*Art. 1.* **S**TRICTE loquendo finis non videtur discendus causa Physica & realis. Non propterea tamen recedendum à communi sententia, quæ finem ponit inter causas veras & reales.

Finis causat secundum esse reale.

Duplex assignari potest finis causalitas, Alia in actu primo: alia in actu secundo.

Actualis causalitas finis non est quid realiter distinctum ab actione agentis, quæ fit propter ipsum.

*Art. 2.* Omnis causa alteri, vt principali subordinata, potest dici aliquo modo instrumentalis. Sumitur tamen magis propriè instrumentum pro causa alteri subordinata in genere causæ efficientis.

Non est de ratione instrumenti, vt non moueat nisi motum à causa principali per aliquid reale in eo receptum.

Instrumentum non debet necessario habere aliquam operationem propriam, antecedenter ad eam quam elicit virtute causæ principalis.

Nomine exemplaris, seu Ideæ vulgò intelligitur forma illa intellectualis, ad cuius similitudinem agens per intellectum intendit producere aliquem effectum externum. Art. 3.

Exemplar, seu Idea communiter definitur, forma, quam effectus imitatur ex intentione agentis intellectualis.

Duplex admittenda est Idea. Alia formalis, alia obiectiva.

Exemplar non est obiectum ipsum quod faciendum est, sed aliud, ad cuius imitationem fieri debet.

Exemplar videtur reducendum ad causam efficientem.

Per casum intelligitur effectus aliquis insolitus ex causa naturali, præter illius inclinationem ortus. Art. 4.

Effectus casualis reperitur in rebus, respectu causarum creatarum, non autem respectu Dei.

Per fortunam intelligitur effectus raro contingens præter intentionem agentis.

Effectus fortuiti licet sic dicantur respectu causarum secundarum, non tamen respectu Dei.

Reiicitur opinio quâ ab antiquis Philosophis nomine fati intelligitur causa aliqua casui, & fortunæ omnino opposita, quâ scilicet res omnes fiant ex absoluta determinatione, & necessitate. Et in eo sensu fatum reiiciendum est, admittendum vero si sumatur pro dispositione in rebus creatis, à Deo posita, qua fit ut causæ naturales effectus suos naturaliter, & necessario, causæ verò contingentes & liberæ, effectus suos

contingenter & liberè, infaillibiliter tamen operentur.

## EX CAP. VIII.

*Art. 1.* CVM Metaphysica agat per se de ente reali, ad eam quoque spectat agere de ente rationis.

Nomine entis rationis non intelligitur aliquid realiter existens, in ratione seu intellectu, nec aliquid ab intellectu productum, sed aliquid quod existit tantum obiectivè in intellectu.

Datur ens rationis in ultimo sensu prædicto.

Ens rationis omnino pendet ab operatione intellectus, ita ut neque quoad essentiam, neque quoad existentiam, sit independenter ab intellectu.

Ens rationis non est in rebus extra intellectum, sed tantum in intellectu.

Ens rationis est obiectum ab intellectu effectum, seu non ens conceptum ab intellectu, per modum entis.

*Art. 2.* Appetitus non potest facere ens rationis, quamvis latè sumptum pro ente ficto, & distincto ab ente reali.

Nullus sensus siue externus, siue internus potest efficere ens rationis.

Solus intellectus efficit ens rationis modo prædicto acceptum.

Ens rationis dupliciter potest ab intellectu cognosci. 1. per cognitionem directam, 2. per cognitionem reflexam: non fit tamen propriè per hanc posteriorem cognitionem.

Per tres vulgares mentis operationes possunt fabricari entia rationis; affirmativè scilicet, vel negativè.

Non potest fabricari ens rationis ab intellectu diuino, si propriè loqui velimus.

Angelus non potest fingere entia rationis quoad res naturales, quarum claram, & perfectam habet notitiam, potest tamen quoad res supernaturales.

Ens rationis primò diuidi solet in fundatum, & non fundatum. 2. in ens rationis primæ & secundæ intentionis. 3. à nonnullis diuiditur in relationem, (quâ intelligitur respectus quidam rationis per mentem alicui rei affictus, respectu termini, ad quem à parte rei nullo modo refertur) priuationem & negationem, quæ duobus modis accipi possunt. 1. vt sunt mera priuatio, & negatio alicuius formæ. 2. vt concipiuntur ab intellectu per modum alicuius formæ positivæ, quo sensu dicuntur entia rationis. *Art. 3.*

Denominationes extrinsecæ à nonnullis inter entia rationis constituuntur, & reducuntur ad relationem rationis, sed male.

EX CAP. I. LIB. III.

**C**OMMUNIS sententia est quidditatem substantiæ in eo consistere quod sit ens per se existens. *Art. 1.*

Esse, seu existere per se non est aliquid entitati substantiæ superadditum.

Nec dicas esse in alio, esse modum superadditum accidenti, & idcirco esse per se, esse modum superadditum substantiæ: Non enim sequitur, quia cum ex fide constet accidens posse actu separari à subiecto, hinc manifestum est, esse in alio, esse modum quendam distinctum ab entitate accidentis, at vero cum non constet substan-

tiam posse esse in alio ut in subiecto inhesionis, hinc merito concluditur modum essendi per se non distinguì à substantia.

- Art. 2.* Negari non potest quin natura substantialis exigit ex se propriam substantiam, per quam dicatur ens subsistens.

Subsistentia est modus quidam positivus naturæ superadditus, & ab ea distinctus.

Subsistentia creata dupliciter se habet erga naturam, quam afficit, eam enim modificat, & vltimò terminat reddendo incommunicabilem alteri supposito: cum autem prior ille modus intrinsecè dicat imperfectionem, à Verbo non potest suppleri, secundus verò cum nullam imperfectionem inuoluat, à Verbo suppleri potest, sicque non opus est ut substantia creata magis quam modaliter distinguatur à natura; contra arguentes eò quòd Verbum non possit supplere defectum modi, cum hoc dicat imperfectionem, substantiam non esse modum, sed potius realitatem distinctam à natura.

- Art. 3.* Materia habet propriam substantiam partialem.

Probabilius videtur etiam formam habere propriam substantiam partialem.

Non est ponenda in toto substantia aliqua simplex, distincta à subsistentiis partialibus materiæ & formæ.

- Art. 4.* Subsistentia emanat immediatè ab ipsa substantia & natura, cum qua suppositum constituit.

Dux actiones requiruntur ad productionem suppositi, quarum alià producat naturam ab agente, alià substantia à natura.

Causa materialis substantiæ non alià est

quam natura quam afficit, & cuius est modus.

Effectus formalis substantiæ non est facere naturam per se existentem, nec eam reddere potentem operari, sed eam constituere vltimò completam, vt sit omnino perfecta & terminata, quoad suum esse substantiale. Et hic est effectus formalis, primarius, & positivus substantiæ, vnde sequitur alius effectus formalis negatiuus, nempe reddere naturam incommunicabilem alteri supposito.

Substantia distinguitur modaliter ab *Art. 5* existentia.

Is ordo constituendus est inter existentiam & substantiam, v<sup>t</sup> existentia prius competat naturæ, quam substantia sit vltima perfectio naturæ adueniens.

Substantia, hypostasis, personalitas & suppositum, parum inter se differunt.

Actiones dicuntur esse suppositorum denominatiuè, non verò effectiuè, seu elicitivè.

EX CAP. II.

**A**CCIDENS sumi potest Logicè & *Art. 1.* Metaphysicè. Priori modo complectitur, quicquid est extraneum alicui, etiamsi in se sit substantia Posteriori verò dicitur tantum de accidentibus, quatenus sunt entia quædã realiter à substantia condistincta.

Accidens posteriori modo sumptum definitur, ens in alio, seu ens inhærens alteri.

Duobus modis concipi potest accidentis essentia consistere in inhærentia: 1. aptitudinaliter: 2. actualiter.

Non est de essentia accidentis quod actu inhæreat subiecto: inhærentia autem

aptitudinalis est de eius essentia.

- Art. 2.* Negari non potest, quin actualis inherencia addat aliquid reale supra entitatem accidentis.

Inherencia distinguitur tantum minori realitate, seu modaliter ab accidente, & nihil est aliud quàm modus vnionis, quo accidens inexistit subiecto, sicut subsistentia est modus, quo natura vltimò completur in se, & terminatur.

- Art. 3.* Accidens potest conseruari extra subiectum sine modo existendi positiuo.

Diuisio accidentis in accidentia categorica, non est ita immediata, quin potuerint aliæ tradi magis immediatæ in membra pauciora, quæ vltèrius in nouem accidentia prædicamentalia subdiuiderentur: diuisio tamen accidentis in nouem accidentium categorias est commodior, & doctrinæ causa retinenda; non est tamen accidentis strictè sumpti.

Accidens in tota prædicamentorum amplitudine non est vniuocum. Potest tamen dici respectu quantitatis & qualitatis.

- Art. 4.* Formæ omnes accidentales educuntur è subiecto in quo recipiuntur. Et hæc assertio procedit non modo de productione caloris, frigoris, aliarumque qualitatum, siue primarum, siue secundarum, quæ Physicæ, & reales appellantur, sed etiam de productione specierum intentionalium, nec non, & de formis artefactorum.

### EX CAP. III.

- Art. 1.* **Q**UALITAS ab Aristotele, describitur, id à quo denominamur quales. Nomen autem qualitatis valde improprie tri-

buitur accidentibus aliorum prædicamentorum.

Quidam, ut illius essentia distinctius exprimeretur, illam sic definiunt, qualitas est accidens absolutum per se primò institutum ad intrinsecè ornandam, & perficiendam substantiam, tum in existendo, tum in agendo.

Alij sic. Qualitas est accidens absolutum à quantitate distinctum.

Alij sic. Qualitas est accidens entitativum, subiectum ad modum substantialis formæ determinans.

Alij sic. Qualitas est accidens proveniens à forma in esse quieto.

Duobus modis concipi potest qualitatem aliquam esse difficile, aut facile mobilem à subiecto. 1. ex natura sua. 2. ex conditione subiecti in quo reperitur. Art. 2.

Habitus ex natura sua difficile mobilis à subiecto, specie distinguitur à dispositione, quæ ex natura sua à subiecto facile amoveri potest.

Habitus ex sola conditione subiecti, difficile mobilis, non differt specie à dispositione, quæ ex natura sua à subiecto facile auelli potest.

Potentia naturalis, & impotentia specie distinguuntur ab habitu, & dispositione. Art. 3.

Impotentia sumpta pro forma positiva potentie opposita, quæ aliquid agrè operari, aut resistere potest, specie à potentia distinguitur.

Duplex assignari potest potentia. Alia Activa: Alia Passiva. Potentia activa duplex est, alia naturalis, alia supernaturalis, seu obedientialis. Art. 4.



Potentia passiva etiam diuiditur in naturalem & supernaturalem, seu obedientialem.

Probabilius videtur non esse ponendam potentiam obedientialem generatim ad quoscumque effectus, sed tantum cum quadam restrictione & limitatione.

Potentia obedientialis actiua non spectat ad cathedriam qualitatis.

*Art. 5.* Cum duplex assignetur qualitas, scilicet secundum rem, & simul secundum modum: & secundum rem duntaxat, non autem secundum modum, passio ex Aristotele, non est qualitas prioris generis, sed posterioris.

Qualitates duobus modis possunt agere in sensum: 1. realiter in eo producendo qualitates similes, 2. intentionaliter per emissionem specierum intentionalium, & hoc sensu posteriori colores ex Aristotele possunt dici qualitates patibiles, non priori.

Paribilis qualitas, & passio non distinguuntur inter se specie.

*Art. 6.* Ij magis accedunt ad mentem Aristotelis qui docent primo formam, & figuram non pro eodem sumi. 2. figuram habere locum tantum in Mathematicis, formam vero in reliquis.

Forma & figura non distinguuntur inter se specie.

*Art. 7.* Densum dicitur, cuius partes sibi inuicem propinquæ sunt. Rarum autem, cuius partes à se inuicem distant.

Læne est illud, cuius partes in rectum quodammodo positæ sunt. Asperum verò, cuius pars alia eminet, alia superatur.

Rarum & densum, asperum & læne sunt qualitates, quorum illa ad tertiam, ista vero ad quartam speciem qualitaris videntur pertinere.

EX CAP. IV.

**Q**UÆCVMQVE relatiue opponuntur, *Art. 1.*  
 idipsum quod sūt, oppositorū dicitur.

Contraria dicuntur, quorum alterum necesse est in iis inesse, in quibus natura comparatum est vt infinit; atque inter hæc contraria non datur medium. Sunt tamen contraria aliqua quorum non est necesse alterum in iis inesse, & in iis datur medium.

Quædam media nomine proprio explicantur, quædam non nisi per negationem vtriusque extremi.

Priuatio & habitus circa idē aliquid sunt.

Vt aliquid dicatur priuatum habitu, duo requiruntur. 1. vt subiectum sit capax habitus. 2. vt non habeat habitum quando à natura habere debet.

Priuantia distinguuntur à relatis, nec non à contrariis, siue immediatis, siue mediatis.

Contradictoriè opposita illud maximè proprium habent, quod alterum eorum de quacumque re, siue existente, siue non existente dicitur.

Oppositum non prædicatur de quatuor *Art. 2.*  
 oppositis supradictis æquiuocè, nec vniuocè, sed tantum analogicè secundum magis & minus.

Diuisio prædicta oppositorum est adæquata.

Oppositio interdum latè sumitur pro quacumque repugnantia inter se conue-

niendi, quomodo complectitur disparata substantiarum completarum, quas repugnat eidem competere; propriè verò sumitur pro repugnantia, cum certo termino, ut patet in quatuor membris propositis: Et inde sequitur disparata non esse reponenda inter opposita.

*Art. 3.* Res semel corrupta non potest eadem numero viribus naturæ restitui.

Res corrupta permanens potest eadem numero restitui per potentiam Dei absolutam.

Etsi probabilis sit communis sententia, quæ statuit res successiuas, quæ desierunt, non posse easdem numero diuinitus restaurari, id tamen non caret difficultate.

*Art. 4.* Quinque assignantur proprietates contrariorum. Prima est. Quicquid bono contrariatur, est malum. 2. Si vnum contrariorum est in rerum natura, non est necesse existere alterum. 3. Contraria non possunt esse simul in eodem subiecto. 4. Contraria versantur circa idem genere, aut specie subiectum. 5. Contraria vel sunt in eodem genere, vel in diuersis generibus.

#### EX CAP. V.

*Art. 1.* **Q**UIDAM habitus admittendi sunt. Habitus est qualitas de se permanens & stabilis, quæ potentia tribuit facilitatem agendi.

*Art. 2.* Habitus sunt in intellectu & voluntate. Appetitus sensitivus est capax habitus, saltem in homine.

Habitus communiter ponitur in sensibus hominis internis, non tamen in externis, neque in facultatibus animæ vegetatiuæ.

Negari non potest quin manus, & pedes

longo usu acquirant magnam facilitatem se mouendi localiter. Negari etiam vix potest, quin mutatio in iis facta dicat aliquam entitatem positiuam in iis receptam.

Habitus possunt produci in brutis.

In rebus inanimatis, & purè corporeis non sunt habitus.

Actus nostri concurrunt aliquo modo ad productionem eorum habituum qui à nobis acquiruntur. *Art. 3.*

Actus concurrunt effectiuè, seu in genere causæ efficientis ad productionem habitus.

Per quemlibet actum habitus productum aliquid habitus producit.

Interdum potest produci habitus perfectus per vnicum actum, vt plurimum tamen multi actus requiruntur ad productionem perfecti habitus.

Dubitari non potest quin habitus augeatur per actus intensiores. *Art. 4.*

Probabile est habitum posse augeri per actus æquè, aut minus intensos.

Habitus dupliciter augeri potest: intensiuè & extensiuè.

Extensio habitus scientiæ ad nouas conclusiones, fit per additionem aliorum, & aliorum habituum partialium, qui simul cum præcedenti faciunt vnum habitum scientiæ per aggregationem, & vnitatem ordinis.

Extensio habituum moralium, non fit per additionem habituum partialium speciè à prioribus distinctorum.

Non est dubium quin omnes habitus corrumpantur, quando destruitur subiec-

tum, cui inhærent proximè, & per actus & habitus contrarios: Non destruuntur autem per solam actuum cessationem.

**Art. 5.** Habitus non se habet tantum dispositiue, seu passiuè per modum subiecti ad modum recipiendum.

Negari non potest quin habitus aliquo modo concurrat ad agendum: Concurrit autem effectiue.

Habitus acquisitus non modò tribuit facilitatem, & promptitudinem potentix ad agendum, sed etiam effectiue, & realiter concurrat ad ipsam substantiam, seu entitatem actûs.

**Art. 6.** Habitus variis modis diuidi solent. 1. in infusos & acquisitos. 2. in speculatiuos & practicos. 3. in virtutes & non virtutes. 4. in morales & intellectuales.

Quinque vulgò assignantur habitus intellectuales. Nempe intellectus, scientia, sapientia, prudentia & ars. Hæc autem diuisio est adæquata si agatur de habitibus, quibus per se intellectus perficitur.

Habitus intellectiui à nonnullis non distinguuntur à speciebus intelligibilibus, quod durum videtur.

Nomine intellectus intelligitur habitus à potentia intellectiua realiter distinctus, & per varios actus acquisitus.

Nomine scientix propriè intelligitur, habitus per veram demonstrationem generatus.

Nomine scientix potest significari, vel congeries plurimarum, aut omnium scientiarum in vno homine, vel excellentia cuiuslibet scientix aut artis, vel maximè propriè, scientia omnium excellentissima, scilicet Theologia.

Nomine prudentiæ intelligitur habitus cum vera ratione actius circa ea quæ homini bona vel mala sunt.

Ars est habitus cum vera ratione effectius.

Duobus modis habitus aliquis potest dici Moralís. 1. quia est elicitiuus actus moralis & liberi. 2. quia actus moralis fit ex voluntatis præscripto seu directione.

EX CAP. VI.

**A**CCIDENTIA sunt duplicis generis : Art. 1.  
Quædam enim ita inhærent subiecto ,  
vt non dicant ordinem ad aliud subiectum ,  
simili , vel diuerso accidente informatum .  
Alia vero ita subiectum afficiunt , vt simul  
dicant ordinem ad aliud subiectum , simili ,  
vel diuerso accidente instructum . Acciden-  
tia autem prioris generis dicuntur absolu-  
ta , posterioris vero relatiua .

Cômune est omnibus accidentibus dicere  
*in* ; Relatio vero non modò dicit *in* . sed &  
*ad* : quod non est ita intelligendum , vt re-  
latio quatenus accidens dicat *in* , & qua-  
tenus tale accidens non dicat *in* sed *ad* ,  
sed ita vt relatio vt accidens , & vt ta-  
le accidens inhæreat subiecto , sicque v-  
troque modo dicat *in* ; id tamen non im-  
pediat quin relatio vt relatio , dicat *ad* .

Distinguntur in relatis , Relatio , re-  
latiuum , correlatiuum , subiectum , extre-  
mum , fundamentum , ratio fundandi , &  
terminus .

Probabilius videtur non debere admitti  
distinctionem realem , inter relationem &  
fundamentum .

*Art. 2.* Relatio identitatis fundatur immediate in substantia.

Relatio potest esse subiectum relationis.

Potest poni in Deo relatio realis in tempore respectu creaturarum.

*Art. 3.* Certum est relationem transcendentalem non exigere necessario terminum realiter existentem. Negari tamen non potest, quin aliqua relata transcendentalia illam exigant.

Relatio tamen prædicamentalis ex natura sui requirit terminum actu existentem.

Necessaria est distinctio realis inter fundamentum, & terminum relationis.

Diuerse sunt relationes, quando termini diuersimodè respiciuntur.

Multiplicandæ sunt relationes iuxta varietatem terminorum, si illi non sint inter se connexi, aut subordinati.

*Art. 4.* In relatis non mutuis, & mutuis relatio terminatur ab absolutum, non ad respectuum. Si quidem omnino per accidens est ad relationem terminandi, quod terminus sit correlatiuus, seu quod fundet relationem ad relatiuum, à quo respicitur.

#### EX CAP. VII.

*Art. 1.* **A**CTIO vulgo definitur, actus agentis, vt agens est. Passio autem, actus patientis vt patiens est.

Actio, & passio non sunt duæ entitates realiter inter se distinctæ, sed vnica sub diuersis formalitatibus concepta. Et non distinguuntur realiter à motu, sed tantum ratione.

Actio est quid distinctum ab agente secundum se spectato, & ab effectu qui per illam producitur.

Actio

Actio transiens non est subiectivè in agente, sed in patiente.

In dubio an agens debeat esse proximè coniunctum subiecto in quod agit, vel immediatione tam suppositi quàm virtutis; vel saltem immediatione virtutis, respondetur alteram ex his præsentis in causis ordinis naturalis, spectata vi naturæ, imò, & absolute necessariam esse. *Art. 2.*

Agens naturale non potest naturaliter agere indistans, non agendo per medium, potest tamen supernaturaliter.

Aliquid potest duobus modis intelligi agere in seipsum, nempe vel actione uniuoca, vel æquiuvoca. *Art. 3.*

Idem non potest agere in seipsum actione uniuoca, potest tamè actione æquiuvoca.

Ea dicuntur similia quæ conveniunt in una qualitate eiusdem speciei, ut in calore aut frigore. Ea verò dicuntur perfectè similia, quæ æquè intensè qualitatem illam participant, ut si ambo habeant quatuor gradus caloris, aut frigoris. *Art. 4.*

Simile non potest per se loquendo, & cæteris paribus, agere in sibi perfectè simile. Neque etiam cæteris imparibus, simile potest agere in simile.

Actio semper fit à proportionem maioris inæqualitatis, adeo ut virtus agentis excedat resistantiam passi. *Art. 5.*

Non omnis agens agendo repatitur, nec omnis patiens patiendo reagit, tamen extra casus aliquos datur mutua reactio, & repassio inter agens, & patiens.

#### EX CAP. VIII.

**N**OMEN alterationis tribus modis sumi potest. i. generatim pro quacumque. *Art. 1.*  
*Metaphysica.* Y



que mutatione accidentali. 2. minus latè pro mutatione ad qualitatem. 3. strictius & magis Philosophicè sumitur pro motu à qualitate Physica, ad qualitatem ei oppositam, siue extremam, siue mediam.

Alteratio distinguitur à generatione, tum ratione termini à quo: tum ratione termini ad quem: tum ratione subiecti: tum ratione modi quo fit.

Sublata generatione deficeret alteratio corruptiua, seu tendens ad corruptionem, non autem perfectiua.

*Art. 2.* Duobus modis intelligi potest alteratio fieri continuè: vel quoad intentionem gradualem, vel quoad extensionem.

Alteratio fit continuè quoad productionem qualitatis, necnon & quoad extensionem subiecti.

*Art. 3.* Aliud est qualitatem in subiecto extendi, aliud in eo intendi. Dicitur extendi, quando ab vna parte subiecti ad aliam transit. Dicitur intendi, quando in eadem parte subiecti magis intenditur.

Qualitatis intensio duobus modis considerari potest: 1. ex parte alterationis quâ qualitas perficitur, 2. ex parte ipsius qualitatis per alterationem productæ.

Qualitatem intendi non est idem, ac nouam qualitatem aduenire perfectiorem præcedente, hancque per illius aduentum destrui.

Intensio qualitatis non consistit in mera ratione contrarij, nec in maiori radicatione illius in subiecto, sed fit per additionem gradus ad gradum.

Gradus omnes intensiōis sunt inter se *Art. 4.*  
similes & homogenei, quoad speciem, nec  
non & quoad indiuiduum, adeo vt nullus  
sit ordo essentialis inter illos, & qui poste-  
riori loco producitur, æquè possit quantum  
est ex se, priori produci.

EX CAP. IX.

**V**BI non est modus quidam realis & *Art. 1.*  
intrinsicus rei vbicatz, à quo habet  
formaliter vt sit præsens tali aut tali loco,  
sed res quælibet est formaliter loco præ-  
sens per seipsam immediatè.

Duratio non est propriè, & formaliter *Art. 2.*  
existentia rei, sed potius illius permanen-  
tia in esse.

Duratio non est entitas realiter distincta  
à re durante. Potest autem generatim di-  
uidi in permanentem & successiuam, & ite-  
rum in æternitatem, & æuum, & tempus.

Tempus est numerus motus secundum *Art. 3.*  
prius & posterius.

Duplex est tempus. Aliud externum. A-  
liud internum. Hoc vero est multiplex iux-  
ta rerum quæ durare dicuntur, varietate-  
m. Illud subdiuiditur, in reale & imagi-  
narium.

Non est ponenda distinctio realis inter  
tempus internum & motum, saltè localem.

Probabilius est absolutè loquendo, tem-  
pus constare ex solis instantibus, adeoque  
per ea sola existere.

In sententia ponente in tempore inf-  
stantia, & partes diuisibiles congruentius  
dicitur tempus existere per suas partes,  
quam per instantia.

Non omnia quæ existunt & durant, in- *Art. 4.*  
cipiunt aut desinunt esse.

# 500 THESES METAPHYSICÆ.

Duplex incipiendi & desinendi modus. Intrinsecus & extrinsecus. Prior est per primum sui esse. Posterior, per ultimum sui non esse. Priori ratione res permanentes dicuntur incipere, posteriori successivuz.

Prior desinendi modus est per ultimum sui esse; posterior per primum sui non esse. Supposita sententia de compositione temporis ex solis instantibus, res permanentes non tantum incipiunt, & desinunt intrinsecè, sed etiam extrinsecè. Res verò successivæ contra, non tantum incipiunt, & desinunt extrinsecè, sed etiam intrinsecè.

Finis Thesium Metaphysicæ.









